

НУРҚАТОВ
АЙҚЫН

6755

ИДЕЯ


және

ОБРАЗ

АЙҚЫН НҰРҚАТОВ

И Д Е Я
және
О Б Р А З
ӘДЕБИ-СЫН МАҚАЛАЛАР

6755-



ҚАЗАҚТЫҢ МЕМЛЕКЕТТІК КӨРКЕМ
ӘДЕБИЕТ БАСПАСЫ
Алматы — 1962

Д 3, 2/23

~~Д Каз 3~~
Н 86

Сыншы А. Нұркатовтың «Идея және образ» атты мақалалар жинағына автордың 1956—1960 жылдар арасындағы әдеби-сын мақалалары енген. Бұл мақалалар қазіргі қазақ совет әдебиетінің келеді мәселелерін қозғауға, жекелеген акын-жазушылардың творчествосын, ірі-ірі шығармаларын, олардың суреткерлік шеберлігін, көркемдік ізденістерін талдауға арналған.

АҚЫН МҰРАСЫ

Соңғы жылдары поэзиямызда көріне бастаған елеулі құбылыстардың бірі — көрнекті ақындарымыздың бірсыпырасының таңдамалы шығармаларының жеке-жеке кітап болып басылып шыққандығы. Әрине, бұл жинақтарды поэзияның соны, тың табыстары деп санауға болмайды. Өйткені, олар — жаңа шығармалар емес, поэзиямыз бұған дейін өтіп келген жолда туған жемістер. Бірақ, осыған қарап бұл жинақтардың жалпы маңызын, құндылығын жоққа саю — ең бері салғанда, әдебиетімізге жасаған қиянат, әделетсіздік болар еді. Бұл жинақтар, бір жағынан, өздерінің авторларының, яғни жекелеген ақындардың белгілі кезеңдегі творчестволық есебі ретінде танылса, екінші жағынан, сол жекелеген авторлардың таңдамаларынан бүкіл поэзиямыздың өсу жолын, дамуымыздың әр кезеңіндегі оның ерекшеліктері мен өзіндік сипаттарын айқын көреміз. Сондықтан да мұндай жинақтар жайында сөз ету белгілі дәрежеде бүкіл поэзиямыздың өткеніне көз салу, оған баға беру болып табылады.

Ақынның толық немесе таңдамалы шығармаларының жинағын дайындау және бастырып шығару — аса маңызды іс. Ол жауапкершілік пен ұқыптылықты, талғампаздық пен табандылықты талап етеді. Бұның қазірде өздері жоқ, қайтыс болған ақындардың мұрасын жинастыру ісіне әсіресе тікелей қатнасы бар. Өйткені, көзі тірі авторлардың белгілі бір кезеңде туған шығармаларын қайта қарап сұрыптауға, текстологиялық және хронологиялық жағынан дәлдеп анықтай түсуіне мүмкіндіктері бар. Ал қайтыс болған ақындардың шығармалар жинағын дайындағанда және бастырғанда мұндай ұқыптылық пен жинақылық сол авторлардың творчестволық мұрасын зерттеп жүрген, олардың шығармаларының жинақтарын құрастырған адамдардан талап етілмек.

Біздің әдебиетімізде, әсіресе поэзия саласында бұл ретте бірсыпыра жұмыстар жасалды. Халқымыздың ақындық ойының өткендегі алыптарын былай қойғанда, қайтыс болған көрнекті советтік ақындарымыздың бірсыпырасының шығармалар жинағы қайтадан басылып шықты. Ж. Жабаевтың, Н. Байғаниннің және Қ. Аманжоловтың

шығармалар жинағы бұған айқын дәлел болып табылады. Бұл жинақтардың қатары соңғы уақытта тағы да бір кітаппен молыға түсті. Ол — бұдан он жыл бұрын қайтыс болған талантты ақынымыз Иса Байзақовтың баспадан биыл шыққан таңдамалы шығармаларының жинағы.

Иса Байзақовтың қазақ совет поэзиясында алатын орны ерекше. Қазақ совет поэзиясының тұңғыш қарлығаштарының бірі болған ол өзінің бүкіл творчестволық өмірі бойына жемісті еңбек етті. Иса Байзақов артына творчестволық мол мұра қалдырды. Ол мұра көптеген өлеңдер мен толғаулардан, ән текстері мен термелерден және бірнеше поэмалардан тұрады. Ақынның осы поэма жанрын өрістетуге сіңірген еңбегі әсіресе мол әрі жемісті.

И. Байзақовтың «Құралай сұлу», «Алтай аясында», «Кавказ», «Он бір күн, он бір түн», «Ақбөпе» атты поэмалары қазақ оқушыларының ең сүйікті шығармаларының қатарына енді. Ақынның бұл шығармалары оның творчестволық мұрасының негізгі бөлімін құрайды және олар кезінде қазақ совет поэзиясында сюжеттік поэманың туып қалыптасуына ерекше күшті ықпал етті.

Сюжеттік реалистік поэманың жасалуы — ұлттық поэзияның кемел өріске, шырқау шаққа жеткендігінің белгісі десек, бізде мұндай поэма жанры тек советтік дәуірде ғана туып қалыптасты. Бізде әдетте поэзия әдебиетіміздің басқа жанрларынан кейін қалып қойды деген пікір көбірек айтылады. Мұндай пікірді айтушылар, бір жағынан, поэзия әдебиетіміздің ең көне жанры екендігін, оның өзіндік ежелгі дәстүрлері барлығын ойға өлшем, тілге тиек етеді. Біздіңше, бұл пікірдің дұрыстығы да, бұрыстығы да бар. Поэзия — ұлттық әдебиетіміздің жасамыс та, сондай-ақ жас та жанры. Рас, біздің ұлттық поэзиямыздың бастауы тереңде, фольклорда жатыр. Сол сияқты, XVIII—XIX ғасырлардағы тарихқа аты мәлім ақындарымыздың таңдаулы шығармалары да — ұлттық әдебиетіміздің асыл қазнасы. Тіпті бұлардың бәрін айтпағанның өзінде революцияға дейінгі жазба әдебиетімізде реалистік поэзияның Абай, Сұлтанмахмұт сияқты алыптары бар. Міне осы тұрғыдан карағанда біздің поэзиямызды жас деуге ешбір болмайды.

Ал поэзиямыздың жасамыс емес, жас екендігі неде? Рас, біздің Октябрьге дейінгі поэзиямыз жадау да, тапшы

да емес. Қазақ совет ақындары өткендегі поэзиямыздың таңдаулы дәстүрлерін, үлкен-үлкен суреткерлеріміздің творчестволық тәжірибесін әрдайым пайдаланып та, молықтырып та отырды. Бұл болашақта да осылай болмақ. Бірақ өткендегі поэзиямызда бардың бәрін тұтас-тай, түгелімен дерлік қабылдай беруге болмайтыны сияқты, одан қазіргі поэзиямыз үшін қажетті нәрсенің барлығы бірдей табыла да бермейді. Өйткені, бұрынғы поэзиямызда жиі ұшырасатын кейбір жанрлық формалар жаңа поэзияда кең өріс тауып кете алмады. Сондай-ақ, өткендегі поэзиямызда болмаған кейбір жанрларды, яғни шын мәнісіндегі сюжеттік реалистік поэманы, балладаны, лириканың көптеген түрлерін қазақ совет ақындарының тыннан тудыруына тура келді. Міне бұл поэзиямыздың жасандығын, яғни оның барлық жанрлық түрлерімен тұтаса дами бастағанына онша көп уақыт болмағандығын көрсетеді.

Бұл ретте біздің ақындарымыз творчестволық қиындықтарға прозаиктарымыз бен драматургтарымыздан аз кездескен жоқ десе де болғандай. Поэзияның ең күрделі, жетекші жанры — сюжеттік реалистік поэманы жасауда ақындарымыздың әсіресе көп ізденуіне, толассыз да тегелей еңбектенуіне тура келді.

Сюжеттік поэма жасау жолындағы талаптанулар 20 жылдардағы поэзиямызда да болды. Бұл кезеңде қазақ совет ақындарының алуан түрлі тақырыпқа арналған көптеген поэмалары шықты. Олардың ішінде сол кездегі поэзиямыз үшін белгі болып қалғандары да, уақыт сынына зәрредей шыдай алмағандары да бар. С.Мұқановтың революцияға дейінгі қазақ аулының шындығын мейлінше мол әрі шынайы бейнелеген, өлеңмен жазылған «Сұлушаш» романы қазақ ақындарының сол 20 жылдардағы поэма жасау тәжірибесінің қортындысы ретінде туған еді.

Поэма жанры 30 жылдары қазақ совет поэзиясында әсіресе кең өрістеді. Бұл кезде совет шындығын бейнелейтін лирикалық поэмалар, поэма-монологтар және тарихи тақырыпқа арналған реалистік-романтикалық поэмалар жазылды. Ал Ұлы Отан соғысы жылдарында туған сюжетті поэмалардың көпшілігінде реалистік қуат әлсіреп, оның орнын фольклорлық сарындар басып кетті.

Ал Ұлы Отан соғысынан кейінгі бейбіт еңбек жылдары

қазақ совет поэзиясындағы, әсіресе оның поэма жанрындағы өрлеу, кемелдену кезеңі болды. Х. Ерғалиевтің, Ж. Молдағалиевтің, Д. Әбілевтің, Х. Бекхожиннің күрделі де кесек реалистік поэмалары дәл осы кезеңде туды.

Сөйтіп, бұл айтылғандар қазақ совет әдебиетінде поэма жанры өзінің қалыптасуында әралуан жол өткенін көрсетеді. Оның осы дамып қалыптасуында И. Байзақов поэмаларының да өз орны, сыбағалы салмағы бар. Әсіресе, оның 30 жылдардағы реалистік-романтикалық поэмалары — ұлттық советтік поэзиямызды молықтыра түскен шығармалар.

Иса Байзақов әдебиетке өмірдің қайнаған ортасынан, халықтың қалың бұқарасының арасынан келді және ол өзімен бірге сол халықтың аяулы арманы мен тілегін, дариядай тасыған ақындық қуатын ала келді.

Ауыл ортасында ойын-тойда суырып салып өлең айтып, кейбір кездескен ақындармен айтысып жүргенімен, Иса Байзақовтың шын мәнісіндегі творчестволық жолы оның совет шындығын жырлауға арналған шығармаларынан басталады. Иса әдебиетке алғаш халық поэзиясының өкілі ретінде келгенімен, ол бұл деңгейде қалып қоймай, жазба поэзияның дәрежесіне көтерілді. Сөйтіп, ол халық поэзиясының дәстүрлерін жазба поэзияның реалистік үлгілерімен тоғыстыра ұластырды. Әрине, бұнан ақын өзін нәрлендірген, сусындатқан қайнар көзден қол үзді, алыстады деген ұғым тумасқа керек.

Қайта, халық поэзиясының асыл нұсқаларына И. Байзақов әрдайым оралып отырды. Мұны оның поэмаларының қамтитын тақырыптарынан да, шығармаларының тілдік ерекшеліктерінен де айқын көреміз. Халық поэзиясының ең бір алғырлық сипатын, творчестволық сарқылмас қуатын танытатын ерекшелік — импровизациядан ақын творчестволық сапарының ең соңғы күндеріне дейін қол үзген жоқ. Ол тіпті шағын өлеңдерді, термелерді былай қойғанда, ұзақ-ұзақ толғаулар мен кесек поэмаларды да алқалы топтың алдында суырып шығарып отырған. Мысалы, ақынның замандастары оның «Он бір күн, он бір түн» поэмасын қазір бізге мәлім түрінен әлдеқайда мол, ұзақ жырлағанын айтады. Өкінішке қарай, дәр кезінде қағаз бетіне түсірілмегендіктен поэманың бұл нұсқасы сақталмаған.

Ақын-импровизатор болғанымен, Иса Байзақов оның

дәстүрлі шеңберінде қалып қоймаған. Бұрынғы импровизатор-ақындардың шығармаларында, суырып салып айтқан жырларында ұшырасатын жадағай сөзуарлыққа, көркемдік тапшылыққа ол мейлінше қарсы болған. И. Байзақов импровизацияны — тасқындап төгілген әрі мейлінше көркем искусство деп таныған. Бұған оның мына бір сөздері айқын айғақ.

«Ақындық қуат, талант дегенің от, электрдің тоғы сияқты. Ол қалың жиып, дұмап үстінде, ерегіскен айтыста жанланады. Электр өзінен-өзі жанбайды, қуат та бермейді, ол қайралса, жанылса ғана от береді. Ақынды қайта-қайта қайрап салса ғана тұтанып жалындайды. Алайда, жиын айтыс үстінде қасақана осы сүрінер ме екен, бөгелер ме екен деп ақынның намысына тигендей мені үлкен айтысқа салса, немесе тосын тақырыптар беріп, әдейі қиын бөгеттерге әкеліп итермелесе, міне осы кезде менің ақындық қуатым электрдің тоғындай лап етіп жанып, өрт болып қаулап сала береді. Неғұрлым намысыма тиерлік жерге, көбірек қайрап, айтысқа араластырса, солғұрлым өлеңді бөгелмей, қиналмай, таудың тасыған бұлағындай төгіліп, суырып салып айтып кетем. Бұл уақыттарда мені ақындық шабыт, отты сезім, ұшқыр қиял сияқты нәрселер билеп кетеді. Ақындығында лапылдаған жалын, қанатты жел, ұшқыр қиял жоқ ақын суырып салып өлең айта алмайды. Суырып салып айттым деп жүргендердің өлеңіндегі ұйқастың көбі жаттамалы».

Сөйтіп, ол суырып салып өлең айту — барды қайталау емес, керісінше, тыннан жасау және ешкімнің өлеңіне, өнеріне ұқсатпай, өзіндік етіп жасау деген қортындыға келді. Өзінің ақындық өнерінде Иса творчестволық осы принципін берік ұстанды да.

Жиырмасыншы жылдардағы қазақ совет поэзиясына тән көптеген белгі-бедерді әдебиетке сол кезде келген Иса Байзақовтың творчасынан да мол ұшыратамыз. Бұл ақын шығармаларының тақырыптық қамтуынан да, оның сол тақырыпқа қатнасынан да, соны жырлау тәсілінен де анық байқалады. Ұлы Октябрьдің жеңісі арқасында азат болған, жаңа дүние орнатып жатқан еңбек адамының қуанышы мен күресі, ел өмірінде жасалып жатқан алуан түрлі өзгерістер мен оқиғалар, халықтың Коммунистік партияға, оның данышпан көсемі Ленинге деген айнымас сүйіспеншілігі мен ынтық құш-

тарлығы — міне, творчестволық жолының алғашқы кезеңінде И. Байзақовтың беріле, шабыттана жырлаған тақырыптары осылар еді. Ақын бұл тақырыптарды өзінің «Ленин», «Біздің еңбек», «Ұлы Октябрь», «Неге Алатау шаттанды» атты шығармаларында және басқа да көптеген өлең-жырлары мен толғауларында әсіресе мол жырлады.

Жиырмасыншы жылдарда қазақ совет ақындары кеменгер Ленин туралы көптеген шығармалар жазды. Мұны сол кезеңдегі поэзиямыздың ерекше бір ұтымды сипаты десе де болғандай. Иса Байзақовтың «Ленин» атты өлеңі осындай шығармалардың таңдаулыларының қатарына жатады.

Лениннің қазасына арналған бұл өлең ауыр қайғыны аза тұтқан қасиетті қасірет-налаға да, Ленин ісінің жеңіліс таппай, мәңгі жасайтындығына деген мұқалмас сенімге де толы:

Ленин өлді, пікірі оның өлген жоқ,
Ленин өлді, жолын ешкім жеңген жоқ,
Ленин — бүтін коммунистер жүрегі,
Жүрек оны өлді деп те сенген жоқ.

Сөйтіп, ақын Ленин және Коммунистік партия туралы тақырыптарды өзара ажырамас тұтастықта алып жырлайды. Лениннің нұрлы бейнесіне ақын осындай тікелей арнау өлеңдерінде ғана емес, сонымен бірге басқа тақырыпқа арналған шығармаларында да оралып отырады.

И. Байзақовтың жиырмасыншы жылдардағы өлең-жырларында жаңа шындықты бейнелеуге лайықты көркемдік бояулар таба алмаушылық, өмір құбылыстарының ішкі тереңіне үңілмей, оны сырттай тамашалап, енжар қызығушылық сияқты көркемдік олқылықтар да бой көрсетіп отырады. Бірақ бұл тек И. Байзақовтың творчествосына ғана тән емес, сонымен бірге сол кездегі жас поэзиямызға тұтастай тән кемшілік еді.

Сондай-ақ, ақынның алғашқы кездегі шығармаларының ең тәуірлерінде оның жалаң баяндаушы, салғырт бақылаушы дәрежесінде қалып қоймай, халықтың атынан сөйлеуге, соның ой-тілегін білдіруге ұмтылғанын атап көрсетпеу әділетсіздік болар еді. Мысалы, «Миллиондаған жалшымыз» атты өлеңінде ақын былай деп жырлады:

Еркін күшпен өрлеймін,
Өмірім ұзақ — өлмеймін.
Міне, мен — жалшы тілімін.
Жарлы жанын жырлайтын,
Қажымайтын, талмайтын
Еңбекші таптың ұлымын.

Ақын өзін жаңа дүние орнатып жатқан қалың көпшіліктің өкілі, соның бір бөлшегі сезінді. Сондықтан да ол осылайша жырлай алды.

И. Байзақовтың ақындық шеберлігі оның лирикалық шағын өлеңдерінен соншалықты терең әрі мол таныла қойған жоқ. Оның зор ақындық қуаты мен творчестволық серпіні күрделі де кесек жанрларда айқын көрініс берді. Әрине, мұны ақынның лирикалық шағын өлеңдерінің, термелері мен толғауларының өзіндік ерекшеліктері мен кейбір көркемдік қасиеттерін жокқа саю деп түсінуге болмайды. И. Байзақовтың поэзиялық шағын шығармалары көбінесе жыр-толғау, кара өлең үлгісінде және Абайдың өлең өлшемдері негізінде жазылған.

И. Байзақов, асылында, Абайдың творчасовына беріле ден қойған және одан іштей көп тағлым алған ақын. Мұны оның көптеген өлеңдерінің құрылысы мен өлшемдерінен де, ақындық сөз саптаулары мен бейнелеулерінен де айқын көреміз. Мысалы, ғасырлар бойы құлазып келген далада жаңа дүниенің нұр-шапағы мол таралғанын, халықтың мәдениетке, жарыққа қайтарусыз бет бұрғанын суреттейтін және осыны азаматтық пафоспен мақтан ететін «Мақтандым бүгін, мақтандым!» атты өлеңінде ақын былай деп жазады:

Қуарған кейбір далада
Көкорай өсіп басыпты.
Ақыл менен санаға
Заман нұрын шашыпты.

Міне, бұл өлеңдегі ақындық шыншылдықтан, еркін де төгіле туған нағыз поэзияға тән саф тазалықтан Абай әсерінің ізін тану онша қиын емес.

И. Байзақовтың басқа көптеген профессионал-ақындардан бір ерекшелігі оның әншілік өнерінде. Қазақ халқының асқақ үнге де, лирикалық сыр-толқынға да, жан тербейтін терең сезім мен парасатты ойға да толы әндері мен күйлерін Иса ғажайып ынтызарлықпен сүйген және өзі де зор шабытпен орындаған.

Сонымен бірге, акынның өзі шығарған музыкалық мұралар да біралуан. Осылайша әрі музыканың сыр-сипатын нәзік сезімталдықпен түсінген өнер иесі, әрі шабыты шарқ ұрған төкпе акын болғандықтан И. Байзақовтың бұл екі өнерді қатар ұстамауы, оларды бір-бірімен ұластыра ұштастырмауы мүмкін емес еді. Шындығында осылай болды да. Оның советтік өміріміздің қуанышты да көңілді тынысын, жігерлі лебін аңдататын желдірмелері, әндері және соларға шығарған текстері бұған айқын айғақ болып табылады.

Қазақтың халық музыкасын қалтқысыз сүйіп, оның ғажайып та мол үлгілерін есепсіз көп еңбек сіңіріп жинаған А. В. Затаевич Исаның талантын жоғары бағалай келіп, былай деп жазған:

«Иса Байзақов — жалындаған жас жігерлі, екпінді суырыпсалма акын, әсерлі әнші, құлашы кең, сөзі нық, ойы ұшқыр үлкен талант. Ал сахнада көріну жағынан алғанда да ол — ерекше тұлға. Шебер қимылды, анық дыбысты, үні ұнамды, талант қасиеті өзімен бірге жаралған актер... Оның залдағы жұрттан түскен сұрауларға сондай батыл әрі жедел жауап қайтаратын өршіл ырғақты суырыпсалма өлеңі, менің байқауымша, үлкен аудиторияға ғана әсер етіп қоймай, кейбір ысылған сыншылардың өзін де қайран қалдырады, ерекше таңдандырады».

Бұл айтылғандардың барлығы да Исаның акындық өнерінің алуан түрлі қырын анығырақ байқатса керек. Бірақ, қайталап айтамыз, И. Байзақовтың акындық құлашының кеңдігі, творчестволық алғырлығы поэма жанрында ғажайып зор қуатпен танылды.

И. Байзақовтың қаламынан онға тарта поэма туды. Солардың көпшілігі тарихи тақырыпқа арналған. Акынның бұл поэмаларының барлығы бірдей оқшау шыққан, үздік шығармалар емес. Олардың ішінде ұлттық поэзиямыздың қорына өшпес мұра болып қосылғандары да, акынның творчестволық биографиясында айқын белгі-бедер қалдырмай, уақыт сынына төтеп бере алмағандары да бар.

Акынның алғашқы кезеңдегі кейбір поэмалары шын мәнісіндегі поэмалардан гөрі ұзақ жырға, толғауға көбірек ұқсас болып келеді. Бұл сол кездегі қазақ поэмаларына жалпы тән қасиет еді. Толғау — қазақ поэзиясында ежелден бері келе жатқан жанр. Өзінің көлемі, шын-

дықты камту шеңбері жағынан толғау жырдан да, термеден де әлдеқайда күрделірек. Толғауда белгілі бір сюжеттік желі, оқиғалар тізбегі болмайды. Ақындар өздерінің толғауларында замана жайлы ойларын, өмір шындығына немесе оның жекелеген құбылыстарына деген көзқарастарын, сондай-ақ халыққа айтар арнаулары мен тағлымдарын шертетін. Өткендегі атакты ақындарымыздың творчествосынан бұл айқын сезіледі. Ақын неғұрлым ірі болған сайын, оның творчествосының әлеуметтік тынысы неғұрлым кең болған сайын, оның толғауларында шертілетін ойлар да солғұрлым кесек те нәрлі болып келеді.

Поэзияның ең бір көне, ежелгі түлектерінің бірі болып саналатын толғау жазба поэзияның дәстүрлері кең таралуына байланысты өз өрісін тарылтып алды. Бұл процесс совет дәуірінде туып дамыған поэзиямызда әсіресе жедел жасалды. Рас, халық поэзиясының өкілдері — қарт ақындардың творчествосында толғау елеулі орын алып келді.

Ал жазба поэзияның өкілдері жайында мұны айтуға болмайды. Рас, советтік қазақ поэзиясы дамуының алғашқы кезеңдерінде, яғни жиырмасыншы жылдар мен отызыншы жылдардың бас кезінде онда толғау жиі ұшырасып қалып отырды. Әрине, поэзиямыздың балаң шағы үшін бұл заңды да, снымды да еді. Ал ақындарымыз поэзияның күрделі формаларын жете баурап, образдық бейнелеуге молырақ ауысқан сайын толғау жанрынан қол үзе берді. Сөйтіп, алғашқы кезеңдегі көп таралған толғау-поэмалардың орнын реалистік-романтикалық, лирикалық, реалистік поэмалар басты.

Поэзиямызда болған мұндай өзгерістерді басқа да көптеген ақындарымыз сияқты, Иса Байзақовтың да творчестволық өсу жолынан айқын көреміз. Мысалы, ақынның «Ұлы құрылыс» атты поэмасы мен «Ұлы Октябрь» атты толғауының арасында соншалықты үлкен айырма жоқ десе де болғандай. Композициялық құрылысы, жазылу манерасы, стилі жағынан да екеуі өзара ұқсас. Екеуіндегі авторлық баяндау мен тақырып шешудегі тәсілдер де бірыңғай, біртектес. Тек қана «Ұлы құрылыс» поэмасы «Ұлы Октябрь» толғауынан көлемді әрі күрделі. Сондықтан да оның тақырыптық камтуы кең. Сондай-ақ, онда өмір шындығы, жадағай түрде болса да, әлдеқайда мол қамтылған. Бұл ақынның толғаудан

бірте-бірте поэмаға ауыса бастағандығының белгісі еді. И. Байзақов сюжеттік поэма жасау жолындағы творчестволық қиындықтарды батыл игерді. Жалпы алғанда, ол поэма жасау өнерін тез баурап әкетті. Оның бірінің ізін бірі баса туған көптеген сюжеттік поэмалары — осының айқын айғағы.

Ақынның тарихи тақырыпқа арналған поэмаларының ең тұңғышы және тандаулыларының бірі — «Құралай сұлу». Бұл поэмасын ол 1924—25 жылдарда жазған. Поэманың негізгі сюжеттік желісі ел арасында таралып келген аңызға құрылған. Бірақ ақын сол аңыздың шеңберінде қалып қоймай, реалистік көріністерге бай, романтикалық сарындағы тамаша поэма жасады.

Осы тұста ақынның мына бір сөздерін еске түсіре кету орынды деп білеміз: «Мұның (поэманың — А. Н.) әңгімесін ел аузынан естіп біраз жатқа жырлап жүрдім. Кейін Орынборда оқып, орыс, казактың әдебиетімен таныса келе және сол кездегі жазушылардың ақыл-кеңесін ала отырып, жазып шықтым. Әуелгі жазуымда Құралай өлгеннен кейін Келден зар жылап енді қайтып әйел сүймеске, ел бетін көрмеске ант-су ішіп, даланың аңшы-мергені болып кететін. Сол даланы кезіп жүргенінде сүйген жігіті өліп, соның күйігінен жапан кезіп кеткен бір ер қызға кездеседі. Екеуі мұлдасып, қосылып елге баратын еді. Мұны басылар кезде ақын-жазушылар сынап ұнатпаған соң және шынында аяғы қиынсыз ертегіге айналып бара жатқан соң алып тастадым».

Поэманың негізгі идеялық бағыты мен авторлық нысананы тереңірек тану үшін бұл сөздердің ерекше маңызы бар.

«Құралай сұлу» поэмасын оқып отырғанда онда суреттелген оқиғалар ертедегі дәуірді қамтитындығын көреміз. Ол — ер мен ер егесіп, ел мен ел шабысқан бағы заман еді. Поэмада сол заманның шынайы көріністері бар.

Ақын поэмада бейнеленген оқиғаларды баяндауға бірден араласпайды. Поэма ақынның өз атынан берілген шағын кіріспе арқылы басталады:

Ойласаң өткен күнді, айтады жыр,
Тыңдасаң, естіледі бір терең сыр.

Ой өліп, өмір сөніп, көп соғылған
Суреті өткендердің алдымда тұр...

Естісем сондайлардың мұң мен зарын,
Менің де қозғалады қапаларым.
Ортақпын қайғылының қайғысына
Үн қосып күңрену — болған барым...

Сөйтіп, акын суреттелейін деп отырған оқиғаларға деген авторлық қатнасын салған жерден-ақ айқындап алады. Яғни, ол «өткендердің суретін» енжар бейнелей салмай, «қайғылының қайғысына ортақтасып, үн қосып күңіренбек». Авторлық осы қатнас, осы бір құштарлық сарын поэманың бүкіл өнбойынан анық сезіліп отырады.

«Құралай сұлу» поэмасы жайында әдебиетшілер арасында алуан түрлі пікір болып келді. Кейбіреулер поэмада Монтай бидің ұнамды түрде суреттелгенін акынға кіна етіп тағуға тырысты. Біздіңше, мұндай пікірде ешқандай дәйекті негіз жоқ. Еңалдымен, Монтай поэманың негізгі кейіпкері емес. Автор үшін Монтайдың тағдыры — Құралай мен Келденнің жайын баяндауға ауысу үшін қажет баспалдақ ғана. Сонымен бірге автор Монтайды халық аңсаған әділдіктің бейнесі ретінде алған. Ол — ел қамын ойлайтын, оны жоғары бағалайтын адам. Жалғыз баласынан айрылып, аңрап қалған Монтайдың аузына акын мына бір сөздерді тегін салмаған:

Уа жұртым, қайғырмайық бір жас үшін,
Жазымыштың сөгеміз бе өткен ісін?
Ер туса, елден тумак, елді тіле,
Елсізден ер тумак па — білмеймісін?

Ер туып, жок елді бар қыла алмайды,
Ел болса, ер туғызбай тұра алмайды...

Бұл — бір жағынан, акынның өзінің де ойы. Халықтық ойды танытатын мұндай сөздерді акын Монтайға әдейі айтқызып отыр. Поэманың кейінгі негізгі бөлімдеріне апаратын жол да осы тұста байқалып қалады. Монтай армансыз адам іздеп сапарға шығады. Сөйтіп, ол Келденнің аулына келеді. Бұдан әрі акын оқушыны поэманың негізгі кейіпкерлері Келден мен Құралайдың тағдыры туралы баяндауға араластырады.

Поэманың негізгі бөлімдерінің оқиғалары Келденнің

атынан баяндалады. Өз басынан кешкендерін ол Монтайға сыр етіп шертеді.

Поэма оқиғаларының Келден атынан баяндалуы шығарманың реалистік қуатына біраз салқынны тиізілмей қоймаған. Өйткені, кейіпкер оқиғаларды баяндап қана қоймай, оларға белгілі дәрежеде баға да беріп отыратындықтан, авторлық қатнас кейбір реттерде көмескі тартып кеткен. Біздіңше, бірқатар әдебиетшілер мен сыншылардың поэмада қазақ елінің ішкі өмірі, ондағы рулық қайшылықтар мен әлеуметтік теңсіздіктер терең ашылмай қалған деген пікір айтуларының да бір сыры осында болса керек.

Поэма оқиғаларының осы сипатта қиюласуы және кейіпкердің атынан баяндалуы өзінің авторлық өрісін біраз тарылтатындығын ақынның өзі де сезген. Сондықтан да, ол кейіпкердің баяндау әуеніне үнемі бірдей бой ұрып кетпей, оқиға желісіне ара-тұра өзі де араласып отырады. Сондай-ақ, көп реттерде кейіпкердің ой-тұрғысы мен ақынның ойы тұрғысы бірыңғай, сәйкес келіп қалады. Мұндай жағдайда кейіпкер атынан берілген баяндау авторлық баяндаудың қызметін өтейді. Бұған поэманың қалмақтар өмірі және қалмақ батырлары мен Келденнің арасындағы шайқастар баяндалатын эпизодтары айқын мысал болып табылады.

«Құралай сұлу» поэмасында халықтың жауынгерлік, батырлық рухы бар. Бұл қасиетті әсіресе Келденнің бойынан мол табамыз. Қапыда қалған елдің жылқысын шауып алып, айдап кеткен қалмақтардың соңынан қуа аттанғанда ол он үш жастағы уыздай жас бала. Әрине, құрсанған қалың жауды жеңемін деген ой онда жоқ. Бірақ оның бойын ел кегі, ерлік намыс кернеген. Келденнің жүрегін жайлаған осындай патриоттық сезімдер ол қалмақтардың қолында тұтқын болған шақта да суынбайды. Егер бұдан былай қалмаққа жау болмаймын деп ант берсең, тұтқындықтан босатамыз деген Сейқынға ол былайша жауап береді:

— Саған жау, Сейқын сұмрай, мендей қазақ.
Болмаймын бас алсаң да ұйтіп мазақ.
Өлсем де өлім үшін өкінбеймін,
Еркінде көрсете бер қандай азап.

Қайтсе де қосылмайды саған қаным,
Жаралғаннан жұртымды сүйген жаным

Бүгін шешіп босатсаң, ертең жаумың,
Сендей жауды жапыру — ойлағаным.

Келден осы сертіне берік күйінде қалады. Ақыры ол Құралаймен көңіл қосып, соның жәрдемімен қалмақтардың тұтқындығынан қашып шығады. Артынан қуған жауларды қырып, ол өзін де, Құралайды да азат етеді. Келден адам қанын төгуге құмар емес. Ол — өз басын қорғаушы. Құралай екеуін қуып келген қалмақтарды жайратып салғаннан кейінгі оның мына бір сөздері осыны аңғартады.

Жаралы жан, жансыз тәң даланы алып,
Он сан адам қырылды өлімге улай.
Қиянатшыл өмірдің таласы үшін
Сорлы адамзат қырылды-ау талай-талай.

Келден — намысты, жүректі батыр ғана емес, сонымен бірге нәзік сезімнің де адамы. Бұл оның Құралайға деген өмір бойы суынбас ыстық сүйіспеншілігінен анық көрінеді.

Құралайдың образы да ерекше бір тартымдылыққа, жылылыққа толы. Оның өз елін аңсап сағынған шерлі үнінен жау қолында арманда өткен анасы Наушаның да өкінішті мұң-зары естілетіндей.

Бірақ Құралай арманның азалы күйін шертіп жаси бермейді. Ол кезеңі келгенде батыл қимыл да жасайды — Келденнің жау қолынан босап шығуына септігін тигізеді. Сөйтіп Құралай аяулы арманына жеткендей болады. Өкінішке қарай, оның бұл қуанышы ұзаққа созылмайды. Әрі аңсаған елі-жұртын көре алмай, әрі Келденді айықпас мұң-шерге батырып, Құралай өмірмен қош айтысады. Өмірінің ең актық сәтінде, демі үзіліп бара жатқанда да Құралай сүйіктісі Келденнің бақытты болуын тілейді. Жалпы алғанда, жан тазалығына, рухани қайратқа толы Құралайдың бейнесі — қазақ поэзиясындағы ұнамды әйел-кейіпкерлер образдарының тандаулыларының бірі.

Келденнің өкінішті монологы айтылып біткеннен кейін ақын поэманы былайша түйіндейді:

Деп Келден тамам қылды барлық сөзін,
Қартайтқан бұл қайғымен бейшара өзіп.
Жазалы кім, жазасызды күйдірген кім?
Тексерші өткендердің әрбір ізін.

Әрине, бұл сұрақтың жауабын сол бір бейуақыттың шындығынан іздеуге керек. Ақынның ерекше еңбегі сол — ол осы тарихи шындықты өзінің поэмасында шынайы да әсерлі бейнелей алды. Мұндай шығарма оқушының рухани сезімдерін аялап, оны ұзақ уақыттар бойына толғандырмақ. «Құралай сұлу» поэмасын таза да інкәр махаббат туралы, армансыздықты армандаған ер жүректі, ізгі жанды адамдар туралы аяулы жыр деп атаса да болғандай.

Ақынның «Алтай аясында» атты поэмасы да өзінің тақырыбы, қамтитын дәуірі жағынан осы «Құралай сұлумен» алуандас. «Алтай аясында» алғаш рет 1934 жылы жарияланды. Бұл — ақынның ертеректе жазған «Алтай ертегісі» атты шығармасының өңделіп, толықтырылған варианты.

Ақын поэмасының алғашқы тарауында Алтай тауының тамаша сұлу табиғат көріністерін суреттейді. Ал осыдан кейін барып ол шығарманың кейіпкерлері мекен еткен және онда бейнеленген оқиғалар өрбіп-өрістеген жерлердің нақтылы көріністерін беруге ауысады.

«Алтай аясы» поэмасында И. Байзақов махаббат және оның еркіндігі туралы тақырыпты жалаң жырламайды. Бұл шығармасында ол әлеуметтік мәселелерге де біраз тереңдеп барған. Мысалы, Балағаз бен Құсанның арасындағы тартыстың түп төркіні тек Еркежанның жайына байланысты деп қарау, — үстірт байлау жасағандық болар еді. «Қарақасқа атты Қамбардың тоқсан үйлі тобырының» ұрпағы Балағаздар мен Құралайларға Құсанның ызасы әбден батқан. Міне осы ыза Еркежанның тағдыры екі талай күйге түскенде сыртқа қайнап шыға келеді.

Айтыста Еркежаннан жеңіліп қалып жер болған әрі Балағаздай ноян, жігерлі жігіттен беті қайтып, сағы сынған Құсан өзінің жемтікестері Кәпін, Кәбік сияқты қалмақтың хандарын Балағаздарға қарсы әккілікпен айдап салады. Олар қапыда бас салып, жарлы ауылдың ойранын шығарады. Талай адамдар жазықсыз құрбан болады. Ал Еркежан қалмақтардың қолында тұтқын болып кете барады. Сөйтіп, поэманың ұнамды кейіпкерлері қым-қуыт жайларға, адам айтқысыз қиындықтарға тап болады. Бірақ олар егіліп, жасып кетпей, қайрат-қажырын шыңдай түседі.

Ақыр аяғында Балағаз бен Жоламан Еркежанды құт-

қарып алады. Бұл ретте оларға қалмақтың Қаутұн деген мерген батыры көмектеседі. Поэманың оқиға желісіне осы қалмақ батыры Қаутұнды енгізу арқылы ақын көп нәрсе ұтқан. Еңалдымен, бұл кейіпкердің іс-әрекеті Еркежанның қалмақтар тұтқындығынан құтылуының мотивировкасын шынайыландырып тұр. Екіншіден, біз осы образдан қазақтың да, қалмақтың да қарапайым адамдарын тұрмыс мүдделері, тағдыр ортақтастығы өзара тұтастыра бастағанын көреміз. Егер Құсандар мен Кәпін, Кәбіктер бірлесіп алып Еркежандарға зорлық-зомбылық жасаса, ал Балағаздар мен Қаутұндар ұжымдасып оларға қарсы шығады, яғни, Қаутұнның сөзімен айтқанда: «Тізе қосып кекпен кек қайтарады». Міне, Қаутұн образының ең бағалы қасиеті де осында. Поэманың эпилогында ақын бұрын Құсан, Кәпін, Кәбік жайлаған далада қазір жаңа өмір орнағанын, бүгінгі күннің Еркежандары шаттық әнін шырқайтындығын қуана жыр етеді. Тегі, осылай ету арқылы ақын өзінің бағы заманда өмір кешкен кейіпкерлерінің аяулы армандары мен жарқын үміттері тек совет дәуірінде ғана шыңдап жүзеге асқанын аңғартпақ болса керек.

II. Байзақовтың «Кавказы» оның басқа шығармаларынан гөрі окшауырақ тұрады. Егер басқа тарихи поэмаларында ақын өз халқының өткеніне көз жіберсе, ал «Кавказ» дағыстан халқының тіршілік жайын, әдет-ғұрпын баян етеді.

Композициялық құрылысы жағынан «Кавказ» жоғарыда аталған «Алтай аясында» поэмасына ұқсас. Соңғы поэмасының да алғашқы тарауында ақын Кавказ тауының ғажайып әсемдігін, оның асқар шыңдары мен тудай аққан тентек өзендерін көркемдік бояуларын лекіте төгіп, мың құбылтып, құлпырта суреттейді. Шығармада баяндалатын оқиға желісіне ақын осыдан кейін барып қана араласады. Сондай-ақ, «Алтай аясындағы» сияқты, «Кавказда» да ақын басты-басты кейіпкерлерін оқушыға жеке-жеке, арнайы таныстырып алады. Бұл поэмада да ақын махаббат тақырыбын әлеуметтік тақырыппен ұштастыра отырып жырлайды және сол екі тақырыптың шешімін бірегей күйде береді.

Поэманың басты кейіпкері Бағыда — асқан ер әрі аса өнерлі жігіт. Шығарманың негізін құрайтын тайталас-тартыс осы Бағыданың іс-әрекеттеріне байланысты өрбіп дамиды. Ал оның барлық іс-әрекеті ата жауы Жү-

сіптен кек қайтару мақсатына арналған. Бір кезде әкесі Асқапты өлтіргені үшін ол Жүсіпке іштей өш. Бірақ қан үшін қан төгу туралы ойдан Бағыда алғашқыда аулақ болады. Қайта, өзінің балуан балаларын жығып, аты және бәйгіден келіп ел көзінде абройы асқан Бағыданың басын жоюды Жүсіп ойлайды. Алайда, оның бұл арам ойы іске аспайды. Жүсіптің төрт баласы бірдей ажал құшағына енеді. Ал ол өзін өлтіреді. Бағыда мен Зайда қол ұстасып Дағыстаннан кетуге бел буады.

И. Байзақовтың бұл поэмасы Ақылбайдың «Дағыстан» атты романтикалық поэмасымен тақырыптас. И. Байзақов Ақылбай поэмасының негізгі материалын өңдеп пайдалана отырып, тыңнан өзіндік поэма жасаған. Иса поэмасындағы оқиғалардың өрбуі мен шешілуі де, ондағы кейіпкерлердің іс-әрекеттері де «Дағыстандағыдан» мүлдем басқаша дерлік. Сондай-ақ, Ақылбайдың поэмасындағы тым әсіре романтикалық сарындар мен кездейсоқ мезеттердің белгі-бедері «Кавказда» жоқ. Әрине, бұдан «Кавказдың» кейіпкерлерінің жанында лаулаған жалын, отты сезім, өр мінез жоқ деген ұғым тумайды. Бірақ ақын осының бәрін де шындық шеңберіне сиымды етіп, реалистік суреттеу мәнеріне көбірек бой ұра отырып берген.

Ақылбайдың поэмасында болып өткен оқиғалардың барлығының да түп төркінін, себеп-салдарын тағдырдың бұйрығынан, жазмыштан іздеу сарыны басым. Ал, И. Байзақов «Кавказдың» оқиғаларын өмір шындығына сәйкестендіре отырып өрбітеді әрі көркемдік жағынан нанымды етіп шешеді. И. Байзақовтың поэмасында адамгершілік ар-намыс, адалдық, әділеттік тақырыбы ең алғы планда жырланады.

«Кавказ» поэмасының бағалы қасиеттерінің бірі сол — онда ақын Кавказ тауының таңғажайып сұлу көріністерін ғана емес, сонымен бірге оны мекендеген халықтың өмірін, әдет-ғұрпын, ұлттық колоритын да шынайы суреттей алған. Сөз жоқ, мұның бәрі поэманың реалистік қуатын күшейте түскен.

И. Байзақовтың 1939—40 жылдарда жазған «Қырмызы — Жанай» поэмасы аяқталмай қалған. Бұл поэмасында ақын 1916 жылғы ұлт-азаттық қозғалысына байланысты туған оқиғаларды бейнелемек болған.

1916 жылғы ұлт-азаттық қозғалысы туралы тақырып проза мен драматургияда біркелкі мол қамтылды дер-

лік. Ал поэзия жөнінде мұны айтуға болмайды. Рас, сол он алтыншы жылдың дауылды оқиғаларының ізі суымастан осы тақырыпқа арналып көптеген поэмалар мен толғаулар, өлең-жырлар туды. Бұл — халықтың творчестволық қуатының дариядай шалқып тасқан бір шағы еді. Туған жерге, елге деген ыстық сүйіспеншілік пен қимастық ыстық сезімдер арманға, сағынышқа толы жыр болып төгілді. Өкінішке қарай, халық поэзиясының осы тамаша қазнасын жинау, бастырып шығару ісіне соңғы кезде мүлде мән берілмей кетті. Сондай-ақ он алтыншы жыл туралы тақырып қазіргі поэзиямызда да жеткілікті бейнеленбеді.

II. Байзақовтың «Қырмызы — Жанайы» осы тақырыпқа арналған поэзиялық кесек шығармалардың ең алғашқыларының бірінен саналады. Поэманың басқы тарауынан ақынның он алтыншы жыл оқиғаларын мол қамтып, уақыт шындығын күрделі күйінде беруді мақсат еткені, тартыс талқысының өткірлігіне ұмтылмақ болғаны байқалады. Онда Жанай, Қырмызы, Сатыбалды, Ұсан сияқты, характерлері әрі айқын дараланып танылмағанмен, біраз белгі көрсетіп тастаған, үлкен үміт күттіретін, тұлғалы образдар болуға лайық бірнеше кейіпкерлер де бар. Бірақ ақын өзінің авторлық негізгі мақсатын тамамдап үлгірмеді — «Қырмызы — Жанай» поэмасы аяқталмай қалды. Сөйтсе де, поэманың жазылып қалған, бізге мәлім тарауларының өзінен де Исаның кесек, күрделі шығармалар жазудағы зор ақындық құлашы, творчестволық кең тынысы айқын танылатындай.

III. Байзақовтың тарихи тақырыпқа арналған шығармаларының ішіндегі ең көлемдісі де, нағыз нәрлісі де — «Ақбөпе» поэмасы. Бұл поэмасын ақын 1941 жылы жазып бітірген және ол сол жылы журналда жарияланған.

«Ақбөпе» поэмасында суреттелген оқиғалардың сыр-сипатына, өрістеп-өрбуіне қарағанда ақын онда «Құралай сұлу», «Алтай аясында» атты поэмаларында қамтылған кезеңдерден бергі дәуірді бейнелейтіні байқалады. Егер ертеректе жазылған және әртініректегі кезеңдерді қамтитын поэмаларында ақын дәуір шындығын тұтастай алып, жалпылама суреттесе, ал «Ақбөпе» поэмасында реалистік детальдар, шынайы көріністер мол ұшырасады. Халықтың әдет-ғұрпын, ескі ауыл өмірінің әрқилы жақтарын ақын кеңінен көрсетеді. Әмірханның

барымтаға түскен жүйрік саңлағы «Ақтарланды» қайтарып алуы, Әмірханның күйеу жолдас болып келіп Ақбөпемен танысатыны баяндалатын сауық-думан, Ақбөпені күшпен тартып апарғаннан кейінгі Ақажан аулының көріністері, тағы басқалар бұған айқын дәлел болып табылады.

Сонымен бірге «Ақбөпе» поэмасында ақынның алғашқы шығармаларындағыдан гөрі оқиға мол, қалың және олар поэманың сюжеттік желісіне заңды түрде тұтаса сіңісіп тұр. Осыған орай «Ақбөпе» поэмасында кейіпкерлердің саны да әлдеқайда көп және реалистік сипатта мүсінделген.

Поэма Ақбөпе мен Әмірханның арасындағы айнымас махаббаты, еркіндікке ұмтылған жастардың тағдырын суреттеуге арналғанымен, онда сүйіспеншілік тақырыбы жеке-дара жырланбайды. Өзінің бұл негізгі тақырыбына ақын әлеуметтік сарындарды мол араластырған. Қуандықтың ұрда-жық куларының Тәукеден «Ақтарланды» тартып алуы, Ақбөпе оқиғаларына байланысты Ақажандардың Көпбай, Қасымдарға зорлық жасап, тізе батыруы және олардың Әмірхан жоқта Ақбөпені күшпен тартып әкетіп оны адам айтқысыз ауыр азапқа салуы және поэмада мол қамтылған басқа да осы тектес оқиғалар — өткен өмірдің өкінішті де ащы шындығы болатын.

II. Байзақовтың «Ақбөпе» поэмасындағы творчестволық ең сәтті табысы — оның Ақбөпе сияқты сүйікті кейіпкерінің тамаша бейнесін жасай алғандығы. Қазақ совет поэзиясының тарихи тақырыпқа арналған шығармаларындағы ең тұлғалы әйел-кейіпкерлер Сұлушаш пен Құланданың қатарына қосылуға Ақбөпе әбден лайықты. Ғасырлар бойына рухани азап шегіп, трагедиялық махаббаттың тақсіретін тартып келген және осы аянышты тағдырына қарсы әрдайым қажырлылықпен күресіп келген қазақ қызының шынайы да тұлғалы бейнесін ақын «Ақбөпе» поэмасында әсіресе зор көркемдік қуатпен жасады.

«Ақбөпе» поэмасының:

Ақбөпе әнмен бірге жасын төгіп,
Қайғыны кекке берді қайратқа егіп.
Тендік пен махаббатты жырлай, жылай
Қапасын қара түннің өтті сөгіп,—

деп аяқталуы да кездейсоқ емес. Бұл шумақтан поэма-
ла теңдік пен махаббат тақырыбы қоса жырланғанын,
Ақбөпе — жырлап та жылап өткен талай жастың жи-
нақты бейнесі екенін ақын өз тарапынан да аңғартпак
болғанын аңдаймыз.

Жалпы алғанда, «Ақбөпе» — қазақ совет поэзиясының
үздік үлгілерінің бірі. Бұл поэма И. Байзақовтың ақын-
дық шеберлігі толыса өскендігін, оның өмірге, тарихи
шындыққа деген көзқарасының тереңдегенін танытты
және ақынның көркем бейнелеудің реалистік стиліне бү-
тіндей бетбұрғанын көрсетті.

Сөйтіп, И. Байзақов өзінің тарихи поэмаларында творче-
стволық жағынан біртіндеп өсіп отырды. Егер ертеректе
жазылған, алғашқы поэмаларының кейбірінде ақын
өмір құбылыстарын романтикалық сарындарға, бояудың
әсіре де тым қалыңдығына көбірек бой ұра отырып су-
реттесе, ал соңғы поэмаларында ол тарихи шындықты
социалистік реализм тұрғысынан бейнелеу дәрежесіне
көтерілді.

И. Байзақовтың «Он бір күн, он бір түн» атты шығар-
масы оның жоғарыда аталған тарихи поэмаларынан
оқшауырақ тұрады. «Он бір күн, он бір түн» поэмасы
өз өміріміздің шындығын суреттеуге арналған. Ақын-
ның совет тақырыбын жырлаған басқа да күрделі шы-
ғармалары болған. Мысалы, Ұлы Отан соғысының
қаһарлы жылдарында ол ел аралап жүріп майдан ерле-
рінің батырлық қимылдарын ұзақ-ұзақ жыр етіп шерт-
кен. Бірақ, өкінішке қарай, ақынның бұл шығармалары
зерттеушілерге әлі күнге дейін мәлім емес.

Тарихи тақырыпқа арналған поэмаларындағы кейбір
суреттеу тәсілдерін И. Байзақов «Он бір күн, он бір
түнде» де қолданады. Мысалы, бұл поэма өзінің баста-
луы жағынан «Алтай аясындаға» ұқсас. «Он бір күн, он
бір түн» поэмасының бас жағында ақын еңалдымен Ал-
тай, Саян тауларының табиғатын құлпырта суреттейді.
Әрине, мұнда ақын «Алтай аясында» поэмасында қол-
данған бояуларынан басқа реңкті өрнек-нақыштар тап-
қан.

«Он бір күн, он бір түн» поэмасында ержүрек совет
ұшқышы Марина Раскованың басынан кешкен жайла-
ры баяндалады. Москвадан Қиыр Шығысқа талмай ұш-
қан және он бір күн, он бір түн бойына Тайганың мең-
реу жыныстарын тынымсыз шарлаған ұшқыштардың

батырлық қимылында қаншалықты романтика, қаншалықты ерлік, патриоттық сыр-сезім бар! Сырттай қарағанда осы оқиганың өзі-ақ жыр болып төгілгелі тұрғандай. Шындығында, әрине, бұлай емес. Суреттелетін өмір құбылысы неғұрлым кесек, неғұрлым гажайып болған сайын, ақын солғұрлым биікке көтерілуге, бейнелеп отырған объектісінің тереңіне нағыз суретшіге тән көрегендікпен сұғынуға, сөйтіп өзгеше, гажайып шындықты әрі өзінің бар күрделі күйінде, әрі көркемдік жағынан нанымды да заңды етіп көрсетуге тиіс.

«Он бір күн, он бір түн» поэмасында И. Байзақов дәл осылай жасай алды да. Күтпеген жерден қатерлі жағдайларға тап болған кейіпкерінің жан толқындарын, бұрқаған сезім дауылдарын ақын әсерлі де шынайы бейнелеген. «Он бір күн, он бір түн» поэмасы ақынның тек тарихи тақырыпқа ғана емес, сонымен бірге совет шындығына арналған да кесек, күрделі шығармалар жаза алатындығын танытты.

И. Байзақов кесек пландағы шығармаларда өзінің ақындық құлашын әсіресе кең әрі ұшқыр сілтейтінін жоғарыда айтқанбыз. Расында да, Исаның ақындық қуаты да, суреткерлік шеберлігі де бәрінен бұрын оның күрделі шығармаларынан айқын танылды.

Ақынның көптеген поэмалары тарихи тақырыпқа арналған. Оның осы шығармаларының ең негізгі идеялық-көркемдік құндылығы неде? Бұл қандай болмасын тарихи тақырыпқа арналған шығарманың негізі болып табылатын тарихи шындықты ақынның дұрыс түсініп әрі көркем де нанымды бейнелей алғандығында. Мұны сол шығармалардың жалпы идеялық мазмұны мен рухынан да, ондағы кейіпкерлердің образдарынан да анық байқаймыз.

И. Байзақов өзінің тарихи поэмаларында өткен өмірдің шындығын мол аша отырып, ұнамды кейіпкерлер образдарының тұтас галлерейсын жасады. Олар — қазақтың Келден, Балағаз, Әмірхан сияқты батыр, дарқан жігіттері, Құралай, Еркежан, Ақбөпе сияқты аяулы арулары. Сырттай қарағанда осы кейіпкерлер өзара ұқсас, алуандас сияқты. Өйткені, бұл кейіпкерлерінің образдары арқылы ақын халықтың жауынгерлік, ерлік рухын, елдік сипатын, оның жекелеген ұл-қыздарының бас бостандығына, махаббат еркіндігіне ұмтылғандығын жинақты түрде бейнелеген.

Сөйте тұра, осы кейіпкерлер бір-біріне мүлдем ұқсамайды да. Өйткені, акын олардың жан дүниесін, характерлерін өзара жеткілікті даралаған. Кейіпкерлерінің портреттерін, олардың сүйіспеншілік сезімдерін акын әсіресе құлпырта, жандандыра әрі өзара ұқсатпай, алуан түрлі етіп береді. Қасіретті де таза жанды Құралайдың, ерке де нәзік Еркежанның, назды да батыл Ақбөпенің тамаша бейнелері — бұған анық айғақ. Кейіпкерлерінің аяулы махаббат сезімдерін, кескін-келбеттерін сипаттауда акынның Абайдан үйренгендігі байқалып отырады. Мысалы:

Екі Сет ұлғжып тұр қаны тамып,
Ақ жүзінде өмірдің шамы жанып.
Жас баланың аузындай кішкене аузын
Қызыл ерні сүйіп тұр құварланып.

Жұп-жұмыр үлбіреген алма мойын,
Ақылдан орнатқандай өлшеу алып.
Білегі аппақ арай, ақ жамбыдай,
Сұлулық есі кетіп тұр тапғалып.

Міне, жан дүниесінің мөлдір тазалығы мен сыртқы бейнесінің сұлулығы астасып берілген Құралайдың бұл портреттік сипаттамасынан сөз жоқ, Абай суреттерінің әсері елес бергендей. Әрине бұдан И. Байзақов Абай қолданған суреттерді табына, телміре пайдалана салған екен деген ұғым тумасқа керек. Мұнда әңгіме творчестволық үйрену жайында болып отыр. Кейіпкерлерінің кескін-кейпін, сезім дүниесін сипаттағанда, олардың сүйіспеншілік қуаныштары мен қасіреттерін суреттегенде Иса бірде романтикалық асқақ лепке, біресе сырлы нәзіктікке ауысып отырады. Бірақ ол қашанда өз қаламының ізінен танбайды, өзінің төгіліп тұрған ақындық шабытынан жаза баспайды.

Табиғат суреттерін беруге Иса әсіресе шебер. Бұл ретте ол көп ақындарымыздан үздік, окшау танылады. Оның поэмаларының қай-қайсысында да табиғаттың тамаша көріністері жиі ұшырасады. Мұның ерекше мәнісі бар. Ақын жансыз табиғаттың жалаңаш сұлулығын жалаң қызықтаудан аулақ. Ол пейзаждық көріністерді бірде шығармада баяндалатын оқиғаларға ая ретінде қолданса, ал басқа бір мезеттерде акын кейіпкерлерінің қуанышты көңіл күйлеріне немесе қасірет-наласына байланысты табиғат суреттерін біресе жарқын, нұрлы

реңкке бояп, біресе жадау тартқызып, жабыркатып береді. Сонымен бірге И. Байзақовтың поэмаларынан суреттеліп отырған жердің табиғат көріністерінің нақтылы, жанды елестерін де байқауға болады. Мысалы Кавказдың тулап аққан асау өзендері мен сұсты асқар шыңдарын, Алтайдың бұлтпен таласқан шың-құздары мен айдын шалқар көлдерін, Арқаның сағым ойнатып, сұлық жатқан кең даласын ақын соларға лайықты бояулар тауып суреттейді.

Ақын қашанда табиғатты қалғыған енжар күйінде емес, қайта оған жан бітіре, түрлендіре отырып суреттейді. «Кавказ» бен «Алтай аясында» поэмаларынан алынған мына бір шумақтарды оқып көрелік:

Сөйлесен бірге сөйлеп зәулім гасы,
Тік шаншып такталған қабырғасы.
Түймесін сауытының ағыта сап,
Желпінген батыр сынды тау түлғасы.
(«Кавказ»)

Күмістей Алтай сері қар жамылған,
Бұлт киіп төбесіне ар жағынан.
Бәріне табиғаттың шашу шашып,
Күн асты көкжиектің шарбағынан.
(«Алтай аясында»)

И. Байзақовтың поэмаларындағы тамаша табиғат көріністерімен танысқанда ұлы сыншы Белинскийдің: «Ақын табиғатқа табынбайды, қайта онымен бәсекеге түседі», — деген сөздері еріксіз еске түседі.

Исаның поэмаларындағы бір ерекшелік — оларда ақынның авторлық араласуларының, лирикалық шалқуларының мол ұшырасып отыруы. Жиырмасыншы жылдардағы және отызыншы жылдардың алғашқы жартысындағы поэзиямызда мұндай ерекшелік тым тапшы болғанын ескерсек, Иса поэмаларының бұл қасиетін тереңірек ұға түсеміз.

Авторлық араласулары мен лирикалық шалқулары арқылы Иса өзінің ақындық қатнасын танытуға тырысады. Ақынның бұл авторлық қатнасы үнемі бірдей айқын әрі белсенді болған жоқ. Өмірге көзқарасы тереңдеп, ақындық шеберлігі ұшталған сайын оның авторлық қатнасы да айқындала, жандана түсіп отырды. Мысалы, алғашқы поэмаларының бірі «Құралай сұлуда» ақын шығармада баяндалатын оқиғаларға өзінің авторлық қатна-

сын білдіре келіп, «Үн қосып күнрену — болған барым» десе, ал ең соңғы кесек шығармасы «Ақбөпе» поэмасында былай деп жырлайды:

... Халықтың қасиетін жанмен ұққан,
Бұл жырды мен жырламай кім жырлайды!
Мезгілсіз, мерекесіз өткендердің
Жандары «бізді де айт» деп сыбырлайды.

Расында да, «мезгілсіз, мерекесіз өткен» ата-бабаларымыздың — халықтың ерлік пен елдікке, азап пен азаға толы тарихы мен тағдырын ақын бүгінгі өмірдің биігінен қарап, тебрене жырлады.

II. Байзақов шығармаларының идеялық мазмұны мен көркемдік ерекшеліктері туралы бір мақаланың шеңберінде тауыса, мол пікір айту қиын. Сондықтан біз ақын творчествосы жайында кейбір байқағандарымызды ғана ортаға салдық. Ақынның шығармаларын, мүмкін қадарынша, толық жинап бастырып шығару және олар туралы лайықты зерттеулер жасау әдебиетшілеріміздің аса игі борыштарының бірі болып табылады.

«Халықтың қасиетін жанмен ұққан» және жалынды жырымен оған қалтқысыз қызмет еткен талантты ақынымыз Иса Байзақовтың творчестволық мол мұрасы — халқымыздың ақындық қуатының айқын бір көрінісі есепті.

МАЙТАЛМАН ЛИРИК

Суреткердің екі өмірі бар. Бірі — өзінің, екіншісі творчествосының өмірі. Шығармасының шоқтығы неғұрлым биік, тынысы неғұрлым кең болған сайын оның өз өмірі де солғұрлым ұзая бермек. Ақын Ғали слуге толлы, жас ортасы деңгейінен асты. Ал оның поэзиясы әлі де жарынан жалын атқан жігерлі жігіт шағында. Бұл оның өлеңдерінің баландығын емес, балғындығын байқатады, кенжелігін емес, кемелдігін көрсетеді.

Ғали Ормановтың творчестволық өмірбаянында әдеттегіден тыс, айрықша жәйттер жоқ десе де болғандай. Оның өмірі өзі тұстас ақындардың тағдыры мен талайына туыстас, солармен сабақтас. Октябрьдің құдіретті дауылы бүкіл Россиямен бірге ұлан-байтақ қазақ сарасын да дүр сілкіндірген шақта Ғали он жасар бала ғана болатын. Әке-шешесінен айырылып, жетім қалған балаға жаңа дүние өзінің мейірбан құшағын ашды. Ол білім бұлағына бас коюды аңсайды. 1928 жылы жазған «Алғашқы адым» атты өлеңінде өз өмірінің осы бір күйлерін еске ала келіп, ақын былай деп шертеді:

Аттанып ауыл — анадан,
Оқуға кеттім қалаға.
Жабыла маған қараған
Жалтандай кеттім далаға.
Жарбиған жаман тон, тұмак
Жабысып кетті үстімде;
Жанайын деген бір шырақ
Жалтылдап кетті ішімде.

Мұнда тек Ғалидің өз басының ғана емес, сонымен бірге талай қазақ жасының өмір өткелінің сыры мен шыны бар. Жылдар өтті... Жетімек бала үстіндегі жарбиған тон, тұмағын сыпырып тастады. Ішіндегі жанғалы тұрған жалт-жұлт еткен шырақ лаулаған жалынға, ақындық алауға айналады.

Ғали Ормановтың әдебиетке алғаш араласуы да өзі буындас ақындардың творчестволық сапарының бұлақ-бастауын еске түсірерліктей. Сахра тіршілігінде туындап жатқан ғажайып жаңалықтар басқа талапкерлер сияқты Ғалидің де жан сарайында ақындық жаңғырық туғызды. Сөйтіп, алғашқы тебреністер мен талаптар

ессе де молая келіп оның «Шеңбер» атты тұңғыш өлеңдер жинағына тоғысады.

Ақынның алғашқы кітабына енген «Қора», «Диханбай», «Мойын серік», «Абысындар аңызы», «Қоңсы мен қожайын», «Екі дай», «Бетпе-бет» және басқа да өлеңдерінде сана-сезімі оянған жарлы-жақыбайлардың күштілерден кек қайтаруы, байлардың тап ретінде талқандауы, ауыл өміріндегі жаңалық нышандары, қалың көпшіліктің өнер-білімге ден қоюы жайында баяндалады. Кезінде өздерінің өлең-жырлары арқылы бұл тақырыпты қозғамаған қазақ ақыны кемде-кем.

Ал Ғали осы тақырыптарды өзіне тән шеберлікпен, ерекше көркемдік ажар-баяу, үн-сарынмен бейнелеуге ұмтылды. Алғашқы өлеңдерінің тандаулыларының өзінен ақ Ғалидің тілі оралымды, лебі майда, жылы юморы бар ақын болғалы тұрғаны анық байқалады. Мысалы, оның 1928 жылы жазған «Қоңсы мен қожайын» атты өлеңінің сюжеті бар, диалогқа құрылған. Мал-мүлкім конфискеге ілігеді деп үрейленген бай жалшы қоңсысын арбайды. Біраз қойды уақытша «өз үйіңе жазып қой?» — дейді. Сонда:

Қуанғаннан қоңсы қарт
Күліп те бір жіберді:
— Балалардың өздері-ақ
Аламыз деп жүр еді...

Үрейі ұшып, құты кашқан байдың қулық-сұмдығы да, есеге қолы жеткелі тұрғанына нық сенген жалшының оптимистік ой-сезімі де осы өлеңде реалистік түрде, шеберлікпен ашылған. Дөп тиетін авторлық юмор да өлеңге ерекше шырай беріп тұр.

Ақын әлеуметтік мәні зор, келелі тақырыпты осындай шағын штрих, тапқыр тәсіл арқылы шешеді. Бірақ бұдан оның шығармаларының идеялық қуаты көмескі тартпайды. Бұл — оның ақындық әдісі, творчестволық тәсілі. Рас, ақынның алғашқы кезеңдегі өлеңдерінде оның көркемдік нысанадан жаза басып, реалистік мәнерден, лирикалық саз бен сыршылдықтан айырылып қалған мезеттері де болған. Тіпті оның «Шеңберден» кейін шыққан «Шәуілдір» (1934) және «Алынған қамал» (1935) атты поэмаларында да көркемдік кемшіліктер мол ұшырасады. Бұл, бір жағынан, ақынның эпикалық шығарма жазуға төселмегендігіне, оның жанрлық

ерекшеліктерін емін-еркін баурамағандығына да байланысты болса керек. Шәуілдірдің өткені мен бүгінгі бейнесін салыстыра суреттеуге арналған алғашқы поэмада ешқандай көркем образ жоқ. Керісінше, онда натуралистік көріністер мол. Ал атақты челюскиншілердің Солтүстік мұзды мұхитқа жасаған жорығын баяндайтын «Алынған қамал» поэмасы көркемдік қасиеті жағынан бұдан бір саты жоғары. Бірақ шын мәнісіндегі сюжетті шығармаға қойылатын тілек-талапқа бұл поэма да сайма-сай болып шықпады.

Ғ. Ормановтың 1936 жылы шыққан «Абысын сыры» атты жинағына енген өлеңдері ақын творчествосының тақырыптық қамтуы кеңейе түскенін, оның шарқ ұрып іздену жолында екенін танытты. Бұл ізденудің жемісін ақынның қыркыншы жылдардағы яғни Ұлы Отан соғысы кезіндегі лирикалық өлеңдерінен көреміз. Бұл тұста Ғали таланты қауырт өсті, шырқау биікке шарықтай көтерілді. Оның ақындық өмір жолын шолғанда бұл кезең асқар таудай айқын сезіледі.

Қазақ совет ақындарының ішінде фашизмге қарсы күрес тақырыбына мол жазғандардың бірі — Ғали Орманов. Оның «Халық — қаһарман» атты көлемді дастаны да осы тақырыпқа арналған. Ұлы Отан соғысы басталған шақта жазған бұл поэмасында ақын Карпат тауын мекендеген халықтардың фашизмге қарсы кекті күресін баяндайды.

Ғали «Халық — қаһарман» поэмасын толық аяқтаған жоқ. Бірақ шығарманың негізгі өзекті идеясы яғни халықтың қаһармандығы туралы, оның фашистік жыртықштарды тас-талқан ететіндігі туралы идея ақынның соғыс жылдарындағы шырайлы да лепті лирикалық өлеңдерінде, күйлі де сырлы балладаларында мол қамтылып жырланды.

Ақынның соғыс жылдарындағы жырлары сан-салалы. Солардың ең өзектілерінің бірі — Отан туралы тақырыпқа арналғандары. Осы тақырыптас өлеңдерінің бірсыпырасында («Отанға ант», «Туған жер», «Отан») ақын өзінің туған елге, аяулы Отанға деген қастерлі ойларын өзінің көңіл күйлері, сезім толғаныстары арқылы білдіреді:

√ Отаным, еркелегем өзге кімге?
Өзіммен нені болсын көргем бірге...
Қалайша қабырғама батпас менің

Басына хатер бұлты төнген күнде!
Көзімде кешегі бір кескінің тұр —
Толықсып түрлі мәуе, енген гүлге.
Ұялап толып тұрған секілді еді
Махаббат бақыт, қызық жер-көгінде.

Ал енді бір сала өлеңдерінде («Қарағай», «Емен», «Гүл») ақын Отан туралы патриоттық сырларын астармен, поэтикалық символ-образ арқылы танытады. Бұл өлеңдердің әрқайсысы да алапатты жаумен астан-кестен арпалыста ауыр жараланған, бірақ сұрапыл дүрбелеңге қарсы өр кеудесін тосып қасқайып тұра алған алып Отанымыздың жанды бейнесін сездіреді. Өшпес өмірдің тыныс-лебі «Гүлден», әсіресе, бұрқап есетіндей:

Жау жіберген өлімдей
Жалын бәрін жалмапты.
Жанғыратын өмірдей
Гүл тамыры жанбапты!

Ғалидің соғыс жылдарында жазған өлеңдерінде майдан көріністері, сұрапыл ұрыс елестері жиі ұшыраса бермейді. Ақын соғыстың адам айтқысыз ауыр тауқыметі мен қайғы-қасіретін де, халықтың үміті мен арманын да, жеңіс қуанышын да көбінесе өзінің лирикалық геройының сыр-сезімі, жан толқындары арқылы береді. Жалпы алғанда, ақынның майдан тақырыбына арналған өлеңдері шыншылдығымен, адам жанын бірде мұңға батыратын, біресе ширықтырып сергітетін әсерлілігімен құнды. Оларды кәзіргі күннің талабымен табыстыратын да — осы қасиеті.

Ақын өзінің уақыт үніне құлақ асқыш сезімтал суреткер екендігін соғыстан кейінгі творчествосынан да анық байқатты. Ғалидің бұл кезеңдегі шығармаларының негізгі тақырыптары — совет адамдарының жасампаздық еңбегі мен баянды бейбітшілік жолындағы күресі, халықтар достығы. Бұлардың ішінен «Днепр оттары», «Бетпак дала дастаны», «Егін — толқын», «Достық жыры», «Асқанға — тосқан» және басқа да көптеген өлеңдерді ерекше атау қажет.

Ғали Орманов соңғы кездегі өлеңдерінде кейіпкерлерін жан-жақты суреттеуге, әр-алуан сипаттар жасауға баса назар аударып жүр. Оның Асы жайлауын аралап қайтқан сапарында алған әсері мен көргендері жайында жазған өлеңдерінде осы қасиет, әсіресе, мол. Мұнда Асыны жайлаған жандардың тіршілік-тұрмысының шы-

найы көріністері де, көздің жауын алып, телмірте қызықтыратын тамаша табиғат суреттері де, ақынның жылы юморы мен шынайы ықласына бөленіп берілген адамның әралуан мінез-құлықтары мен көңіл аңсарлары да — бәрі де бар. Бұл өлеңдерді қайта-қайта оқығың келеді. Өйткені, лирик ақын бұл жырларында бұрынғы қалам сілтесінен танбаған, қайта ол өз талантының соны бір қырларын ашқан.

Бізде әдетте лирика жайында сөз болса Ғ. Ормановтың аты аталмай кетпейді. Бұл заңды да. Өйткені қазақ совет поэзиясының лирика жанрын дамытуда, оны өзгеше бояу-реңктермен молықтыруда Ғалидің еңбегі ерекше. Қазақтың қалың оқушылар жұртшылығы оны күйлі де сырлы нәзік лириканың майталман шебері деп таниды. Ғалидің ақындық қуаты оның шығармаларының сыршылдығында, әсерлілігінде ғана емес. Ол саф мөлдір, тұнық ойларын «тас бұлақтың суындай» келісті де көркем өлең жолдарына құя біледі. Оның тілі меілінше бай, әрі ойлы да образды. Ол не туралы жырласа да, қысылып-қымтырылмай, еркін жазады.

Ғалидің «майда қоңыр» шешен де шебер тілін академик М. Әуезов аса жоғары бағалап, «Мәлік Ғабдуллинге жауап хат» деген мақаласында: «Тіл жөнінде бұрынғының қорынан қарбытып алып отыратын, анық асыл тіл байлығы бар екі ақынды бөліп атар едік. Олар Асқар мен Ғали», — деп жазды.

Қазақ совет поэзиясы өкілдерінің ішінде кемеңгер Абайдан көп үйренген, оның дәстүрлерін бекем ұстанған ақындардың бірі — Ғали. Абайдан творчестволық түрде үйренуі оның өзіне тән ақындық стиль табуына ерекше ықпал етті. Бір ғана мысал келтірелік:

Алтын өмір — жас қызық
Алдында ойнап бұралсын.
Балы тамған тал шыбық,
Саясы жаз шынарсын.

(«Сәуле»)

Мұнда Абай поэзиясының лебі есіп, мен мұндалайды. Сөйте тұра Ғали өзінің ақындық даусын жоғалтпайды. Ғ. Орманов соңғы кезде көркем аудармамен де беріле шұғылданып жүр. Шығыс поэзиясынан және орыстың классикалық әдебиетінен ол жасаған тамаша аудармалар ұлттық әдебиетімізге бағалы үлес болып қосылды.

Ғали жүлде бермес жүйрік газетші, журналистердің бірі. Оның 4—5 беттік очерктеріне талай дүние сынып жатады, бұл ретте де одан жас талапкерлердің үйренері мол.

Ғали өткен жылы жазған «Ақын өмірі» атты өлеңінде өзінің өткеніне ой көзімен үңіле келіп былай дейді:

Салшы, ақным, таразылап зейінге,
Нелер тарттың бүгінгі мен кейінге?
Әлде күйбең күпкөріспен жүрем деп,
Қол тимеді, кешіріндер дейін бе?
... Жок-жок! Өмірі оған аяқ баспаймын,
Не жолықсың — кныпсынып қашпаймын,
Тіршіліктің тынысындай жыр жасап,
Сонда ғана өмір сүре бастаймын!

Міне, бұл — әншейін айтыла салған сөздер емес. Мұнда талғампаз да кәнігі ақынның жүрек жарды сыры мен шыны бар.

Ғали ақын елудің беліне шықты, ақ басты, бурыл шашты «қартқа» айналды. Осындай мерекелі күні аға ақынға айтылар тілек: жалынды, жақсы өлеңді көп жазыңыз. Шашыңызды шалған бурыл жырыңызға әсте дарыма-сын!

ЕРЛІК ПЕН ЕЛДІК ЖАРШЫСЫ

Халық талай ғасыр бойына өзінің жан азығы, рухани серігі болған сөз өнерінің әсемдігін, саф сұлулығын сұқтана таңырқаумен бірге, оның құдіретті күшін де танып бағалай білген. Сондықтан да ол қаһарлы сөзді қамал бұзған батырға балаған. Халық тарихының тереңіне үнілсек, онда небір қиян-қилы кезеңдерде қаһарлы сөз жауға қарсы еңіреген ермен бірге шапқанын, ерлік пен елдік жаршысы болғанын анық көреміз. Көркем сөздің осындай ғажайып қасиеті, қайрат-күші біздің совет дәуірінде әсіресе айқын танылып, молыға түсті. Ұлы Отан соғысының дауылды жылдарында жауынгерлік рухын бұрынғыдан да тереңдетіп, шымырай шыныққан әдебиетіміз — осының анық айғағы.

Ұлы Отан соғысы бүкіл халқымызға, оның жауынгерлік және рухани күштеріне, саяси-моральдық тұтастығына зор сын болды. Совет халқы да, оның әдебиеті де бұл асқаралы сыннан мүлдем өтті. Туысқан Коммунистік партияның дана басшылығымен халқымыз дүниежүзілік-тарихи жеңіске ие болды. Ал совет әдебиеті халқымыздың сол жеңісті жолын, ерлік қимылын жарқын да шынайы бейнеледі.

Көп ұлтты совет әдебиетінің бөлінбес бір отряды — қазақ совет әдебиеті де бұл іске өз үлесін аз қосқан жоқ. Қазақтың көптеген ақын-жазушылары қолдарына қару алып майданға аттанды. Сөйтіп олар батырлық дастанын тек қаламмен ғана емес, қарумен де жазысты. Ал тылда қалған қалам қайраткерлері өздерінің шығармаларында халықты Отан игілігі үшін жан аямай еңбек етуге, майданға көмекті мейлінше көп беруге шақырды, адамдарымыздың жеңіске деген сенімін ұштап, оларды рухани жағынан қолдап отырды. Сондықтан да Ұлы Отан соғысы жылдарындағы әдебиетімізді — жауынгер-әдебиет, жеңіскер-әдебиет деп атауымызға әбден болады.

Бұл ретте әдебиетіміздің ең белсенді, ұшқыр жанры — поэзияның атқарған ролі әсіресе ерекше екенін атап айтпауға керек. Отан қорғау, қырағылық тақырыбы, советтік патриотизм идеялары поэзиямызда отызыншы жылдардың өзінде-ақ мол жырланған болатын. Халық поэзия-

сының алыбы қарт Жамбылдың патриоттық идеяларға, интернационализм рухына толы жалынды жырларынан, С. Мұқановтың «Майға сәлем», «Сөз — советтік Армия» сияқты шығармаларынан және басқа да көптеген ақындарымыздың таңдаулы өлең-жырларынан халықтың қарары мен қайрат-күшінің өшпес тынысы сезілгендей болатын. Сондықтан да олар өз творчествосының отаншылдық рухын, жауынгерлік пафосын өмір мен өлім айкақан ауыр арпалыстың ең алғашқы күндерінен бастап-ақ бұрынғыдан әлдеқайда өршітіп, өсіріп әкетті.

Фашистік жыртықштардың бейбіт елімізге тұтқиылдан жасаған опасыздық шабуылына деген кек сезімі жасы жүзге таянған қарт Жамбылды да жауынгерлік сапқа қойды.

Асқар таудай еліме,
Байтақ жатқан жеріме
Шапты фашист дегенде;
Ашуменен аралас
Жыр да келді көмейге,
Қаһар қаулап денемде,—

деп жар салды патриот ақын. Қаулай тұтанған осы қарарлы сезімнен Жамбыл танған жоқ, оның батыр да батыл жырлары тынған жоқ.

Азат басты егерде
Салмаймын десек құлдыққа.
Фашистермен күресте,
Малды, жанды аяма!
Аяғанмен мал, жанды,
Қанқұмар фашист қоя ма?
Ішсе қанға тоя ма?
Бір адым кейін аттама!
Қарасы жаудың өшкенше,
Жеңгенше жауды тоқтама!

Қарт ақын әрбір совет патриотына осылайша ұран тастап, жар салды. Зұлым жау Отанымыздың жүрегі Москваға төніп келген қатерлі кезеңде де, қоршауда қалған Ленин қаласы мен Волга түбінде өмір мен өлім кескілесе айкасып жатқан шақтарда да Жамбылдың ызалы, кекті үні бүкіл ұланбайтақ елімізге ғажайып күшпен естіліп тұрды. Қарт ақынның патриоттық жырлары оқ бүркіп, от шашқан майдан даласындағы жауынгерлермен де, тылда жан аямай еңбек еткен ерлермен де бірге болды, оларды жеңіске жігерлендірді, еселенген еңбекке үндеді.

Жамбылдың Ұлы Отан соғысы жылдарындағы жыр толғауларының ішіндегі шоқтығы асып, оқшау табылатыны «Ленинградтық өрендерім». Таскындап төгілген ақындық мол шабыттан, өзекті де терең патриоттық ойдан туган бұл өлең сол кездегі бүкіл поэзиямыздың идеялық рухы мен әлеуметтік тынысын анық аңдатқандай. Бұл жырында ақын бүкіл қазақ халқының атынан сөйлейді. Ленин қаласын өзінің туған жеріндей, алтын бесігіндей ыстық көріп, ардақ тұтқан, оның әрбір тасын емірене сүйген отты сезімдерін ақын үйлесімді де ұшқыр өлең жолдарына құяды.

Нева езенін сүйкімді,
Бұлағымдай көремін.
Көпіріне қарасам,
Көмкерген су көлемін,
Өркеш-өркеш жарасқан
Шоқылардай дер едім.
Сапырылған көк теңіз.
Шомылдырып кемерін!
Шамы күндей жайнаған,
Аспанға үйлер бойлаған...
Арқа тұтып алыста,
Айбыным деп ойлағам

Жамбылдың патриоттық жыры қоршауда қалған батыр қаланың халқын зұлым жауға қарсы кекті шайқасқа шақырды, совет адамдарының жүрегінде отаншылдық сезімін қаулатты. Жамбыл жырларының осындай күдіретті қуатын, өршіл әсерін өз көздерімен көргенін орыстың талай көрнекті ақын, жазушылары табына да таңырқай еске алған болатын. Жамбылдың жалынды толғауы ленинградтықтарды тебіренге толқытқаны, оларға рухани күш-жігер қосқаны жауынгерлердің ақын атына арнаған хаттарынан да анық байқалады. Сол бір кезде Ленин қаласындағы халық жасағының жауынгері болған Кәрім Мыңбаев Жамбылға былай деп жазды: «Ақын аға, ленинградтық балаларыңа арнап жазған өлеңінді оқыдым. Бұл алтын сөздер мені толқытты. Ленинград майданының қатардағы жауынгерлерінен қазақстандықтардың бәріне жалынды сәлем айтыңыз... Біз ұлы Октябрь социалистік революциясының қымбатты бесігін қорғап қаламыз! Қасиетті қала совет халқының мақтанышы болған, әлі де мақтанышы болып қалады.

Мен ақтық қаным қалғанша соғысамын. Өмір қымбат,
бір ақ Отан өмірден де қымбат. *и*

Ардақты Жамбыл, сенің үніңді бүкіл Ленинград естіді.
Халқым үшін, өз ақыным үшін жүрегім мақтанышқа бө-
ленді, сенің сөздерің біздің бәрімізді, ленинградтықтар-
ды жаңа ерлік істерге рухтандырды.

Айбынды жырыңмен қас жауға қарсы қазақстандықтар-
ды тегіс күреске көтер... Біз жеңіске қарай алға баса
береміз».

Осындай шексіз алғыс сезіміне толы хаттарды Жамбыл
эралуан ұлттың өкілдерінен үздіксіз алып тұрды және
оларға жалынды жырларымен жауап қайтарып отырды.
Жамбылдың «Москваға», «Отан әмірі», «Алынбас ка-
мал», «Воронеж батырларына» атты толғаулары да сол
кездегі поэзиямыздың тұлғалы туындыларының қатары-
на жатады.

Ұлы Отан соғысы жылдарында Жамбылдың жасы жүзді
енсеріп қалған болатын. Бірақ қатерлі де қасиетті сол
бір айқастардың айбынды ай-күндерінде Жамбылдың
ақындық қуаты толастап, сарқылып қалған жоқ, қайта
кемерінен аса төгілген дариядай шалқып тасты. Оның
жырларында жауынгерлік рух, публицистикалық өткір-
лік молая түсті.

Соғыстың не бір сұрапыл, қатерлі кездерінде де біздің
поэзиямыз Совет Армиясының жеңісіне деген сенімнен,
оптимистік қуаттан жаза басқан жоқ. Ақындарымыз ха-
лықтың жеңіске деген бұл үзілмес үмітін оның туысқан
Коммунистік партияға деген сенімімен ұштастыра жыр-
лады. Бұл тіпті соғыс басталысымен туған өлеңдерден
де анық байқалады. Мысалы, ақын Сәбит Мұқанов
«Біздің күш» атты белгілі өлеңінде соғыстың талай қия-
лары, қиын өткелдері бар екенін жасырмай суреттей оты-
рып, халықты жеңіске үндейді, оның партияға деген
айнымас махаббаты мен сезімін жырлайды.

Соғыстың талай қиын бар қиясы,
Күшпенен алынатын әр қиясы,—

деп халықты қатал шайқастар барын айтып, ширықты-
ра шыңдай түскен ақын біз жеңеміз, өйткені «біздің
күш—большевиктер партиясы» деген бекем тұжырым-
мен түйеді.

Коммунистік партияға, оның даналық басшылығына де-
ген осы сенім халықтың жарқын үмітіне айналды, оны

жеңіске бастады. Сондықтан да бұл тақырып ақындарымыздың шығармаларында мейлінше мол жырланды.

Ер партиям, ана боп сен тербетпін,
Білім бердің, өсірдің — мен ержеттім
Сатап төңірең қаулаққа қарсы аттаным,
Ақ жолыңда өлуді арман еттім, —

деп жазды ақын Жұмағали Санин. Осы бір аяулы сыр, Коммунистік партияға қалтқысыз берілген адалдық, оның асыл идеяларын қорғау жолында бас тігіп, құрбан болуға әзірлік сезімі әрбір қалам қайраткерлерінің де жүрегіне ұялады. Олар мұны қаламмен де, қарумен де айқын танытты.

Отан соғысы жылдарындағы поэзияда советтік патриотизм тақырыбы ерекше мол орын алды. Ақындарымыз бұл тақырыпты жан-жақты, алуан түрлі көркемдік үлгіде жырлады. Өздерінің ең асыл, ең аяулы сезімдерін Социалистік Отанымызға арнады. Совет адамдарының отаншылдық сезімін білдіре келіп, ақын Ғали Орманов былай деп жазды:

Отаным — бар өмірім, жан тынысым.
Қызығым, қуанышым бір өзіңсің!
Бақыты адамзаттың — Ұлы Отаным
Дайынбыз жан қиюға біз сен үшін!

Бұл өлеңде ақын туған елге, аяулы Отанға деген қастерлі ойларын өзінің көңіл күйлері, сезім-толғаныстары арқылы білдіреді. Ал бірсыпыра өлеңдерінде («Қарағай», «Емен», «Гүл») ол Отан туралы патриоттық сырларын астарлы түрде, поэтикалық символ-образ арқылы танытады. Бұл өлеңдердің әрқайсысы да алапатты жаумен астан-кестен арпалыста ауыр жараланған, бірақ сұрапыл дүрбелеңге қарсы өр кеудесін тосып қасқайып тұра алған алып Отанымыздың жанды бейнесін сездіреді. Өшпес өмірдің тыныс-лебі «Гүлден» әсіресе бұрқап есетіндей:

Жау жіберген өлімдей,
Жалын бәрін жалмапты.
Жанғыратын өмірдей,
Гүл тамыры жанбапты!

Ақынның соғыс жылдарында жазған өлеңдерінде майдан көріністері, сұрапыл ұрыс елестері жиі ұшыраса бермейді. Ол соғыстың адам айтқысыз ауыр тауқыметі

мен қайғы-қасіретін де, халықтың үміті мен арманын да, жеңіс қуанышын да көбінесе өзінің лирикалық геройының сыр-сезімі, жан толқындары арқылы береді. Жалпы алғанда, Ғалидың майдан тақырыбына арналған өлеңдері шыншылдығымен, адам жанын бірде мұңға батыратын, біресе ширықтырып сергітетін әсерлілігімен құнды. Оларды қазіргі күннің талабымен табыстыратын да — осы қасиеті.

Соғыс жылдарындағы поэзиямызда публицистикалық қуат мол. Бұл, бір жағынан, сол бір отты күндердің сипатына, уақыт ұранына байланысты еді. Қиын да қатал уақыт көркем сөз шеберлерінен «қаламды көк найзаға теңеуді» талап етті. Олар осы талаптан, қысылшаң сыннан мүдірмей өтті.

Публицистикалық сипат тылда қалған қалам қайраткерлерінің еңбек адамдарына арнаған шығармаларында әсіресе айқын белгі берді. С. Мұқанов өзінің жоғарыда аталған «Біздің күш» атты өлеңінде өз творчествосының бір ерекшелігін анық байқатты. Бұл — өлеңнің үгіттік мәнінің күштілігі, публицистикалық өткірлігі. Ақын сырттай қарағанда көзге болмашы, ұсак болып көрінетін оқиғаларды агитканың жалынына шыңдай отырып, құбылстын мәнін терең ашуга, сөйтіп келелі де кесек ой айтуға ұмтылады:

...Кендірден түк, мақтадан түбіт шашпа,
Жүн, жібек, тоқылатын не бар басқа,
Бәрін де фабрикаға төкпей жеткіз,
Әскерге олар қажет жанталаста.

... Мүлікке боп жүрмесін өрттен қастық,
Күзет қой арам ойлы жоламастық!
Әр түйір бидай, күріш, тары — бір оқ,
Фашисті талқандайтын бомба — астық.

Бұл өлеңде ақын совет адамдарын жеңіс мүддесімен тыныстауға, аянбай еңбек етуге үндейді.

Кезінде зор үгіттік роль атқарған шығармалардың бірі А. Тоқмағамбетовтың «Мұнай бер!» атты толғауы. Ақынның бұрынғы көптеген толғау-өлеңдері жалаң да жадағай үгітке ғана құрылып, авторлық идеяны жалпылама білдіріп, қарадүрсін күйді танытатын. Ал мынау толғауында Асқар мұндай кемшіліктерден арылған. Ақын совет адамдары үшін ең қымбат аяулы тілектер мен асыл армандарды суреттеп келеді де, солардың тезірек орын-

далуы үшін бел шешпей, белсене еңбек етіндер деп ұран тастайды:

Қанмен беті болған
Қара ормандар қайтадан
Қалпына келсін десендер;
Қайғы мен қасірет оранған
Қаралы жандар қайтадан
Халқына келсін десендер;
... Көтеріп туын жеңістің
Аброй, данқ, атақпен
Балаларың әндетіп
Елге келсін десендер;
«Жендік!» деген ұлы үнді
Жер-көк айтсын десендер;
«Жауды құрттық» дегенді
Ел боп айтсын десендер;
... Мұнайшылар, мұнай бер!
Соны сізден сұрайды әлі

Мұнда ешқандай дерексіз ділмарсу, сылдыр суырылу жоқ. Ақын өзінің түбегейлі ойын буалдыр тартқызбай, шабыт жалынына бөлеп бере алған. Сондықтан да оның өлеңі совет адамының патриоттық ойын оятып, намысын шыңдайтын, оның жарқын үмітін ұштайтын ұйтты да әсерлі шығарма болып шыққан.

Өмір мен өлім айқасқан сұрапыл соғыстың жауынгерлік рухы мен елес-көріністері басқалардан гөрі майданға өздері тікелей қатнасқан, оның ерлік пен елдікке, хауіп пен қатерге толы шындығын өз көздірмен көріп, өз жандарымен сезінген ақындардың шығармаларында нақтылы әрі әсерлі бейнеленді. Олардың өлең-жырларында жанды суреттер, патриоттық идеялар мол ұшырасады. Бұл ретте Ж. Саинның «Днепрге қарады», «Донец», Д. Әбішевтің «Туған елге», «Неман», Ж. Молдағалиевтің «Сок, сағатым», «Отан» сияқты өлеңдерін және басқа да көптеген ақындардың шығармаларын атап айтуға керек. Ақындарымыз майдангерлердің батырлық әрекеттерін жай баяндап қана қоймай, олардың сол сұрапыл айқастар үстіндегі психологиясын, патриоттық ой-сезімдерін терең ашуға тырысты. Солардың бірі — Жұмағали Саин.

Ж. Саинның ақындық қуаты оның поэмаларынан гөрі өлеңдерінде айқын көрініс тапты. Ақынның партизан жырлары оның бүкіл творчествосының ең бір жарқын беттері болып табылады. Партизан-ақын Отан соғысы жылдарында жазған өлеңдерінде өзі бастап кешірген

ақиқат жайларды баяндайды, өз ойын білдіреді. Сонымен бірге Отан соғысының ауыр күндерін, оның от-жаманында туган жеңіс жолын суреттейтін бұл жырлардан әрбір совет майдангерінің ой-сезімін аңғаруға болады.

Жаралы қазақ жауынгерін жаудан жасырып, араның ашқан ажалдан аман алып қалған украин қызы, жаудан тазарған украин жерінің топырағын жата қалып, емірене сүйіп жатқан қазақ жігіті, құшақтары айқасып қабірде де бірге жатқан орыс пен қазақ жауынгері — **Ж. Саинның** жырларын оқығанда осы бір суреттер көз алдына келеді. Бұлар — сұрапыл соғыстың жанды көріністері, совет адамдарының патриоттық абзал сезімдерінің, Отанға шексіз берілгендігінің, біздің халықтарымыздың майдан өртіне шыңдала түскен қасиетті достығының символы.

Ақынның «Есімде Айдар өзені» атты өлеңінде мынадай бір шумақ бар:

Айқара мылтық асынып,
Суынды кештім мен талай.
Бегімді толқын жасырып,
Өмірді шықтым арқалай.

Осы келтірілген үзіндідегі «суынды кештім мен талай» деген бір жолда совет жауынгерінің шайқасқа толы бүкіл жорық жолының бейнелі суреті бар. Ал, «өмірді шықтым арқалай» деген сөздер арқылы ақын Совет Армиясы фашизмнің қанды шеңгелінің қатерінен бүкіл адамбаласының өмірін құтқарды деген ойды білдіреді. Бұл өлеңдегі ақынның лирикалық геройы совет жауынгерлерінің ортақ сипатын, ерлік тұлғасын, моральдық бейнесін танытады.

Ж. Саинның «Партизандар», «Қанжар», «Ұрыстан кейін», «Айтылмай кеткен аманат» деген сияқты өлеңдері де өздерінің қатал да қайсар шындығымен, азаматтық терең пафосымен құнды. Ақынның бұл жырлары, оның өзі образды түрде орайлы тауып айтқанындай, «сияменен жазылған жоқ», «жүрек қанымен», «ұлы айқаста құрбан болған ерлердің атыменен, арыменен жазылған». Олардың уақыт сынына бой алдырмас өміршендігі де осында.

Ұлы Отан соғысы тақырыбына арналған поэзиялық шығармаларды тұтастай алғанда біз олардан Совет Армия-

сы өткен майдан жолының, жеңіс жолының бел-белестерін, алуан түрлі суреттерін көреміз. Егер көптеген шығармаларда совет жауынгерлерінің қасиетті жерімізді жексұрын жаудан құлан-таза тазарту, қас дұшпанға өлтіре сокқы беру жолындағы батырлық қимылдары бейнеленсе, ал енді бірсыпыра өлеңдерде жеңімпаз Армиямыздың азатшылдық ролі, оның Еуропадағы көптеген елдерді фашистік жыртқыштардың қанды тырнағынан құтқарғаны жырланады. Бұл тақырыпқа біздің ақындарымыз Ұлы Отан соғысының алғашқы жылдарында да талзай-талай өлеңдерін арнаған болатын. Ақын Әбділда Тәжібаев «Біз женеміз» атты өлеңінде Еуропаның бұғауда бұлқынған жастарына былайша жар салған еді:

Кектенген Еуропаның ұл, қыздары,
Күтіндер — жетеміз біз құтқарғалы,
Көлеміз қазып терен аждаһаны,
Болса да бір басында мың бір жаны.

Осындай гуманистік сарын, азатшылдық идеялары Ә. Тәжібаевтың соғыс жылдарында жазған басқа бірсыпыра өлеңдерінде де баршылық.

Бұл тақырыпқа мол жазған ақындардың бірі—Әбу Сәрсенбаев. Майданда жүріп туған елін, аяулы жарын аңсай сағынған совет солдатының мөлдір сезімін, қалтқысыз көңіл күйлерін әсерлі бейшелеген «Ақша бұлт» атты назды да нәзік тамаша лирикалық өлеңнің авторы Батыс Еуропа елдері туралы бірнеше өлеңдер циклын жазды. Оның лирикалық геройы — гуманистік роль атқарған азаткер жауынгер. Ақын оның аузына мынадай сөздер салады:

Бар табиғат қарсы алғандай
Қуанышпен бүгін мені.
Құрмет етед Еуропа,
Басып іні қызыл гүлі.

Күн астынан ала келдім
Азаттықты мен бұл елге.
Қаным тамған жерге шыққан
Қызғалдағы өскен белде.

Ақынның «Мадияр қызына», «Арнау», «Шипка асуы» және басқа да көптеген өлеңдері бұрын фашистік тепкіде зар илеген, енді азаттық таңына жеткен бауырлас

славян халықтарына деген достық сезімге, жылы мейрімге толы болып келеді.

Совет Армиясы Европаның көптеген елдері мен халықтары азат ете отырып, Германияның астанасы Берлинге дейін барды. Фашистік жыртқыштар мен қарақшылардың қанқұйлы ордасы болған Рейхстаг халықтардың қарғысы мен ыза-кегінің жалынына оранды. Фашизмнің қаралы туы бүкіл әлем алдында масқара болып қақырай құлады. Ал біздің халқымызды жеңіс қуанышқа бөледі, оның мерейін үстем етті. Жеңіс ақындарымызға да зор шабыт берді. Қасым Аманжоловтың «Жеңіс даусы», Жұмағали Санинның «Жеңіс күні», Қалижан Бекхожиннің «Менің даңқым» атты өлеңдері және басқа да көптеген шығармалар жеңімпаз халықтың қуанышы мен ләззаты мақтаныш сезімін бейнеледі.

Осылардың ішінде Қ. Бекхожиннің «Менің даңқым» атты өлеңі айрықша атауға тұрарлық. Бұл өлеңі арқылы ақын өзінің соғыс кезіндегі шығармаларына белгілі дәрежеде қортынды жасады. Өлеңнің сюжеті мынадай. Бүкіл әлемді тітіреткін соғыс өрті өшкен. Ақынның лирикалық геройы — жеңіскер совет солдаты Европаны азат болған бір қаласын аралап келеді. Ол өзін төкиббар сезінеді. Қыздар оған қошемет көрсетіп, ақынны тастайды. Айран болған сарайдың есігіне сүйеніп тұрған бір субъект совет солдатына «қасқырға қарағандай, сұқ қолын шошайта қап» қарайды және «Азиятшысың, Европаның төрінде... неғып жүрсің» деп сұрақ қояды. Совет солдаты оған былайша жауап береді:

...Біл мырза, Адамымын —
Дүниеге азаттық әсер берген —
Айбынды ұлы Совет Одағының!
Мактанам —
Европада сенің тумай,
Туғаным —
Ізгі елде Россиялық
Мактанам —
Сол ұлы елдің толқынындай
Келгеніме —
Азаттық мен сый алып,

Бұл өлеңнен заманымыздың ұлы ақыны В. Маяковскийдің советтік патриотизмнің символына айналған «Советтік паспорт туралы жыр» атты тамаша шығармасының тыныс-лебі есіп тұрғандай.

Халқымыздың батырлығы мен қаһармандығын бүкіл әлемге әйгілеп паш еткен совет жауынгерлері туған жерге жеңіспен оралды. Басқа елдерде болып өз Отанын, өскен ұясын ансай сағынып келген оларды жау салған жарадан айыға бастаған өлкенер мен бейбіт өмір құшақ жая қарсы алды. Ақындарымыз осы тақырыпқа да көптеген өлеңдер жазды.

Сүйсінемін кең өлкеге —
Пай-пай шіркін, неткен көрік!
Европаның еш жерінде
Болмас еті мұны көріп,—

деп суреттейді ақын Әбу Сәрсенбаев туған елге қайтып оралған шақтағы қуанышы мен сезімін. Соғыстың сұрапыл соқпақтарын кешіп өткен, талай елдердің топырағын басып, ауасын жұтқан және өзінің қасиетті Отанының артықшылығын солғұрлым терең сезіне түскен совет солдаттының көңіл күйлерін ақын Д. Әбілев әсіресе шынайы, тартымды бейнеледі:

Шіркін Россия екен ғой кең —
Жазылды ғой бойым жана!
Тар секілді ед сенсіз әлем
Шалқыды ғой ойым жана!

Атап айтуды қажет ететін бір жәйт — ақындарымыз совет жауынгерлерінің жеңіспен оралған заңды да такаббар мақтанышын, сағынып қауышуын суреттеумен шектеліп қалған жоқ. Олар бұл тақырыпты дамыта, тереңдете отырып жырлады. Көптеген ақындарымыздың әралуан шығармалары жеңіспен оралған солдаттың қол қусырып отырып қалмай, қайта соғыс салған жараны айықтыруға, өртенген өлкені бейбіт құрылыс дүниесіне айналдыруға бел шеше, білек сыбана кіріскенін көрсетуге арналған. Осындай шығармалардың бірі — Қ. Бекхожиннің «Украин жігіті» атты өлеңі. Оның геройы «өз үйін, өз қақпасын көрейін деп туған жерге майданнан асығып келеді». Бірақ ол туған үйін таба алмайды. Орынында күйген ағаш, күл көмір ғана қалған. Жігіт жанына бұл қатты батады. Бірақ жаудан кегін алып қайтқанын есіне алып, ол сабасына түседі. Өлеңнің аяғында ақын геройының жаңадан үй салу қамына кіріскенін баяндайды. Осы өлеңдегі оптимистік қуат, жасампаздық пафосы соғыс аяқталған шақта туған поэзиялық шығармаларға терең сіңісіп, мол дарыған.

Ұлы Отан соғысы тақырыбына арналып лирикалық шағын өлеңдермен қатар көптеген поэмалар да жазылды. Бұлай болуы заңды да еді. Совет адамдары шайқас даласында, еңбек майданында ғана қас батырлықтың ғажайып үлгілерін көрсетіп қойған жоқ. Сол бір сұрапыл жылдарда ерлік пен елдік те, жігер мен намыс та, қайраттылық пен адалдық та сынға түсті. Біздің адамдарымыз бұл сыннан да шалдырмай шықты. Олар ой-сезім ерлігін, мінез батырлығын да көрсетті. Осыны лайықты бейнелеу үшін әдебиет те батырлық сөз табуға тиіс еді. Ақындарымыз сол сөзді тауып айта алды да. Осындай шығармалардың бірі — Қ. Аманжоловтың «Ақын өлімі туралы аңыз» атты дастаны.

Қ. Аманжоловтың поэмасы майданда болған нақтылы бір жауынгерлік эпизодқа негізделіп жазылған. Поэма-ның геройы қазақ ақыны Абдолла майданда ғажайып ерлік қимыл жасайды. Ол ақтық демі біткенше зұлым жаумен аяусыз арпалысады. Ақыры қоршауда қалған күйінде лаулаған өрт ішінде қаза табады. Бұл асқан ерлік өзінің суынбас та солмас сипаты жағынан тек аңызға ғана снымды сияқты. Бірақ оқиға әдеттегіден неғұрлым тыс болған сайын, оны жеріне жеткізе жырлау да солғұрлым қиындай түспек. Ақын осы қиындыққа бой алдырмаған, сыр бермеген. Қайта оқиға өртке тиген дауылдай ала-түлей сапырлысып қабындаған сайын, геройы аранын ашқан ажалмен арпалысып, шымырап шырққан сайын ақынның ыза-кекке, ашу-намысқа толы жыры да жандана жайнап, тасып төгіліп отырады. Алапатты соғыстың астан-кестен суретін ақын мына бір шумақтарға сиғызып бере алған:

Зіл-зала боп жер мен аспан.
Соқты ұйтқып оқ бораны:
Қан кілкіте қара тастан,
Түткіледі кең даланы.

Қара толқын орман шашын
Жұлды талдап снарядтар.
Мәңгі мекен — көл жағасын
Тастап, суға сүнгіді жар.

Міне, майдан дүрбелеңін көзімен көрген, оның ауыртпалығын өз жанымен тебрене сезінген шын суреткер ғана осылай жаза алмақ. Қ. Аманжолов бұл дастанында «От ұстаған Прометейге ұқсас», «Өрт жанарлы жас ұлан-

нын» ұмытылмас бейнесін жасады. Жазушы Ғ. Мүсрепов осы дастан шыққан кезде былай деп жазды: «... поэма майданда ерлік көрсетіп, елі үшін қаза тапқан ақын жайында. Ақын Қасым ақын жанының бар толғауын, көк күшін, сөзім тереңін түгел бере алған. Жалынды сөзбен жауға аттандырар, жан сезімінен жас тамшылатар ақын сөзі өзегін өртеп, жүрегін тербей шыққан... Қасым поэмасы майданнан соққан жаңа леп сияқты»: («Социалистік Қазақстан» (VI — 1944 жыл). Қ. Аманжоловтың бұл шығармасы — азамат, батыр ақынның өлімі туралы өлместік дастан.

Ұлы Отан соғысы тақырыбына жазылған көлемді шығармалардың ішінде атакты халық ақыны Н. Байғаниннің «Ер туралы жыр», «Жиырма бес» атты дастандары ерекше орын алады. Алғашқы поэма Панфиловшы жиырма сегіз батырдың бірі Нарсұтбай Есболатовтың майдандағы патриоттық қимылдарын, ерлік қазасын баяндауға арналған. Ақын геройының батырлығын жеке-дара алып жырламайды, қайта оны қарулас достарының қалың ортасында суреттейді. Ал екінші дастан («Жиырма бес») Совет Одағының Батыры, халқымыздың ардагер ұлдарының бірі Төлеген Тоқтаров жайында. Ақын Төлегеннің бейнесін барынша толыққанды етіп мүсіндеуді мақсат еткен. Дастанда Төлегеннің бейбіт шактағы шадыман тіршілігінің де, қасарысқан қан майдандағы жауынгерлік өмірінің де жарқын елестері бар. Н. Байғаниннің ақындық қуаты, эпиктік кең толғамы да бұл дастандардан мол танылды. Ақынның жыры жалынды, ойнақы әрі геройлардың батырлық мінезіне мензес тегеурінді.

Халық ақындары шығарған дастандардың барлығы да осындай идеялық-көркемдік биік дәрежеге көтеріле алды деп айтуға, әрине, еш болмайды. Көптеген қарт ақындар творчестволық дұрыс ниетте болғанмен, майдан жайында шынайы шығармалар бере алмады. Олар көркемдік бейнелеудің реалистік тұрғысынан тая соғып, ежелгі батырлық эпостың дәстүрлі суреттеу тәсілдерін сол бәз байырғы күйінде қолдана салды. Сондықтан да мұндай шығармалардың кейіпкерлері ақиқат совет адамдарынан гөрі атамзаманғы «аруақты» алыптарға көбірек ұқсап кетті. Мұндай кемшіліктерге тіпті жазба поэзияның кейбір өкілдері де бой алдырды.

Майдан тақырыбына жазылған сюжетті шығармалардың

тартымдыларының бірі — ақын Х. Ергалиевтің «Әке сыры» атты лирикалық монологы. Поэма ақынның лирикалық героиняның бейбіт өмір, сұрапыл соғыс туралы ой толғаныстары, сәби перзентімен сырласуы ретінде жазылған. Соғыс аяқталғаннан соңғы шақтың тынысы да, сұранып майданның суық та сұрғылт суреті де, жеңістен кейінгі бейбіт өмір қуанышы да жадағай баяндалмай, ақынның сезімі, терең тебреністері арқылы берілген. Сондықтан да поэма оқушы жүрегін толқытады, оны шартарап ойға бөлейді. Соғыс басталған сәттегі тулаған көңіл күйлерін ақын былайша шертеді:

Жұлкып тастап бейхабар жүрегімді,
Түкпіріне жанымнан мұз төгілді.
Өзім тұрмақ, жүректен шыр еткізіп,
Кім шошытты мұншама бөбегімді?..

... Жібергенде мұз жалап отты өзекті,
Не қорқыныш, не бір күш билеп кетті.
Ұға алмадым, әйтеуір үстімдегі
Жылы көрпем жиырылып дір-дір етті.

Сүйген жарым асығып оятты ма?
Ғазиз анам:

— Агтан! — деп зар қақты ма?

Әлі күнге ашпаған дүние есігін
Әлде менің бөбегім тіл қатты ма?

Ақын осылайша өзіне жақын, отбасындық күйлерден бастап, Отан деген зор да қасиетті ұғымға бірте-бірте ауысады. Сонда дүниеге әлі келмеген жас сәби ақынның өз перзенті ғана болып қоймай, болашақ ұрпақтың жинақты тұлғасына, соның символына айналады.

Поэманың көркемдік ерекшелігі де көңіл аударарлық. Онда әралуан күйде алынған сезім шындығы бар, лирикалық саз басым. Жоғарыда алынған үзіндіде үн-сарын мен сурет-елес ұласа ұштасып келген. Суреттен үн есітесің, сарыннан елес-емеурін танысың. Ақынның лирикалық кейіпкері кайғырып қуана да, тебреніп толғана да біледі. Ол адам үшін ең қымбат та абзал, армандай ыстық күйлерді шертеді. Х. Ергалиев поэмасы осы қасиетімен құнды.

Соғыс жылдарындағы поэзияның ерекше бір сипаты оның творчестволық кадрлары қатарының көптеген талантты жас қаламгерлерімен молығуына байланысты. Кейінгі кезеңде поэзиямызды дамытуға, оның мәдениетін

көтеруге көп үлес қосқан С. Мәуленов, Ж. Молдағалиев, К. Жармағамбетов, Қ. Шаңытбаев, М. Әлімбаев, С. Сейітов сияқты ақындардың тұңғыш балғын дауыстары сол бір дауылды жылдарда естіле бастады. Бұлардың ішінде К. Жармағамбетовтың адамгершілік үлкен сезімге, гуманистік пафосқа толы тамаша балладаларын ерекше атап айтуға керек.

Ұлы Отан соғысы жылдарындағы поэзиямыздың осындай құнды қасиеттері, еңселі шығармалары барлығымен қатар онда мін-мүлтіктер де, ішінара кейбір суық, сарнауық сарындар да болды. Әрине, бұған бола бүкіл поэзиямыздың жақсы жақтарын бекерге шығаруға, ақындарымызға жалпылама мін тағуға ешкімнің де правосы жоқ. Ақындарымыздың көпшілігі өздерінің майдан жырларын жайлы бөлменің ішінде, жазу столының жанында отырып жазған жоқ, өмір мен өлім айқасқан, ажал кезген далада, оқ астында жүріп жазды. Олардың қолдарына қалам ұстатқан — шарқ ұрған шабыт емес, қайта өртенген қала мен жазықсыз өлген жандардың жүрекке түсірген жарасы, боздағынан айрылып анраған ана мен жетім қалған жас сәбидің көз жасы, қан майданда қаза тапқан қанды көйлек жан жолдастың намысы мен кегі, жаудан тазартылған қасиетті жеріміздің топрағын иіскеген шақта тұтанған тебренген көңіл күйлері, ата жаудың ордасы ойрандалып, шаңрағы ортасына түсіп, қаралы туы құлаған шақтағы жеңіскер солдаттың қуанышы мен төкаббар сезімі, т. б. Поэзиямызда соғыс жылдарының осындай қатал да қайсар шындығы, уақыттың ұмытылмас рухы бар. Біз үшін ол осы қасиетімен құнды.

Біз Ұлы Отан соғысы жылдарындағы поэзияға кеңірек талдау жасауға тырыстық. Өйткені ол сөз болып отырған кезеңде әдебиетіміздің ең ұшқыр, белсенді әрі жемісті жанры болды. Әрине, әдебиетіміздің басқа жанрларында да творчестволық ілгерілеулер болды. Прозаның очерк, әңгіме, публицистика сияқты шағын түрлері жедел дами бастады. Ақын, жазушыларымыз совет адамдарының майдандағы да, тылдағы да патриоттық істері жайында әрдайым жазып отырды.

Егер Ә. Сәрсенбаевтың «Арқаның ақиығы», «Бас иді ту батырына», «Отты күндер», С. Омаровтың «Ананың арманы», «Жаралы жауынгер», Ә. Әбішевтің «Батыр десе батыр», «Кек деп ұшқан оқ» атты очерктері мен әңгі-

мелерінде майдан өмірінің әралуан елестері болса, а.л М. Әуезовтың «Отан шақырғанда», «Күй қажырлы коп-всер», С. Мұқановтың «Екі солдат немесе екі қойшы», Ғ. Мүсреповтың «Ту мен намыс біздің қолда», М. Иман-жановтың «Орынбай карт» атты әңгіме-очерктері жеңіс мүддесімен тыныстаған совет патриоттарының қажырлы еңбек пафосына толы.

Соғыс жылдарындағы прозаның шағын түрлерін, әсіресе көркем публицистиканы дамытуда жас жазушы Баубек Бұлқышев (1917—1943) көп еңбек сіңірді. Оның «Комсомольская правда» газетінде жарияланған публицистикалық мақалаларынан совет заманында тәрбиеленген, өз халқын, туған Отан-анасын нәзік те қызулы махаббатпен сүйген жас азаматтың жарқын бейнесін көргендей боласын. Оның үлкен жүрегі досқа деген ыстық та мөлдір мейірмен суарылған, жауға деген жібімес ызғарлы кекпен қарылған. Жас жазушының «Менің өмір сүргім келеді», «Шығыс ұлына хат», «Өмір, жастық біздікі», «Тында, Кавказ!», «Заман, жастар, біздікі» атты публицистикалық мақалалары мен памфлеттері осы қасиетті анық танытады.

Б. Бұлқышев творчествосына гуманистік сипат та мол дарыған еді. Адамдос жазушының өзі де мұны талай рет атап айтқан болатын. «Біз қашанда гуманист болатынбыз... Мен адам өмір сүрсе екен, еңбек етіп, өнерін көрсете алса екен деймін!» Осы бір абзал арманы, асқақ идеясы үшін жазушы қарумен де, қаламмен де аянбай алысты және сол жолда қаза тапты.

Жазушыларымыз соғыс тақырыбына арнап бірсыпыра көлемді шығармалар да жазды. Ә. Әбішевтің «Төлеген Тоқтаров», «Саржан» атты шағын повестері осындай шығармалардың қатарына жатады. Бұл шығармаларында жазушы кейіпкерлерінің бастан кешкен оқиғаларын, олардың алапатты арпалыс үстіндегі психологиясын әсерлі бейнелеуге тырысты. Сонымен бірге оның авторлық баяндаудың реалистік мәнерінен жаза басып, жасандылыққа ұшыраған мезеттері де бар.

Соғыс жылдарында аға жазушылардың ішінде жемісті еңбек еткендерінің бірі — Ғабит Мүсрепов. Оның «Ер ана», «Ақлима» атты әңгімелері соғыс кезіндегі прозаның жақсы үлгілерінен саналады. Алғашқы әңгімеде украин әйелі Натальяның фашистер орналасқан үйді өртегені, сөйтіп зұлым жаудан кек қайтарғаны жайында

баяндалады. Ал екінші әңгіменің кейіпкері қазақ әйелі Ақлима майданда мүгедек болып қалған Сапар деген жас жігітті өзіне бала етіп алғды, адамгершілік үлкен мінез, апалық зор мейірім көрсетеді. Ғ. Мүсрепов отызыншы жылдарда ана тақырыбына әңгімелер циклын жазғаны аян. Наталья, Ақлима бейпелері арқылы ол сол ана кейіпкерлер образдарының галереясын толықтыра түсті.

Жазушының бұл кезеңдегі шығармаларының ең көлемдісі де, нәрлісі де — «Қазақ батыры» повесі. Бұл шығармасы арқылы Ғ. Мүсрепов әскери тақырыпты қазақ прозасында шын мәнісінде әлеуметтік кең өрісте алып бірінші рет көтерді.

Повестің негізгі кейіпкері Қайыргалидың образында жазушы өмірден өз орнын іздеген және соны тауып өзінің азаматтық борышын ақтаған совет жасының жинақты бейнесін берген. Автор бұл повесін кейін толықтырып, «Қазақ солдаты» деген атпен роман етіп жазды. Ұлы Отан соғысының сипаты мен рухы, совет адамдарының отаншылдығы, халықтар достығының әлуетті қуат-күші туралы тақырыптар Ғ. Мүсрепов романында жалаңкабат, жадағай күйде алынбай, терең де шынайы көркемдік шешімін тапқан. «Қазақ солдаты» романы бүкілодақтық әдебиетке, оның ішінде әскери беллетристикаға байсалды үлес болып қосылды.

Бұл кезеңдегі прозамыздың шоқтығы биік шығармаларының бірі — Ғ. Мұстафиннің «Шығанақ» романы. Композициялық желісінің босандығына және басқа да кейбір көркемдік кемшіліктеріне қарамастан, «Шығанақ» романында еңбек тақырыбы реалистік планда шешілді. Жазушы еңбекті творчество дәрежесіне көтерген жаңашыл адамның типтік образын жасады. Сондай-ақ романда соғыс кезіндегі тыл тіршілігінің майдан өмірімен тығыз байланысты болғаны, жеңіс мүддесімен тыныстағаны да нанымды бейнеленген.

М. Әуезовтың атакты «Абай» романының бірінші кітабының жарыққа шығуы (1942) соғыс жылдарындағы қазақ совет әдебиетіндегі аса зор көркемдік оқиға болды. Романда автор өткен ғасырдың екінші жарымындағы қазақ өмірінің қат-қабат қырларын, әралуан көріністерін шын суреткерге тән асқан алғырлықпен мейлінше терең ашып берді, сахра тіршілігін түнекке қамап шарпыған қаралы күштер мен болашағына ұмтылған

ЖЕМІСТІ ЖОЛ

Қазақтың үлкен ақыны, көрнекті жазушысы Сәбит Мұқанов әдебиетке тарихи да ұлы оқиғаларға толы жылдарда жаңа дәуір азат еткен еңбек адамының ой-тілегін, арманы мен қуанышын жырлай келді. Ақынның 1917 жылы жазған «Көңілім», «Неге тудым», «Жалшының зары», «Шығар күнді» атты лирикалық өлеңдері — тек оның өзінің ғана қаламалдылары емес, сонымен қатар, бүкіл қазақ совет әдебиетінің тұңғыш қарлығаштарының бірі.

Осылайша, ұлттық советтік әдебиетіміздің ірге тасын қаласқан, оның туып, қанат жаюының басы-қасында болған Сәбит Мұқанов сол әдебиетімізбен бірге өсіп, бірге жасасып келеді. Жазушының қырық жылдан астам творчестволық жолы, белгілі дәрежеде, бүкіл қазақ совет әдебиетінің даму жолын, өсу кезеңдерін аңдатарлықтай. Бұл жылдарда жазушы әдебиеттің барлық жанрларында оқушы жұртшылық сүйсіне оқитын көптеген кесек те күрделі шығармалар берді. Оның лирикалық сыр толқынға және философиялық терең мазмұнға толы поэзиялық шығармалары халық арасына мейлінше кең таралды. Ал жазушының «Ботакөз», «Сырдария» сияқты прозалық кесек шығармалары бүкіл совет оқушыларының игілігіне айналды және көптеген шет ел халықтарының тілдеріне аударылды.

Сөйтіп, Сәбит Мұқанов творчестволық жолының әр кезеңінде халқымыздың өмірі мен күресін шынайы бейнелейтін кесек шығармалар жазып, ұлттық әдебиетімізді өркендете беру жолында белсенді еңбек етіп келеді. Сондықтан да ол туған халқының сүйіспеншілігі мен лайықты құрметіне бөленді. Сәбит Мұқанов — «саяси санасы оянғаннан бастап, бар еңбегім халқыма деп келген, әр кезеңнің сынды өткелдерінде қашанда елімен бірге болып, еліміздің мәдениетін сатыдан сатыға көтеруде үздіксіз көп еңбек сіңірген, қалың еңбекші бұқараның ортасында өте сүйікті жазушы. Сәбиттің еңбектері — халық қазынасы, ел мақтаны». ¹ Бұл — үлкен

* Ғ. Мүсірепов. Жазушы Сәбит Мұқанов. «Әдебиет және искусство» журналы. 1946 жыл, № 2—3, 3-бет.

суреткеріміздің көркем де мол творчествосына берілер бүкіл халықтық бұла.

Соңғы кезде бізде ірі-ірі жазушылар мен ақындардың, драматургтардың таңдамалы шығармаларын том-том етіп бастырып шығару дәстүрге айналды. Бұл әдебиетіміздің ғана кемелдену кезін, шырқау шағын көрсетіп қоймайды. Сонымен бірге, оқушы жұртшылықтың да мәдени дәрежесі, тілек-талабы өскендігін танытады. С. Мұқановтың да таңдамалы шығармалары басылып шықты. Олар үлкен-үлкен алты томнан тұрады. Осы мақалада сол томдарға енген шығармалар жайындағы азды-көпті пікірлерімізді ортаға салмақпыз. Бұл ретте біз әдеби-көркемдік талдауды хронологиялық тәртіпте, яғни жазушы шығармаларының туу кезеңдеріне қарай бермейміз. Біз жазушының әр томға енген көркем туындыларына сап-сабымен, нақтылы талдау жасауды мақсат етеміз. Орайлысы да осы сияқты.

С. Мұқанов творчествосында оның «Өмір мектебі» атты екі кітапты өмірбаяндық романы елеулі орын алады. Осы романның өңделген, толықтырылған нұсқасы таңдамалы шығармалардың алғашқы екі томына енген.

«Тар жол, тайғақ кешу» атты белгілі кітаптың авторы атақты ақын Сәкен Сейфуллинмен бірге, С. Мұқанов қазақ әдебиетінде мемуарлық, өмірбаяндық роман жанрын бастаушы болып табылады. Бұл салада ол жиырма бес жылға тарта уақыт бойына еңбектенді. Өйткені кейін «Өмір мектебі» атанған романның алғашқы кітабының кейбір үзінділері жеке новеллалар ретінде отызыншы жылдардың бас кезінде-ақ жарияланған болатын. Содан бері жазушы бұл шығармасына уақыт-уақыт оралып, оны әрдайым толықтыра, шындай түсіп отырды.

Романның бірінші кітабын автор өзінің балалық шағын баяндаудан бастап 1918 жылғы оқиғаларды суреттеумен аяқтайды. Жазушы өз басынан кешірген болмыстарды ғана баяндап қоймайды, сонымен бірге, туып-өскен ортасының да кең көріністерін беріп отырады. Тұтас алғанда, кітапта революция алдындағы қазақ ауылы өмірінің кат-кат сырлары, мол шындығы бар. Бұл ауыл Абай туралы эпопеяда немесе «Оянған өлке» романында бейнеленген дәрежесінде емес. Онда жаңалық нышандары бұрынғыдан әлдеқайда мол. Мұны кітапта суреттелген алуан түрлі адамдардың тіршілігі мен

тағдырынан да, ой-санасы мен психологиялық шындықтарынан да анық сезуге болады.

Сонымен бірге, жазушы ескі ауыл өмірінің өзі басынан кешіріп өскен ащы шындығын, әлеуметтік теңсіздіктер мен феодалдық-патриархалдық тағылықтардың кесепаты зардаптарын да жеріне жеткізе ашады.

Социалистік реализм әдебиетінің негізін салушы ұлы суреткер Горький азапта, жоқшылықта, кісі есігінде өткен балалық өмірін еске ала келіп былай деп жазған еді: «Сол бір өмір маған қайырымды, бірақ ащы шындығымен азапқа салатын дана адам айтқан қатал ертегідей болып елестейді. Қазір өткен күнді тірілте, оған жан бітіре суреттей отырып, мен бәрі де дәл солай болғандығына кейде зорға деп қана иланамын... Бірақ шындық мүсіркеушіліктен артық...» Кеменгер Горькийдің осы сөздерін өз тұрғысынан С. Мұқанов та айта алар еді. Өйткені оның да балалық өмірі ертегіге бергісіз қатал шындыққа, қиян-қиялы жайларға толы. Жазушы солардың барлығын сап-сабымен негізінен реалистік мәнерде баяндайды.

Кітаптың ең алғашқы беттерінен бастап-ақ оқушының көз алдынан екі дүниенің — зорлық-зомбылық, байлық дүниесі мен езушілік, жоқшылық дүниесінің алуан түрлі сырлары ашылады. Егер Нұртаза, Әлтидің Сәдуі, Ыбыр, Әубәкірлер қиянат пен өктемдік иелері ретінде көрінсе, ал Мұқан, Мұстафа, Бопан және басқалар өмірден, қытымыр заманнан өгейлік тартқан жандар бейнесінде суреттеледі. Жалпы алғанда, жазушы ескі қазақ ауылы өмірінің әлеуметтік көріністерін шынайы елестете алған.

Романның ең бағалы қасиеттерінің бірі — туған халқының тағдыры мен талайын, ой-арманын, ұлттық дәстүрлерін жазушының жарқын да мол суреттегендігінде. Ол халық өмірінің көленкелі жақтарын ғана ақтара баяндап қоймайды, сонымен бірге, оның бойындағы, ой-санасындағы бағалы қасиеттерді де кеңінен бейнелейді. Романда халық өкілдері образдарының тұтас галереясы бар. Солардың ішіндегі ең көрнектілері — Ораз, Ғабдол, Қанапия, Шәйін, Молдағазы және басқалар. Жазушы Оразды аңсақ саятшы, Ғабдолды асқан әнші, Қанапияны зор қайрат иесі, Молдағазы мен Шәйінді өнер-білімге, жаналыққа үндеушілер ретінде бейнелейді. Олар халық қасиетінің әр алуан қырын танытады.

Сондықтан да автор оларды мейірлене, іш тарта отырып суреттейді.

«Өмір мектебінің» бірінші кітабында революция алдындағы қазақ ауылының рухани тіршілігінің де елес-көріністері мол. Жазушы қазақ халқының өнер-білімге, ілгерішіл ой-пікірге, басқа халықтардың мәдениетінен де үйренуге ден қойғанын оқиғалар тізбегі арқылы да, нақтылы адам образдары арқылы да аңдата алған. Сонымен бірге, ол схоластикалық ислам мектебінің, діни оқудың кертартпалық сипаттарын да жеріне жеткізе әшкерелей алған. Бұл романның «Інемен қазған құдық» атты тарауынан әсіресе анық сезіледі.

Жазушы өз халқы мәдениетінің бұлақ-бастауларын да ашып суреттейді. Бұл тақырыпты ол асқан әнші-композитор әрі акын Ақан сері, «сегіз қырлы, бір сырлы» Балуан Шолақ, қиялы ұшқыр ертегіші-аңызшы Қорабай бейнелері арқылы шешеді.

Автор татар акыны Ғабдолла Токайдың және Абайдың шығармаларымен алғаш қалай танысқанын да әсерлі баяндайды. Сондай-ақ, бұл кітап С. Мұқановтың өзінің творчестволық жолы қалай басталғаны және оның ақындық өнерін нәрлендірген қайнарлар қандай екендігі жайында да оқушыға, зерттеушіге көп материал береді. Егер романның бірінші кітабы революция алдында тұрған және соның дауылды дүбірінен оянып сілкіне бастаған ескі ауыл өмірінің шынайы көріністерін берсе, ал екінші кітап азамат соғысы және совет өкіметі орнауы жылдарында Солтүстік Қазақстанда болған оқиғаларды суреттейді. Оқушы тек ауылдың ғана емес, сонымен бірге, Омбы, Қызылжар қалаларының да сол кезеңдегі өмірімен танысады.

Солтүстік Қазақстанда совет өкіметі кескілескен, қиян-кескі тап күресі жағдайында орнады. Сол күрестің белсенді қатысушысы болған коммунист-жазушы өз басынан кешкен, көзімен көрген жайларын сол қатал да шын күйінде баяндайды.

Сөйтіп, романның бірінші кітабында күн көріс қамында көрінетін болашақ жазушы екінші кітапта халық бақыты жолындағы күрескер ретінде әрекет етеді. Бұл жағынан алғанда ол өткен жол қазақтың халықтық интеллигенциясының тұтас бір буынының өмірі мен тағдырына хас сипат сездіреді.

Бұл сияқты революция ісі салтанат құруы жолындағы

қасиетті күресте каза тапқан Владимир Гозак, Баймағамбет Ізтөлін, Жакып Қыстаубаев тәрізді коммунистердің бейнелері де оқушы зердесінде ұялап қалады. Соңғы кітаптың идеялық тұрғыдан алғандағы ең құнды қасиеттерінің бірі — онда алашордашыл-ұлтшылдар ұстаған кертартпалық бағыттың тарихи прогреске, қазақ халқының болашағына жат сипаты уытты да өткір түрде әшкереленетіндігі. Бірінші кітаптың соңғы тарауларында ұшығын көрсеткен осы тақырыпты ақын екінші кітапта әлеуметтік кең тұрғыда көтереді.

«Өмір мектебі» тек өмірбаяндық ғана роман емес. Бұған қоса ол — тарихи да шығарма. Өйткені, онда автор өзі өткен өмірлік жолдың ғана бел-белестеріне үніліп қоймайды, сонымен бірге туып өскен ортасының да шындығын кеңінен қамтып ашады, тұтас тарихи бір кезеңнің көріністерін береді.

Романда өмірде болған жүздеген адамдардың аттары аталып соларға өз тарапынан автор портреттік, психологиялық сипаттамалар береді. Шығармада бой көрсетіп өтетін сол көптеген кейіпкерлер мен онда баяндалған саналуан оқиғалардың, жер-мекен аттарының барлығын бірдей жазушының өз жадында ұмытпай сақтағанына танданбасқа болмайды.

Жазушы өз назарын ең алдымен қарапайым халықтың өмірі мен тағдырына аударады, соның бойындағы қабілет, дарын мен жарқын қасиеттерді мадақтайды, уақыттың ащы шындығын, күрес кезеңін өз күйінде суреттеуге ұмтылады. Бұл айтылғандар С. Мұқановтың ұлы Горькийден жемісті үйренгендігін көрсетеді.

Әрине, «Өмір мектебі» романында кемшіліктер де бар. Жазушының бірсыпыра күрделі шығармаларында ұшырасатын шұбалаңқылық, өмір шындығына сыйымсыз оқиғалар мен қажетсіз қосалқы жайларды баяндап кетуге бой алдырушылық сияқты көркемдік олқылықтар осы романнан да сезіледі. Сондай-ақ, жазушының тек өзінің ғана емес, тіпті басқалардың да ата тегін қазбалап баяндап, генеалогияға түсіп кететін мезеттері де бар. Осындай және басқа да кейбір кемшіліктеріне қарамастан, бұл роман С. Мұқанов творчествосында ерекше орын алады. Ф. Гладков, С. Айни сияқты көрнекті совет жазушыларының белгілі мемуарлық, өмірбаяндық романдарына меңзес «Өмір мектебі» де өзінің тарихи өткенді нақтылы, шынайы бейнелеуімен құнды.

Жазушы таңдамалысының үшінші томына енген «Ботакөз» романы – тек автордың ғана емес, отызыншы жылдардағы бүкіл әдебиетіміздің аса ірі шығармасы. С. Мұқановтың бұған дейін де бірсыпыра прозалық шығармалар жазғаны аян. Әрине, олардың ішінде көңіл аударуға тұрарлық тәуірлері де, әдебиетімізге тұрақты шығармалар ретінде ене алмай, тез ұмыт болғандары да бар. Бірақ солардың жазушы қаламын ұштай түскені, оған біраз творчестволық тәжірибе бергені күмәнсіз. «Ботакөзді» жазу үстінде автор сол тәжірибесін кеңінен әрі жемісті пайдаланды да.

С. Мұқановтың бұл романы «Жұмбақ жалау» деген атпен тұңғыш рет 1938 жылы басылып шықты. Роман жұртшылық назарын өзіне бірден-ақ мол аударды. Бұл мейлінше заңды да еді. Өйткені «Ботакөз» романы — қазақтың реалистік кесек прозасының социалистік реализм әдісін игеру жолындағы зор табысынан саналуға лайықты шығарма.

«Ботакөз» романында бейнеленген тарихи оқиғалар: революция алдындағы қазақ ауылындағы шегіне жетіп шнеленіскен өткір тап тартысы, қазақ халқының 1916 жылғы ұлт-азаттық қозғалысы, қазақ еңбекшілерінің революцияға келу, араласу жолдары, Азамат соғысы және совет өкіметі орнауы жылдарында Қазақстанда болған ірі-ірі оқиғалар, қазақ және орыс халықтарының достығы, халықтың жаңа дүние жасау жолындағы батырлық күресіне Коммунистік партияның басшылығы туралы тақырыптар еді.

Романда суреттелген оқиғалар мен тартыстың өрбіп-дамуына, шешілуіне сәйкес жазушы осы тақырыптардың барлығын да шығарманың сюжеттік желісіне шеберлікпен енгізеді және оларды өмір шындығына сай, ерекше заңдылықпен шешіп отырады. Автор өзі суреттеп отырған дәуірдің жоғарыда аталған оқиғаларын жай суреттеп қана қоймайды, сонымен қатар, ол сол оқиғаларға бүгінгі күннің биік тұрғысынан қарап дұрыс та лайық баға беріп отырады. Бұл — сол оқиғалардың романда берілген реалистік суреттерінен, жазушының сол оқиғаларға деген айқын, тура авторлық қатынасынан анық сезіледі.

«Ботакөз» романы С. Мұқановтың жазушылық шеберлігі де өскенін, бұрынғыдан әлдеқайда жетіле түскенін танытты. Романда талай кесек образдар бар. Жазушы

ұнамды кейіпкер образын жасау міндетін бұл шығармасында табысты шешті. Романда жаңа дүние орнату жолындағы күрескерлер — ұнамды кейіпкер образдарының тұтас галереясы бар. Бұлардың ішіндегі ең тұлғалы, тұтас образдардың бірі — Асқар.

Жазушы романның бас жағында оқушыны Асқармен былайша таныстырады: «Орысша кнінген жігіт — Досанов Асқар еді. Оның әкесі — Досан. Бурабай маңындағы Шортан қаласының малын бағатын жатақ бола тұра, баласын школға жасынап сабаққа берді. Екі клас-ты школды 16 жасында, 1907 жылы бітіріп, сол жылы күз Асқар Омбының Учительская семинариясына түсті. Бірақ оны аяқтауға қаражаты болмай, 1911 жылы соңғы класын бітірмей семинариядан шығып, Көкшетаудың ық жағында отыратын, Байсақалдың Итбайы деген болыстың ауылынан балаларын орысша оқытуға жалда-нады».

Жазушы оқушыны Асқардың өткен өмірімен осылайша сараң ғана таныстырады. Бірақ оның ссесіне, автор Асқардың бұдан кейінгі өмірін, іс-әрекеттерін мейлінше кең суреттейді. Асқар оқушының көз алдында заңды да нанымды түрде өсіп отырады. Жазушы Асқарды бірден-ақ қалыптасқан күрескер ретінде көрсетпейді, оның бойына лайық емес қасиеттерді қолдан телімейді. Асқар алғашқыда алдына онша зор мақсат та қоймайды. Өзі орыс мектебінде оқып көзі ашылған және туған халқының надандық торында зар илегенін көрген, жаны ашыған ол қазақ жастарының, балалардың мектепте оқуын, жанаша білім алуын арман етеді. Асқардың ауыл мектебінде оқытушылық қызмет атқаруының, Сағит сияқты балаларға қамқорлық жасауының бір та-мыры оның осы арманына да байланысты.

Сонымен қатар Итбайлар мен Кошкиндердің еңбекші халыққа жасайтын зорлық-зомбылығын өз көзімен көріп түніле, ашына жүріп Асқардың жүрегінде үстем тап өкілдеріне деген қарсылық, жеккөрушілік сезімі күшейді. Бірақ оның саяси беті бірден айқындалмайды, күрес жолына да белсене түсіп кетпейді. Орыс революциясының бесігі Петербургта болуы, онда Смирнов, Булатов сияқты революционерлермен танысуы Асқардың өмірінде шешуші роль атқарады. Ол мұнда тұңғыш рет Лениннің еңбектерімен танысады. Сөйтіп Асқардың бүкіл дүние тануында, өмірге деген көзқарасында үл-

кен өзгерістер болады. Ол өзін қатты толғандырған, бірақ анық та тура жауабын бұрын таба алмаған мәселелердің шешімін Ленин еңбектерінен және жоғарыда аттары аталған революцияшыл достарынан біледі.

Асқар образы — жазушының үлкен табысы. Автор өзінің бұл басты кейіпкерінің қатардағы халық мұғалімінен саяси санасы өскен коммунист, революционер дәрежесіне дейінгі өсу жолын мейлінше шынайы әрі терең көрсете алды. Жазушы Асқар бейнесінде қазақ интеллигенциясының таңдаулы тобы халықпен бірге болғанын және оның революцияға келу жолын образды түрде көркем бейнелеп берді.

Романдағы ең негізгі, басты образдардың бірі — Ботакөз. Ол — бүкіл қазақ совет әдебиетіндегі әйел кейіпкерлердің ішіндегі ерекше тұлға. Жазушы Ботакөздің өсу жолын, оның бастан кешкен оқиғаларын реалистік түрде суреттейді.

Ботакөз жас кезінде орыс мектебінде оқиды. Романның алғашқы тарауларында біз Ботакөзді айналада болып жатқан оқиғаларға қатынасы да, онша қызығуы да жоқ, көбінесе оқыған кітаптарынан алған әсерлерімен ғана өмір сүретін жас қыз ретінде ғана көреміз. Бірақ оның балалық шағының қызығы ұзаққа созылмайды. Өмірдің алуан түрлі, қат-қабат оқиғалары өзінің тереңіне Ботакөзді де тартады. Сол бір бейуақтың ауыртпалығы мен қайшылығы Ботакөздің де үлесіне тиеді. Бір жағынан, Ботакөз — оқыған, көзі ашық, саналы жас. Екінші жағынан, ол ескі қазақ қоғамының әділетсіз салт-жоралғылары мен заңдарының бұғауынан әлі құтылмаған. Итбай сияқты нысапсыз, ұятсыз адамның Ботакөзді әйелдікке алмақ болуы Ботакөздің өзіне де, оның туыскандарына да қатты батады. Міне, осылайша жастық өміріне ерте төнген қауіпті сезіну, оған қарсы күресуге ұмтылу Ботакөздің ой-өрісін ерте есейтеді, бойындағы қайрат-жігерді, намысты оятады.

Тұрмыстың қиындықтары мен ауыр сындарына жастайынан тап болған Ботакөз сыр бермейді, бойын бекем ұстайды. Ботакөздің бұл қасиеті алғаш рет ағасы Балтабекке пәле жабылып тұтқынға алынып, жеңгесі Айбала ауыр науқастанған шақта сезіледі. Ботакөздің бойындағы зор адамгершілік сезімдерін жазушы әсіресе осы эпизодтарда терең ашып көрсетеді. Айбала өлім үстінде жатқан ауыр шақта Ботакөзді Итбайдың жігіт-

тері зорлықпен алып қашады. Бірақ оны Амантай аман құтқарып алады. Міне, автор осындай жантүршігерлік ауыр да аянышты оқиғаны шынайы суреттеу арқылы әрі Итбайдың ұяттан безген қарақшылық әрекеттерін аяусыз әшкерелейді, әрі Ботакөздің қайсарлығын, рухани ұстамдылығын ұтымды аңдатады.

Ботакөз Асқармен қосылғаннан кейін де қауіп-қатерден құтылмайды. Итбайдың балалары Ботакөзді қудалауын қоймайды. Бірақ Ботакөз бұған жасымайды, қайта осындай арпалысқан алыс үстінде оның характері қалыптасып шыңдала түседі. Ботакөз Асқарға адал, сүйікті жар ғана болып қоймай, сонымен қатар, оны халықтың азаттығы жолындағы күресінде қолдап, қайрат-жігер беріп отырады. Сөйтіп ол халық мүддесін өздерінің жеке бастарының бақытынап жоғары қояды. Ботакөз образы сол кездегі тарихи шындыққа сәйкес келе ме? Иә, әбден сәйкес келеді. Өйткені автор сол дәуірдегі қазақ қыздарына тән таңдаулы қасиеттер мен мінездерді Ботакөз бейнесінде жинақтап көрсетті, сөйтіп, қазақтың күрескер қызының типтік образын жасады. Ботакөз романның бүкіл өн бойына өзінің қажырлы әрекетімен және тамаша жан дүниесімен ерекшеленіп, айқын көрініп отырады. Ботакөз — қазіргі жастардың да еліктеуіне, үлгі алуына тұрарлық кесек тұлға.

Халықтың қалың бұқарасының өкілі Амантайдың образын да автор зор көркемдік қуатпен бейнелей алған. Романда Амантай образы бар шындығымен, нанымды суреттелген. Амантай — халықтың қалың ортасынан шыққан және оның қажымас қуаты мен даналығын өз бойына мол жинаған кейіпкер.

Романда бұлардан басқа да көптеген ұнамды кейіпкерлер бар. Олар — Кенжетай, Темірбек, Бүркітбай, Асан, Сағит тағы басқалар. Екінші қатардағы кейіпкерлер болғандықтан, жазушы бұлардың әрқайсысының өмірі мен іс-әрекеттерін үнемі жан-жақты көрсете бермейді. Олар шығарманың сюжеттік желісіне, ондағы оқиғаларды дамыта түсуге тікелей қатынасы, қажеттігі бар мезеттерде ғана қатыстырылып отырады. Сөйтсе де біз олардың әрқайсысының да өмірлік жолымен, іс-әрекеттерімен, жан дүниесімен терең де толық танысамыз. Бұл әрине, жазушының образ жасаудағы шеберлігін анық байқатады.

Романда жоғарыда аталған ұнамды кейіпкерлерге қар-

сы алысатын жаулар лагерінің де көптеген өкілдері бар. Бұлардың ішінде ерекше дараланып көрінетіндері — Итбай мен Алексей Құлаков.

Революция алдындағы қазақ ауылының тіршілігіндегі әділетсіздік пен зорлық-зомбылық, жекеұрындық атаулының барлығын автор осы Итбай бейнесінде жинақтап көрсеткен.

«Ботакөз» романы өзінің идеялық тереңдігімен ғана емес, көркемдік ерекшеліктерімен де құнды.

Жалпы С. Мұқановтың жазушылық творчествосындағы ерекшелік «Ботакөз» романында әсіресе айқын көрінді.

«Ботакөз» — көп планды, мол тынысты роман. Ол ондаған адамдардың тағдыры мен тартысын камтиды. Осыған байланысты шығарманың сюжеті дамып өрбіген сайын оған жаңа кейіпкерлер араласып, тың тартыстар қосылып отырады. Оқиғалар тек қазақ сахрасында ғана емес, сонымен қатар, Петербургте, Омбыда, Қызылжарда, майдан шебінде де қатарласа, жарыса өрбіп жатады. Бірақ сол қалың оқиғалар шығармада әрқайсысы өз алдына бөлек қалмайды, қайта бірімен-бірі байланыса, заңдылықпен қабыса дамиды. Мұның барлығы жазушының өзі суреттеп отырған уақыттың сипатын аңдауына, кейіпкерлерінің характерін айқындап ашуына септігін тигізеді. Сөйтіп, шығармада сюжет характердің тарихын құрайды, яғни оқиғалар шиеленісіп дамыған сайын, ондағы кейіпкерлердің образдары да тереңірек ашыла түседі.

Жазушының образ жасаудағы құралдары, әрине, мұнымен саркылып қалмақ емес. Көркем әдебиетте суретшінің негізгі бейнелеу құралы — тіл. «Ботакөз» романының көркемдік ерекшеліктерінің негізгі бір тамыры оның тілінің көркемдігі мен молдығында. Бұл шығармадағы авторлық баяндаулардан да, кейіпкерлерге берілетін портреттік немесе психологиялық сипаттаулардан да, табиғат суреттерінен де анық байқалады.

«Ботакөз» романы — тарихи әлеуметтік роман. Әрине, онда тарихи адамдар суреттелмейді. Бірақ типтік дәрежеге көтерілген жинақты образдар арқылы жазушы өзі таңдап алған дәуірді тарихи нақтылы бейнелейді. Сонымен қатар, жазушы сол бір кездегі тарихи дамудың беталысын, ішкі мәнін көрсететін әлеуметтік құбылыстар мен оқиғаларды кеңінен камтиды. Автор оларды образды түрде суреттеп қана қоймайды, сонымен бірге,

сол оқиғалар мен құбылыстарға баға да беріп отырады. Сөйтіп, «Ботакөз» романы өзінің идеялық тереңдігі, реалистік қуатымен және көркемдік ерекшелігімен жұртшылық назарын мол аударды. Бұл шығарма халықтың қалың көпшілігінің ең бір сүйіп оқитын кітабына айналды. Роман жайында ол жазылған кезде де, одан кейін де әдебиетшілер арасында әрдайым келелі сөз болғанын былай қойғанның өзінде жазушыға осы шығарма туралы оқушылардан жүздеген хаттар, ризалық тілектер түсуі — бұған айқын дәлел.

«Ботакөз» романы бүкілодақтық оқушының да назары мен сүйіспеншілігіне ие болды. Сондықтан да орталық баспасөз органдары бұл романды жоғары бағалай келіп, сылай деп жазды: «Қазақстандағы халық өмірінің өрлеу кезеңдерін тарихи шындыққа сай көрсететін шын мағнасындағы үлкен еңбек жасады»¹, «Сәбит Мұқанов романының беттерінен советтік Қазақстан тарихының алғашқы кезеңін көресіз. Біздің ұлы Отанымыздың тарихын жақсы білгісі келетін кісі бұл кітапқа соқпай өтуіне болмайды».²

Жазушының бұл тамаша шығармасы қазақ совет прозасында шын мәнісіндегі кесек әрі нағыз реалистік роман жанрының іргесі терең де берік қаланғанын айқын танытты.

С. Мұқанов — тек көрнекті прозаик емес, сонымен бірге, аса ірі ақын да. Оның қаламынан әлденеше лирикалық өлеңдер, ондаған поэмалар туды. Сол поэмалардың бірсыпырасы таңдамалының төртінші томын құрайды. Әрине, ақын поэма жанрында бірден биікке құлаш ұрып кеткен жоқ, біртіндеп өсті. Оның алғашқы поэмаларының («Жұмаштың өлімі», «Балбөпе», «Құрдас», «Құланың құны»), кейбіреуі шын мәнісіндегі сюжетті шығармаларға қойылатын талап дәрежесіне деңгейлес келе бермейді. Олар ақынның поэма жасау жолындағы алғашқы ізденулерінің жемісі, творчестволық жаттығулары есепті. Бұл шығармаларды ақын поэма сияқты күрделі жанрдың сырына әбден қанықпаған, оның табиғатын игеріп жетпеген кезде жазған еді.

¹ З. Кедрина. О сильных и смелых. «Правда», № 137, 17 мая 1949 г.

² В. Смирнова. Свет из России. «Литературная газета», № 39, 1949 г.

Ақынның алғашқы кезеңдегі сюжетті, оқиғалы шығармаларының ішінде көңіл аударуға тұрарлықтарының бірі — «Пионер».

«Пионер» поэмасында өткір тартыс, желілі сюжет жоқ. Ақын мұнда оқиғалар өрбуін ондағы кейіпкерлердің монологтары мен диалогтары арқылы, авторлық баяндаулары арқылы өрістетеді. Шығарманың соңында берілетін арайлап атқан шұғылалы таңның суретін оқушы Шокпыттар мен Сұрағандар жеткен жаңа дүниенің символы ретінде қабылдайды.

«Батырақ» атты көлемді поэмасында ақын қазақ кедейінің революцияға дейінгі азапты өмірі мен совет дәуіріндегі азат өмірін салыстыра отырып суреттейді. С. Мұқановтың бұдан кейінгі жазған көлемді поэтикалық шығармасы — «Октябрь өткелдері» поэмасы. Октябрь революциясының он жылдығына арналған бұл поэмасында ақын қазақ пролетариаты өкілдерінің өмірі мен тағдырын суреттейді. Және де осы шығармасы арқылы ақын алашордашылар мен буржуазияшыл ұлтшылдардың революциядан бұрын Қазақстанда жұмысшы табы болған жоқ деген жаулық жаласына соққы берді, қазақ жұмысшысының қызғылықты образын жасайды.

Поэмада кемшіліктер де бар. Кейіпкерінің өмірлік жолын ол кешкен өткелдерді тізбектей суреттеудің салдарынан автор кей реттерде көркемдік шындықты сезінуден жаза басып, мүлт кетеді. Мұндай жағдайларда оның поэмасы көркемдік қасиетін жоғалтып, жалаң хроникаға айналып кетеді.

Осы сипаттас кемшіліктеріне қарамастан, «Октябрь өткелдері», «Батырақ» поэмаларының ақынның сол кездегі өсу тенденциясын, тақырыптық ізденуін танып-білуде ерекше мәні бар.

С. Мұқановтың 1926—28 жылдарда жазған «Сұлушаш» атты өлеңді романы — тек ақынның өз творчествосындағы ғана кезеңді шығарма емес, бүкіл қазақ совет поэзиясының да үздік табысы.

«Сұлушаш» — ең алдымен әлеуметтік роман. Рас, шығарманың негізгі кейіпкерлері Алтай мен Сұлушаштың махаббат жайлары романның ең басты, өзекті тақырыптық желілерінің бірі болып табылады. Бірақ автор бұл тақырыпты бөліп алып, даралап жырламайды, қайта оны әлеуметтік өмірдегі тайталас-тартыстардың қа-

лын ортасында, солармен тығыз байланыстыра отырып, дәуір шындығын терең ашады, өткір таптық тартыс пен әлсіздік теңсіздіктерді баса көрсетеді.

Романда ең алғы лекте суреттелетін кейіпкерлер — Алтай мен Сұлушаш.

Алтай — қазақ совет поэзиясындағы ең бір тұтас, тұлғалы образдардың қатарына қосылады. Қараңғыда, жоқшылықта ғасырлар бойы өмір кешіп келген еңбекші халықтың өктемдікке, қанауға негізделген дүниеге қарсы қайнаған кегі мен құрсаңған ашу ызасын акын осы басты кейіпкерлерінің Сонына жинақтап көрсеткен. Алтайда жалын атқан жігер мен қажымас қайраттың мол болып келуі де осыдан.

Алтай Тілеуберді сияқты байларға және солар өкілдері болып табылатын байлық дүниесіне қарсы бала жас-тан-ақ кектеніп, өшігіп өседі. Алтайды бұған итермелеген сол қолқысқа тұрмыстың, әділетсіз өмірдің өзі еді. Тіпті, алғаш Сұлушашпен көңіл қосып жүрген шағында да Алтай өзінің бұл әрекетін үстем тапқа деген қарсылықтың бір көрінісі, нышаны деп түсінеді.

«Денім сау боп, сұлумен көңіл қоссам,
Ежелдегі алам ғой байдан кекті»,—

деп ойлайды ол. Алтайдың өктемдік дүниесіне қарсы күресінде саяси айқын бағыт, жүйелі программа жоқ және бұлай болуы мүмкін де емес. Бірақ оның күресінде өзіндік мақсаты да бар. Бірінші бөлімнің аяғында берілетін Алтайдың ішкі монологынан бұл айқын көрінеді:

«... Дүние-ай, маған берсе бар билікті,
Құштың етер едім көзге түрткі,
Жалшыға, құл мен күнге, келейлерге
Берер ем бөліп-бөліп бар мүлкіті.
Не керек, бар байлықты байлар көріп
Кекіріп болып отыр майға құпті!»

Бұл — Алтайдың жүрегіне мықтап ұялаған ой. Бірақ оның орындалуына қажетті жағдайлар ол кезде, әрине, жоқ болатын.

Романның аяғында Алтай сүйіктісі Сұлушаштан, жан серігі Қайсардан айрылады, өзі де трагедиялық ауыр

қазаға ұшырайды. Сөйтіп, азаттықты арман етіп, өктемдік дүниесіне қарсы шыққан Алтайдың тағдыры осылайша аяқталады. Өрине, Алтайдың есеге қолы жетуі ықтимал емес-ті. Сондай-ақ оның күрсау өмірдің торында, сорлы тағдырына табынын көндігіп жүре беруі де мүмкін емес еді. Ақыры ол осылай етті де...

Алтай — мол қимылдың, қайтпас қайрат-жігердің ғана адамы емес, сонымен қатар үлкен сезімнің де иесі. Бұл оның Сұлушашқа деген айнымас, адал махаббатынан, Қайсарға деген берік достығынан, әке-шешесіне және інісі Ермекке деген туысқандық сезімдерінен айқын көрінеді. Ақын оның көз тойарлық пішін-тұлғасын да, есті, ойлы жан дүниесін де келістіре суреттейді.

Романда шоқтығы асып, окшау тұрған образдардың бірі — Сұлушаш. Оның образын тек ақынның жеке өз творчествосындағы ғана емес, сонымен қатар бүкіл ұлттық поэзиямыздағы ірі табыс деп қарау керек. Шығармада Сұлушаш оқушының көз алдында занды, нанымды түрде өсіп отырады.

Сұлушаш алғашқыда сүйіспеншілік сезіміне берілген, аңқау, албырт жастың бейнесінде көрінеді. Бірақ жастық өмірінің отын өшірерлік қауіп төнген шақта ол тез есейеді. Сүйгені Алтаймен қосылу мақсатына жету жолында ол қандай ауыр қиыншылықтарға болса да шыдауға белін бекем буады. Сұлушаш көп жағдайларда Алтайға да дем беріп, оның намысы мен үмітін ұштап отырады.

Алтай сияқты, Сұлушаш та — типтік дәрежеге көтерілген образ. Сұлушаш образы арқылы автор революциядан бұрынғы бағы замандардағы қазақ әйелінің теңдіксіз, тұл өмірін және оның сол өмірге деген наразылығын, оның аяулы арманы мен айнымас, адал сезімдерін шебер бейнелей алған.

«Сұлушаш» романы өзінің терең де бай идеялық мазмұнымен ғана емес, сонымен қатар тамаша көркемдігімен де ерекшеленеді. Ақынның өзі суреттеп отырған дәуірдің шындығын жеткізе ашатын типтік оқиғалар мен құбылыстарды таңдап ала білгенін және сол шындықты заман сипатын танытатын өткір тартыс-тайталас үстінде зор көркемдікпен бейнелей алғанын атап айту қажет. Осының арқасында оның кейіпкерлері характерлерінің бар шындығымен өсу, толысу үстінде көрінеді. Сондықтан да шығармада суреттелетін оқиғалар мен

оның кейіпкерлерінің шындығына оқушы қалтқысыз сеніп отырады.

Романның көркемдік құндылығы оның оралымды әрі образды тілінен айқын танылады. Авторлық баяндаудан да, кейіпкерлерге берілген портреттік және психологиялық сипаттаулардан да, олардың монологтарынан да ақынның өз халқының тіл байлығын, оның мол сөздік қорын шеберлікпен әрі жете пайдаланғанын көреміз.

Отызыншы жылдар — С. Мұқановтың ақындық творчествосының кемеліне келіп, есейген кезеңі. Ақын бұл кезеңде бірнеше поэмалар мен ондаған өлеңдер жазды. Сонымен қатар оның жаңашылдық жолдағы ақындық ізденулері мен толғануларының нағыз жемісті болған шағы да осы кезең. Таңдамалыға енген «Жүйткі, қара айғырым», «Ақ аю» поэмалары — бұған анық мысал. Түркістан — Сибирь теміржолының салынып бітуіне арналған, «Жүйткі, қара айғырым» поэмасында ақын республика өміріндегі осы үлкен оқиғаны әрі халық ұғымына жақын, қызғылықты әрі жаңаша етіп жырлауға талпынды. Ақынның мұндай жаңалықтарға ұмтылуын поэманың сюжеттік желісі мен композициялық құрылысынан да, сондай-ақ оның стилінен, өлеңдік ырғағы мен екпіннен де байқау қиын емес.

С. Мұқановтың отызыншы жылдарда жазған күрделі шығармаларының бірі — «Ақ аю» поэмасы. Мұнда ақын терістік мұз теңізін зерттеуші совет адамдарының тас мінез табиғатқа қарсы табандылықпен жүргізген күресін суреттеуді мақсат еткен. Поэмада суреттелетін торға түскен ақ аю — табиғаттың сол стихиялық күштерінің совет адамдарының ыркына көнуінің символы. Бірақ табиғаттың дүлей күшімен арадағы бұл күрес жай ғана жұлқысу емес еді. Сондықтан да С. Мұқанов совет адамдарының осы өршіл күресінің өр қасиеттерін жаңаша жырлайды:

Жаңа өмірде адамға адам қастық
Бітпек.
Адам бірлігін мықты тас қып
Алғасын
табиғатқа бұйда тағып,
Жалған тәңір орнына болмақ бастық.

Мұнымен қатар поэма өзінің терең гуманистік пафосымен де бағалы. Совет адамын ардақтау, қадір тұту жә-

не оның жасампаздық еңбегін мадақтау сарындары поэмаға ерекше шырай беріп, оның идеялық тынысын кеңіте түседі. Ақынның бұл поэмалары оның көркемдік ізденулеріндегі, Маяковский дәстүрлерін дамытудағы сәтті қадамдарын да анық танытты.

С. Мұқановтың проза саласындағы ірі шығармаларының бірі — «Сырдария» романы таңдамалының бесінші томын құрайды.

Жазушы өзінің бұл романын Қызылорда су плотинасын салу және Сырдария өзенінің суын пайдалану арқылы құлазып жатқан шөл далаларды игеру тақырыбына арнаған. Бұл роман қазақ совет прозасының совет адамын көрсетуге, еңбек тақырыбын бейнелеуге мықтап бет бұрғанын белгілеген шығармалардың бірі болып табылады. Осы ретте қазақ совет әдебиетінің үлкен досы, бағалаушысы болған тамаша жазушы марқұм А. Фадеевтің бұл роман жайында айтқан, жұртшылыққа кеңінен мәлім емес мынадай бір пікіріне назар аудара кету орынды тәрізді: «Романның материалы Отан соғысының дәл алдындағы кезеңді және Отан соғысы кезеңін қамтиды. Сырдария ауданындағы суландыру каналы құрылысы және колхозшы қазақтардың Отан соғысы күндеріндегі еңбегін суреттейді. Бірақ романның тақырыбы бұдан гөрі маңыздырақ та кеңірек. Сәбит Мұқанов жаңа адамдарды — советтік құрылыс тәрбиелеген қазақтардың аға және жас буындарын көрсетеді. Қарт колхозшы Сырбайдың, инженер Анатолий Владимировичтің тұлғаларын және жастардың — Айбарша мен Дәулеттің образдарын автор әсіресе сәтті жасаған. Роман Мұқановтың және бүкіл қазақ әдебиетінің үлкен табысы деп санауға болады. Роман — Қазақстанның таңдаулы жазушыларының қазіргі заман тақырыбына бет бұрғандығының куәсі...

Роман — қазақ әдебиетінің үздік құбылысы»¹ С. Мұқановтың жазушылық еңбегінің өзіндік кейбір ерекшеліктерін дұрыс түсініп бағалауда бұл пікірге соқпай өтуге болмайды.

Романда Ұлы Отан соғысы алдындағы бейбіт кезеңнің және соғыс жылдарының оқиғалары суреттеледі. Оның тақырыптық қамтуы да, сюжеттік желісі де күрделі. Романда бейнеленген оқиғалар алуан түрлі арнамен,

¹ А. Фадеев. За тридцать лет стр. 828. Москва, 1957.

олара ұласа, өзектесе дамып отырады. Автор егер романның алғашқы бөлімінде совет адамдарының сараң табиғаттың мылқау күштеріне қарсы аттанып, оны өз иілігіне жаратуға жан сала кіріскенін бейнелесе, ал шығарманың соңғы бөлімдерінде оқиғалардың өрбитін орны бірде қызу еңбек даласына, біресе оқ бүркіп, от шашқан майдан шебіне ауысып, кезектесіп отырады. Бірақ, бұл ретте сол оқиғалар өзара бөлініп алынып, жеке-дара суреттелмейді, қайта жазушы оларды кейіпкерлерінің тағдыры мен іс-әрекеттеріне байланыстыра отырып, ажырамас тұтастықта беруге ұмтылады.

Романда суреттелетін образдардың ішіндегі ең тұлғалысы, бедерлісі — Сырбайдың образы. Бұл образдың құндылығы оның көркемдік қуатында, шынайылығында. Жазушы Сырбайдың бейнесін мейлінше толық суреттейді. Автор оның өткендегі өміріне кеңінен тоқталып жатпайды. Бірақ авторлық шегіністерден және Сырбайдың өзінің ойлары мен еске алуларынан оқушы оның өткендегі өмірін көз алдына айқын елестете алады.

Бүкіл романның өнбойында Сырбайдың іс-әрекеттерінен жазушы оның еңбексүйгіштігін, патриоттық сезімдерін баса көрсетуге ұмтылып отырады. Жазушы Сырбай образын ешқандай мінсіз етіп, майдалап көрсету тілегінен аулақ. Ол кейіпкерінің бойында ескі өмірден қалған кейбір мінездер мен қылықтарды жуып-шаймай, реалистік түрде суреттейді. Сырбай ескі салт-жоралғыларға, діни нанымдарға сенеді. Бірақ, негізінен алғанда, Сырбай жаңа адам. Социалистік шындық, жаңа дүние Сырбайды азат еңбектің үлкен өрісіне шығарып, оны рухани жағынан жасартып қана қоймайды, сонымен қатар оның ой-санасын да жаңартады.

Қорыта келгенде, жазушы Сырбайдың іс-әрекеттерін де, жан дүниесін де өмір шындығына сай көрсетіп, оның шынайы образын жасады. СССР Совет Жазушылары Одағының Екінші съезінде жасаған қосымша баяндамасында К. Симонов Сырбай образын совет прозасындағы ұнамды геройлардың аса көрнекті, еліктеуге тұрарлық тұлғалы бейнелерінің қатарына қосты. Бұл — Сырбай образына берілген әділетті де жоғары баға еді. Романда Сырбайдан кейінгі тәуір жасалған тартымды образдардың бірі — Полевой. Бұл образ арқылы жазушы орыс халқының қамқорлығы мен достық мейірімін бейнелемек болған. Атап айту керек, ол бұл мақсатын

шығармасында белгілі дәрежеде орындай алған да. Мұны Полевойдың жылы шырағы мен жақсы сөздерінен ғана емес, сонымен қатар оның іс-әрекеттерінен де айқын көреміз. Полевой Сырдың суын пайдаланып, шөл далаларға жан кіргізуді, сөйтіп табиғат байлығын халық игілігіне жаратуды арман етеді. Өзінің бұл арманын жүзеге асыру жолында ол ғылымның табыстары мен халықтың тіршілік әрекеттерінің тәжірибесін өзара ұштастыра, байланыстыра қолдануға ұмтылады. Әрине, революциядан бұрынғы жұтаң да жүдеу жағдайларда Полевой аршынды адым жасай алмады. Ал совет өкіметі жылдарында, халықтың ғасырлар бойғы ежелгі игі армандары қиялдан шындыққа айналуына шексіз мүмкіндік туған шақта ғана Полевойдың іс-әрекеті өнімді нәтижелер береді. Өзінің жасы егде тартып қалғандығына және басқа да қиындықтарға қарамастан ол сырдың суын канал арқылы пайдалану ісіне елеулі үлес қосады.

Сонымен қатар Полевой образында елеулі кемшілік те бар. Автор Полевойды халықтың қалың ортасында, оның өмірімен жақын да тығыз қарым-қатнаста көрсетемін деп отырып, көп реттерде оны тым қазақыландырып алады. Бұл, әрине, Полевой образына көрінеу қиянат. Жазушы кейіпкерінің ұлттық характерін, пішін-тұлғасын шындық шеңберінде терең де айқын суреттеуге тиіс еді.

Романда суреттелетін жастар тобының ішінде ең алдымен атап айтуды қажет ететіні — Айбарша. Автор бұл кейіпкерінің өмірін кеңінен қамтып көрсетуге, оның іс-әрекеттерін барынша толық бейнелеуге тырысады. Алдыңғы қатарлы совет жастарына тән көптеген қасиеттерді, яғни кедергілерден тайсалмау, еңбек сүйгіштік, халық игілігіне қалтқысыз қызмет ету сияқты сипаттарды Айбарша образынан мол кездестіруге болады.

Бірақ, романда суреттелетін басқа геройлардың образдары жайында мұны айтуға болмайды. Романның көптеген ұнамды геройларының образдары өмір шындығына сәйкес, толық шықпаған. Бұл кемшілікті еңалдымен Рахмет, Гүлнар, Дәулет образдарының бойынан табамыз.

Романның көркемдік жақтарында да көптеген кемшіліктер бар. Жазушы бұдан бұрын, яғни «Ботакөз» рома-

ның жазу үстінде іздене жүріп тапқан творчестволық тәжірибесі мен көркемдік шеберлігін бұл шығармасында жеткілікті түрде пайдалана алмаған. «Сырдария» романы өзінің көркемдік жетілуі жағынан «Ботакөзден» көп төмен дәрежеде.

«Сырдарияның» көркемдік кемшілігі ең алдымен оның тілінен байқалады. Романда көркем де шұрайлы тіл арқылы берілген образды бейнелеулер, әсем көріністер тым аз. Жазушы образды бейнелеуден гөрі жалаң баяндауға, өз тарапынан түсіндіруге көбірек бой ұрады.

Мақала көлемімен шектелгендіктен біз романның бағалы жақтарына да, образдар жүйесіндегі, көркемдік тұтастығындағы кейбір кемшін жайларға да қысқа түрде тоқталып өттік. Қорыта айтқанда мына бір жәйт даусыз: «Сырдария» романы — бүкіл әдебиетімізде еңбек тақырыбын кеңінен толғап көтерген, шоқтығы биік шығармалардың бірі.

Таңдамалының алтыншы томына жазушының әр кезеңде жазған әңгімелері мен повестерінің бірқатары енген. Оларды автор жазылған уақыттарына қарай хронологиялық тәртіппен берген. С. Мұқановтың прозалық тұңғыш шығармасы — «Түсімде» атты әңгімесі. Мұнда ол тарих толқыны салындыдай сыртқа теуіп тастаған алаш-ордашылардың буалдыр тағдырын, жас тілекпен келген жаңа дәуірдің қуанышты сипатын символ — образ арқылы суреттейді. Жазушының әңгімелерінде адамгершілік — мораль тақырыбы да («Азғын»), Ұлы Отан соғысы оқиғалары да («Тіл алушылар», «Батыр қыз»), еңбек тақырыбы да («Алып айнаш», «Аспаз») баяндалады. Бұл әңгімелердің тәуірлерінен көркем прозаның шағын түрлеріне қажет тұжырымдылық, айқын суреттілік те сезіледі.

С. Мұқановтың алғашқы кезеңде туған повестерінің ішінен ерекше назар аударатыны — «Ақбөпенің сыры». Мұнда ол совет өкіметі қазақ әйелін күндік өмірдің адам айтқысыз азабынан құтқарып, оның алдынан жарқын болашақ ашқанын шынайы түрде суреттей алды. Тақырыбы жағынан «Жарқын жолмен» повесі де осы «Ақбөпенің сырымен» орайлас. Мұндағы Күміс образы Ақбөпе бейнесінің заңды жалғасы есепті.

Жазушы повестерінің ішіндегі ең көлемдісі әрі оқиғаға бай қызғылықтысы — «Балуан Шолақ». Бұл шығармасында жазушы тарихта болған атақты әнші-композитор

әрі кереметті күш-қайрат иесі Балуан Шолақтың өмірі мен тағдырын баяндайды.

Повесть жергілікті билеу-төстеушілер мен патшалық әкімдердің көріне ұшырап қонысынан, ата мекеннен айрылған ауылдың азалы да ауыр халін суреттеуден басталады. Бұдан әрі автор шығарманың болашақ негізгі кейіпкері жас Нұрмағамбеттің сол қысталаңға ұшыраған елі үшін кек қайтарғаны, урядниктің үйіне өрт салғаны жайында баяндайды. Халық жауларына қарсы күрестегі осы стихиялық сипат Балуан Шолақтың есейген шағындағы, тіпті бүкіл өмір бойындағы іс-әрекеттері мен тайталас-тартыстарына да ортақ. Расында да, Балуан Шолақ революциялық идеяны ұстанған саналы күрескер дәрежесіне жеткен жоқ және жете алуы мүмкін де емес еді. Повесте ол осылай суреттелген де. Бұл жазушының тарихи шындықтан шығандап кетпей, онымен орайласып, қоян-қолтық келіп отырғандығын көрсетеді.

Жазушы Балуан Шолақты еркіндікке ұмтылған, бірақ тура жолды таба алмаған, сөйтсе де күресуден жалықпаған халықтың рухын білдіруші бейнесінде, тамаша талант иесі ретінде суреттейді. Сонымен бірге автордың Балуан Шолақ жайында халық арасында таралған аңыздарды орынды-орынсыз пайдаланған да және шындыққа, өмір құбылыстарына өз кейіпкерінің көзімен қарап кететін мезеттері де бар.

Повестің тілі төгіліп тұрған бай да көркем. Яғни, онда ақын қаламынан шыққан прозалық шығармаға тән ерекшеліктер мол.

Мақаланың соңында таңдамалыға байланысты тағы да бірер пікір айту ләзім тәрізді. Таңдамалы аталғанмен, бұл томдарға жазушының таңдаулы шығармаларының талай-талайы кірмей қалған. С. Мұқанов — саяси-үгіттік, философиялық және азаматтық лирика саласында жүздеген өлең жазған ақын. Оның ішінде поэзиямыздың алтын қорына кіргендері де аз емес. Таңдамалыға ақынның сол лирикасының бірде-бір үлгісі, сондай-ақ, «Қолхозды ауыл осындай» поэмасы, «Мен кіммін деп мақтанам», «Сырласу» атты лирикалық монологтары мүлдем енбей қалған.

Жазушының драматургиясы жайында да осыны айтуға болады. Өзгесін былай қойғанда, тіпті Шоқан туралы пьесаның да таңдамалыдан орын алмағандығына таң-

дибасқа болмайды. Бұл ретте баспа қызметкерлері де, автор да ұқыптылық көрсетпеген.

Қазақ совет әдебиетінің туып-қалыптасуының басы-қасында болған, оны әрдайым кесек те көркем туындылармен молықтырып келген С. Мұқанов даңқты әрі жемісті творчестволық жол өтті. Бұл таңдамалыда сол жемісті жолдың бел-белестері, айқын да сара іздері бар.

ЖАНР ТАБИГАТЫ

Өскен, кемеліне келген әдебиет өзінің есейгендігін барлық жанрларда бірдей бірегей де тұтас танытуға тиіс. Өйткені, белгілі бір әдебиеттің өскендігі, оның даму барысы мен жолдары жайында сөз еткенде сол әдебиеттің әр саласын, әр жанрын бөле-жара, бірінен-бірі ажырата, алалап қарауға тіпті де болмайтындығы әркімге-ақ аян.

Социалистік мазмұндағы ұлттық әдебиетіміз шарықтап өсіп одақтық, тіпті дүниежүзілік аренаға шыққаны, совет әдебиетінің кейбір аса көрнекті қайраткерлерінің оған биік баға бергені жайында бізде әралуан жиналыстарда, зерттеулер мен мақалаларда әрдайым айтылып келеді. Республика жазушыларының бұдан төрт жыл бұрын болып өткен үшінші съезі де осы байлауды айқындай түскен еді. Сондай-ақ, әдебиетіміздің жедел де батыл өсе алмай кенжелеп қалып келе жатқан салалары да бар екендігі, солардың бірі — көркем әңгіме мен очерк екені де сөз болмай қалмады. Бұл қалай? Кемелдену биігіне қарай нық та бекем басып өрлеп бара жатқан әдебиетіміздің даму барысында оның жекелеген жанрларының арасында мұншалықты алшақтық болуы неліктен? Міне, жалпы әдебиетіміз үшін ерекше терең мәні бар осы бір салмақты сұрақ та сол өткен съезде заңды түрде қойылған еді. Ал осы сұрақ әлі күнге дейін өзінің өткірлігін жоғалтпай келе ме әлде енді мәселені басқаша қоюға бола ма және онда нені тілге тиек етпекпіз? Ойласу, пікір алысудың осы бағдарда өрістегені ләзім.

Әдебиетіміздің өткен жолына ой көзімен оралсақ, оның әралуан шиырларына барлай үңілсек, онда көркем әңгіме бізде әдебиеттің өгей туындысы болмағанын, ірі-ірі суреткерлеріміз бұл жанрға әруақыт қалам ұшын тигізіп отырғанын байқаймыз. Қазақ совет прозасының ең іргелі, белді шеберлерінің бірі Бейімбет Майлиннің көптеген реалистік тамаша әңгімелері, Мұхтар Әуезовтың «Қорғансыздың күні» мен «Бүркітшісі», Ғабит Мүсреповтың «Талпақ танауы» мен ана тақырыбына арналған әңгімелер циклы, С. Мұқановтың «Алтын аймағы» және басқалар — осының анық айғағы.

Бұл айтылғандар жиырмасыншы, отызыншы жылдарда әдебиетіміз көркем әңгіменің бірталай жақсы үлгілерін жарыққа шығарғанын көрсетеді. Бірақ осы игі дәстүр соғыс тұсындағы және одан кейінгі жылдардағы әдебиетте қанатын кең жайып, молынан өрістеп кете алмады. Рас, бұл кезеңде де әңгімелер аз жазылған жоқ. Орта буындағы бірсыпыра жазушылар мен көптеген жас авторлардың әңгімелері жыл сайын жеке кітап болып шығып жатты. Журналдар мен газеттерде де әңгімелер аз басылып тұрған жоқ. Бірақ солар шынтуайттап келгенде көркем әңгіменің жанрлық дамуы мен молығуында жаңа кезең тулыра алмады. Өйткені, гәп тек санда ғана емес еді. Қазақ совет прозасы мен поэзиясы әдебиетіміздің ең жетекші, өскелең жанрына айналды дегенде біздің негізгі өлшем етіп ұстайтынымыз — осы жанрларда туған шығармалардың жалпы санының молдығы емес, ең алдымен сол шығармалардың сапасы, яғни олардың идеялық тереңдігі мен көркемдік кемелдігі ғой. Ал бізде жоғарыда аталған кезеңде туған әңгімелер негізінен бұл талапқа сай болып шықпады, көркемдік жағынан тым олқы, аласа соғып жатты. Мұндай әңгімелерде авторлық жақсы идея жеткілікті көркемдік шеңберін таппағандықтан бедерлі бейнеге айналмай, жалғыз да жалағай схемалық күйде қалып қойды. Сондықтан да жазушылық шеберлікті жетілдіре түсу, суреттеу құралдарының алуан түрін жете баурау, сөйтіп творчестволық жаңа биіктерге көтерілу міндетін өткен съезд әңгімеші-жазушылардың алдына ең басты талап ретінде қартты.

Үшінші съезден бергі уақыт осы талаптың аздап та болса орындала бастағанын байқатады. Мұны жасамыз да, жас та бірсыпыра авторлардың прозаның шағын түрлерімен беріле шұғылданып жүргендігінен де, сондай-ақ бізде көркем әңгіменің дербес жанр ретіндегі мүмкіндіктерінің өрістеп кеңейіп түскендігінен де анық көреміз. Соңғы жылдары бізде бірталай әңгімелер жинақтары басылып шықты. Солардың ішіндегі ең кенеулісі де, қысқасы да — «Қазақ әңгімелері». Жинақты құрастырған С. Шаймерденов әдебиетімізде әр кезеңде туған әңгімелердің ең тәуір дегендерін таңдап алуға тырысқан. Мұнда М. Әуезов, С. Мұқанов, Ғ. Мүсрепов, С. Бегалин, Ә. Әбішев, М. Иманжановтың ертеректе жазылған, оқырман қауымға әзелден таныс бірсыпыра әңгімелері

бар. Бірақ біз оларға талдау беріп жатпаймыз. Біз жинақтағы әңгімелердің уақыт жағынан тек соңғы кезеңде туғандарына ғана назар аудармақпыз.

Әңгіме өмір шындығын қамту шеңбері жағынан роман немесе повестен әлдеқайда тарап, тапшы екендігі әркімге-ақ аян. Оны прозаның соқталы жанрларымен бұл ретте ешбір салыстыруға болмайды. Сондай-ақ оларды өзара қарама-қарсы қоюдың да ешбір қажеті жоқ.

Рас, әңгіме өмір ағысын, оның қиян-қилы шындығын, уақыт рухынан туындап жататын өткір коллизияларды тұтас күйінде, бар тереңімен көрсете алмайды. Герой тағдырының бар бұралаңын, өмірлік сапарын сарқа баяндап жату да әңгімеші-жазушының міндетіне кірмейді. Шағын шығармада ол өз геройы тіршілігінің жарқын бір көрінісін, оның характерінің бір ғана қырын көрсете алмақ.

Бірақ өмір шындығына суреткерлік қатнас, геройдың тағдыры мен талайын, іс-әрекетін, рухани келбетін реалистік тұрғыда суреттеу принципі және жалпы көркемдік әдіс жағынан алғанда романшыға да, әңгімеші-новеллашыға да қойылатын талап бірегей. Роман, повесть, тіпті эпопея сияқты, әңгіме де өмір шындығын, сезімдер мен идеялардың шындығын бейнелеуге тиіс. Сондай-ақ бұлардың тақырыптық қамтуларының арасында да ешбір ала-құлалық, артық-кемдік жоқ. Осыған орай олардың бірін әдебиеттің қиын жанрына, бірін оңай жанрына, бірін бағалы түріне, бірін арзан түріне жатқыза салуға ешбір болмайды. Роман немесе повесть жазушыдан өмір шындығын кең арналы, терең ағысты, күрделі күйінде бейнелеуді тілейтін болса, ал әңгіме де одан асқан ұсталық, творчестволық тапқырлық талап етеді. Бұл — жанр табиғатын түсіне білу, оның ерекшеліктерін баурай алу қажет деген сөз. Жинақтағы кейбір әңгімелерді осы тұрғыдан алып талдап көрелік.

Т. Ахтановтың «Қаһарлы күндер» романы соңғы жылдарда әдебиетімізге қосылған іргелі шығарма, жаңа леп екендігі даусыз. Жазушының осы жинаққа енген екі әңгімесін оқып шыққанда оның прозашы ретінде дәл осылай жазыла құлаш сермеуі кездейсоқ емес, заңды құбылыс екендігін сезінбей қалмайсың.

Бұл әңгімелердің біреуі («Алғашқы ән») қазіргі уақыт тақырыбына, екіншісі ел арасында ерте заманнан сақталып айтылып келген құй туралы бір аңызды баяндауға

арилған. Бірақ осы екеуіне тұтастай ортақ, хас бір қасиет бар. Бұл олардың тақырыптық тамырластығында, яғни екеуінде де ән мен күй өнерінің тууы жайында суреттелетіндігінде ғана емес. Уақыты, сипаты жағынан әралуан екі оқиғаны алғанмен, автор солар арқылы өлеңті де нәрлі бір ойды — саф сұлу өнер үлкен сезімнен, терең тербеністен, асқақ арманнан ғана туатындығы туралы идеяны көркем де әсерлі бейнеге түсірген. «Алғашқы ән» әңгімесі жазушының шығарма композициясын құруға шеберлігін көрсетеді. Автор әңгіме кейіпкері Серәлі композитормен және Гауһармен оқушыны салған беттен-ақ таныстырады. Бірақ ол бәрін бірден ақтара салмай, шым-шымдап ашады. Әңгімеде лирикалық шегініс мол. Осы арқылы автор оқушыны кейіпкерлерінің өткен өмірімен, әралуан тағдырымен осылайша ұтырлы таныс етеді. Серәлінің ән-күйге жастайынан ауес болғанын, өз жүрегінің тұңғыш сүйіспендік лүпілін Гауһарға арнаған әнмен айтқанын, оның Ұлы Отан соғысына қатынасканын, кейін консерваторияға оқуға түсіп композитор болғандығын, Гауһардың махаббат қасиетін шеккендігін оқушы автордың лирикалық шегіністері арқылы біледі.

Бірақ осының бәрі әңгімені шұбаланқы етіп жібермеген, оның оқиғалық орбун, шымырлығын босаң тартқызбаған. Өйткені, автор жоғарыдағы оқиғалар тізбегінің барлығын бірдей тәптіштеп баяндап жатпайды. Кейде авторлық баяндауға берілсе, кейде кейіпкерлердің еске алулары, толғаныстары, диалогтары арқылы да оқиға желісін жалғастырып, өрбітіп жібереді, емеурінмен де көп жәйттерді аңғартады.

Жазушы Серәлі тағдыры арқылы қайнаған өмірдің ортасында, терең де үлкен сезімнен туған және адамға сол абзал қасиеттерді дарытатын музыка ғана кең өріс табатындығын, ал осындай нәрлі негізінен айрылса, ол жүдеу тартып, ешкімге керексіз болып қалатындығын бейнелі түрде көрсете алған.

Т. Ахтанов «Күй аңызы» атты екінші әңгімесін күйдің күдіретті күші туралы тамаша жыр деп атаса да болар еді. Жазушы халық аңызын негізге ала отырып, ондағы өлеңті идеяны ақындық алғырлықпен терең де нәзік аша алған. Бұл шағын әңгіме-аңызда сонау бір бағы замандағы Естеместей күйшінің бақытсыз, сорлы тағдыры да, ботасы өліп суалып қалған нарды күй сарынымен идір-

ген оның құдіретті өнері де, Жанылдай қарапайым халық қызының тапқырлығы да соншалықты әсерлі суреттелген.

Осы әңгіменің екеуі де ықласпен, қызғылықты оқылады. Мұның сыры оқиға тартымдылығынан ғана туатын сырттай қызықтылықта емес, қайта ішкі тереңдіктен, психологиялық шындықтан, реалистік бейнеліліктен, оралымды да құнарлы тілден туатын саф әсемдікте.

Бір-ер мысал келтіріп қаралық. Жазушы ботасынан айрылып, жапан түзде жалғыз қалған нарды былай суреттейді: «Нардың түрі жүдеу, бүйірі солып, өркеші камшылар жағына қисая бастаған. Тамыры құраған ағаштай семіп, кішірейіп бара жатқан ірі тұлғасы, күйіс қайырмай, қыбыр етпей тұрған мүсәпір бейнесі, әсіресе телміре қараған жасқа толы үлкен мөлдір көзі екі күйшіге қатты әсер етті... Нар аяғы жерге кіріп кеткендей ырғала ауыр қозғалып бұрылды да, теңселе аяндап кете берді. Төбе құйқаны шымырлатып, зарлап боздап барады». Бұл үзіндіні оқығанда көз алдына жанды сурет келеді. Сонымен бірге мұнда мал баққан, әсіресе түйе түлігінің жайын жақсы білетін сахара елінің адамына тән жіті байқағыштық та бар.

«Нар идірген» күйінің туу сәтін де жазушы мейірлене, көсіле де толқына суреттейді. Бұл тұста да ол күйшінің шарқ ұрған шабытына, аруананы аңратып идірген домбыра сазына орай әуезді де бай тіл тапқан.

Т. Ахтанов бұл әңгімелерін «Қаһарлы күндер» романымен қатар жазды. Соның әсерінен болу керек, ол кейде, әсіресе алғашқы әңгімесінде ара-тұра реалистік штрихтармен ғана аңдатып кетерлік кейбір мезеттерді, табиғат суретін тым беріле, ұзақ баяндап кетеді.

Бұл әңгімелері арқылы Т. Ахтанов прозаның шағын түрлеріне де суреткерлік оңтайы барлығын, психологиялық талдауға шебер екендігін көрсетті. Ол бұл жанрда болашақта да қалам үзбеуге тиіс.

Соңғы жылдары еліміздің өмірінде болған ұлы өзгерістердің бірі — тың игеру жолындағы бүкілхалықтық қозғалыс. Совет адамдарының қажырлы да тегеурінді еңбегінің арқасында ғасырлар бойы сауырына қол тигізбеген шетсіз де шексіз шу асау даланың келбеті қайта жасалды. Халқымыздың бұл жасампаздық жігеріне достарымыз қуана сүйсінсе, ал капиталистік кәрі дүние өкілдерінің өздері де таңырқап «ауыздарын ашып, көздерін

жұмды». Расында да совет халқы еңбек майданындағы ерлік қимылын бүкіл әлемге паш етті.

Совет әдебиеті — өзінің табиғаты бойынша белсенді, пәрменді әдебиет. Өйткені, ол еңсесін сәт санап биік көтере түсіп келе жатқан жаңа дүниенің жаршысы. Совет әдебиетінің белсенді әдебиет ретіндегі соны сипаты халқымыздың рухани жағынан өзгеруіне оның тигізіп отырған қуатты, игі әсерінен де, бүгінгі өміріміздің шындығына шапшаң әрі батыл араласуынан да анық көрінеді. Өзінің бұл қасиетін ол тың туралы тақырыпты көтеруде де біраз танытып тастады. Рас, тың тақырыбын біздің үлкен әдебиетіміз тұтастай алғанда әзір жеткілікті баурап кете алған жоқ. Бірақ тың туралы тақырыпқа біздің әдебиетіміз молынан бет бұрғанын атап айтпасақ болмайды. Бір-ер роман, бірнеше повесть, пьесалар, көптеген очерк, әңгімелер — бұған толық дәлел. Прозаның шағын түрлері бұл тақырыпқа әсіресе мол да ұшқыр барды. Бірақ, неге екені белгісіз, жоғарыда аталған жинаққа осы тақырыпқа арналған бір ғана әңгіме кіргізіліпті. Ол — Ж. Жұмақановтың «Жаңа қоңыс» атты әңгімесі.

Қалам сілтесін әдебиеттің әр жанрында бір байқап көргенмен, Ж. Жұмақанов соңғы кезде прозаға қарай ойысты. Мұнысы дұрыс та. Өйткені, ол өз икемділігін осы бағытта тәуір танытып келеді.

Бұл әңгімесінде автор тың жерді игеру халықтың өміріне, тұрмысы мен салтына қандай өзгерістер, жаңалықтар ала келгенін шағын оқиғалар тізбегі арқылы аңдатуды мақсат еткен. Бұл ойына ол белгілі дәрежеде жете алған да.

Тың игеру жолындағы күрес «алыс өңірде жым-жырт тұрған жеті-сегіз үйлі кішкене разъездің» өмірін де жаңғыртып жібереді. Жақын жерден орналасқан тың совхозы өзінің қайнаған тіршілігінің аясына разъезді де тартады. Жазушы мұны жалпылама көріністермен де, жол қараушы Досай мен су тасушы Жақып және олардың балалары Темірбек пен Жаңылдың іс-әрекеттері арқылы да нанымды көрсетеді.

Автор Досай мен Жақып сияқты қарттардың бейнелерін әсіресе қызғылықты етіп берген. Жазушы реалистік детальдар мен шынайы штрихтар арқылы олардың ой-арманын, интеллектуальдық дәрежесін даралап суреттей алған. Бұл екі қарт сырттай тон пішіп, Темірбек пен

Жанылды атастыруды ойлайды. Бұл олардың ой өрісіне, характерлерінің шындығына снымды да. Бірақ олар, әрине, батыл әрекет жасай алмайды, көбінесе іштей тынып, сырттай тілек тілеумен болады. Ал жастар өз жүректерінің қалауын табады. Темірбек Анюта деген орыс қызымен, Жаңыл Володя деген орыс жігітімен танысады. Мұны сезген қарттар, әсіресе Жақып бұрқан-талқан болады.

Жазушы осылайша кейіпкерлерінің арасындағы көзқарас, наным, ой өрісі алшақтығынан туындайтын өткір тартысқа мензейді. Бірақ ол соны өршітіп, шиеленістіріп әкетпей, тартыс арқауын босансытып жібереді. Кемпіріне, қызына қатты ашуланған, Володяға ызасы келген Жақып ұшты-күйлі жоқ болып, бір жаққа кетіп қалады. Сөйтсе ол Москва түбіндегі бір қалаға, Володаның бұрынғы тұрған жеріне кеткен екен. Ол Володаның шешесін, қарындасын, жолдастарын көреді. Олардың арасындағы диалогты автор былай береді:

« — Володаның денсаулығы қандай?

— Біздікінде бірнеше болды, денсаулығы мықты сияқты, өзі орамды жігіт көрінеді.

— Ең жақсы адамымыз еді, — деді Семен, — комсомол ұйымы әдейі таңдап жіберген болатын.

— Заводта комсомол көп пе?

— Үш жүзден асады.

— Володя сол үш жүздің ең таңдаулысы ма еді? — деп Жақып тағы бір керек сұрағын жүгіртіп қалды.

— Иә, ең таңдаулысы еді». Осыдан кейін жазушы кейіпкерін ештеңе сезбегендей, қаннән-қаперсіз момақан күйге түсіре салады. «Жақып жаңа совхоз жайында кен отырып, шамасы келгенінше мақтай сөйледі. Тіпті Жақып осы заводтан дәл бір жаңа совхозға қосымша адамдар алуға келген арнаулы өкіл сияқты көрініп кетті,» — деп баяндайды автор. Әрине, мұның бәрі оқушыда жасандылық сезімін туғызады. Жазушы Жақып Володаның кім екенін жақсырақ білу үшін оның туып-өскен жеріне әдейі барды деген емеурін жасайды. Бірақ мұның да еш орайы жоқ. Өзі сәтті тауып ала білген тартыс желісін жеріне жеткізе өрбітіп барып таркатқанда, геройының іс-әрекетін оның характерінің шындығына сәйкестендіріп бере білгенде Ж. Жұмақановтың әңгімесі бұдан да тәуір бола түсетін еді.

Көркем әңгімеде автордың негізінде бір ғана өзекті идеяны тандап алғаны және оқиғаны соның төңірегінде өрбіткені, қосалқы желілерге көп алаңдамағаны жән. С. Шаймерденовтың «Көршінің кесірі» атты әңгімесінде бала тәрбиесі тақырыбы қозғалады. Бұл тақырыпқа ол «Болашаққа жол» романында да барған болатын және оны жас адамның қалыптасу жайымен ұштастыра шешуге тырысқан еді. Ал мына әңгімесінде ол басқаша тәсіл қолданады, салыстыру әдісін пайдаланады.

Әңгімені ересектер де, балалар да қызыға оқиды. Мұның сыры онда бала да, ересек те кейіпкерлердің барлығында ғана емес. Автор солардың характерін, іс-әрекетін қызғылықты суреттей алған.

Оқушының көз алдынан екі түрлі ана, екі түрлі бала өтеді. Әлпеш баласы Тұрарды құр жақсы көріп өбектегеннен, әншейін әлпештей бергеннен басқаны білмейді. Ал Гүлжәмиланың характері, түсінігі бұдан өзгеше. Ол баласы Қамбарды өмірге икемді, еңбекті жақсы көретін, ширақ та елгезек етіп өсіреді. Автор кейіпкерлерінің осындай әралуан характері мен іс-әрекеттерін осылайша қарама-қарсы қоя, салыстыра отырып, шебер тоғыстырады, оқушыға ой тастайды. Әңгіменің «Көршінің кесірі» аталуында да астар бар. Мұнда автор Әлпештің ой аңғарын, райын танытады және ишара юмормен қағытады. Тұрардың қиын халге душар болуы көршінің кесірінен емес, шындап келгенде Әлпештің өзінен, оның теріс тәрбиесінен.

Автор бала кейіпкерлеріне, әсіресе Әлпешке сөздік сипаттаманы орайлы тауып бере білген. Сөйтсе де, әңгімеде біраз шұбалаңқылық, бірсарындылық барлығы байқалады.

Соңғы жылдарда бізде көркем әңгіменің тақырыптық аясы кеңі бастады. Бұрын газет, журнал беттерінде жарияланған немесе жекелеген жинақтарға енген әңгімелер көбінесе мал шаруашылығының маманы, еңбек ері жайында болып келетін. Әрине, бұл айтылғандардан мұндай тақырыптарға әңгіме жазбау керек деген ұғым тұмайтындығы өзінен-өзі түсінікті. Қайта бұл тақырыптарға жазған үстіне жаза беру қажет. Сонымен бірге басқа да көптеген тақырыптар барлығын, соларды да қамту керектігін естен шығаруға болмайды. Мұны ұлан-ғайыр бай өміріміздің алуан түрлі шындығының өзі талап етеді.

Қазір бізде өндіріс тақырыбына, техникалық интеллигенция жайына арналған әңгімелер жиі бой көрсете бастады. Солардың ішіндегі ең тәуір, маңыздыларының бірі — Т. Нұртазиннің «Мазасыз жан» атты әңгімесі. Мұнда айқын характерлі, алуан сырлы жандар бар. Солардың ішінде әсіресе жарқын көрінетіндері — заводтың бас конструкторы Орлов пен заводтың директоры Сабыр Тайлақов. Бұлардың екеуі де өз зауыдының мерейі үстем болуын тілейді, сол үшін жан сала күреседі. Бірақ олар бірінің бірі көлеңкесі, көшірмесі емес. Жазушы кейіпкерлерінің бейнелерін, характерлерін еркін даралай алған. Сабыр өз ісіне мығым, бір тоға байсалды, ой топшылауы жүйрік, нағыз шаруақор адамның кейпін танытса, ал Орловта тыным таппай ізденгіштік, жаңалыққа жан сала ұмтылушылық басым. Осыған орай оның мінезі де өткір, албырт, өзі тура тілді. Ол талай кедергілерге де душар болады. Бірақ орта жолда қалып қоймайды, дегеніне жетпей тынбайды. Ақыры ол өзінің жаңашылдық ұсынысын, жаңа станның жобасын өткізеді.

Жазушы бұл екі кейіпкерінің әр сәттегі көңіл толқындарын, жан қалтарыстарын да нанымды ашып тастап отырады.

Әңгімеде өз мінезімен, өзіндік тұлғасымен танылатын кейіпкерлердің бірі — Никитин. Министрлікте техникалық басқарманың бастығы болғанмен ол — өмірден қалып қойған, жаңалыққа қарай баспайтын, кеңсекүшік, консерватор жан. Автор оны тікелей суреттемейді. Бірақ Сабыр мен Орловтың ой толғаныстары, ол жайындағы сөздері және оған қатнасы арқылы оқушы оның қандай адам екенін тапжылтпай танып отырады.

Жалпы алғанда Т. Нұртазин бұл әңгімесі арқылы жазушылық қабілетін, өмір шындығынан құнарлы ситуацияларды, оқиғаларды мол қарбытып алуға, адам характерлерін тап басып таба білуге икемділігін танытты. Бірақ әңгімеде бір елеулі ақау бар. Бұл оның тілінің ала-құла, кедір-бұдырлығында. Мәселен, мынадай тіркестерде қандай көркемдік барлығы бізге беймағлұм: «Ташкент-кабель» заводы жоғары бағалап қабылдаған «ВМ-14» стан бас конструктордың проект жасауда бас болып қатнаскан, ішінен шыққан перзент. Владимир Владимирович оның бойына орынсыз мін тағуына қандай төзбесе, бойынан табылған мінді бүркеп қалуға

одан бетер көнбейді. Сондықтан ол станнан табылған елеулі олқылықтарды білуге асықты».

Көркем шығармада, оның ішінде әңгімеде де кейіпкерлердің сөз байлауы, ой тұрғысы және ішкі монологтары авторлық баяндауға әсер етіп отыратын шақтары болады. Өйткені, бұл — кейіпкердің жан сарайын, сөйлеу ерекшеліктерін айқынырақ байқату үшін қажет жанама тәсілдердің бірі. Бірақ бұған орайлы кезеңде, ділгір болған шақта ғана бару керек. Әйтпесе, шығарма тілі шұбарланып кетпек.

Әңгіме жанрына соны тақырып, творчестволық тың тыныс әкелген жазушылардың бірі — Зейін Шашкин. Ол көбінесе өзіне жете таныс дәрігерлер өмірі жайында жазады.

Көркем әдебиеттің міндеті — адамды рухани жағынан байыту, ой өрісін кеңейту, оны өмір сүруге, күресе білуге үйрету екендігі аян. Бірақ ол мұны дидактикалық күйде емес, бейнелі түрде береді. Дидактика неғұрлым тереңде жатса, шығарма солғұрлым ұта түспек. 3. Шашкиннің бірсыпыра әңгімелері осы қасиетті жақсы танытады.

«Дәрігер қатесі» атты әңгімесі 3. Шашкиннің шығарма композициясын құруға, диалогқа шеберлігін байқатады. Сырттай қарағанда дәрігер қателігін суреттеудің жазушы үшін ешбір қажеті жоқ сияқты. Қайсыбіреулердің мұнда қандай идея болуы мүмкін деп ойлауы да ықтимал. Шындығында бұлай емес. Жазушы әралуан адамдардың характерін, іс-әрекетін, өзара тартысын, жаза басуларын оқиға барысында ашып беру арқылы бейнелі түрде тағлым айтады. Бірақ әңгімеде авторлық позицияның ара-тұра көмескі тартып кетуі оның жалпы құндылығын біраз әлсіретеді.

3. Шашкин реалистік штрихтарға, психологиялық сипаттама беруге, кейіпкерлерінің ішкі монологтары арқылы оларды мінездеуге шебер екендігін «Дос ойы» атты басқа бір әңгімесінде әсіресе мол аңғартады. Жас дәрігер қыз Гүлсімнің сүйіспендік сырын, махаббат тағдырын баяндай отырып жазушы астарлы түрде тағы да ғибрат айтады және оны соншалықты нәзік жеткізеді. Бұл әңгімеде де әртүрлі характер, әралуан кейіпкер бар. Жазушы олардың барлығын бас-басына арнайы суреттеп жатпайды. Тұрар да, Әли де көбінесе Гүлсім арқылы көрінеді. Жазушы Гүлсімді әртүрлі оқиғаларға, қиян-қи-

лы сезім дауылдарына душар етеді. Солардың бәрін бастан кешіре жүре Гүлсім әрнәрсені барлай аңғаратын, өмірге ойлы көзбен қарайтын болады. Жазушы мұны нанымды суреттейді. Өмірде Әли сияқты ал бетте сүйкімді болып көрінетін аярлар да, Тұрар тәрізді тұнық сырын тереңдете ұстайтын абзал жандар да бар. Олардың алғашқысынан сақтана, соңғысын тани білу керек. Автор Гүлсімнің махаббат тағдыры арқылы оқушыны осындай ой аңғарына меңзейді.

3. Шашкиннің ең тәуір әңгімелері оның өмірге жіті үңіліп, адамдарымыздың бойындағы жақсы қасиетті, жаңа қарым-қатнастарды көре білетінін, суреткерлік сергектігін танытады.

Қазақ совет әдебиетінде көркем әңгіме жанрын дамытуға зор үлес қосқан, осы жолда тынымсыз да мол еңбек сіңірген жазушылардың бірі марқұм Мұқан Иманжанов еді. Республика жазушыларының үшінші съезіне дейін ол оқушылар қауымына «Алғашқы айлар» повесін, бірнеше пьесалары мен әңгімелер жинақтарын ұсынды. Өмірінің соңғы кезеңінде ол көбінесе әңгіме жанрымен шұғылданды. Оның бұл әңгімелері 1955 жылы «Тыңдағылар» деген атпен жеке кітап болып шықты. М. Иманжановтың творчестволық мұрасы тақырыптық жағынан әралуан. Бірақ солардың барлығына ортақ бір қасиет болатын. Мейлі қай тақырыпқа жазса да, совет адамдарының адамгершілік үлкен қасиеттерін, жан қуатын бейнелеуге өзінің суреткерлік назарын ең алдымен аударатын. Жазушының соңғы әңгімелер жинағы да оның сол бағыттан тапбағандығын, айнымағандығын көрсетіп еді.

Әңгіменің жанрлық ерекшеліктері оның көлемінің шағындығында ғана еместігін, оның өзіне тән табиғаты, ішкі заңдылықтары барлығын біз жоғарыда орайы келгенде айтып едік. Әңгімеші-жазушы осыны ескеруге, солардың шегінен шығып кетпеуге тиіс. Бірақ мұны жазушының іздену өрісін тарылту, оның қиялына тұсау салу деп ұқпау керек.

Біздіңше, шағын әңгімеде толып жатқан оқиғаларды камтимын деп әрекеттенудің қажеті жоқ. Шағын әңгімеде көбінесе бір ғана типтік оқиғаны алып, соның әлеуметтік мәнін терең ашып көрсеткен жөн. Ал егер әңгімеде бірнеше оқиға суреттелсе, олар ажырамас тұтастықта алынуға және бірінен бірі заңды түрде туын-

дап жатуға тиіс. М. Иманжановтың жазушылық манерасына осындай ерекшелік хас еді. Оның «Үй» деген әңгімесінде бірнеше оқиға желісі бар. Бірақ жазушы осы оқиғалардың ыңғайына түсіп, әрқайсысын өз алдына баяндамайды. Әңгіменің кейіпкері Гришаның басынан кешкен оқиғаларын, оның Надямен және суретші Сәлімовпен арасындағы жайларын жазушы кейіпкерлердің өз атынан берілген баяндаулар арқылы шебер аңғартады.

Бұл әңгімеде диалог ерекше қызмет аткарып тұр. Мұнда диалог кейіпкерлердің не жайында сөйлескенін білдіріп, олардың характерлерін айқындап қана қоймайды, сонымен қатар автордың болған оқиғаның ішкі мәнін тереңірек аша түсуіне де септігін тигізеді.

Әңгімеде сырттай бұрқырап, қабындай өрбіп жатқан тартыс жоқ. Ол көбінесе психологиялық сипатта өрістейді. Жазушы шығарманың оқиғалық желісін кейіпкерлерінің сыр-сезіміне, олардың характерлерінің шындығына сәйкестендіре отырып өрбітеді. Бұл оның әңгімесіне лирикалық шырай, ерекше бір жұмсақтық береді.

Жинаққа енген әңгімелердің ішінде арнайы тоқталуды қажет ететіндерінің бірі — «Есеновтың тағдыры». Мұнда жазушы тың игеріп жатқан жерге келіп қызмет етіп жүрген Есенов деген хирургтың тағдырын суреттейді. Әңгіменің бас жағында Есеновтың өз ісіне қалтқысыз берілген адам екені, сондықтан да жұрттың бәрінің оны сыйлайтындығы баяндалады. Осыдан кейін жазушы оқыманды кейіпкерінің өткен өміріне үнәлдіреді. Бұл ретте ол сөзді кейіпкердің өзіне береді. Яғни, әңгіменің негізгі өзекті оқиғасы кейіпкердің атынан баяндалады.

Жазушы баяндаудың мұндай тәсілінің қиындығына қарамастан кейіпкерінің рухани дүниесін, психологиясын әсерлі бейнелеген. Есенов университетте өзімен бірге оқыған Биғайша деген қызды сүйеді. Бірақ түрлі себептермен оның бұл сезімін суытуына тура келеді. Кейіпкердің осы тұстағы жан толқындары, ішкі тебіреністері нәзік те әсерлі берілген.

Біздің әдебиетімізде соңғы жылдарда сатиралық бағыт кең өріс алды. Алға қарай қажырлылықпен дамуымызға қырсығын тигізетін кеселдерді, ескіліктің әсерінен арылып болмаған адамдарды әшкерелейтін уытты шы-

фармалар әдебиетіміздің қай жанрында болса да туя бастады. Бірақ дәурені өткен, келешегі жоқ ұнамсыз құбылыстарды әшкере етуді тек арнайы сатиралық шығармалардың ғана үлесіне беріп қою жансақтық, ағаттық болар еді. Сатиралық уыт пен әшкерелеушілік сарындарды қандай шығарманың болмасын сюжеттік арқауына араластыруға болады. Гәп тек суреткердің сол ұнамсыз құбылыстарды жіті көріп, әшкерелеушілік құралдарымен өткір түнрей алуында.

М. Иманжанов жақсылыққа жаны құштар, жаңалыққа інкәр жазушы еді. Ол өзінің шығармаларында көбінесе игі де жарқын нәрсені бейнелейтін. Сонымен бірге ол соңғы кезде өз талантының соны бір қыры, яғни сатирашылық қабілетін де анық таныта бастап еді. Жазушының «Аттаным алдында» деген әңгімесін мысалға алып қаралық.

Әңгіменің кейіпкерлері Зейінгүл мен Қәрім ойда жоқта танысады. Келбетті, инабатты жас жігіт қыз жүрегін тез баурайды. Екі жас ұғынысқандай болады. Үкімет пен партияның үндеуіне жауап ретінде жастар тыңға аттануға дайындалады. Осы еріктілердің жиналысында Қәрім жалынды сөз сөйлеп, жастарды тыңға аттануға шақырады. «... Кімде-кім Отанды сүйсе, оның көркеюін тілесе, кімде-кім халқымыздың игілігі жолында даламызда жаңа өмір бастап, тұрмысымызды шалқытқысы келсе, ол адам бөгелместен тыңға тартады, ендігі еңбекті тыңнан бастайды...» — деп жар салады ол. Қәріммен және өзінің құрбыларымен бірге тыңға Зейінгүл де аттанбақ болады. Бірақ шынтуайттап келгенде Қәрім тыңға барудан жалтарарды және ол Зейінгүлге де қалада қалуды мәслихат етеді. Зейінгүл сүйген жігітінің мұндай зымияндығынан жирене түңіледі. Өйткені, жаны жалған адамның сезімінде де адалдық болмақ емес. Ақыры Зейінгүл құрбыларымен тыңға аттанып кетеді, ал Қәрім жалғыз қалып қояды. Ол өз сазайын осылай тартады. Мұндай аяр жанды адамдар сүйіктісі, жолдастары түгіл, қысылшаң кезде Отанды, халықты сатып кетуден де тайынбайды. Олар әдемі-әдемі сөздер айтады. Сырт көзге мінсіз болып көрінеді. Сондықтан да олар әсіресе қауіпті. Іште жатқан сұмдығын көлегейлеп жасырған мұндай адамдарды тани да, олардан сақтана да білу керек. Әңгіме оқушыны осындай ой түйініне әкеледі. М. Иманжановтың тыңдағылар туралы шығармалары

осы тақырыптас әңгімелердің ішінде ең бір тәуірлері деп атауға әбден болады. Ден саулығының әлсіздігіне қарамастан ол тында талай рет болып, ондағы өмірді сарыла, көп зерттеді. Осындай көп ізденудің нәтижесінде жазушының көлемді де күрделі шығарма беретіндігі шәксіз еді. Бірақ, қыршынынан үзілген талант бұл ойын тамамдай алмай кетті.

Прозамызды, оның ішінде көркем әңгіме жанрын дамытуға М. Иманжанов аз үлес қосқан жоқ. Оның адам атын ардақтау рухына толы, ойлы да жарқын творчестволық мұрасынан жас қаламгерлер көп нәрсе үйрене алмақ.

Жас прозашыларымыздың ішінде әңгіме жазумен ден қоя шұғылланып жүрген авторлар аз емес. Солардың ішінде Б. Сокпақбаев, Р. Әутәліпов, Қ. Исабаевтың есімдерін ең алдымен атауға болар еді.

Бұрын балаларға арнап көптеген қызғылықты да татымды шығармалар жазған Б. Сокпақбаев көркем әңгіме тудыруға да өзінің ысылып қалғандығын, кемелдену жолында келе жатқанын танытады. Соңғы кезде ол тақырып кендігіне ұмтылып жүр. Оның «Бекен», «Ортақ қуаныш», «Нағашы» сияқты әңгімелері нәрлі идеясымен де, көркемдік құнарлығымен де назар аударады. Жас жазушы құйтырқы, шытырман ситуациялар іздеп жатпайды, қарапайым оқиғалардан да көңіл аударарлық, ой саларлық мағна таба біледі.

Б. Сокпақбаевтың «Мен былай үйлендім» деген әңгімесі кезінде жұртшылық арасында екіұдай пікір туғызды. Оны қызғылықты шынайы шығарма деушілер де, идеясы күнгірт, көмескі сарынды нәрсе деп бағалаушылар да болды. Расында да әңгіменің оқиғасы қызғылықты, тілі де шұрайлы. Сонымен бірге мұнда жазушының өзіндік бір тың авторлық тұрғы ұстағаны, басқалар жүріп өткен жолды тағы да қайта шиырлағысы келмегендігі сезіледі.

Әңгіменің ұзын-ұргасы мынадай: Әңгіменің негізгі кейіпкері Бектас Нағима деген келіншекпен кездеседі. Екеуі ұғынысқандай болады. Бірақ артынан бұлар бір-бірімен көріспей, аралары үзіліп кетеді. Бектас Галя деген қызбен танысады. Бірақ ақырында ол Нағимамен қайта кездесіп, ақыры соған үйленеді. Мұнда автор оқиға желісін өзгеше өрбітеді, тартыс талқысын жана-ша шешуге ұмтылады. Адамгершілік, мораль тақыры-

бына арналғанмен, мұнда жадағай ғибрат, көрнеу ділмәрсү жок. Оның ықыласпен оқылатыны да осыдан. Бірақ осы тәуір әңгімеде елеулі бір кемшілік бар. Бұл автордың әңгіме кейіпкерлерінің бірі Галяның тағдырына енжар салғырттықпен қарауы, оның рухани драмасын тереңдеп ашпауына байланысты. Әңгіменің ең соңында мынадай бір жолдар бар: «Ал әлгі Галя болатын болса, ол да бір тамаша ақылды қыз еді. Реніш туғызудың орнына қайта Нағиманың маған қосылуына көп кеңес беріп себін тигізді. Бірақ кейін онымен бірге оқыған бір жолдас қызына кездескенімде оның бірнеше ай бойына қатты күйзеліс шегіп, жүдеп кеткенін айтты».

Дәл осы арада автор әрі жалған, әрі келте айтып отыр. Кейіпкерді де, оқырманды да бұлайша бастан сипап, алдарқатудың не қажеті бар? Галя да — жүрегі, сезімі бар жан ғой. Оның қызғанышы, көңіл налысы, сыр-толғаныстары қайда? Автор оны неге тереңнен толғап, нанымды суреттемейді. Әлде ол мұның бәріне үнілсем, шығармаға қосалқы желілер енгізіп шұбалтып аламын деп ойлаған болар.

Бірақ бұл да — жансақ ұғыныс. Шағындық, тұжырымдылық көркем әңгіме үшін, әрине, мейлінше қажет. Әңгімеде әрбір эпизод, жекелеген деталь, әр фраза орнымен келуі және тиісті қызмет атқаруы керек. Көркем сөздің нағыз шеберлерінің өз шығармаларында ойлы да қажетті шағындыққа ұмтылып отырғаны — біздің жазушыларымыз үшін үлкен өнеге. Бірақ шағындықты дара қасиет етіп алып, шығарманы қайткенде де қысқа етуге тырысудың қажеті жок. Шығарманың идеясы терең, толық ашылған күнде ғана оның шағындығы өзін өзі ақтайды. Ал бұлай болмаған жағдайла шығарма тым келтеленіп, сырдаң тартып кетеді. Жас жазушы осы жәйтті бекер-ақ ескермеген.

Б. Соқпақбаевтың бірсыпыра әңгімелері юморлық, сатиралық сарында жазылған. Оның «Кездесу», «Балалар мен аналар», «Көйлек мәселесі» сияқты әңгімелері езу тартқызар, жаймашуақ жылы юморға толы. Бірақ автордың нағыз уытты сатираға, ащы сарказмға көтерілмейтін сәттері бар. Оның «Сөгiс» деген әңгімесін мысалға алып қаралық.

Бұл әңгімеде ішкілікке салынған екі адамның арасындағы оқиғалар баяндалады. Әңгімедегі аяқ киім

фабрикасының уақытша директоры Сартымбетовтың өң кабинетінде көзі жасаурап, ауық-ауық есіней түсіп, «манаурай беруінің себебін» оқушы кешікпей-ақ біледі. Ол... біраз ішіңкіреп алған екен. Сартымбетов мұнымен де тынбайды. «Жоғарғы жактан» қаймыққан ол өзінің бөтелкелесі Қасымовка маскүнемдігі үшін сөгіс жариялайды. Қасымов бұған өкпелеп қалады. Бірақ екі дос кешікпей қайта табысады. Екеулеп Қасымовтың сөгісін «жуады» және енді «қызмет уақытында ішуден тиылуға» уәделеседі. Осыдан кейін автор әңгімені былайша аяқтайды:

« — Тағы жүз грамм құйып жіберіңіз! — деді Қасым буфетші әйелге.

Екеуі стакандарын сыңғыр-сыңғыр соғыстырды да, шалқая беріп, тастап-тастап жіберді».

Бұл әңгімені оқып шыққанда автордың өзі жазып отырған материалды жете зерттегенін, кейіпкерлерінің, яғни ішімдікке салынған адамдардың өмірін, психологиясын жақсы білетіндігін аңғару қиын емес. Әңгіменің тілі де нәрлі, шұрайлы. Кейіпкерлердің диалогтары арқылы да автор олардың характерлерін оқушыға айқын сездіреді. Мұның бәрі де жақсы. Бірақ ең басты нәрсе мұнда емес. Осы әңгімесінде автор оқушыға нені көрсетіп, нендей идея ұсынып отыр және қалай ұсынып отыр? Міне, мәселе осында.

Жоғарыда айтылғандай, әңгіме кейіпкерлері — маскүнем жандар. Әңгіменің аяғында олар қызмет уақытында арақ ішпеуге (қызметтен бос уақытта ішіңкіреп алуды олар тіпті де теріс көрмейтін тәрізді және кейіпкерлерінің мұнысына автордың өзі де онша қарсы емес сияқты) уәделеседі. Бірақ олардың бұл уәделерін орындауы да тым күманды. Әңгіменің бүкіл өнбойындағы олардың іс-әрекеттері де, шығарманың ең соңында стакандарды сыңғырлата соғыстырып, шалқая беріп тастап-тастап жіберуі де (бұл сәтті автор да мейірлене, тілдің майын тамыза суреттейді) мұны анық байқатады. Сөйтіп, автор өзінің маскүнем кейіпкерлерін зілсіз ғана қағытады, олардың «қызық» қылықтарына сырттан қарап езу тартады. Мүмкін, жазушы ішімдікке салынған адамдарда пәтуа, тұрлау болмайды деген ойды аңғартпақ мақсат көздеген шығар. Бірақ бұл да жеткіліксіз, мұнымен ақталуға болмайды.

Мұндай өткір тақырыпты, яғни тұрмыста әлі кездесетін

ең бір зарарлы кеселге қарсы күрес тақырыбын бұлайша шешуге, әрине тіпті де болмайды. Автор мынадай халге душар болған кейіпкерлерін өткір әшкерелеуге және бұл тұста өзін бейтарап ұстамай, суреттеліп отырған оқиғаларға, кейіпкерлерінің іс-әрекеттеріне деген ешқандай ымыраға келмейтін өзіндік қатнасын айқын танытуға тиіс еді. Бірақ ол бұлай етпеген. Соның салдарынан өзі каншама мәнерлеп, құлпырта суреттегенімен оның әңгімесі идеялық құндылығы жағынан биіктеп кете алмаған.

Автордың өзі де мұны жақсы сезген болу керек. Өйткені, кейін «Туысқан» атты әңгімесінде ол осы тақырыпқа қайта барғанда мүлдем басқаша авторлық қатнас аңғартты. Мұнда жазушы әңгіме кейіпкері Әбдіғалық дегеннің маскүнемдігін, байлаусыздығын жер-жебіріне жетіп, тамтығын қалдырмай әшкерелейді. Бұл ретте ол ұтырлы оқиғалар, дөп тиетін өткір эпизодтарды тапқырлықпен іріктеп ала білген.

Б. Сокпақбаевтың бір тақырыптас осы екі әңгімесін салыстыра талдағанда сатиралық шығармада авторлық позицияның айқын да берік, уытты болып келуінің каншалықты маңызы барлығын, ал ол көмескі берілсе, шығарма идеясы да солғын тартатындығын анық көреміз.

Жас жазушылардың ішінде прозаның шағын түрлерімен беріле шұғылданып жүрген және осы саладағы өзіндік ізденулерін, қалам сілтесін айқын танытқандардың бірі — Р. Әутәліпов. Оның «Сабантой», «Юбилей», «Алуа», «Нан-тұз» «Әке досы») атты әңгімелері шынайы прозаға тән байсалдылық, есейгендік аңғартады. Бұлардың ішінен соңғы екеуін әсіресе бөліп айтқан жөн. «Алуа» атты әңгімені тіпті шағын повесть деп атаса да болар еді. Өйткені, мұнда өз бойларына лайық іс-әрекетпен, характерімен дараланып берілген бірсыпыра кейіпкерлер, көркемдік тиянақ тапқан бейнелер бар. Солардың ішінен автордың ең мейірлене әрі жеткізе суреттеген кейіпкері — Алуа. Жазушы оның семьялық тұрмысын да, еңбектегі өмірін де, адамгершілік қасиеттерін де соншалықты нанымды, ерекше бір жылылықпен көрсете алған. Алуаның майданда жараланып қайтыс болған сүйікті жары Уақасқа деген айнымас та адал сезімінен, атасы Шаманы аса қадір тұтып ізег көрсетуінен, ұстамды да тұнық мінезінен нағыз қара-

пайым қазақ әйеліне тән рухани тазалық, жан қуаты сезіледі. Автор да кейіпкерінің осындай абзал қасиеттерін ешбір әсіресе қылдыққа, сыртқы жалтылдақтыққа бой ұрмай, байсалдылықпен нанымды түрде ашады. Әңгіменің Шама, Мағаз, Күдері, Ақыш сияқты кейіпкерлері де өз бойларына сай сипаттарымен көрінеді. Олар да — өзімізге таныс, өмірде ұшырасатын жанды адамдар. Бұларды да осылай суреттей алуы, әрине, автордың шеберлігін танытса керек.

Көркем әңгіменің кімнің атынан және қалай баяндалуының да мәні ерекше. Әңгіме оқиғаларын кейіпкерлердің өз атынан баянлау әсіресе киын. Мұнда баяндау әрі шығарма идеясын оқушыға әдеттегідей толық жеткізуге әрі әңгімелеуші кейіпкердің характеріне, ой өрісіне, интеллектуальдық дәрежесіне сәйкес болуға тиіс. Бұл ретте кейіпкер автордың өз тілімен сөйлеп кетпеуіне, болып жатқан оқиғаларды автордың тұрғысынан қарап бағалап қоймауына мұқият болу керек.

Көптеген жас жазушылар осыны ескере бермейді. Р. Әутәліпов те кейде осы кемшілікке бой алдырып қалады. Оның «Нан-тұз» атты тамаша әңгімесіне де осы бір кемшілік сәл де түсіріп тұр.

Бұл әңгімеде украин және қазақ халықтарының арасындағы достық көрсетілген. Әңгіме кейіпкерлерінің бірі Тищенконың бейнесі арқылы автор украин адамының достыққа беріктігін, оның жолдасқа деген кең пейілі мен мол мейірімін әсерлі суреттейді. Бірақ осы жақсы әңгімеде, жоғарыда айтқанымыздай, бір олқылық бар. Әңгіме бір жас баланың атынан, соның ойы тұрғысынан баяндалады және онда сол жас баланың ой-өрісі, зердесі жете бермейтін көп жайлар айтылады. Сондықтан да әңгіме кейбір реттерде оқушыда жасандылық сезімін туғызады. Яғни, кейіпкер өз бойына шақ тілмен сөйлемей, авторға тән сөздерді айтады. Осы кемшілік жылы лепке, шын ықыластық сезіміне толы бұл әңгіменің әсер етушілік күшін едәуір солғындатып тұр.

Бірақ тұтастай алғанда Р. Әутәліповтың әңгімелері ысылып, ұшталып қалған шеберлік танытады. Жас жазушы кейіпкерлерінің лирикалық ішкі монологтарын беруде әсіресе нәзік алғырлық көрсетеді. Осы тәсіл арқылы ол кейіпкерлерінің жан дүниесін әсерлі ашып қана қоймайды, сонымен бірге шығармасының сюжеттік арқауын да қызғылықты етіп, ширата түседі.

Р. Әутәліпов әңгімелерінің тілі шұрайлы, суретті. Ол **сырттай** жалпылап, әйтеуір әдемі сөздерге үйір емес. **Суреттеп** отырған нәрсесін дәл жеткізіп берерлік тіл табуға ұмтылады. «Алуа» атты әңгімеде түнгі далада жанған оттың суреті былай берілген: «Қурай мен тобылғы түтінсіз жанып, жалынын сиырдың тіліндей соза, шалқусыз маздатады. Абайсыз салынған дымқыл отын ғана әбден қызғанша пыс-пыстай бытырлап, сансыз ақ нокаттарын жан-жаққа ұшыра түтіндейді. Ұшқын шөп басындағы мөлдіреген шыққа түсіп жылт-жылт ете қалады да, ілезде сөніп жатыр». Мұны оқығанда көз алдына сурет елестейді. Сондықтан оған сенесің. Жас жазушыда қуатын тереңге жасырып баяу аққан салмақты стиль бар. Бұл одан болашақта көп үміт күтуге негіз береді.

Біздің жазушыларымыз соңғы кезде шет жұрт тақырыбына да молырақ бара бастады. Мұндай шығармалар әңгіме жанрында да бой көрсетіп келеді. Бұл тақырыпқа ең көп жазып жүрген жас жазушы Қ. Исабаев. Ол Германия шындығынан алып бірсыпыра қызғылықты шығармалар берді. Сөйтіп, жас жазушы Батыс Германиядағы қайыршылық тұрмыс туралы да, жаңа Германиядағы азат өмір жайында да қазақ оқырманына бейнелі түрде едәуір мағлұмат берді.

Қ. Исабаевтың бұл шығармаларының ішіндегі ең тәуірі — «Эльбаның ашуы». Мұнда ол совет елінің неміс халқына достық құшақ жайғанын, ескі көзқарастар мен түсініктер бұзылып, адамдардың ой-санасы жаңғыра бастағанын образ-символ арқылы бере алған. Автор суреттеп отырған халқының өмірін, тұрмысы мен психологиясын біртоға жақсы біледі. Бұл оның әңгімелеріне шынайылық сипат бітіреді.

Қ. Исабаев өз өміріміздің шындығынан алып та бірталай әңгімелер жазды. Солардың ішінде атап айтуға тұрарлығы — «Қыз құпиясы». Автор оқиға желісін қызғылықты етіп тартуға, кейіпкерлеріне психологиялық сипаттама беруге жап-жақсы төселіп қалған. Бірақ оның әңгімелеріне тұтастай бір ортақ кемшілік бар. Бұл оның тіліндегі доғалдыққа, олақтыққа байланысты.

Рас, соңғы әңгімелері оның тілінің біраз ұшталып та ұстарып қалғанын байкатады. Дегенмен, оның бұл салада әлі де болса көп ізденуі керек.

Соңғы жылдары жас талаптардың да бірсыпыра әңгіме-

лері жарыққа шықты. Солардың ішіндегі ең оқшауы, әсерлісі — Тобық Жармағамбетовтың «Екі жүрек» атты әңгімесі. Жас автор сюжет өрбітуде, композиция құруда, кейіпкерлерін мінездеуде балапан шабытына орай албырт ойнақылық та, кәнігі суреткерге тән ысылғандық та байқатады. Оның мына әңгімедегі қалам сілтесінен көп үміт күтуге болатындай.

Біз бұл мақалада соңғы кезде, яғни өткен «съезден бергі уақытта туған біраз әңгімелерді мысалға ала отырып, солардың көркемдік ерекшеліктері мен олқылықтарын талдауға және әдебиеттің осы бір қиын да қажетті жанры жайындағы кейбір байқаулар мен топшылауларды ортаға салуға тырыстық.

Сөз болып отырған уақыт ішінде көркем әңгіме бізде сан жағынан да көбейді, сапа жағынан да есейе түсті, оның жанрлық өрісі, мүмкіншіліктері біраз кеңейді. Бірақ ол бай да құнарлы өмірімізді тереңнен камтып, кеңінен толғап суреттеді, замана пафосын сездіре алды деп тұжырым жасауға болмайды. Әңгімеші-жазушылар әдебиетімізді әлеуметтік тынысы кең типтік бедерлі бейнелермен молықтыра алмай келеді.

Көркем әңгіме жанрының шын мәнісінде белең алып өсіп кете алмай отырғанына сын да кінәлі. Бізде көркем әңгіме жайына арналған ойлы, байсалды зерттеулер жоқ, ара-кідік жеңіл де шағын рецензиялар ғана ұшырасады. Тіпті өзгені былай қойғанда өткен съезде жасалған негізгі баяндамада әдебиетіміздің осы бір маңызды саласы жайында бар болғаны: «Прозамыздың енді бір кемшілігі — ұсақ жанрлары тым шабан өсіп келеді. Бұлар прозаның бұтағы, жапырағы сияқты. Бұларсыз көркеймейді проза» — деген тәрізді жалпылама да келте сөздер ғана айтылғанына таңданбасқа болмайды.

Аға жазушылар да әңгіме жанрымен шұғылдануды мүлдем қойып алды. Рас, прозаның эпопея, роман, повесть сияқты соқталы түрлері аса қажет. Бірақ бұл әңгіме жазуға бөгет жасамасқа тиіс. Ұлан-ғайыр эпопея, роман, повестері мен тамаша әңгімелерін қатар жазған Толстой, Тургенев, Горький сияқты ғажайып суреткерлердің творчестволық тәжірибесі осыны көрсетеді.

Сондай-ақ кейбір жас жазушылар да әңгіме жанрын атап өтіп, романға немесе повеске бірден бас қояды. Кейбір аса туған таланттары болмаса, солардың та-

лайы-ақ қаламдарынан қайрылып, беттерін қайтарып алады. Ал шындап келгенде көркем әңгімемен шұғылдану олардың жанрда тұрақтауына, шеберлікке төселуіне мүмкіндік берер еді.

Әрине, бұдан әңгіме — әдебиеттің оңай, өтпелі жанры деген ұғым еш тумады. Керісінше, көркем әңгіме әдебиеттің ең қиын, күрделі жанрларының бірі. Бірақ осыған орай бұл жанрдың бойындағы творчестволық мүмкіндіктер де ұшан-теңіз. Гәп тек жазушыларымыздың сол мүмкіндіктерді сарқа пайдалануында, жанр табиғатын терең де жете баурауында, сөйтіп суреткерлік шеберлікті ұстарта, жетілдіре алуында.

ҚАҢАРЛЫ КҮНДЕР ТЫНЫСЫ

СССР совет Жазушылары Одағының осы жылғы февральда болып өткен пленумы совет әдебиетінің қырық жылдық тарихын қорытындылады. Осы мәселе бойынша негізгі баяндама жасаған жазушы Николай Тихонов коммунистік асқақ идеалдардың жаршысы — совет әдебиетінің кесек табыстарын атап көрсетті, оның творчестволық өзгешелігін, сонылық ерекшеліктерін саралап ашты. Кең байтақ Отанымызды мекендеген халықтардың түрі ұлттық, мазмұны социалистік әдебиеттерінің мәуелеп өсуі — біздің социалистік реализм әдебиетінің ең басты сипаттарының бірі. Н. Тихонов өзінің баяндамасында осы мәселеге әсіресе мол назар аударды. Әралуан ұлттар жазушыларының талантты өкілдері өздерінің таңдаулы шығармалары арқылы бүкілодақтық советтік әдебиетке кенеулі үлес қосып, оны молықтыра дамытып отырғандығын ол қуаныш сезімімен айтты. Н. Тихоновтың жақсы бағалаған осындай шығармаларының бірі — қазақтың жас жазушысы Тахауи Ахтановтың «Қаһарлы күндер» атты романы.

Бұл роман — Т. Ахтановтың шын мәнісіндегі тұңғыш көлемді шығармасы. Бұдан бұрын ол біраз әңгімелер, бірді-екілі шағын пьесалар және жазушы Ғ. Мүсіреповтың творчествосына арналған сын-библиографиялық очерк жазған болатын. Ол көркем аударма саласында әсіресе мол әрі жемісті еңбектенген еді. Міне осының бәрі жас жазушыны үлкен өріске меңзегені, оның қаламын ұштай түскені даусыз. Бірақ сырттай қарағанда бұл еңбектерді сөз болғалы отырған кесек реалистік көркем романның айқын хабаршысы, творчестволық кең құлаш ұрудың шүбәсіз кепілі деп қарау қиын тәрізді еді. Шындығында да, бұл роман оқушы үшін де, автордың өзі үшін де өзгеше бір жаңалық, творчестволық ашылыс болды. Осы романы арқылы Т. Ахтанов өзінің творчестволық мүмкіндігі мол суреткер екендігін бірден-ақ айқын танытты.

«Қаһарлы күндер» романы Ұлы Отан соғысы тақырыбына арналған. Еліміздің тарихындағы осы бір ұлы кезенді, өмір мен өлім шарпысқан сол бір сұрапыл отты күндердің қатал да қайсар шындығын бейнелеу — қа-

лам қайраткерлері үшін қиын да, қасиетті де міндет. Совет адамдарының Ұлы Отан соғысының ай-күндерінде көрсеткен ғажайып ерлік істерін, патриоттық қимылдарын баяндайтын шығармалар біздің әдебиетімізде аз жазылған жоқ. Орыс совет жазушылары А. Фадеевтің «Жас гвардия», М. Бубенновтың «Ақ қайың», К. Симоновтың «Күндер мен түндер», А. Бектің «Арпалыс», Б. Горбатовтың «Бағынбағандар» атты романдары мен повестерін былай қойғанның өзінде қазақ совет жазушылары да Ұлы Отан соғысы тақырыбына арналған бірнеше кесек туындылар берді. Ғ. Мүсреповтың «Қазақ солдаты», Б. Момышұлының «Бір түннің тарихы», Ә. Нұрпейісовтың «Күткен күн» («Курляндия»), С. Бакбергеновтың «Талғат» атты шығармалары — бұған анық айғақ.

Авторларының өмірлік және творчестволық тәжірибесінің өзгешелігіне, суреткерлік алғырлығының әралуандығына қарамастан аталған романдар мен повестерде және осылармен тақырыптас басқа да көптеген шығармаларда сол бір айбарлы жылдардың мол шындығы, қажырлы пафосы бар. Бірақ Ұлы Отан соғысы тақырыбы әдебиетімізде өзінің жан-жақты қырымен, зор эпопеяларға ғана снымды терең шындығымен сарқыла суреттелді, тұтас көрінді деп айту қиын. Халқымыздың бақытын, азаттығын қорғап қалған еңіреген ерлердің білек күшімен, жүрек қанымен жазған батырлық дастандары көркем образ тіліне толық түсіріліп болған жоқ. Ұлы Отан соғысы жайында жазылған әрбір кесек шығарманы оқушы жұртшылықтың мол ықласпен қабыл алатындығы да осыдан.

Біздің совет әдебиетінде әскери тақырыпты қозғауда және оны шынайы шешуде творчестволық тәжірибе аз жиналған жоқ. Бірақ қаншалықты тұлғалы, күрделі болғанмен кез келген шығарма өз аясына бүкіл Армияның не тұтас бір майданның өмірін сиғыза алмақ емес. Ең басты мәселе сол соғыстың негізгі сипатын, психологиясын, уақыт рухын сездірте алуда. Міне советтік әскери беллетристиканың ең таңдаулы шығармаларына хас осы қасиет Т. Ахтанов романында да баршылық. Т. Ахтанов романының оқиғалық аясы тұтас дивизия аумағын ара-тұра ғана қамтиды. Автор көбінесе жеке-леген полк, батальон, рота, взводтардағы жауынгерлік қимылдарды баян етеді. Бірақ бұл оның шығармасы-

ның өрісін тарылтпайды, идеялық тынысын әлсіретпейді. Керісінше, көптеген совет офицерлері мен жауынгерлерінің батырлық әрекеттерін, сұрапыл майдан үстіндегі олардың ой-арманын, сезім дауылдарын, рухани тұлғасын көркем бейнелей отырып, жазушы Ұлы Отан соғысының шешуші бір кезеңінің сұсты да қайсар шындығын елестете алған. Яғни, романдағы басты-басты кейіпкерлердің көпшілігінің дерлік прототиптері өмірде болған адамдар, даңқты Панфилов дивизиясының офицерлері мен қатардағы жауынгерлері. Сондай-ақ, романның майдан өмірін тікелей суреттейтін бөлімдері мен тарауларының сюжеттік арқауы да Москва түбіндегі атақты шайқастардың оқиғаларына құрылған.

Әрине, бұдан «Қаһарлы күндер» романы сол әлуетті айкастардың құр сұлдері, хроникасы деген ұғым тумасқа керек. Рас, Панфилов дивизиясының бүкіл әлемді таңқалдырған батырлық қимылдары жайында әдебиетімізде бұрын да көптеген шығармалар жазылған болатын. Бірақ Т. Ахтанов солардың көлеңкесінде қалып қоймаған. Адамдарымыздың қажырлы ерлігіне, терең патриотизміне толы осы бір тақырыпты ол өзінше шешкен.

Жазушының творчестволық даралығы мен өзіндік ерекшеліктері романның ең алғашқы беттерінің өзінде-ақ бой көрсете бастайды. Сырттай қарағанда романның басталуы соғыс тақырыбына жазылған талай-талай шығармаларды еске түсіретін сияқты. Бірақ, бұл — ал беттегі өткінші, үстірт қана әсер. Авторлық баяндаулардың ішкі сырына қаныққан сайын, оның геройларының жан түкпіріне неғұрлым терең үңілген сайын жанағы әсерден арыла бастайсың. Романдағы алуан тағдырлы адамдардың жан-күйі, олардың автор нәзік байқағыштықпен, суреткерлік емеурінмен сездіретін рухани дүниесінің қат-қабат сырлары барған сайын ынтықтыра түседі. Бұл романның шығармалық шымырлығын, әсер етушілік қуатын аңдатса керек.

Роман болашақ жауынгерлердің майданға аттануын суреттеуден басталады. Жазушы үлкен өмірдің боямсыз, шынайы көріністерін осы тұстың өзінде-ақ, салған жерден қарбыта қамтып, жарқырата ашып тастайды. Кейіпкерлерінің өміріндегі осындай шешуші, өтпелі мезетке жазушы назары әлдеқалай түсе салмаған. Бұл — олардың ой-армандарының, мінез-құлық қайсарлығының сынға түсер сәті. Өзінің ең аяулы, қимас та қадір-

мен дүниесі: туған жер, өскен ел, жылы мекен, тату-тәтті семья — барлығы да артта қалып бара жатқанын және алда оқ бүркіп, от шапқан майдан даласы, екі-талай болашақ күні тұрғанын сезіну кімге болсын оңай емес. Мұнда да әркімнің-ақ жан түкпірі танылып қалады. Т. Ахтанов кейіпкерлерінің неси армандап, немен тыныстантынын ұтырлы аңдататын осындай орайлы кезеңді тап басып, табжылтпай тауып ала білген. Жалпы алғанда геройларының сезім шындығына терең бойлап, ақтара ашуға ұмтылуы, авторлық баяндаудың реалистік мәнерінен айнамай, көркемдік тұтастықтан ауытқымай отыруы — Т. Ахтановтың көркем прозаның күрделі түрлерімен шұғылданушы шеберлерге мейлінше қажет қасиеттерді молынан баурай бастағандығын байқатады.

Өзінің композициялық құрылысы, оқиғалық өрбуі жағынан бірінші тарау романның басқа бөлімдерінен гөрі сәл оқшаулау тұрады. Онда бүкіл тарауға тұтас арқау болып жатқан кесек оқиға, күрделі желі жоқ. Керісінше, автор лирикалық шегіністерге мол орын берген. Бірақ мұны да шығарманың көркемдік тұтастығына дақ түсіретін селкеулік деп қарауға еш болмайды. Шығарма композициясын құрудағы мұндай ерекшелік автордың көркемдік үнемділікке ұмтылу жолындағы ізденулерінен туған. Бұл тарауда жазушы әрбір эпизод арқылы, әрбір лирикалық шегініс арқылы басты-басты кейіпкерлерінің тағдыры мен талайын, өткен өмірін, жан күйлерін реалистік қалыпта қонымды әрі қызғылықты етіп бейнелей алған. Батальон командирі Мұрат, полктың штаб бастығы Купцианов, взвод командирі Ержан, сержант Добрушкин, жауынгерлер Қартбай, Көжек, Кәкібай, Бондаренко және басқа да көптеген кейіпкерлер өздерінің кескін-келбеттерімен де, мінез-құлық ерекшеліктерімен де оқушыға біртоға жақын танылып қалады. Бұлар романның соңғы тарауларында өздерінің батырлық істерімен, патриоттық қимылдарымен көрінеді. Шығарманың бір тарауынан екінші тарауына, бір эпизодынан екінші эпизодына ауысқан сайын олар да биіктей береді, өз характерлерінің соны бір қырларын аша түседі. Сөйтіп, автор роман геройларын олардың өз характерлерінің шындығына, арман-тілектерінің тереңдігіне немесе тайыздығына орайлас өсіріп не құлдыратып отырады. Қайткен күнде де оның геройлары сірескен

статикалық күйде қалып қоймайды. Олардың бейнелері өздерінің лайықты логикалық және көркемдік тұтастығына қарай өрбіп отырады. Мәселен, егер Мұрат, Ержан, Қартбай және басқалар сұрапыл соғыстың небір ауыр тауқыметтерін бастан кешіре, үрейлі сезімдермен қобалжыған көңіл налыстарын жеңе отырып ширғағын шыңдалса, ал Уәли сияқты атаққұмар аялдар өздерінің жолдастарына, Отан-анаға опасыздық жасауға дейін барады. Әрине, бұл да — өмір шындығынан алынған ақиқат жәйттер. Өйткені, Ұлы Отан соғысы — тек әскери техниканың өзара қақтығысуы емес, сонымен бірге адам характерлерінің, ар-намыс пен арсыздықтың, қайсарлық пен үрейшілдіктің, патриотизм мен опасыздықтың арасындағы да аяусыз арпалыс еді. Автор осы шындықты көркем мүсінделген адам образдары арқылы нақтылы көрсетеді.

Егер жазушы өзінің геройларын — әскери адамдарды өне бойы тек шабуыл үстінде көрсетсе және оларды «отқа салса жанбайтын, суға салса батпайтын» қияли «жансебілдер» етіп бейнелесе, ол жасандылыққа ұрынар еді. Т. Ахтанов мұны жақсы түсінген. Ол совет жауынгерлерінің қасақы жауға қарсы шабуылға шыққан сәттерін де, бекініс жасаған кездерін де, орайы келгенде уақытша кейін шегінген мезеттерін де тұтас алып суреттейді. Әрине, шегіну қай жағынан болсын оңайға түскен жоқ. Ол қарапайым халыққа да, әскери адамдарға да ауыр тиді. Осы жәйді автор мынадай бір шағын эпизод арқылы нанымды суреттейді: «Генерал-лейтенант жүзін мұң шалып, Панферовқа тереңдей қарады. Өңі сұрланып, төмен қарап отырған Панферов басын көтеріп, командашыға байсалды көз тастады.

— Дұрыс айтасыз. Халық қазір де елендеп, бізден күн сайын жақсылық хабар күтеді. Сол хабарды кешіктіріп тұрмыз ғой.

Бұдан бір жеті бұрын менің штабым анау кейін қалған дивизиялардың бірінде тұрды, — деді генерал-лейтенант өткен бір істі есіне алып. — Қолхоздың ба, сельсоветтің бе біреуінің кеңсесіне орналасқанбыз. Сыртқа шығып келе жатсам, алдымда бір кемпір мен шал тұр екен. Бас изеп өте беріп едім, кемпір адъютанттың «не шаруаңыз бар, бөгеменіз» дегенін елең етпей, алдымнан көлденең тұра қалды. Өзі де жойқын кемпір екен. Командашы мырс етті. — «Маған нағыз генералдың өзі

керек, сол сенбісің», — деді «Я, мен едім», — дедім. «Еңдеше айтып мына шалға, қарағым. Туған жерден көшеміз деп мағамды алды. Неместерді тоқтатасыңдар ғой, соншада аңшы мына кемесің, туғаным», — деп орысша мықшып тайнып тұрып алды. Бетіне қарасам, байұс кемпірдің менің мақұлдап жауап береріме еш күмәні жоқ екен. Қатты қысылып қалсам да, бірақ «көшкендерің жөн болар» демеске шарам болмады. Кемпір «денің сау ма» дегендей маған таңырқай қарады. «Сонда қайда барасыңдар. Екі аттасаң артыңда Москва тұрған жоқ па?!» деді зекіп. — Генерал-лейтенант түйіліп темен қарап, аз іркіліп, саусағымен столды шертті. — Вот такие дела.

— Халыққа жауап беру оңай емес, бірақ жауап бермей жалтара да алмайсың, — деді Панферов...» (141—142 беттер).

Біз осы ұзақ үзіндіні әдейі келтірдік. Өйткені, бұл көп жайды аңғартады. Еңалдымен: мұнда сонау қырық бірінші жылғы күзде Москва түбінде болған сұрапыл шайқастардың қатал да қайсар лебі бар. Халықтың өз Армиясына артар үміті мен салмағын да, қарапайым орыс адамдарының туған жерге деген патриоттық ыстық сезімін де автор жаксы аңғарта алған. Сондай-ақ, әскери стратегия мен тактиканың орайлылығы мен орамдылығы тек шабуылға шығуда, кескілесе сайысуда ғана емес. Біздің Армия шегіне отырып та жаудың қанды шенгелін майыра, жайрата білді. Т. Ахтанов осыны тек жекелеген эпизодтар ғана емес, сонымен бірге тұтас оқиғалар тізбегі арқылы және шығарманың бүкіл рухы арқылы да сездіріп отырады.

Жазушы жауынгерлердің тұңғыш рет майданға араласқан кездегі толқынған көңіл күйлерін де, олардың іштей кобалжуды бірте-бірте жеңіп шырыға бастағанын да реалист-суреткерге тән сергектікпен көрсете алған. Жүрегінің түкпірінде жасырынған сырын өзінің сүйікті зайыбына да айтуға тайқакситын Кәкібай, зарығып көрген жалғыз ұлының жайдары жүзінен басқаны білмеген аккөңіл, анқау Көжек сияқты бұйығы жауынгерлер әскері қатал тұрмысқа, сұрапыл соғыстың тауқыметіне бірден үйреніп, көндігіп кете алмайды. Бұларды әскери еңерге баулып тәрбиелеуде Ержан сияқты командирі және қарулас достары аз еңбек сіңірмейді. Сөйтіп, автор өз геройларын әскери уставтың

кигидаларын ғана жаттап алған және содан басқаны білмейтін көзсіз ерлер бейнесінде емес, өмір шындығынан алынған кәдімгі қарапайым жанды адамдар ретінде суреттейді. Өзінің реалистік шеберлігін де, майдан өмірін, әскери тұрмысты терең білетіндігін де осы тұста жақсы танытады.

Романда кескілескен ұрысты тікелей көрсететін жарқын тараулар, жауынгерлік эпизодтар аз емес. Солардың ішінде әсіресе оқшау танылатындары — Мұрат батальонының, Ержан взводының, Қартбай мен Көжектің қоршаудан құтылып шыққаны және Москва түбіндегі ең соңғы қаһарлы да қатерлі айкас жайында баяндалатын беттер. Егер қоршаудан шығу жолындағы қимылдарда совет жауынгерлері әскери тактикаға жетіктігін, тапқырлығын танытса, ал Москва түбіндегі шайқастар суреттелетін эпизодтар ерлік пафосқа, асқан батырлық рухқа толы. «Темір шыдамаған» сұрапыл сойқанға «адам шыдағанын», совет жауынгерлері әскери техникасы басым, саны артық қасақы жауға қасарыса соққы бергенін жазушы зор шабытпен суреттеген.

Сөйтіп, роман фашист қарақшыларының Москва түбінде қаусап жеңіліп, маскара болып кейін қашуын, біздің адамдарымыздың жеңіс қуанышына бөленіп мерейі үстем болғанын баяндаумен аяқталады. Орыс шалы Ерофей Максимовичтің Ержанға айтқан мына бір сөздерінде көп мағна бар:

«— Қарағым,— деді ол даусы бұзылып.— Бәрін естідім. Мен орыстың қартайған шалымын. Орыс мекені өртенгенде өзегім өртенбейді дейсің бе?.. Бәрің осылай соғысқасын... Қандай жау алмақ бізді!» (368 бет). Романның ең соңында айтылған осы бір сөздерден оның бүкіл идеялық тынысы сезілетіндей. Совет адамдарын ешбір жау, ешқашанда ала алмақ емес. Т. Ахтанов осындай езекті патриоттық идеяны, халқымыздың жеңілмес жігерінің өшпес лебін өз шығармасының бүкіл рухы, сюжеттік арқауы, оқиғалар өрбуі, геройларының образдар жүйесі арқылы көркем де шынайы бейнелей алған.

«Қаһарлы күндер» романында толыққанды әрі соны да қызғылықты көптеген образдар бар. Тек алғы лекте алынып бейнеленген кейіпкерлердің мөлшері оннан астам. Автор өзінің басты-басты геройларының барлығына дерлік тың тыныс беріп, жан бітіре алған. Солардың

ішінде жазушының әсіресе мейірлене әрі мол суреттейтіндері — Ержан мен Мұрат.

Автордың өз сөздерімен айтқанда «Ержан қарапайым казактардың арасында өсті. Олар оны атқа мінгізіп, мал қайтартып, жылқыға құрық салғызып үйретті. Өз білгенін, өз түйгенін бұған да берді. Ғажайып ертекттерін, хатқа түсірмей сақтаған жырларын тыңдатты» (32 бет). Оның өмірінің бұдан былайғы кезеңдері — онжылдық мектеп пен әскери училище. Жазушы мұның бәрін қазбалап, тәптіштей баяндап жатпайды, лирикалық шегініс немесе геройлардың өз басының ой-толғаныстары арқылы аңғартып тастайды. Оқушы Ержанды алғашқыда өмірден көргені мен түйгені әлі аз, балалық табынан, жастық бұйығылықтан арыла қоймаған қарапайым офицер ретінде біледі. Ол іштей алыс арманға берілуден де аулақ емес. Аркадий Гайдар он алты жасында полк командирі болғанын, Щорс жиырма екі, жиырма үш жасында үлкен әскерді басқарғанын кітаптан оқып білген Ержан жұрт таңқалатын ерлік қимылдар жасауды, даңққа бөленуді де қиялдайды. Мұның бәрі де оның жас шамасына және әлі ауыртпалық көрмеген албырт характеріне сиймды. Бұл — тек Ержан ғана емес, жас офицерлердің талайына бірдей ортақ, әрі ыстық арман. Сөйтіп, жазушы өз геройларының тағдыры, ой-талабы арқылы көпке тән күйлерді қозғайды.

Бірақ арман мен шындық үнемі бірдей және оп-оңай қабыса бермейді. Тек жан қуаты мол, табанды да тапқыр күрескер жандар ғана мұрадына жетпей тынбақ емес. Жазушы Ержанның майдандағы өмірін осы тұрғыдан алып суреттейді. Соғыстың от-жалыны оның адамдық характерін де ширатып толыстырады, әскери жағынан да шындайды. Ержанның өз взводын қоршаудан алып шығуын және өз жауынгерлерін жауға қарсы ұрысқа тайсалмай баруға баурай білгенін жазушы көптеген жарқын эпизодтар арқылы шынайы да нанымды суреттейді. Ержанның әр кездегі, әр жағдайдағы түйсінудері арқылы берілген батальдық көріністер әсіресе қызғылықты оқылады.

Жазушы Ержанның жан дүниесін де терең ашып көрсетеді. Туып-өскен далаға, жауынгерлеріне деген ыстық құштарлығы, өзінің сезім-сырлары мен іс-әрекетіне әрдайым көңілі толмай, қомсына қарайтын кішіпе-

ілідiгi, адалдығы, ойшылдығы, кейде албырт қиялшылдығы оның рухани тұлғасын айқындап та, даралап та тұрады.

Романда Ержанның Раушанға деген саф таза, мөлдір махаббаты әсіресе тартымды, өзгеше бір жарастықпен бейнеленген. Бұл тұста да жазушы әсіреқызылдыққа, арзан жаркылдақтыққа бой ұрмайды. Ол кейіпкерлерінің іс-әрекеттерін солардың өздерінің жан диалектикасынан, характерлерінің шындығынан іздейді. Сондықтан оның суреттеуінде Ержанның Раушанды шын жүректен, жастық албырттықпен беріле сүйі, бірақ қыз ықласын емін-еркін баурай алмауы, Раушанның жаза басып, айықпас өкінішке ұрынуы, Ержан басында болған іштей шарпысқан екіұдай сыр-сезімдер, ақыр аяғында оның ерлікпен қаза тапқан Раушанды кешіре де аяй, тебірене ұнатуы — бәрі де реалистік қалыпта әрі психологиялық жағынан шыншыл да нанымды.

Жоғарыда автор адам образдарын даралап бейнелеуге оңтайлы деп едік. Оның осы шеберлігін тіпті сырттап қарағанда тағдыры мен талайында біраз ұқсастық бар геройлардың дара-дара образдарынан анық байқаймыз. Жазушы Ержан сияқты Мұратты да жау қоршауын бұзып шығу, қорғаныс шебін жасау, жаумен қоян-қолтық соғысу үстінде көрсетеді, оның да сүйіспендік тағдырын баян етті. Бірақ осы екі кейіпкер характері, психологиялық күйлері жағынан өзара қаншалықты ұқсамайды.

Мұраттың өмірден алған тәжірибесі мол, көргені мен түйгені көп. Оның еркі күшті, характері әбден қалыптасқан. Мұраттың әскери ой өрісі де кең. Полктың штаб бастығы Купциановпен пікір таластарынан, кескілескен ұрыс кездерінде батальонды және кейіннен полкты шебер де тапқыр басқаруынан оның бұл қасиеті жақсы байқалады. Мұрат әскери стратегияға жүйрік, командирлік толғамы кең. Москва түбіндегі шайқастың стратегиялық сипаты туралы оның Купциановпен айтысын жазушы былай береді:

«— Жауды тоқтататын ақырғы рубежге аз шығынмен жету әркімнің арманы екені рас. Сол үшін жонымызды тосып бұға беру керек пе? — Мұрат Купциановтың қарсы дау айтқысы келген ажарын танып, тез сөйлеп кетті. — Сіздің айтып отырғаныңыз істің бір ғана жағы. Ал біз үшін ең басты міндет — қадам басқан сайын

жауды қансырата беру. Сіз Кутузов тактикасын айттыңыз. Негізінен ұқсастығы болғанмен, біз оны айнытпай қайталамаспыз. Біз тарихи спектакль қойып жүрген жоқпыз. Москваны да бере алмаспыз» (95 бет). Мұраттың осыдан ой тереңдігіне мензес іс-әрекеті де кесек, тегеурінді.

Мұраттың жеке басының күйлері, әсіресе оның Айшаға деген махаббаты суреттелетін эпизодтар да адамгершілік ыстық сезімдерге, өзгеше бір қызулы лиризмге толы. Бұл кейіпкерлердің тағдырына, іс-әрекеттерінің шындығына, рухани сезімдерінің мөлдірлігіне оқушы қалтқысыз сеніп, қоса тебреніп отырады. Автордың лирикалық шегіністері арқылы баяндалатын Мұраттың балалық шағы және «шынжыр балақ-шұбар төс» Дербісәлімен тартысы романның көркемдік болуы қалың, бейнелілік қуаты мол, ең бір тартымды беттерін құрайды.

Жалпы алғанда «Қаһарлы күндер» романындағы Ержан, Мұрат, Раушан, Айша образдары әдебиетіміздегі тұлғалы герсйлар қатарына қосылатын тың бейнелер болып табылады.

Романдағы орыс кейіпкерлерінің образдары жайында бір-ер сөз. Өздерінің шығармаларында орыс адамдарының бейнелерін жасау проблемасына біздің ақын, жазушыларымыз көптен бері назар аударып келеді. Бұл көзір игі дәстүрге айналды. Бірақ осы проблема біздің әдебиетімізде өнебоіы сәтті шешілді деп айту асыра сілтегендік болар еді. Көптеген жазушыларымыз бен ақындарымыздың шығармаларында орыс адамдары жанды кейіпкерлер ретінде бейнеленбей, шартты түрде, схемалық қалыпта суреттелетін. Оларда айқын ұлттық сипат, адамға тән даралық қасиет бола бермейтін. Біздің әдебиетіміз қазір бұл олқылықтан батыл арылып келеді. Онда орыс адамдарының небір жарқын да соны бейнелері жасалды. Қазақ совет прозасының шеберлері М. Әуезовтың, Ғ. Мүсреповтың және басқа да көрнекті жазушыларымыздың шығармаларынан мұны анық байқаймыз.

Әдебиетімізде беки бастаған осы өнімді принципті Т. Ахтанов та бекем ұстанған. Оның романында Василий Кусков, Зеленін, Земцов, Ерофей Максимович, Фильчагин, Корыстылев, сондай-ақ Купцианов, Добрушкин сияқты орыс адамдары өзіндік даралықпен, тек

өздеріне ғана хас ұнамды қылықтарымен немесе әлсіздіктерімен ерекшеленіп бейнеленген. Автор олардың әрқайсысының дерлік бойына шак іс-әрекет беріп, ой өрісіне, рухани дәрежесіне қонымды тіл бітіре алған. Бұлардың ішінен әсіресе Кусковты ерекше атауға болар еді. Адамгершілік зор қасиетке, патриоттық ой-сезімге толы осы геройының образы арқылы жазушы атакты жиырма сегіз панфиловшылардың бірі, даңқты политрук Клочковтың тұлғалы бейнесін мүсіндеген.

Көркем шығармада герой образының тұтас, толыққанды болып жасалуы оның әйтеуір көп суреттелуіне, оған орынды-орынсыз мол назар аударыла беруіне байланысты емес. Орайын тапқан автор эпизодтық геройлар арқылы да көп жәйді аңғарта алады. Шебер суреткер онтайлы штрихтар мен детальдар, кейіпкерлерінің айқын репликалары, ішкі монологтары арқылы да образдың табиғатын, мән-сырын ашып бере алады. Т. Ахтанов романынан осындай образдардың да әралуанын ұшыратуға болады. Мәселен, Дәурен, Жексен қарт, Василиса Ивановна және басқалар осындай бейнелердің қатарына жатады.

Мақала көлемімен шектелгендіктен романдағы образдар жүйесіне бұдан әрі тоқталып жатпаймыз. Өйткені, әрбір образдардың әлеуметтік ішкі сырына тесіле үңілу, олардың көркем де жанды бейнелер ретіндегі ерекшеліктерін талдап ашып, түбегейлі сөз қылу — бұл мақаланың мақсаты да, міндеті де емес. Бұл тұста тек романның ұнамсыз кейіпкерлері болып көрінетін Купцианов пен Уәлидің образдары жайында бір-ер сөз айта кету қажет сияқты. Біздің әдебиетімізде, әсіресе жас жазушылардың прозасында ұнамсыз кейіпкерлер айқынырақ суреттеліп, ұнамды геройлар схемалық қалыптан аса алмай, көмескі тартып кететін сәттері болушы еді. Ал Т. Ахтановта бұлай емес. Ол ұнамды планда алынған кейіпкерлерін, әсіресе басты-басты геройларын соқталы етіп шығаруға, сомдап беруге творчестволық қайрат-қажырын қапысыз жұмсауға тырысады. Бірақ оның ұнамсыз кейіпкерлері дәл мұндай дәрежеге көтеріле бермейді. Мәселен, оның Купциановы да, Уәлі де — автордың идеясы, творчестволық позициясы тұрғысынан қарағанда біртоға шынайы жасалған, характерлер дараланып берілген бейнелер. Осы кейіпкерлерінің образдарын, олардың табиғаты мен мінез-құлқы-

ның әлеуметтік сырын тереңірек ашқанда және солардың іс-әрекеттеріне байланысты туындап жататын тартыс талқысын өршіте, шіңелістіре түскенде — жазушы тек ұтатын еді. Рас, автордың Уәли мен Ержанды, Купцианов пен Мұратты қатар алып, карама-карсы қоя отырып суреттейтін сәттері бар және онысы қызықты да. Бірақ дәл мынадай кең тынысты, кесек шығарма үшін олқы соғып тұрғандай.

Енді романның көркемдік ерекшеліктеріне байланысты кейбір байқағандарымыз бен әсерлерімізді баяндауға ауысалық. Рас, жоғарыда біз романның тақырыбы, әлеуметтік тынысы, идеялық мазмұны жайында сөз еткенде ара-тұра көркемдік талдауға да назар аударып отырдық. Бірақ шығарманың сөз өнері туындысы ретіндегі өзіндік ерекшеліктері, автордың жазушылық шеберлігінің әралуан қырлары мұндай азды-көпті ойлардың аясына симайтындығы хақ.

Қандай жазушының болмасын негізгі суреткерлік құралы — оның тілі. Сондықтан, еңалдымен романның тілі жайында бірер сөз. Қазақ совет прозашыларының аға буыны өкілдерінің, кәнігі суреткерлеріміздің тілімен салыстырып қарағанда Т. Ахтановтың тілі лексикалық жағынан соншалықты бай, мол сезіле бермейді. Бірақ оның тілінің бейнелілігін, суреттілігін және тазалығын ерекше атап айтпасқа болмайды. Авторлық баяндауларда да, геройлардың өздерін сөйлеткенде де, олардың әр сәттегі алуан түрлі көңіл күйлерін шерткенде де ол дәл сол мезетке, дәл сол жағдайға бояуы, мағнасы жағынан тура келетін сөз тауып қолдануға тырысады. Бұл оның тілінің оралымдығын танытады. Бір-екі мысал келтіріп қаралық:

«Тау қапталынан шыққан поезд даланы үңгіп тауыса алмай келе жатқалы екі күн болды. Толқындары қыртыстанған алып мұхит сияқты шексіз, шетсіз дала жатыр. Сәскеде алыс қырларды сұйық көгілдір мұнар шалып тұрады да, түске таман сол мұнар сағым болып төгіледі. Ұшан даланы көкпенбек су қаптап кетеді. Сол әсем су дірілдей құбылып, асығыс ағып бара жатады. Әр жерде арал болып төбелер көрінеді. Бір кезде ерке сағым-су ойнақтап сол төбелердің де басын жуып өтеді. Қалың селдің ортасынан зәулім ақ сарай теңкиіп шыға келеді де, бір сәтте ап-аласа боп жерге жабысып қалады. Теңіз ортасынан биік бойын көкке созып хайуан

шығады, ол суға қайтадан сүнгіп бара жатқанда бір сәтке түйе бейнесіне түседі. Бүктетіліп, орғып, жүйткі ағып бара жатқан сағым-су түс қайта талықсығандай шабандай береді де, бір сәтте ғайып болады. Бетінен көк жібек пердесі сыпырылып, адырлы жалпақ дала ажарсыз жүзін көрсетеді». (31 бет).

«Добрушкин ұзын бойлы қапсағай, сәл еңкіштеу. Қиымында әскери жинақтылықтан гөрі мысықтың ептілігіне ұсайтын бір шапшандық бар. Бетінде әжім жоқ болғанмен, өңі ескі. Жас шамасын ажырату қиын. мұндайлар кейде отызда, кейде қырықтың аржағында болады. Добрушкиннің дауысында, бүкіл тұлғасында, бет әлпетінде, иі түскен қайыстай, көңіл аударып, көз токтатарлық ешнәрсе жоқ. Тек кісіні сипап көргендей әккі көзқарасы ғана оның өзіндік қасиетін аңғартқандай. «Әй, бір, талайды көрген, жырынды боп қалған қу боларсын» деп ойлады Мұрат». (19 бет).

Алғашқы үзіндіні оқып қана өтпейсің, бояуы құлпырған әсем де ойнақы суретті көз алдына елестетесің. Тек далада туып өскен, оның құбылмалы да шалқар, жадау да жарқын стихиясын сезінген суреткер ғана осылай жаза алмақ. Бұл жазушының тіл байлығын ғана емес, әсерлену мен сезінулерінің молдығын да байқатады.

Ал екінші үзіндіде геройдың басқа бір кейіпкердің түйсінугі арқылы берілген портреттік сипаттамасы бар. Сонымен бірге осында қаншама психологиялық шындық, астарланып берілген авторлық нәзік түйін жатыр. Рас, Т. Ахтановтың тілі еш мінсіз, мүлтіксіз емес. Онда ішінара алақұлалық, шұбарлық сезілмей қалмайды. Бір-ер мысал келтіріп қаралық: «Ол остановкада Раушанды көріп қалды» (38 бет), «Ержан әлі соғысты жанлы түрде көз алдына толық елестете алған жоқ» (8 бет), «Уәлидің жылтыраған кішкене көзі, қызара бөрткені толықша жүзі, қызу тоқ тұлғасы...» (28 бет), «Көжесі оның бойындағы педагогтік қасиетін аңғартуға себепші болды» (47 бет), «Бірақ Мұрат бұл соғыстың аяусыз соғыс болатынын сезеді. Әсіресе, жау жүрекке тақап қалғанда өлімге қарауға болмайды. Осыны біліп ол өзіне де, өзгелерге де қатал болды» (13 бет). Мұндай мысалдарды романның басқа да талай-талай беттерінен көп іздеп қиналмай-ақ табуға болады. Бірақ соның бәр-бәрін жіпке тізгендей шұбалтып келтіріп жатудың орайы да, қажеті де болмас. Ал автор мұны

болашақта қатты ескеруге тиіс. Өйткені, тілдегі шұбарлық, мейлі ара-тұра ұшырасып калып отырса да, шығарманың реалистік қуатына салқынның тигізбей қоймақ емес.

Т. Ахтановтың суреткерлік өнерінің бір қыры оның юмористік шеберлігінде. Геройлардың диалогтарында, авторлық сипаттауда жазушы өңбойы болмағанмен, орынды жерінде юморды шебер пайдаланады. Мұндай тұстарда шығармаға жаймашуақ, жылы да көңілді бір шырай бітеді.

Жазушы авторлық сипаттау мен баяндауға да оңтайлы. Сондай-ақ оның авторлық баяндауларының геройлардың ішкі монологтарына ұласа ауысып кететін шақтары да мол. Бұл ретте жазушының өзі беріле көп аударған орыс әдебиетінің творчестволық тәжірибесінен үйренгені де байқалады.

Біздіңше, романда автор әлі де болса жете ойланып, толғанбаған немесе еркін баурай алмаған бірсыпыра жәйттер бар.

Еналдымен, романда біздің Армиямен сілкілесе сайысып жүрген жау жағы нақтылы, жанды бейнеде көрінбейді. Жау әскерлері көбінесе жалпылама, стихиялы дүлей күш ретінде суреттелген. Олардың соғыс стратегиясы мен тактикасы жайында да тым сараң айтылады. Осы бір олқылық шығарманың тартыс өткірлігін біраз әлсіреткен.

Романда кейбір қажетсіз мелодрамалық көріністер де ұшырасады. Шығарманың оқиғалық өрбуіне тікелей қатнасы жоқ, бір-ақ рет ғана көрініп із-түзсіз жоғалып кететін мезеттер де бар. Мысалы, Соколово деревнясына бекінген жауға шабуыл жасағанда Қартбай мен Бондаренконың бір неміс майорын қолға түсіріп алуына байланысты эпизод осындай әсер қалдырады. Жалпы қызғылықты оқылғанмен, оның шығарма оқиғаларының логикалық тұтастығын толықтырып тұрғаны шамалы. Автор тыл туралы тақырыпты кеңінен, өрбіте суреттемейді. Бұл оның творчестволық нысанасына ілікпеген де болу керек. Біз тыл өмірінің кейбір елестерін Мұраттың әйелі Хадишадан алған хатынан және Айшаның Хадишаны үйіне іздеп барып жолыққаны баяндалатын эпизодтан ғана көреміз. Сондай-ақ, жазушы Алматы қаласының соғыс кезіндегі суық, сұсты бейнесін баса суреттеп жіберген. Жалпы алғанда романда тыл тірші-

лігінің тыныс-лебі, қайратты да қажырлы пафосы сезіле бермейді.

«Қаһарлы күндер» романында ең алғы лекте әрі жаркын көрінуге тиіс геройлардың бірі — дивизия командирі генерал Панферов еді. Бұл образ арқылы автор Панфиловтың бейнесін жасамақ болғанын байқау қиын емес. Бірақ осы образ өзінің шырқау биігіне көтерілмеген. Жазушы Панферовтың адамгершілік қасиеттерін, қарапайымдылығы мен кішіпейілділігін әсерлі, жылы суреттейді. Сөйтсе де, романда Панферовтың әскери қолбасшы ретіндегі шын мәнісіндегі биік тұлғасы толық көрінбейді.

Жазушы соғыстың жалпы сипатын, психологиясын шынайы суреттегенмен, романның кейбір батальдық көріністерін бір-бірінен айыру қиын. Бұл автордың қайсыбір мезеттерде қайталауға бой алдырғанын аңдатса керек.

Бізде бұрын әскери тақырыпқа арналып жазылған шығармалардың бірсыпырасында не шеберлік олқы соғып, не өмір шындығын терең баурау жағы жетіспей жататын еді. Т. Ахтановта үміт күттіретін ұшталған шеберлік те, жазып отырған материалын жақсы білушілік те бар. Тұтастай алғанда ол өзінің романында сол бір қаһарлы күндердің елс-рухын, сол бір қаһарман жандардың батырлық тұлғасын көркем де шынайы бейнелей алған. Сондықтан да бұл роман әдебиетімізге лайықты үлес болып қосылмақ.

АСҚАҚ ДАУЫСТЫ АҚЫН

Творчестволық сапарының ең алғашқы ай-күндерінен бастап қазіргі уақытқа дейін өз шығармаларында совет шындығын бейнелеумен беріле шұғылданып жүрген ақындарымыздың бірі — Тайыр Жароков. Ол әдебиетке жиырмасыншы жылдардың аяқ кезінде келді. Содан бергі уақыт ішінде оның қаламынан ондаған поэмалар мен жүздеген лирикалық өлеңдер туды. Солардың басым көпшілігі социалистік жаңа дүниені жырлауға, халқымыздың өмірінде болған елеулі-елеулі оқиғалар мен құбылыстарды суреттеуге арналған. Осының өзі-ақ Тайыр Жароковтың творчестволық дұрыс әрі өрісті бағыт ұстағанын, советтік дәуіріміздің сезімтал да сергек суреткері болуға ұмтылатынын анық аңдатарлықтай.

Тайыр Жароковтың жемісті де мол ақындық творчествосына мұндай шағын мақалада терең талдау беру, әрине, мүмкін емес. Сондықтан да біз ақынның өнерпаздық жолына ой көзімен оралғанда оның лирикасы мен поэмаларын жинақтап сипаттауды, солардың басты-бастыларына талдау жасауды ғана мақсат етеміз. Ақынның «Жұлдыз жарығы» (1932) атты тұңғыш жинағына оның 1926 жылы жазған «Ленин», «Қодар күліп тұр», «Алтын дәнсін», 1927 жылы жазған «Нұр орнап», «Жыл құсы», «Пионер болам деді» атты өлеңдері және негізінен 1928—30 жылдарда жазғандары енді. Бұл жинақтағы өлеңдерінің денінен ақынның сол жылдардың жасампаздыққа, күреске толы рухын, қуатты тынысын поэзияға ала келуге тырысқанын көреміз. Ел өмірінде болып жатқан өзгерістерді, социалистік құрылыстың тегеуірінді екпінін ақын поэзия тіліне түсіруге ұмтылды. Күні кеше жел ұйтқыған жапан түзде алып завод орнағанын мақтан ете келіп, ақын былай деп жырлайды:

Завод мың күй қозғайды,
Аруанадай боздайды.
Тұрбасы бұлтпен таласып
Пешінде оты маздайды.
Маздап бак,
Жалындап.
Бесжылдықты

Орындап,
Машинаны мың-мыңдап
Завод туып, коздайды.

Бұл өлеңнен ақынның алғашқы кездегі творчествосына тән бағалы қасиеттер де, кемшіліктер де анық аңғарылатындай. Кемшілігі — жас автордың өмірлік құбылыстардың ішкі мәнін ашып, бейнелі түрде суреттеуге әлі төселіп жетпегендігі, алып отырған тақырыбын сырттай бақылаушы ретінде жырлауы. Ал өлеңнің бағалы қасиеті — онда социалистік құрылыстың қуатты екпінінің ақын жүретінде шымдалып шыққан жаңғырығы бар, авторлық құштарлық пен шыншылдық бар. Сонымен бірге мұнда ақынның дала өміріне келген жаңалықты халық ұғымына жақын, түсінікті етіп суреттеуге тырысқанын да байқау қиын емес. Бұл — сол жылдардағы поэзиямызға тұтастай ортақ сипат болатын. Ақынның тұңғыш жинағындағы тәуір өлеңдерінің бірі — «Аэроплан». Бұл өлең кейін де ақынның көптеген жинақтарына енді. «Аэроплан» Т. Жароковтың суреттеу құралдарының сонылығына ұмтылуда, сөзді саралап қолдануда ілгерілей бастағандығын байқатты. Өлең оқуға да жеңіл, қызғылықты. Көк жүзінде шарықтап ойнақ салған аэропланды суреттей келіп, ақын былайша түйеді:

Жарқырап бауырында жұлдыз күліп,
Дірілдеп зенгір көкте ұшты сүйіп:
Нұры мен шұғыласы шомылдырған
Алтын күн, мөлдір аспан оны сүйіп!
Қиырдан окта-текте көшкен ақ бұлт
Өтісіп жатыр бейне басын иіп...

Сырттай карағанда бұл өлең ақынның аспанда қалықтаған болат құсты көргенін және содан алған әсерін ғана баяндайтын сияқты. Бірақ шындығында авторлық ой бұдан тереңде жатыр. Озат техниканы жасаушы адамдарымызға, табиғатты бағындырушыларға деген татаусыз ықласы мен ыстық сезімін ақын бұл өлеңінде астарлы түрде аңдата алған («Қиырдан окта-текте көшкен ақ бұлт өтісіп жатыр бейне басын иіп...»). Еңбек тақырыбы — ақынның «Еңбек дабылы», «Темір жол», «Болат балға», «Шахта» сияқты өлеңдерінің де өрісті өзегі. Бірақ көркемдік жетілуі жағынан олар біркелкі емес. Бұлардың көпшілігінде ақын таңдап алған

тақырыбын игере алмай, жалаң түр қуалаушылыққа, ой-пікір бұлдырлығына ұрынды.

Ақынның тұңғыш жинағына енген «Жаңаданды ауыл», «Кодар күліп түр», «Алла-құдай жалбарынған сөздері» атты өлеңдері колхоздасу кезеңіндегі ауыл өмірін көрсетуге арналған.

Алғашқы жинақта көтерілген осындай келеді тақырыптар ақынның екінші жинағындағы шығармаларының «Мотор жыры» да негізгі идеялық мазмұнын құрады. Бұл жинақтағы өлеңдерінің тәуірлерінде Т. Жароков социалистік даму жолына түскен жаңа ауылдың жаңарған бейнесін, советтік бесжылдықтың қуатты қарқынын жырлайды. Ақын жаңа адамның артықшылығын, рухани әсемдігін оның еңбегінен іздейді:

Алтындаған нұрға малған
Жібек шапақ таң сұлу.
Таң нұрында
Жаз жырында

Елбек еткен
Жан сұлу.

Бұл тұстағы өлеңдерінің бірсыпырасында «Бесжылдықтың балғасы», «Қызыл керуен», «Миллион толқын» ақын өмір шындығын тұтас күйінде алып, коллективтің тұлғалы бейнесін жасауға тырысады. Сонымен бірге оларда үгіттік қуат, лептілік те мол («Солқылдата соғылсын бесжылдықтың балғасы!»).

Ал бірқатар өлеңдерінде ақын көзімен көрген құбылыстарға авторлық қатнасын білдіруге, сөйтіп өмір шындығын нақтылы әрі әсерлі суреттеуге көбірек бой ұрады. «Қордай тауы», «Қаспий» атты өлеңдер — осының айғағы. Соңғы өлеңінде ақын Қаспий теңізінде «Ленин» атты кемемен жүзгенін баяндай келіп, былай деп жырлайды:

Келемін «Ленин» атты пароходта,
Қырандай көзім тігіп шар-тарапқа.
Толқынға малтықтырмай бас капитан,
Серпілтіп жол сілтеді пароходқа.
Тау мен тас, жолымды аш — жайдым құлаш,
Көз тігіп ұшан-қыр атрапқа.

Мұнда ақын алыс атрапқа көз тіккен, табиғатты өз ыркына көндірген жалын жанарлы жас адамның аты-

нан сөйлейді. Осы ерекшелік, яғни халықтың атынан сөйлеуге, көптің ой-арманын білдіруге ұмтылу кейін Т. Жароков творцовосының ең негізгі сипаттарының біріне айналды.

Т. Жароковтың «Өмір сөйлейді» (1934) атты үшінші жинағы оның творчестволық өскендігін танытпады. Жинаққа аты қойылған «Өмір сөйлейді» деген өлеңінде автор елімізде болып жатқан ұлан-асыр өзгерістердің барлығы да ақынға шабыт беріп, оның көкірегіне жыр құятынын, өмірдің өзі өлең тілімен сөйлейтінін әсерлі аңғартады. Бірақ жинаққа енген басқа шығармалардан («Балабас», «Аңқасу» поэмалары мен «Жеңу», «Өсу», «Қазіргі колхоз түрі», «Жаңа жолбасшылық», «Біздің міндет» атты өлеңдері) ақынның осы дәрежеге көтерілгені, яғни өмірдің поэзиясын таба білгені байқалмайды. Т. Жароковтың отызыншы жылдарда жазғандарының дені — поэмалар. Бірақ ол шағын жанрлық шығармалардан да қол үзген жоқ. Социалистік жаңа дүниенің қуаттылығы, совет адамдарының шадыман өмірі мен бейбіт еңбегі, халықтар достығы — Т. Жароковтың отызыншы жылдардағы өлеңдеріне де ортақ тақырыптық арқаулар осылар. Ақынның осы кезеңдегі өлеңдерінің ең тәуірлері «Заң», «Қалба тауы», «Қыран туралы жыр», «Кремльдің төрінде», «Алтын ұя», «Жазулы тас» және басқа да лирикалық туындылары, оның кейінгі жинақтарында да талай рет қайталанып басылды. Жоғарыда аталған «Алтын ұя» атты өлеңінде ақын:

Октябрьдің таны атласа,
Қанатымды қаға алар ма ем!
Өмір деген шын жартасқа
Алтын ұя сәла алар ма ем! —

деп жырлады. Осы «Алтын ұядағы» азаматтық аскақ сарын мен такаббарлықты, қуанышты лептілік пен жарқын реңкті Т. Жароковтың отызыншы жылдардағы таңдаулы өлеңдерінің қай-қайсысынан болса да мол ұшырағамыз.

Басқа ақындарымыз сияқты, Т. Жароков та Ұлы Отан соғысының қаһарлы жылдарында өз творчествосын жеңіс мүддесіне қызмет етуге арнады.

Мүмкін, сөзі қате болмас
Мені ақын дескеннің.

Жырымды да танда, жолдас,
Ең әуелі әскермін,—

деп жар салды ол. Т. Жароков творчествосына бұрыннан тән үнділік пен публицистикалық өткірлік оның майдан жылдарындағы поэзиясында әсіресе айқындала түседі. «Ленин қаласы», «Жұлдыздай жанған Москва», «Жеңіс жылы», «Саған сәлем, туған ел», «Жапанда жалғыз қарағай», «Днепр» сияқты өлеңдерінде ақын халқымыздың зұлым жауға деген құрсаңған ыза-кегін, совет адамдарының ерлік істері мен патриоттық қимылдарын жырлайды.

Соғыстан кейінгі кезеңде Т. Жароков лирикалық шағын өлеңдерді көп жазды. Солардың ішінде халқымыздың Коммунистік партияға деген айнымас махаббатын, адалдығын, шын берілгендік сезімін суреттейтін және партияның ұлылығы мен жеңімпаздық күшін көрсететін, публицистикалық қуаты зор өлеңдері әсіресе мол. Ақынның «Қызыл алаң» атты патриоттық өлеңі де өзінің идеялық тереңдігімен, көркемдік ерекшелігімен оның партия туралы жырларына үндесіп жатады.

Ақын соңғы жылдарда халықтар достығы, баянды бейбітшілік тақырыптарын беріле жырлап жүр. Оның «Достық туының астында», «Әлемге бейбітшілік қанат жайған», «Ұлы Қытай», «Өлеңмен қойдым қолымды», «Құмға шабуыл» атты өлеңдері осы тақырыптарға арналған. Бұл өлеңдерде совет адамдарының жасампаздық қуатқа толы еңбегі, халықтардың бейбітшілікті аңсаған ой-арманы суреттелген.

Т. Жароковтың әр кезеңде жазған өлеңдерінің кейбір үлгілері және олардың идеялық мазмұны, қозғайтын тақырыптары осындай. Ақынның белгілі бір сюжетке құрып жазған өлеңдері тым аз. Ол көбінесе нақтылы бір тақырыпты тандап алады да, соның төңірегінде ой өрістетеді. Бар ақындық жалынын, көркемдік бояулар мен тілдік өрнек-нақышты да ол осыған орай қолданады. Т. Жароков өлеңдерінің қызу серпінге, жігерлі пафосқа толы болып келетіндігі де осыдан. Ол өзінің өлеңдерінде заманымыздың өршіл рухын, қуатты тынысын сездіруге тырысады. Ақынның творчестволық көрігінде көркемдік жағынан жетіліп шыққан өлеңдерінен оның тек өзіне ғана тән осындай ерекшеліктер айқын аңғарылады.

Г. Жароковтың ақындық таланты лирикалық шағын өлеңдерден гөрі кесек шығармаларда, яғни поэмаларда айқыннырақ танылды. Ақын қаламынан небары жиырмаға тарта поэма туды. Бірақ олар өзара біркелкі емес. Ақынның ертеректе жазған «Коммунизм таңында», «Нефтьстан», «Балабас», «Айқасу», «Мұз тұтқыны» атты поэмалары ақын творчествосында із қалдырмаған, татымсыз шығармалар болып шықты. Олар поэмаға қойылатын көркемдік талаптардың (образдардың шынайылығы, композициялық тұтастық, оқиғалардың заңды да нағымды түрде өрбуі, тілдің суреттілігі) ешқайсысына да жауап бермейді. Мұндай кемшіліктерге ол тәжірибесінің тапшылығынан, поэма сияқты күрделі жанрдың сырына қанықпағандықтан ұрынды.

Ал «Отан даусы», «Шекарада», «Нарын», «Зоя туралы жыр» поэмалары әдебиетіміздің қорына тұрақты да салмақты үлес болып қосыла алған жоқ. Бірақ олардың ақын творчествосында алар азды-көпті орны бар. Әсіресе соңғы үш шығарма оның сюжетке құрылған, эпикалық поэмалар жасауға талаптанғанын байқатты.

Ақын поэмаларының ішінде уақыт сынынан мүдірмей өтіп, поэзиямыздың қорына елеулі үлес болып қосылғандары — «Күн тіл қатты», «Тасқын», «Жапанды орман жаңғыртты» және «Қырда туған құрыш». Сондықтан да бұлар арнайы сөз стуге тұрарлық.

Г. Жароков «Күн тіл қатты» поэмасын 1934 жылы жазды. Бұл кезде әдебиетімізде, оның ішінде поэзияда да социалистік жаңа мазмұнға толы өмір шындығын бейнелеуге лайық көркемдік соны түр іздеу, социалистік реализм әдісін игеруге ұмтылу байқалған болатын. «Күн тіл қатты» — осындай іздену жолында туған сәтті шығармалардың бірі. Өмір шындығын асқақтата жырлап, көркемдік шындыққа ұластыру, оны революцияшыл романтика дәрежесіне көтеру сияқты соны сипаттар Г. Жароков поэмасында мол.

Шығарманың негізгі сюжеті елімізде болған белгілі оқиғаға құрылған. Автор Федосеев, Васенко, Усыскин сияқты ержүрек ұшқыштардың стратостатпен 22 000 метр биікке көтерілгенін суреттейді. Ақын ұшқыштардың көкке көтерілгенін бейнелеу үшін дамыту әдісін қолданады. Поэманың басталуының өзі-ақ оқушыға бір ғажайып күштің екпінін сездіреді және соны біздің өміріміздің шындығы ретінде қабылдауға дайындайды.

Ақын совет ұшқыштарының көк әлеміне көтеріліп, күнмен «тілдесуін» суреттеу арқылы совет адамдарының табиғаттың стихиялық күшімен күресіп, оны өз ырқына көндіретіндігін аңдататын тәрізді. Ұшқыштың атынан айтылатын әрбір сөзден совет халқының қайтпас жігерінің лебі есіп отырады:

Желектей желпіп желінді,
Желкомдай жырттым жеріңді
Түсіттей түтіп бұлттыңды,
Таспадай тілдім толқынды,
Бағынбай кеннен не қалды!
Қарынды қағып су қылдым,
Суынды сілкіп бұ қылдым.
Түніннен таң атқыздым,
Жеріме жұлдыз жаккыздым —
Электрден шам жанды.

Поэма советтік өміріміздің қуаттылығын, мызғымас беріктігін бейнелі түрде сездіретін романтикалық көрініспен аяқталады. Шығарманың мұндай оптимистік жарқып сипаты совет халқының әр қайраты мен отты жігеріне деген сеніммен ұласып жатады.

Поэмада кесек оқиға, кеңінен өрбіп отыратын сюжетті желі жоқ. Бірақ ақын ұшқыштардың аспанға көтерілуін, олардың дүлей табиғатпен арпалысып, ерлікпен қаза табуын шарықтау шегіне жеткізіп, романтикалық асқақ сазға көтеріп әсерлі суреттей алған. Поэманың қанатты да серпінді тілі, ондағы авторлық толғаныстар мен шалқулар да бейне оқиғаны өрбітіп, ширата түсіп отыратындай.

Т. Жароков өзінің бұл поэмасында сол кездегі қазақ совет поэзиясы үшін тосын, тың тақырыпты қозғады. Бірақ соның көркемдік шешімін табу үшін ол жадағай тәсілдер, жасанды сөздер іздеп әуре болған жоқ. Қайта ақын қазақтың байырғы сөздерін екшеп, жаңғырықтыра қолданды. Сөйтіп ол жаңа тақырыпты жаңа ақындық өрнек-нақышпен жырлай алды.

«Күн тіл қатты» поэмасы өзінің кейбір ерекшеліктерімен В. Маяковскийдің «Владимир Маяковскийдің жаздыкүні дачада көрген ғажайып оқиғасы» деген шығармасына үндесіп, сарындасып жатады. Маяковский шығармасының да лирикалық геройы күнмен «сөйлеседі», оған өзінің өктемдігін білдіреді. Әрине, бұл сырттай ұқсастық. Бірақ, бұл отызыншы жылдардың бас кезінде-

ак Т. Жароковтың орыстың классикалық және советтік поэзиясынан творчестволық түрде үйренуге бет бұрғанын анық байқатты. Ал осы үйренудің жемісі ақынның бұдан кейінгі күрделі де көлемді шығармасы — «Тасқын» поэмасынан айқын көрінді.

Ақын «Тасқын» поэмасын 1936 жылы бастап, 1937 жылы аяқтады. Поэма 1921 жылы Алматы қаласында болған оқиғаларды суреттеуден басталады. Бірақ ақын өмірде болған жәйттерді жалаң көшірумен шектелмеген. Қайта поэма желісіне сол уақыттың сипатын аңдататын оқиғалар мен тартыстарды мол кіріктіре отырып, ол әлеуметтік тынысы кең кесек шығарма жасай алған.

«Тасқын» поэмасы арқылы Т. Жароков творчестволық жолының алғашқы кезеңіне қорытынды жасады. Сонымен қатар ол ақынның кең құлашты, зор тынысты эпикалық шығарма жасаудағы жемісті қадамы болып табылады.

Жаңа дүннені орнатушы қарапайым адамның ұнамды образын жасауға талпынушылық жиырмасыншы жылдардағы поэзияда да байқалған болатын. Бірақ бұл проблеманы лирикалық шағын өлеңдерде емес, күрделі шығармаларда шешу тек отызыншы жылдардағы поэзиямызда ғана шындап қолға алынды. «Тасқын» поэмасындағы Қайсардың образы — осының айғағы.

Қайсар бейнесі поэманың бүкіл өнбойына елес беріп отырады. Ақын шығарманы осы Қайсармен таныстырудан бастайды.

... Қыр мұрын, бүйрек бетті, өткір көзді,
Жас бала көп жасаған жан мінезді,
Жаны оның жаз жылуын көрмегендей,
Көңілсіз алып қарсы қоңыр күзді,—

деп суреттейді ақын Қайсарды. Жоқшылық өмірі, қол қысқалық «қаршадай қарға бойлы қара баланы» ерте есейтеді. Партизан әкесінің жараланып қаза табуы да жас Қайсарды азалы, ауыр ойға салады. Кейін телегей тасқын кезінде ол жалғыз шешесінен де айрылады. Сөйтіп, ол панасыз қаңғырып қалады. Бірақ совет өкіметі, Коммунистік партия оған қолын созады, қамқорлық жасайды. Осының арқасында кешегі жетімек кейін білімді маманға, озық мәдениетті интеллигенцияның өкіліне айналады.

Поэманың бір тарауында Қайсардың орыс ақыны Пуш-

кіннің «Мыс салтатты» поэмасын оқып отырғаны баяндалады. Бұл көріністе көп мән бар. Пушкин шығармасын оқи отырып Қайсар өзінің сорлы балалық шағын, тілсіз табиғаттың апатына ұшыраған жайын еске алады. Әрине, егер совет өкіметі болмаса, «Мыс салтаттыдағы» Евгенийдің мүшкіл халіне Қайсар да ұшырайтын еді. Бірақ жаңа дәуір, социалистік қоғам Қайсарды жоқшылық шеңгелінен жұлып алып, жарқын өмірге жеткізеді. Қайсар образы советтік құрылыс адамды бақытты ететіндігін, оның творчестволық қаблет-дарынына кең өріс ашатындығын аңдатады.

Қайсар — білімді маман ғана емес, сонымен бірге жалынды патриот та. Өз қызметін атқаруға ол салған беттен-ақ беріле кіріседі. Ордабаевтың зиянкестік әрекетінің сырын тез аңғарып, уытын қайтаратын да — осы Қайсар. Әрине, бұл Қайсарға оңай түспейді. Сарыла ізденудің, аянбай ақыл-ой жұмсаудың арқасында және партияның, көпшіліктің қолдауына сүйене отырып қана ол Ордабаевтай жаудың арамза пиғылының, сұмдық ойының астан-кестеңін шығарады.

Қайсардың бойында жалын атқан жігермен бірге асқақ арман да, жүйрік қиял да бар. Ол ойлана да, толғана да біледі. Өзі жобасын жасаған үйді салғызып болғаннан кейін Қайсар небір әсерлі ой-сезімдерге бөленеді. «Тасқыны қара тасты қақ айыратын, төбесі мұз, бауры суық қар» Алатауға қарап ол такаббарлана тіл қатады:

... Тасқында сел ағызған өз үйімнің
Орнына жаңа үй салып тасын қидым.
Долданған тасқыныңды тойтарсын деп
Цементпен белдеуіне құрышты идім.
..... Дәумін деп мактанба, тау, сүйген аспан,
Бас иген сендей асау талай тасқан.
Көз тікпе зәулім үйді құлатам деп,
Бір ұлы күш бар бүгін сенен де асқан.

Бір кезде дүлей табиғаттан және одан да қытымыр тұрмыстан өгейлік көрген Қайсар енді соларға осылайша өктемдік білдіреді. Сөйтіп, табиғаттың стихиялық құбылысы жайындағы баяндау социалистік құрылыстың, жаңа өмірдің қуатты да тегеурінді тасқыны туралы тақырыпқа ұласады. Осы идеяны акын Қайсар образы арқылы бейнелеген. Қайсар образында қазақ совет интеллигенциясының тұтас бір буынының өмірі мен тағ-

дырының шындығы бар. Оның образының ерекше құндылығы да осында.

Поэманың ұнамды кейіпкерлерінің бірі Жамал Қайсармен тағдырлас. Қайсар сияқты, оны да жетімдік өмірден құтқарып азат еткен — совет өкіметі. Қайсар сияқты, ол да техникалық білім алып, маман болып шығады. Бірақ оның өмірі поэмада толық, жан-жақты суреттелмеген. Ақын Жамалды өзінің қызметін атқару үстінде көбірек көрсеткен. Ал оның басқалармен байланысы, әсіресе коллективпен қарым-қатнасы терең ашылмаған. Ақын кейіпкерінің бұл мінезін оның бұйығы ұяңдығынан емес, өз ісіне татаусыз шын көңілмен берілгендігінен деп түсіндіреді.

Түспейтін жұртқа орынсыз оның көзі,
Өйткені, ауыр еді тым мінезі.
Жұмысқа жан-тәнімен берілгеннен
Алаңсыз жүретұғын ісінде өзі.

Жұмыстан босап кетсе ойында оның
Оқу ғой, кітап түспейд — қолында оның...

Дегенмен, Жамал бейнесінің жарқын да толық ашылмауы типтік дәрежеге көтерілуге лайықты осы образдың әсер етушілік қуатын біраз әлсіреткен.

Поэманың алғашқы вариантында Жамал Ордабаевтай жаудың қолынан қаза табатын. Ал поэманың жөнделген кейінгі нұскасында Жамал тірі қалады. Осылай ету арқылы ақын, сөз жоқ, өз шығармасының оптимистік сипатын анағұрлым күшейте түскен.

Поэманың ұнамсыз кейіпкерлерінің ішінде оқшауланып көрінегіні — Ордабаев. Ақынның суреттеуінде ол — алуан айлалы, қыры көп, тақыс жау. Ордабаев өзінің сұмдық ойының орайына қарай құбыла да жалтара біледі.

Көздіктің ар жағынан көзі жайнап
Жүзінен мың құбылған сұмдық ойлап.
Безеріп бірде кейіп, бірде күліп
Біресе отырады ойға бойлап...

Біресе момқансып түк те сезбей,
Біресе бір сұмдықтың кілтін іздей.
Жылтылдап сордың сұрғылт түлкісіндей
Тұра алмайд жұртты сикыр көзі кезбей.

Ордабаевтың портреттік сипаттамасы мен ішкі дүниесінің бейнесін ақын осылайша астастыра, ұластыра суреттейді.

Поэмада Ордабаев жалғыз емес. Оның тілектес серіктері бар. Ақын оларды кеңінен суреттеп жатпайды. Олар тек Ордабаев бейнесін толықтыра түсу үшін алынған. Шығарманың соңғы тарауында ақын Алматы қаласының қуанышқа, шаттық-думанға толы тіршілігінің жарастықты суреттерін береді. Бояуы қалың бұл әсем суреттер поэманың ұнамды геройларының жарқын тағдырын, бақытты өмірін де паш ете түсетін тәрізді. Поэма ақынның Алматы туралы лирикалық шалқуларымен, патриоттық ой-сырларымен аяқталады. Алматының капиталистік елдер астаналарынан артықшылығын ақын мақтаныш сезіміне бөлене отырып жырлайды:

Одактас Алматы отау туын тіккен,
Саянда сүйем сені шын жүректен
Қаланған сенің әрбір тасын артық.
Мұнайған Париж, Лондон, Нью-Йорктен

Ақынның астана туралы бұл патриоттық ойлары поэма-ның сюжеттік желісінен оқшауланып тұрған жоқ. Қайта шығарма композициясымен кабыса ұласып, оның негізгі идеясын айқындай түсіп тұр.

«Тасқын» поэмасы Т. Жароковтың көркемдік ізденуін, ақындық шеберленуін де байқатты. Бұл ретте поэма оқиғаларының эпикалық кең планда алынғанын, авторлық баяндаулар, ақындық тебреністер геройлардың іс-әрекеті, сыр-сезімі жайындағы суреттермен араласа келіп отыратынын ең алдымен айтуға керек. «Тасқын» Т. Жароковтың кең құлашты, эпикалық шығарманың композициясын құруға икемділігін танытты. Ол геройларының өткен өмірімен, белгілі бір кезеңдегі тағдырымен, іс-әрекеттерімен таныстырғанда лирикалық шегіністерді әсіресе ұтырлы пайдалана біледі. Сондай-ақ оның қолдануында лирикалық шегіністер шығарманың оқиғалық өрбуін баяулатпайды, қайта жандандыра қызғылықты ете түседі. Жамалдың балалық шағымен және Қайсардың, Жамалдың оқуда болған кезімен таныстыратын эпизодтар бұған айқын мысал болып табылады.

Жалпы алғанда «Тасқын» поэмасы тек Т. Жароковтың ғана творчествосындағы емес, сонымен бірге отызыншы жылдардағы бүкіл қазақ совет поэзиясының елеулі табысы болды. Бұл поэма ақындарымыздың қазіргі за-

ман тақырыбына арнап күрделі де кесек шығармалар жина алатын дәрежеге жеткендігін танытты.

Ақынның қыркыншы жылдардағы поэмаларының ішіндегі ең тәуірі — «Жапанды орман жаңғыртты». Бұл шығарма совет адамдарының табиғатты өзгертіп, қайта жасауы туралы тақырыпқа арналған. Поэмада өткен өмір елестері, бүгінгі күн көріністері, болашақ суреттері де бар.

Шығарманың алғашқы тарауында ақын Сарыадырдың бұрынғы сұрықсыз да сүреңсіз кейпін бояуы дәл суреттермен елестете алған:

Жерден қолын жұрт былғап,
Жанбырды үміт ететін.
Жалауын жасыл бұлт бұлғап,
Оралмай бірақ кететін...

Алаулаған аңызда
Құс қаға алмай қанатын
Тамызық боп тамызда
Шөбі дір-дір қағатын.

Осындай қуаң даланы мекендеген жандардың да тіршілігі қуқыл. Олар аңызға алаулаған бұл даланы жасыл орман көмкеруін арман етеді. Сарман шал мен оның қызы Майраның да көкірегін осы бір арман аялаған. Халықтың ғасырлар бойғы бұл арманы тек совет дәуірінде ғана жүзеге асты. Поэманың негізгі тараулары осыны көрсетуге, яғни арманның шындыққа айналғанын бейнелеуге арналған.

Туған өлкенің табиғаты қалай өзгерді, бұл жолда қандай күрес жүргізілді? Бұл жайында поэмада ештеңе айтылмайды және көлемі шағын шығармада мұның бәрін қамту мүмкін де емес. Сондықтан да ақын сол сұрапыл күрес қандай нәтижелер бергенін ғана суреттейді. Тоты қанат жас тоғай, гүл атқан ақ қайың мен көк терек, алма мен жүзім ағаштары, орман арасында жайқалған егін алқабы, еңбекке жұмылған, шат көңілді адамдар — міне жасарған, жаңғырған Сарыадырдың бүгінгі көріністері осындай. Әрине, мұның бәрі — батыл ойдың, батыр еңбектің жемісі. Ақын Сарыадырды осынау күйге келтірген еңбек адамдарын мадақтайды.

Туған даланың табиғаты ғана өзгеріп қойған жоқ. Сол жапан түзді жасартқан, тас мінез табиғатты қайта жа-

саған адамдардың өздері де өзгеріп өсті. Поэма геройларының өсу жолы осыны танытады.

Поэманың алғашқы тарауларында Сарман шал еңбегі еш, тұзы сор адам ретінде суреттеледі. Оның арманы — Сарыалдыда жасыл орман жайқалғанын көру. Сол бір бағы заман үшін бұл тым алыс қиял еді. Бірақ «қырда өскен сол қазақ» бет шымшыған аяздан да, мазақ еткен желдің өтінен де таймайды. Бұл ретте Сарман — халықтың еңбек сүйгіш өкілі, оның арманын аркалаушы есепті.

Халықтың бұл арманы жаңа дүние орнағаннан кейін ғана ада болды. Осы жолда күрескендердің ішінде Сарман да бар. Сарманның жасы қартайғанымен, жаны жас. Ол өзінің жасарып балғын тартқан өлкесіне мейірлене көз тігеді, еңбек етуді ұнатады. Сарыалдыдың болашақтағы бұдан да әсем көріністерінің де осы Сарманның ой-қиялы арқылы берілуі тегін емес. Бұл ретте де акын өз геройының халықтық сипатын айқындай түспек болған.

Осындай өсу Майраның бейнесінде де бар. Бір кезде «тұлым шашы желкілдеп жалаян аяқ, жалаң бас» жүгіріп жүрген, «көк орманның шымылдықтай ашылуын» арман еткен Майра да танығысыз болып өзгерген. Ол енді жоғары дәрежелі білімі бар маман болған. Бірақ осының бәрі сырттай ғана суреттелген. Майраның жан сарайы, руханы өсуі поэмада ашылмаған. Бұл — шығарманың елеулі кемшіліктерінің бірі.

Поэмада халықтар достығы, аға орыс халқының қазақ халқына қамқорлығы туралы тақырыпта шынайы бейнеленген. Сарман шал мен Сидор Семенычтың арасындағы достық — олардың өмірлік мүдделерінің ортақтығынан келіп туған, нағыз адал да абзал достық. Сарманның мына бір сөздері осы достықтың тамаша куасы есепті:

Ұрығын еккен еменнің
Сол мейрімді орысты —
Құты деп білем жерімнің,
Тоғайлы еттік қонысты.

Акын Сидор Семенычты арнайы суреттемейді. Оқушы оның кім екенін тек Сарман шалдың әңгімесінен ғана біледі. Сөйтсе де, поэмада үлкен жүректі, мейірбан жанды орыс адамының жылы да тартымды бейнесі бар.

Бұл — автордың образ жасаудағы шеберлігінің алғашы. «Жапанды орман жаңғыртты» поэмасы өзінің көркемдік қасиеттерімен де ерекшеленеді. Акынның басқа кейбір поэмаларындағыдай артық асқақтау, көп сөзділік бұл шығармаларда жоқ. Мұнда соны суреттер мен теңеу-балаулар, тың ұйқастар да мол ұшырасады.

«Жапанды орман жаңғыртты» поэмасы Т. Жароков творчествосындағы жаңа бір беталысты байқатты.

Акынның соңғы жылдарда жазған ең көлемді әрі кесек шығармасы — «Қырда туған құрыш» поэмасы. Бұл поэма 1954 жылы жазылды. 1955 жылы акын оны жөндеп, толықтырып қайтадан бастырып шығарды. «Қырда туған құрыш» поэмасы өндіріс тақырыбына арналған. Жалпы Т. Жароков творчествосында өндіріс тақырыбы үлкен орын алады. Тіпті оның алғашқы кезеңдегі өлеңдері мен поэмаларының да бірсыпырасы осы тақырыпқа арналған болатын. Өзін бүкіл творчестволық жолы бойына толғандырған бұл тақырыптың кемел де көркем шешімін акын осы поэмасында әсіресе сәтті тапты.

Поэма прологтан, тоғыз тараудан, эпилогтан тұрады. Тақырыптық камтуының кеңдігі, оқиғаларының молдығы жағынан «Қырда туған құрыш» Т. Жароковтың бұрынғы поэмаларының барлығынан да биік, оқшау танылады.

Шығарманың алғашқы тарауларында совет адамдарының Нұра өзенін бөгеу су қоймасын жасағаны және оның жағасында су электр станциясын салғаны жайында баяндалады. Поэманың негізгі тараулары металлургиялық заводтың салынуын және онда тұңғыш рет құрыш қорытылуын көрсетуге арналған.

Осындай зор істерді акын өз кейіпкерлерінің қимыл-әрекеттері өрістеген, олардың тіршілік-тағдыры айқындалған ая ретінде суреттейді. Автордың ең негізгі назар аударатыны — адамдардың өмірі мен тағдыры, олардың өзара қарым-қатнастары.

Поэманың беттерінен халықтың жасампаздық еңбегінің, творчестволық қайрат-қажырының лебі еседі. Бұл әсіресе Нұра өзенінің бұғалыққа бас июі, су электр станциясы мен заводтың салынуы бейнеленетін эпизодтардан анық танылады. Поэманың ең басты тартыс түйіндері де осы оқиғалардың төңірегінде өрбіп өрістейді. Дегенмен, поэмада адамдардың өзара тайталас-тартысы күрделі де өткір күйінде берілмей, босаң тартып кеткен.

Мұның есесіне акын қалың көпшіліктің табиғат стихиясына тұсау салудағы, жұмыстағы қиындықтарды жеңудегі күрес-тартысын баса суреттейді.

Шығарма талай жылдық оқиғаларды қамтығанмен, оның композициялық құрылысында селкеулік, шұбалаңқылық жоқ. Өйткені, акын геройларының өмірлік жолын, тағдыры мен күресін айқындап ашатын оқиғаларды ғана сұрыптап алған және соларды ажырамас тұтастықта бейнелей білген.

Поэмадағы ең басты герой — Темірбек. Поэманың сюжеттік желісіне балғын бала күйінде енген Темірбек шығарманың бүкіл өн бойына толыса өсіп, барған сайын биіктей түсіп отырады. Қырда туған тұңғыш құрышты құюшы да — осы Темірбек. Поэманың эпилогы да Темірбектің жай-күйінен елес беруге арналған.

Темірбектің өсу жолы поэмада нанымды бейнеленген. Әкесі Жоламанның ұста дүкенінде, көрік айналасында жүргенде-ақ оның бойында еңбекке деген құштарлық сезімі оянады. Ол әкесі сияқты ұста болуды армандайды. Бұл оның өмірден көргені мен түйгеніне, балалық княлына сай да. Білімі өсе, жасы толыса келе оның арманы да ұлғая, биіктей түседі.

Асау Нұраны бағындыруға да, завод салуға да Темірбек белсене араласады. Ол әрдайым еңбек майданының алғы легінде болады. Өзі де құлшына қимылдап, басқаларды да жұмылдыра түседі.

Акын Темірбектің Оралдағы бір заводта болып мамандыққа баулынғанын және Теміртауға қайтып келіп тұңғыш рет құрыш құйғанын әсіресе мол, әрі тартымды суреттеген. Автор құрыш құйылуы процесінің технологиялық жағын көп қазбалай көрсетіп жатпайды, қайта оны поэзия мен романтикаға толы тамаша бір еңбек дүниесі ретінде бейнелейді.

Поэмада Темірбек пен Лизаның арасындағы махаббат та жарастықты күйде, жылы суреттелген. Лиза — парасатты, ойлы жас. Ол өзінің көз тойдырарлық ажар-көркімен де, нәзік жан дүниесімен де, жігерлі іс-әрекетімен де тұтас көрінеді. Лиза өзінің еңбексүйгіштігімен де Темірбекке лайықты жар.

«Қырда туған құрыш» поэмасында бұлардан басқа да шынайы жасалған бірсыпыра образдар бар. Олардың ішінде парторг Парамонов, Жоламан, Самсон қарт, Попов бейнелері әсіресе ерекшеленіп көрінеді. Акын бұлар-

ды еңбек үстінде де, қоғамдық тіршілікте де, семьялық тұрмыста да суреттейді. Сонымен бірге олардың әрқайсысының өзіне тән кескін-кейпі, сыр-мінезі, даралық бітімі бар. Ал поэманың басқа кейбір кейіпкерлері (завод директоры, мастер, Тоқтарбай қарт) мұндай дәрежеге көтерілмеген. Олардың шығарма оқиғаларына араласы да, тындырары да аз.

Поэманың тілі тұтастай алғанда көрікті де суретті, түсінікті. Бөгетті бұзып, буырқана тасыған селді де, кейіпкерлерінің кескін-келбеті мен сыр-сезімін де, кұйылып жатқан құрышты да ақын бояу реңктері ұқсас, орайлас келетін сөздермен шынайы суреттейді. Бір ғана мысал келтіріп қаралық:

Жалын жұтқан көк темір
Қып-қызыл боп сұмдай,
Секіріп түсіп жатқан бір
Он құлаш от жыландай!...

Шокка піскен көк темір
Лақтырылған найзадай.
Немесе ұсап кетті бір
Жерде ойнаған нажағай!

«Қырда туған құрыш» поэмасында реалистік қасиет мол. Поэмадағы авторлық баяндаулардан да, кейіпкерлерге берілген сипаттаулардан да, олардың диалогтары мен ішкі монологтарынан да ақынның реалистік жазу мәнеріне көбірек ден қойғаны байқалады. Осы тұрғыдан қарағанда «Қырда туған құрыш» ақынның бұрынғы сюжеттік күрделі шығармаларының бәрінен де оқшау танылады.

Биыл ақын «Құмдағы дауыл» атты ұзақ дастанын жариялады. Өзінің бұрынғы «Нарын» поэмасының материалдарын өзек етіп алғанмен, ақын бұрынғы шырға түсіп кетпеген, тың туынды жасаған. Сондықтан да бұл шығарма Т. Жароковтың өз юбилейі қарсаңындағы творчестволық нәрлі табысы саналуға лайықты.

Т. Жароков көркем аударма саласында да беріле әрі жемісті еңбек етіп келеді. Ол Грибоедов, Пушкин, Лермонтов, Тарас Шевченко, Шота Руставели, В. Маяковский сияқты көркемсөз алыптарының көптеген шығармаларын қазақ тіліне аударды.

Тайыр Жароков өзінің таңдаулы поэмаларымен, уақытымыздың рухына, жасампаздық пафосына толы саяси-

лирикалық өлеңдерімен казак совет поэзиясына мол үлес қосты. Творчестволық дер шағына келген, дәуір талабына, уақыт үніне құлақ асқыш сергек те шабытты ақынымыздың асқақ дауысы болашақта да зор қуатпен естіле беретіндігі күмансыз.

САМАЛ-ЖЕЛ

Суреткердің творчестволық мүмкіндігі мен даралық сипаты өнебойы әрі мейлінше жарқын көріне беруі ләзім емес. Әрбір қаламгер өз өнерінің мұндай биігіне творчестволық сапарының әркілі кезеңінде, әралуан күйде көтерілмек. Ақын Жұмағали Санин творчасының осындай шырқау шағы оның Ұлы Отан соғысының сонау бір қаһарлы да қатерлі ай-күндерінде туған отты да уытты, саф мөлдір әрі сыршыл лирикасы еді. Ақынның бұл жырлары, оның өзі образды түрде орайлы тауып айтқанындай, «сияменен жазылған жоқ», «жүрек қанымен», «ұлы айкаста құрбан болған ерлердің атыменен, арыменен жазылған». Олардың уақыт сынына бой алдырмас өміршеңдігі де осында болатын.

Ж. Саннның бұл тұстағы поэзиясының өрісті өзегі, үзілмес желісі совет адамы туралы, оның отаншылдығы, асқақ азаматтығы туралы тақырып еді. Осы тақырыпты беріле жырлаудан ол соғыстан кейінгі жылдарда да танған емес. Егер ақын бұл тақырыпты бұрын лирикалық сазға көбірек бой ұра отырып бейнелесе, ал енді ол философиялық толғаныстарға да ауысып отырады. Ақын поэзиясының осы сипатын оның «Самал» атты соңғы жинағына енген шығармалардан да анық танимыз.

Ақынның соғыстан кейінгі кезеңде жазылған және осы жинағына да енген «Таң мен адам» атты өлеңін мысалға алып қаралық. Бұл шағын өлең рауандап атып келе жатқан жазғы таңның суретін бейнелеуден басталады. Айнала күйлі әсемдікке, тыныштыққа толы. Бірақ бұл тыныштық беймезгіл мүлгу емес, шартты түрде ғана алынған. Өлең желісіне «күдіретті адам» енуімен бірге тыныштық пердесі жыртылып, дүние бір жас қуатқа, қимыл-қозғалысқа еніп жайнап сала береді. Бұл өлең «өмірді асығыс жасап жатқан адамның» қажырлы тегеурінін жаксы сездіртеді. Адам мен табиғат туралы тақырыпқа ақын басқа да бірсыпыра өлеңдерінде «Шың мен адам», «Түнде» оралып отырады.

Жинақтың шоктығын көтеріп, идеялық тынысын тереңдете түсіп тұрған шығармалардың бірі — «Ленин атымен» деген өлең. Мұнда ақын өткен өмірге, тарих тереңіне өзінің сезінулері мен еске алулары арқылы үңіл-

мек болады. Бастан-аяқ баяндау түрінде жазылғанмен, өлең ықласпен оқылады. Өйткені, бұл баяндау бірте-бірте автордың өзінің лирикалық монологына айналады. Ел басынан өткен оқиғалар мен кезеңдерді акын өз атынан баяндайды. Рас, оның осы екі желіні ұштастыра алмай, ара-тұра еңістеп кететін жақтары да бар. Сөйтсе де бұл өлең Ж. Саинның әлі де болса азаматтық лириканың жақсы үлгілерін тудыруға оңтайлы скендігін анық аңдатады.

Жинақтың «Сағыну» атты бөлімі көңіл күйі, махаббат лирикасынан тұрады. Мұндағы өлеңдерде өмірдің бел-белестерінен өтіп келіп өткен күнге ой көзімен оралған, жастық шағын сағынған адамның аяулы, абзал сезімдері бар. Бұлардың ішінде «Жолығар кезді мен күттім», «Шәрбанға», «Қараш бойында», «Екі жалын бір жүректен маздаған» атты өлеңдер абзал парасаттылыққа, сезім шындығына әсіресе мол суарылған.

Махаббат — үлкен де қасиетті сезім. Оны шынайы жырлау арқылы ақындарымыз оқушыларының жан-жүрегіне жақсы қасиеттер дарытады. Соңғы жылдарда жасамыз ақындар да, жас талаптар да бұл тақырыпқа көбірек бой ұрып жүр. Бірақ бұл тақырыпты тым тар шеңберде жырлау, ішінара оны азаматтық лирикаға кесекөлденең тартуға тырысушылық сияқты жәйттер де байқалды. Ж. Саин махаббат тақырыбын бұлай шешуден аулақ. Ол мұның тәрбиелік мәні барлығын естен шығармайды. Бұл жағынан жас ақындар Ж. Саиннан көп нәрсе үйрене алар еді.

Әрине, акынның бұл саладағы өлеңдерінің барлығы бірдей мін-мүлтіксіз, мұнтаздай таза десек тым асырып айтқандық болар еді. Оның махаббат лирикасының ішінара әсіреқызыл, татымал нашарлары да бар. Өз басының көңіл күйлерін шертуге сергек те жүйрік акын басқалардың сезім-сырларын суреттеуде салғырт та салқын. Сөзіміз дәлелді болуы үшін «Бір түнде» деген өлеңді мысалға алып қаралық. Мұнда акын «ел ұйқысына жатқан мезгілде» колхозды ауыл бақшасында серуендеген, «үңсіз ғана махаббатты жырласқан» екі жастың құштар да қызулы халдерін баяндайды. Содан кейін өлең мынадай екі шумақпен түйінделеді:

Құшқан сайын гүл-гүл жайнап барады,
Бір шоқ талдан ай да ақырын қарады...

Бұл екеуі сықылықтап күледі,
Қара көздер электрдей жанады.

Ертең көрдім бұларды егіс басында,
Бірі қырда, бірі тоғай қасында,
Комбайнда отыр екен күлімдеп
Бұ да өмірім, бұда менің жарым деп.

Ең алдымен, екі жастың әйтеуір күйіп-жанғанын жалпылама жырлай беру ақын үшін дара мақсат болмасқа керек. Сондай-ақ өлеңнің нақ соңында, тынар шағында автордың ешбір дайындықсыз, күтпеген жерден басқа тақырыпқа ауысып кетуі де келте әрі көңілге қонымсыз. Өлеңге орнын таппай қосылған мұндай «тұздық» шығармаға сөл де, реңк те бітірмейтіндігі хақ. Сөйте тұра ақындарымыз осыны көп жағдайда ескере бермейді.

Ж. Саинның ақындық өнерінің қыры мол, тынысы терең. Оның шығармаларында асқақ пафос, жалынды үгіт, байсалды ақыл, нәзік сыршылдық — бәрі де ұласа, ас-таса жүреді. Бұдан біраз уақыт бұрын бізде «өлең сезімге құрылсын» деп талап қоюшылар да және шығармаларын осы талапқа қарай ойыса отырып жазғандар да болды. Бірақ уақыт қазір сол талаптың солақайлығын, сыңаржақтылығын анық көрсетті. Тек сезімге ғана емес, сонымен бірге және де ең алдымен парасатты ойға құрылған шығарма ғана оқушының жан сарайын байыта түспек.

Ж. Саин — осыны терең түсінетін, ақыл мен сезімді қатар ұстайтын ақын. Өз өнерінің осы бір қырын ол творчествосының бүкіл ұзына бойына анық аңдатып келеді. Сөз болып отырған жинаққа енген «Ойласам бала кезімді» атты өлеңде бейнелі түрде берілген қаншалықты ғибрат әрі көңіл тербетер күйлі саз бар. Бұл жерде біз «ғибрат» деген сөзді нағыз жақсы мағнасында алып отырмыз. Өйткені, шын мәнісіндегі әдебиеттің негізгі нысанасының өзі — тағлым айту, адамның ой-санасын маркайту, сыр-сезімін ояту-ғой. Гәп тек сол тағлымның жадау да жадағай айтылмай, бейнелі де астарлы түрде берілуінде.

Жоғарыда аталған өлеңінде ақын балалық шағын тебрене ойға алады. Өз өмірінің сол бір кезінің суретін ол оқушының көз алдына жайып салады. Мұнда балалық шақтың қимас қызықты сәттері де, жетімдік өмірдің көңіл жүдетер көріністері де бар. Бұл жерде тағы да

ақын жеке тағдырын баяндаудан өз тұстастарының көпке ортақ күйлерін шертуге ауысады. Өлең былайша тәмамдалады:

Осылзй өткен бала шак,
Оралмас енді ол жылдар.
Белгісіз еді болашақ,
Жазы дауыл, қысы ызғар.

Отырсың ба таңырқап,
Қуғандай жазғы сағымды?
Сендерге айттым, жас ұрпақ,
Бақытсыз бала шағымды.

Әрине, саған бұл аңыз,
Сонау бір өткен ғасырдай.
Сонда да ойжап байқаныз,
Барлығын айттым жасырмай.

Ақын өлеңін осылайша оқушыға ой тастап аяқтайды. Қазіргі бақытты балалық шақты өткен өмірдің өгей көріністерімен салыстыра жырлап жатпайды. Бұл жайындағы байлауды оқушының өз үлесіне қалдырады. Бірақ бұдан өлеңнің әсер етушілік қуаты еш кемімейді. Жұмағали Саин — шындықтың жүзіне бұлтақтамай тұра қарайтын және сондықтан да өзінің ой-толғаныстарын ақтара ашып айтатын ақындарымыздың бірі. Ал мұндай авторлар оқушысымен оңай тіл табады, оны тез баурайды. Ж. Саинның партизандық жырларының, оның ішінде «Есімде Айдар өзені» атты атақты өлеңінің жұртшылық арасына кең таралып, тіпті жатталып кетуінің негізгі сыры осында болатын. Жаралы қазақ жауынгерін жаудан жасырып, аранын ашқан ажалдан аман алып қалған украин қызы, жаудан тазарған украин жерінің топырағын жата қалып, емірене сүйіп жатқан қазақ жігіті, құшақтары айқасып қабірде де бірге жатқан орыс пен қазақ жауынгері — ақын өлеңін оқығанда көз алдымызға осындай суреттер елестейтін. Бұл өлеңдегі ақынның лирикалық геройы совет жауынгерлерінің ортақ сипатын, ерлік тұлғасын, моральдық бейнесін танытатын.

Уақыт өткен сайын жасаң тартып жанғыра түсетін осынау жақсы өлеңін ақын мына жинағына тағы да енгізіпті және Айдар өзені жайында жазған «Көз алдыма келтіреді «Арқаны» атты жаңа бір жырын қоса беріпті. Соңғы өлеңін ақын Украинаға кейінгі барған сапарында

жазған. Мұнда ол Айдар өзеніне деген сағынышын, ыстық ықласын тербейді, оны бүкіл украин жерінің жинақты бейнесінде алып жырламақ болады. Өлеңде «тас бұлақтың суындай» шынайы да мөлдір талай-талай сыр-сезім, жақсы жолдар бар. Бірақ тұтастай алғанда бұл өлең «Есімде Айдар өзенінен» тайыз соғып жатыр. Өзіне іштей жақын, сүйікті тақырыбына қайта оралған ақын жаңа бір леп сездірте бермейді. Бұл ретте ол өзгенің емес, өз биігінің көлеңкесінде қалыңқырап қойған сияқты.

Жұмағали Саин бұрын адамгершілікті, адалдық пен беріктікті уағыздайтын. «жауыз ойлап, жалған күлушілікті» бекерлейтін бас-аяғы жинақы афористік, нақылдық бірсыпыра өлең жазған-ды. Бірақ онда тұтастай сатиралық сарында жазылған шығармалар ұшыраса бермейтін. Ал ақынның мына жинағына оның осы тақырыпқа арналған біраз өлеңі («Таңқы мұрын кара қыз», «Біреу...» т. б.) еніпті. Рас, алғашқы өлеңде әлеуметтік терең астар жоқ. Онда сатиралық уыттан гөрі кекесін, келемеж сарыны басым. Ал екінші өлең ақынның сатирашылық қаблетін анық байқатады. Өлеңнің «Біреу...» деген атының өзі де жинақты ұғымды әрі бір жаттықты, бөтендікті сездіртеді. Мұнда ақын «осы өмірде жүрген талай біреулерді» — жағымпаздар мен жылмандарды, мансапқорлар мен аярларды аяусыз мінейді, түптеп келгенде олардың төркіні бір екендігін айтады. Өлеңнің аяқталымы да ұтырлы тапқырлық танытады:

Біреу емес,
Мындар біздің досымыз.
Мындар үшін
Жасаймыз ғой осы біз.

Ж. Саинның поэзиясында лирикалық саз бен пафос, үгіттік сарын араласа жүретіндігін жоғарыда атап көрсеткен едік. Оның соғыстан кейінгі жылдарда жазған «Россия туралы сөз», «Орыс халқына», «Өлеңім менің» сияқты өлеңдері зор шабыт, ақындық үлкен пафостан туған шығармалар екендігі даусыз. Ал ақын осы жалынды пафосқа көтеріле алмаған шақта оның өлеңдерінің көркемдік қасиеті сұйкылт тартып, жадағайланып кететіндігі байқалады. «Мәселен, осы жинақтағы «Май жыры» атты көтеріңкі рухта жазылған өлеңде мынадай жолдар бар:

Күреспесен,
 Өмір сылын бере ме!
 Айқаспасаң,
 Жеңіс тегін келе ме!
 Күшің аспай,
 Шіркін еңбек өне ме!
 Өнім қызбай,
 Коммунизм жеңе ме!

Өрине, ұйкастары өзара үйлесіп тұрғанмен, мұнда шын өлеңге хас қасиет шамалы. Толқынусыз, терең сезінусіз туған мұндай салқын жолдар оқушыны сергіте де серпілте алмақ емес. Творчестволық сапарының әр қырқасында ара-тұра төбе көрсетіп қалатын осындай кемшілікке ақын болашақта бой алдырмасқа тиіс.

Жинақтың «Талпынған шақ» атты тарауына автор ертеректе, алғашқы кезеңде жазған кейбір өлеңдерін енгізіпті. Біздіңше, бұл жинақ таңдамалы болмағандықтан оларды кіргізбеуге де болатын еді.

Кітаптың соңында ақынның қазір жазып жүрген «Азамат» атты ұзақ дастанының алғашқы екі тарауы бар. Ж. Саинның поэма жанрында да кенеулі творчестволық тәжірибесі бары аян. «Құланда» поэмасы оның эпиктік кең толғамын танытқан еді. Бірақ «Алтайда» ақын тая соғып, аласа тартып кетті. Сондықтан да оның мына соңғы поэмасындағы аяқ алысы ерекше назар аудармақ.

Шығарма оқиғасының шарықтау шегі поэманың бірінші тарауында баяндалады. Ал екінші тарауда ақын геройының балалық шағы жайында әңгімелейді. Оның бүкіл өмірлік, азаматтық жолы, іс-әрекеті поэманың келесі жазылмыш тарауларында бейнеленуге тиіс. Шығарманың қолда бар екі тарауы ақынның эпикалық кең өріске де, лирикалық сәттерге де, авторлық ой-толғаныстарға да мензейтіндігін байқатады, оның тенденциясын да едәуір сездіреді. Ал ақынның бұл жәйттерді каншалықты өсіріп, тереңдетіп әкете алмағын болашақ көрсетпек.

ДОСТЫҚ ЛЕБІЗ

Біздің советтік әдебиетіміз өзінің интернационалдық, гуманистік сипатын ондаған жылдар бойына, яғни творчестволық сапарының ең алғашқы сәтінен бері жарқын да кең танытып келеді. Өйткені, бұл оның өтпелі, жанама қасиеті емес. Керісінше, бұл сипат әдебиетіміздің творчестволық табиғатынан, оның жанашылдық тұрпатынан келіп туады. Мұны біздің әдебиетімізге пролетариаттың кемелгер суреткері, ұлы гуманист Горький мен заманымыздың аса талантты, таңдаулы акыны Маяковский мирас етіп қалдырды. Бір мақсатты, көп ұлтты совет әдебиеті олардың осы дәстүрлерін дамытып, барған сайын молықтыра, тереңдеге түсіп келеді. Жалпы алғанда біздің әдебиетімізді әделет пен гуманизмнің, халықтар достығының шабытты да жалынды жаршысы деп атау лайық.

Халықтардың достығы мен бауырластығының ұлы идеялары — совет әдебиетінің өрісті өзегі, үзілмес арқауы, сирқылмас қайнары. Үлкен әдебиетімізді бұл тақырыптап, яғни өзінің тамыр тартар тереңінен оқшау алып, бөле-жарып қарауға еш болмайды. Мұнсыз ол идеялық тынысын тарылтып, әлеуметтік құнын әлсіретіп алар еді. Сондықтан да, бұл тақырыптың көркем әдебиетте өз шешімін қаншалықты дәрежеде және қалай тауып отырғандығы туралы мәселені талдап зерттеудің мәні ерекше.

Достық тақырыбы бүкіл совет әдебиетінде, оның ішінде жекелеген ұлт әдебиеттерінде де лайықты, үлкен орын алады. «Халықтар достығы сияқты тақырыпты алып қараңыз! — деп жазды Н. Тихонов.— Біздің қайталанбас уақытымыздың ұлы да тамаша жан тебіренер құбылысы ғой бұл! Халықтар достығы Отанымыздың азаттығы мен тәуелсіздігі үшін ұрыс далаларында күреспен шынығып, қанмен беркіді және мұның өзі туысқан халықтар әдебиетінде... тамаша бейнеленген».

Халықтар достығы тақырыбы қазақ совет әдебиетінде дәстүрлік әрі сонылық сипат танытады. Өйткені, бір жағынан, оның тамыры өте әріде, тарих тереңінде жатыр. Бұл дәстүр өз бастауын Шоқан, Ыбрай және Абай творчасынан алады. Туған халқын қараңғылық пен

тағылықтан жарыққа, прогресс жолына бастаумен бірге олар халықтар достығының үміткер жаршылары да болды. Осы дәстүр әдебиетімізде әрдайым өркен жайып, өрбіп отырды.

Сондай-ақ, бұл тақырып қазақ совет әдебиетінде мейлінше жаңа, соны шешім тапты. Оның мазмұны да өлшеусіз терендеді, көркемдік аясы да кеңи, кемелдене түсті. Көптеген қазақ совет қаламгерлері халықтар достығы мен бауырластығының жарқын идеяларын өздерінің жекелеген шығармаларының ғана емес, сонымен бірге бүкіл творчествосының өрісті өзегі етті.

Өзгесін былай қойғанда, қазақ совет әдебиетінің кемелдену кезін, есею шағын танытқан, оның дүниежүзілік өріске шығуын белгілеген «Абай» эпопеясы, «Ботакөз», «Оянған өлке», «Қарағанды» романдары сияқты тамаша шығармалар да халықтар достығының нәрлі идеяларымен суарылған. Олардың халық арасына мейлінше мол таралуының негізгі бір сыры осында.

Поэзия мен драматургияның кенеулі, кесек туындылары да осы қасиетті жақсы аңғартады. Халық поэзиясының алыбы Жамбыл мен оның талантты шәкірттерінің творчествосы, Ж. Саин, Х. Бекхожин, Х. Ергалиев, Ж. Молдағалиев және басқа да көптеген ақындардың өлең-поэмалары, Ә. Тәжібаев, Ә. Әбішев, Ш. Хұсайновтың қазіргі заман тақырыбына жазған пьесалары бұған анық мысал бола алады.

Сөйтіп, қазақ ақын, жазушылары өздерінің творчествосында халықтар достығы тақырыбын барған сайын жіті де жете игеруде. Сонымен бірге Қазақстан туралы тақырып та басқа ұлт әдебиеттерінде көрнекті орын алып келе жатқандығын атап айту мәлім. Бұл ретте украин жазушысы О. Десняктің «Торғай сұңқары» романын, молдаван ақыны Ирина Ставскаяның «Жыр сарайы» поэмасын, грузин ақыны Иосиф Нонешвилидің «Қазақстан жерінде» атты кітабын, белорус ақыны Максим Танктың «Абайдың туған елінде», орыс ақындары Е. Долматовскийдің «Қазақстан», В. Луговскойдың «Шевченко Арал теңізінде» деген шығармаларын, қырғыз ақыны Аалы Токамбаев пен өзбек ақыны Ғафур Ғұламның өлендерін атаудың өзі жеткілікті.

Бұл айтылғандар достық идеясы халықтарды ғана бауырластырып қоймай, сонымен бірге әдебиеттерді де өз-

ара жакындастыратын, оларды нәрлендіре, молықтыра түсетіндігін анық байқатады.

Аалықтар достығы тақырыбын қазақ совет әдебиеті өз дамуының әр кезеңінде-ақ қозғап отырды. Ұлы Отан соғысы жылдарындағы әдебиетте ол өзінің шырқау шегіне жетті. Өмір мен өлім белдесіп, Отан басына катер төнген шақта совет халықтарының берік ұжымдасып зұлым жауға қарсы аттануы, олардың жауынгерлік және рухани тұтастығы, құрсанған ыза-кегі әдебиетте де қуатты, күдіретті сарын тугызды. Қазақтың көптеген ақын, жазушылары еліміздің тәуелсіздігі мен азаттығы жолындағы қасиетті де айбынды айқасқа тікелей араласты. Сөйтіп, олар ерлік пен достық дастанын тек қаламмен ғана емес, қарумен де жазысты.

Достық тақырыбы соғыстан кейінгі қазақ әдебиетінде де кеңі, өрістей түсті. Бұл игі тақырыпқа тікелей де тұтастай арналған көптеген шығармалар туды. Бірақ көлемі шағын мақалада солардың бәр-бәріне талдау жасау мүмкін емес. Сондықтан біз белгілі бір кезеңде, яғни Қазақстан совет жазушыларының үшінші съезінен бергі жылдарда туған поэзиялық және прозалық шығармаларда халықтар достығы тақырыбы қалай бейнеленгендігі туралы мәселеге ғана тоқталуды мақсат етеміз. Біздің ақын, жазушыларымыз достық тақырыбына материалды дерексіз болмыстан, құр қиялдан іздемейді. Оларға мұны өмірдің, шындықтың өзі ұсынады. Бұған мысалды революцияға дейінгі сахра тіршілігінен де мейлінше мол табуға болады. Атақты «Дударай» әнін шығарған орыс қызы Мәрия Егоровна Рекинаның қазақ жігіті Дүйсенге деген сүйіспендік тағдырына байланысты тамаша аңызды кім білмейді! Мәриям мен Дүйсеннің тағдыры орыс және қазақ халықтарының арасында сонау бір қытымыр заманның өзінде-ақ туып қалыптасқан адал достық пен мейрімді махаббаттың символындай сезіледі.

Ақын Х. Бекхожин осы тақырыпқа арнап «Мәриям Жагор қызы» атты ұзақ поэма жазған еді. Бірақ поэманың алғашқы нұсқасында елеулі ақаулар бар-ды. Ақын көбінесе екі жастың сүйіспендік тағдырын ғана жалаң суреттеп, достық тақырыбының өрісін тарылтып алған болатын. Ал кейін осы тақырыпқа қайта оралғанда ақын шығармасын бұл ақаудан арылтқан. Ол поэманың оқиғалық өрбуін, тартыс желісін жаңаша құрып, көптеген

тарауларды қайтадан жазып шыққан. Бұл оның достық тақырыбын тек екі жастың махаббаты шеңберінде ғана қалдырып қоймай, кең әлеуметтік тұрғыдан қарап жырлауына мүмкіндік берген.

Поэмада Дүйсеннің әкесі Үкен мен Мәриямның әкесі Жагордың арасындағы достық та жылы, нанымды суреттелген. Бұл достық тұрмыс мүдделерінің ортақтығынан, тіршілік талабынан келіп туған. Бірақ олар сол достықты әлеуметтік теңсіздіктерге қарсы күрес құралы ету дәрежесіне жетпеген. Бұл, әрине, автордың тарихи шындықтан шығандап кетпей, онымен орайласып, қоян-қолтық келіп отырғанын көрсетеді.

Ал Алексей, Тимофей, Дүйсен, Базар, Мариямдардың достығы бұдан әлдеқайда әлуетті де берік. Достық пен махаббат еркіндігін қорғай отырып, олар ескі әдет-ғұрыптарға, діни нанымдарға және әлеуметтік теңсіздіктерге де қарсы шығады.

Дүйсеннің мешітке келіп хазіретпен және Ыдырыс болыспен айтысқан мына бір диалогтарында көп мән бар:

Дүйсен

Басқаны Мәриямдай сүйе алмаймын,
Бұйрығы емес пе екен бұл құдайдың?

Хазірет

Құдайдың әмірі емес, өзін аздың,
Ғұрыпты бұздың ескі — дінге жаздың.

Ыдырыс

Малғұл!

Мұнда сірә, иман бар ма?

Ақ жүрек азәзілге алдапар ма?

Дүйсен

Әмірші құдай болса, қайда күнәм?

Сүйдірді орыс қызын өзі маған!

Дүйсен махаббатқа деген осы адалдығын, қытымыр заманның құрсау ғұрпына бас имес беріктігін кесек іс-әрекетімен де танытады.

Ақын жастар махаббатын, халықтар достығын мадақтап жырлаумен бірге сол достықтың кеселді жауларын, олардың зұлымдық әрекеттерінің кесепаты ауыртпалығын да шынайы суреттейді. Қасарысқан бетінен қайтпайтын қатал болыс Ыдырыс, арамза хазірет, ақмақ та алуын урядник Андрей бейнелері бұған айқын мысал болып табылады.

«Мәриям Жагор қызы» поэмасында жастар махаббаты мен халықтар достығы туралы тақырыптар өзара жай ғана ұласып қоймаған. Ақын соларға әлеуметтік терең жастар бере білген. Поэмадағы негізгі тартыс желісінің махаббат еркіндігі мен достық жолындағы жастар күресін баяндауға құрылып, ақыр аяғында 1916 жылдың дауылды оқиғаларына ойысуы осыны көрсетеді.

Поэманың эпилогында ақын астанада болып, кеудесіне орден қадаған, халықтың ыстық ықласына бөленген кейіпкерінің сезім-сырларын шерте келіп былайша тұяді:

... Тербетіп алдындағы гүл жастарын,
Шақырды Дударайдың сырластарын.
Шақырды қосылуга бастады өзі
Достықтың шертілмеген бір дастанын.

Ақын достықтың осы дастанын, яғни Мәриям мен Дүйсеннің өмірін, сүйіспендік тағдырын, екі халықтың қасиетті достығын келісті де көркем поэзия тіліне түсіре алған.

Көркем әдебиетте халықтар достығын бейнелеудің творчестволық тәсіл-амалдары сан алуан. Егер проза бұл тақырыпты сюжетті шығармалар, тұлғалы образдар арқылы бейнелесе, ал поэзия мұнымен қоса терең сезімге, жалынды пафосқа құрылған лирикалық отты, уытты өлеңдер арқылы да достық идеяларын жырлай алады. Сондай-ақ ақындарымыздың соңғы кезде көбірек әрі жемісті қолданып жүрген тәсілдерінің бірі — туысқан халықтардың өмірін немесе олардың жекелеген ардагер ұлдарының тағдырын суреттеуге тұтас шығармалар арнау. Ақындар Ж. Молдағалиевтың «Жыр туралы жыр», Х. Ерғалиевтің «Оралдағы отты түн» поэмалары дәл осындай шығармалардың қатарына жатады.

Ж. Молдағалиев өз поэмасын татар халқының атакты ақыны, батыр ұлы Мұса Жалелге арнаған. Фашистердің түнек түрмесінде небір ауыр ғазаптарды бастан кешіріп, аранын ашқан ажалдан қаймықпаған, ер өлімімен дүние салған патриот-ақынның тамаша өмірі мен трагедиялы ерлік тағдыры тіпті тек аңызға ғана сымды тәрізді. Бірақ бұл — аңыз емес, киял мен ертегіге бергісіз шындық. Поэмада осы шындықтың жанды да көркем суреттері бар.

Автор Мұсаның өмірін бастан-аяқ баяндап жатпайды. Бұл шығарманың көркемдік міндетіне кірмейді де. Сөйт-

се де, ақын лирикалық шегіністер, еске алулар арқылы кейіпкерінің өмірлік жолының әр кезеңінен жарқын-жарқын елестер беріп тастайды.

Поэма ақынның өлмес жыр туралы авторлық тебреністерімен басталады. Бұдан әрі ол оқиға желісін кілт үзеді де, кейіпкерінің жау тұтқынындағы ауыр да аянышты халіне ауысады. Фашистер қанды шеңгелін қаншама қатты батырғанмен, қаншама алдау-арбау жасағанмен, Мұса илікпейді, сынбайды. Қайта ол зұлмат сұмдықты көрген сайын шымырай шынығып, кектене түседі. Мұны ақын былайша суреттейді:

Қанша арып, қанша жүдесін
Михнат, ыза, күйіктен,
Тік ұстап дембел денесін,
Қарайды жауға биіктен.

Жайнаған өткір көзінде
Қарашық емес, от сынды.
От емес, осы кезінде
Өнменнен өтер оқ сынды.

Бұл жолдарды оқығанда «қабырғасын сөксе де қайыспайтын» жалын жанарлы ер бейнесі келеді көз алдыға. Мұсаның өз атынан айтылатын сөздер де оның осы тұлғасын айқындай түседі. Біресе қорқытып, бірде арбап өз дегеніне көндірмек болған фашист жандармға Мұса былайша жауап қайтарады:

— Қару берсең — сазайын,
Қалмаспын енді қапыда.
Қалам Серсең — жазайын
Басына эпитафия.

... Жаным жоқ менің бұл жерде,
Халқымда қалды ол менің.
Өлмейді халық өмірде,
Ендеше мен де өлмеймін!

Міне осы сөздерден қаншалықты қайсар қайраттылық, рухани батырлық, өлімге де бас имейтін өршілдік сезіледі. Жалпы алғанда поэма ақын өлімін баяндағанмен, ол өлместік рухына толы. Осы тұрғыдан қарағанда Ж. Молдағалиевтің поэмасы атақты ақынымыз марқұм К. Аманжоловтың «Ақын өлімі туралы аңызын» еске түсіреді. Сонымен бірге олардың өзіндік ерекшеліктері, айырмашылықтары да мол. Егер К. Аманжолов даста-

Х. Ерғалиев ойды бейнелеп айтуға, сурет-көрініс жасауға шебер. Ол осы қасиетін тіпті авторлық баяндауларында да мол сездіреді. Көлемі шағын поэмада алған тақырыбын игере алуы, сол бір отты кезеңнің тынысын, пафосын бере білуі оның осы суреткерлік алғырлығына байланысты.

Поэманың негізгі геройы — Чапаев. Шығарманың көлеміне, шама-шарқына орай автор кейіпкері өмірінің бір ғана кезеңін, яғни оның Жайық бойындағы қазақтарды, Орал қаласын ақ бандалардан азат ету жолындағы күресін суреттейді. Ақын Чапаевты тек қолбасшы ретінде ғана бейнелеп қоймай, оның адамдық тұлғасын, рухани келбетін де көрсете алған. Бір ғана мысал келтіріп қаралық. Чапаевтың өздері азат еткен қазақ аулында болып жалынды сөз сөйлегенін және солардың ең жақын адамындай мейір танытқанын баяндай келіп, ақын мына бір жайды аңдатады:

Аттанар кезде өткір ұл
Башлығын киді батырдың.
Чапаев айтты:

— Бөк мұрын,
Білемісің сенде жатыр кім?
Болмайсың бұржуй атшысы,
Жалпақ бас толар ақылға
Губкомның, бәлкім, хатшысы,
Әлде, бір тептек ақын ба?!

Ақтаңдақ ауыл сыртында
Арқадан қағып қалдырды;
Күлкісі кетті мұртында,
Артағы көзді талдырды.

Міне, бұл жолдарды мейірлене, сүйсіне оқисың. Өйткені, мұнда ақын Чапаевтың адамға деген жылы ықласын, болашаққа сенген жарқын үмітін де және оны іш тартып, қимай шығарып салған көптің суретін де жеткізіп бере білген.

Х. Ерғалиевтің бұл поэмасы қазақ совет поэзиясының орыс және қазақ халықтарының Азамат соғысының дауылды жылдарындағы бірлескен патриоттық күресін бейнелеудегі, даңқты батыр Чапаевтың өр тұлғасын жасаудағы сәтті қадамы болып табылады.

Поэзиямыздың соңғы жылдардағы сүйекті шығармаларының бірі — ақын Д. Әбілевтің «Таудағы ту» романы. Кезінде жұртшылықтың әділ сынына ұшыраған, көр-

кемдік жағынан әлсіз «Алтай жүрегінің» материалын пайдалана отырып, автор негізінен тың, соны шығарма тудырған. «Таудағы ту» — кенді Алтай туралы, ондағы адамдар туралы және солардың өмірі мен достығы туралы шығарма. Алтай — ақынның талай жылдар бойына көп көңіл бөліп, мол ізденіп жүрген тақырыбы. Бұл романында ол революцияның дауылды күндерінде шетелдік капиталистер қиратып кеткен кенді Алтайдың қалпына келтіріліп, қатарға қосылғанын баяндайды.

Қиындыққа, жокшылыққа, жаулардың зиянкестік әрекеттеріне қарамстан үлкен патриоттық қимыл жасаған орыс, қазақ жұмысшыларының өмірі, олардың өзара та-таусыз достығы романда кеңінен суреттелген. Шығарманың бүкіл өн бойына, оқиға желісіне мол араласып, аршынды әрекет жасап жүретін парторг Деев, инженер Горин, жұмысшы әйел Зейнеп, қарт шахтер Тата бейнелері осыны аңғартады. Осылардың ішінде Деев әсіресе ерекше көрінеді. Автор оны шебер ұйымдастырушы, іскер де табанды адам ретінде бейнелеуге тырысқан. Ол көп жағдайда осы нысанасына жеткен де.

«Таудағы ту» романындағы ерекше назар аударарлық бір жәйт — автордың кеменгер көсем Лениннің бейнесін жасауға талаптануы. Автордың басқа бір үлкен ақындарға еліктей ұқсап кеткен сәттері ара-кідік сезіліп қалып отырса да, шығарманың «Ленин қайтыс болғанда» атты тарауы мол ықласпен оқылады. Ленин ісінің өлмейтін өміршеңдігін, оның жарқын идеяларының кемі-мес қуат-күшін ақын тебірене толғайды.

Сонымен бірге осы тұста мынадай бір жәйді атап айту ләзім. Романның алғашқы нұскасында «Кремльде» атты бөлім бар еді. Мұнда Алтай жұмысшылары делегациясының Москваға келуі, оларды Лениннің қабылдауы және Лениннің оларға жасаған қамқорлығы жайында баяндалатын. Данышпан көсемнің ұлылығын, қарапайымдығын көңілге қонымды эпизодтар, тартымды штрихтар арқылы жылы суреттейтін бұл бөлімде автордың шұрайлы ойлары мен ыстық сезімдері де мол ұшырасатын. «Таудағы туды» ақын осы бөлімді алып тастаған. Жұмысшылар делегациясының Ленинде қабылдауда болғаны тек жекелеген кейіпкерлердің сөздерінен, репликаларынан ғана білінеді. Бұлай ету арқылы ақын, әрине, тек қана ұтқызған.

Жас ақын Ғ. Қайырбековтың «Дала қоңырауы» атты

көлемді поэмасы жұртшылық назарын мол аударды. Ол жайында айтылған пікірлер де аралуан. Тұтастай алғанда поэмада сол кездегі сахра шындығының көп сырлары, ұлы ағартушы Ыбрайдың өз мұрат-мақсаттарын орындау жолындағы толассыз тартысының сан-сан қырлары шынайы қалыпта мүсінделген. Онда буырқанған ақындық қуат пен алғыр шабыт сездіретін шумақтар, да аз емес. Бірақ осы шығармада достық тақырыбы, яғни Ыбрайдың өз достарымен — алдыңғы қатарлы орыс адамдарымен қарым-қатнастары әлеуметтік кең тұрғыда алып бейнеленбеген. Ал өзге біреу емес, дәл Ыбрай жайында жазылған көлемді шығармада мұндай үлкен тақырып қағажу қалмай, өз орнын алуға, лайықты көркемдік шешімін табуға тиіс еді.

Қазақ совет ақындары достық тақырыбына арнап келелі дастандармен бірге көптеген лирикалық шағын өлеңдер де жазды. Солардың ішінен Т. Жароковтың қырғыз тақырыбына арнаған өлеңдері мен С. Мәуленовтың «Баку жырларын» ерекше атауға болады.

Т. Жароковтың «Жыр сапары», «Қырғыз — менің өз елім», «Сүттен тамған дән», «Қырғыз ақыны Темірқұлға» атты өлеңдерінде татаусыз достық, кимас бауырластық сезімдері мол. Қазақ ақыны қырғыз елін өзінің туған халқындай ыстық көріп, емірене жырлайды:

Туыстармен сәлемдесіп, қол ала,
Көрейін деп келдім бір-ер қонаға.
Мейман емен, қырғыз — менің өз елім,
Өз еліне кісі мейман бола ма?
Ақын қырғыз жырласа, әр сөзінің
Ырғақтары секілді бір өз үнім!
Домбыранын шанағындай күй толы
Қырғыз үйі — бейне менің өз үйім.

Тауларының жанар тіксем жүзіне —
Біздің таудың деп қалам нақ өзі ме?
Күлімдеген қыздарының көзі де
Ұқсап-ақ тұр біздің қыздар көзіне...

Бұл өлеңнен әркім де өз ойын, сыр-сезімін табады. Мұнда сылдыр суырылу, жадағай жарқылдақтық жоқ. Көбінесе көтеріңкі рухта, асқақтай отырып жазатын ақын бұл өлеңдерінде достық тақырыбын нәзік тебреніспен соншалықты жылы жырлай білген.

С. Мәуленовтың «Баку жырларында» да осындай ұнамды қасиеттер мол. Азербайжан елінде көрген достық

ықлас пен алған әсерлерін ақын шабыттана жырлайды. Бүкіл халық атынан айтар жалынды сәлемін және өзінің де ынтыққан сезімдерін, кірбеңсіз көңіл күйлерін шынайы да шымыр өлең жолдарына құя келіп, ақын былай түйеді:

Сәлем, Баку ұл-қызы,
Өленде жок шекара...
Сәлем, Каспий теңізі
Толқындары көкала.

Ән салғанда тауда су,
Күй шертеді дачасы
Сәлем саған, жан Баку,
Ақындардың қаласы.

С. Мәуленовтың «Баку жырларының» ішінде оның Азербайжанның атақты ақыны Самед Вургун туралы өлеңдері әсіресе әсерлі. Оларды оқығанда туған елін, жер-мекенін емірене сүйе де, тебірене жырлай да білген, мезгілсіз өткен үлкен ақынның тұлғасы елестейді көз алдына.

Сырбай Мәуленов достық тақырыбына арнап «Орыс даңқы» атты шағын дастан да жазды. Бұл дастан оның «Жаз ерке» деген соңғы жинағына енген. Орыстың ұлы металлургы Аносов туралы осы поэмасында С. Мәуленов жоғарыда аталған өлеңдеріне тән ақындық қуат сездірмейді. Поэмада оның басты кейіпкерінің көркем бейнесі жок.

Осы орайда поэзиямыздың достық тақырыбын шешудегі бір кемшілігін атай кеткен жөн. Кейбір ақындардың шығармаларында басқа халықтардың өкілдері жанды әдеби тұлғалар ретінде көрінбей, тек сол достық идеясының құр сұлдері сияқты болып қана жүреді. Мысалы, І. Есенберлиннің «Большевик туралы поэмасындағы» Иван, Назар тәрізді кейіпкерлердің күйі осындай.

Мұндай кемшіліктер ақындарымыздың сол суреттеп отырған кейіпкерлерінің ұлттық характерін, өзіндік сипатын терең танып-білмеуіне және ақындық шеберліктің жетіспеуіне байланысты келіп туады. Бірақ бұл сияқты кемшіліктер поэзиямыздың тұтастай алғанда халықтар достығы тақырыбын барынша мол жырлап отырғандығын бекерге шығармақ емес.

Соңғы жылдарда көркем проза қазақ совет әдебиетінің ең жетекші, басты жанрына айналғаны әркімге-ақ аян.

Ол осы өскелеңдігін, құлашының кеңдігін өзінің тақырыптық қамтуының молдығы мен кеңдігі арқылы да анық аңғартады.

Қазақ совет прозасының үлкен шығармаларының қай-қайсысы болмасын өздерінің бүкіл рухымен және көптеген кесек образдарымен халықтар достығы идеяларын толассыз бейнелеп келеді. Бұл ретте де біздің ауызға си алдымен аларымыз — М. Әуезовтың Абай туралы эпопеясы.

Эпопеяның алғашқы кітаптарында Абайдың орыс мәдениетімен, орыс достарымен идеялық және рухани жақындығын жазушының мейірлене, сүйсіне отырып суреттейтіндігі, орыс адамдарының көптеген жарқын бейнелерін жасағандығы баршаға мәлім. Бірақ біз оларға талдау беріп жатпаймыз, тек өткен съезден бергі кезеңде басылып шыққан «Абай жолы» романының екінші кітабына ғана тоқталамыз.

Қазақ және орыс халықтарының достығы туралы тақырып эпопеяның соңғы кітабында да нанымды, лайықты шешім тапқан. Бұл достықтың айқын көрінісін Абай мен Павловтың арасындағы қарым-қатнастардан ғана емес, сонымен қатар орыс, қазақ жұмысшыларының мақсат-мүдделерінің ортақтығынан, олардың өктемдік дүниесіне қарсы тайталас-тартыстарының бірегейлігінен де айқын сеземіз.

«Абай жолы» романының екінші кітабында суреттелген орыс кейіпкерлерінің ішіндегі ең негізгі де тұлғалы бейне — ақынның досы Павлов. Романның алғашқы кітабында Павлов көбінесе өзінің жақсы ой-тілектерімен, Абайға және оның халқына деген ықлас-сезімдерімен көрінетін. Ал әрекет-қимыл оның бойында тапшы болатын. Соңғы кітапта Павлов бұдан әлдеқайда биіктей түскен. Оқушы енді Павловты Абайдың ғана емес, сонымен бірге оның жылаулар болған халқының да қалтқысыз досы, жанашыр жақыны ретінде қабылдайды. Халық дертті апатқа душар болған қысылшаң шақта Павлов өзінің осы қасиетін, гуманизмін әсіресе анық танытады.

Даланы тұмшалаған дүлей қараңғылық пен қара күштерден зәбір шегіп шалдыққанда, сұм тағдырдан сокқы көріп қасірет-шерге батып налығанда Абайға достық қолын ең алдымен ұсынатын, рухани қолдау жасайтындардың бірі де — осы Павлов. Ол Абайды ішкі Россия-

да, орыстың қоғамдық ойының тарихында болып жатқан өзгерістермен таныстырып отырады және оны заман рухын дұрыс сезінуге меззейді. Павловпен кездесіп пікірлескен сайын Абайдың ой көзі аршылып, жан сарайы ашыла түсіп отырады. Шығарманың оптимистік пафосын танытатын және Абайдың жарқын болашаққа деген нұрлы сенімін аңдататын мұндай эпизодтардың Павлов есімімен байланыстырыла берілуі, әрине, тегін емес. Бұл арқылы автор Павлов образында бейнеленген орыс күрескерлерінің Абайға тигізген идеялық әсерін айқын аңдатады.

Бірақ романда бейнеленген басқа орыс адамдары жайында мұндай пікірлер айту қиын. Эпопеяның алғашқы кітаптарында жазушы екі түрлі Россияның бейнесін бергенін зерттеушілер атап көрсеткен болатын. Расында да, олардан орыс және қазақ халықтарына бірдей ортақ қамқоршы, үлкен жүректі нағыз орыс адамдарының да, өзгені қойып, өз елін де арзанға айырбастап кететін, екіжүзді әрі қорқау құлықты чиновниктердің, әкімшілік өкілдерінің де шынайы бейнелерін мол ұшырататынбыз. Ал соңғы кітапта осы желі біраз босаңсып кеткен. Яғни, онда Павловқа қарама-қарсы тұрғыда алынған және оған пар-пар келетін кесек тұлға жоқ. Әрине, бұл ұланғайыр эпопеяның идеялық зор тынысын, ғажайып көркемдік қуатын әлсіретпек емес. М. Әуезов — басқа халықтардың өкілдерін олардың ұлттық айқын болмысымен, өзіндік ерекшеліктерімен, психологиялық шындықтарымен реалистік сазда бейнелеуге мейлінше ұста. Бұл ретте одан кексе суреткерлеріміз де, әсіресе жас жазушыларымыз көп нәрсе үйрене алар еді.

Егер М. Әуезов эпопеясынан қазақ және орыс халықтарының өткен замандарда-ақ қалыптаса бастаған қасиетті достығының тарихи тамырларын танысақ, ал жас жазушы Т. Ахтановтың «Қаһарлы күндер» романынан сол достық совет шындығы жағдайында шыңдала түскенін, күдіретті күшке айналғанын көреміз.

Т. Ахтанов өзінің романында Ұлы Отан соғысының алғашқы кезеңінде Москва түбінде болған қаһарлы да қатерлі шайқастардың шынайы суретін береді, совет жауынгерлерінің кескілескен сайыста ерлік жеңістерге жеткенін көрсетеді және сол жеңіс біздің халықтарымыздың айнымас достығы мен терең патриотизмінің жемісі екендігін бейнелі түрде аңдатады.

Жазушының кейбір соқталы образдарды мүсіндеуде осындай шеберліктен, суреткерлік алғырлықтан жаза басып, тая согатын сәттері де бар. Мәселен, дивизия командирі Панфиловтың образы жайында осыны айтуға болады. Бұл образға прототип етіп жазушының атақты генерал Панфиловтың бейнесін алғаны байқалады. Бірақ романда ол өзінің шындықта болған биік тұлғасына лайық бейнеленбеген. Жазушы геройының кішіпейілдігін, адамгершілік қасиеттерін кейбір шынайы эпизодтар арқылы жылы суреттегенмен, оның асқан қолбасы ретіндегі зор тұлғасын жеріне жеткізе мүсіндей алмаған. Романның осы кемшілігі жайында кезінде біз айтқан едік. Кейін сол кемшілікті Москва сыншылары да атап көрсетті.

Біздіңше, қазақ жазушылары жасаған әскери беллетристиканың ішінде генерал Панфиловтың образын бар алып тұлғасымен жанды күйде бейнелеген шығармалар — Бауыржан Момышұлының повестері мен күнделіктері. Генерал Панфиловпен майданның талай отжалынын бірге кешкендігі және өзінің де қолбасы ретінде әскери өмірді жақсы білетіндігі бұл ретте оған көп септігін тигізген.

Қазақ совет прозасына соңғы кезде қосылған көлемді шығармалардың бірі — Х. Есенжановтың «Ақ Жайық» романы. Жазушы көп ізденіп, өмірлік тәжірибе мен суреткерлік байқауларға молыға келіп, бірден кесек шығарма берді. Бұл романда Октябрь революциясынан кейінгі алғашқы жылдарда Орал қаласында, Жайық бойын жайлаған елдерде болған қиян-қиялы оқиғалар баяндалады. Жазушы басқа көптеген күрделі тақырыптармен бірге халықтар достығы тақырыбына да мол назар аударады.

Орал қаласында тұнғыш совдеп құрған Әбдірахман Әйтиев, Дмитриев, Червяков сияқты коммунистердің халықты азаттық жолындағы күреске үндеген революциялық қызметі де, олардың талай сыннан өткен өзара достығы да романда нанымды бейнеленген. Жазушы қазақ, орыс, татар халықтарының арман-мүдделерінің бірегейлігін, достық ықласын солардың қарапайым өкілдерінің бейнелері арқылы да, көпшілік тұтас көрінетін реалистік эпизодтар арқылы да суреттей алған.

Тақырып жағынан осы «Ақ Жайық» романымен орайлас шығарманың бірі — З. Шашкиннің «Ұядан ұшқан

да» атты повесі. Онда өрбитін оқиғалар негізінен алғанда Жетісу өлкесінде совет өкіметі орнап, жаңа өмірдің таны атқан кезеңді қамтиды. Сондай-ақ, лирикалық шегіністер арқылы жазушы 1916 жылғы ұлт-азаттық қозғалыстың көріністерін де елестете кетеді. Жалпы алғанда автор сол бір қысылшаң кезеңнің алуан түрлі әрі күрделі оқиғаларға толы сипаттарын, уақыт рухын аңдата алған.

1916 жылғы көтеріліс күшпен басылғаннан кейін Синь-цзянға өтіп кеткен қазақтар совет өкіметі орнағаннан соң Жетісуға қайтып келеді. Олардың мұндағы жерлеріне бай қазақтар орналасып алған. Совет өкіметінің жаулары — контрреволюционерлер, ұлтшылдар, дін иелері осы ұрымтал жағдайды әккілікпен пайдаланады. Олар қазақ және орыс халықтарының арасына араздық отын тастайды. Өздерінің бұл арамза ниеттерін іске асыру жолында олар Орта Азиядағы керітартпалық күштермен де астыртын байланыс жасайды. Олардың бұл лаңына Сақа және ол бастаған басқа да коммунистер халықтың достығы мен күресін қарама-қарсы қояды. Жазушы осы күрес, тайталас-тартыс үстінде шыңдалып шыныққан достықты суреттейді.

Өздерінің шығармаларында халықтар достығы идеяларын бейнелеу, басқа ұлт адамдары өкілдерінің образдарын жасау проблемасына біздің ақын, жазушыларымыз көптен назар аударып келеді. Бұл қазір игі дәстүрге айналды. Рас, басқа халықтардың өкілдерін жанды кейіпкерлер ретінде бейнелемей, оларды шартты түрде, схемалық калыпта мүсіндеген шығармалар да болды. Ал қазір біздің әдебиетіміз осы олқылықтан батыл арылып келеді. Мұны жоғарыда талдаған және бұл шолуға енбеген басқа да көптеген шығармалардан анық көреміз. Әдебиетімізде өрістеп, терең беки бастаған осы өнімді принципті жас жазушылар да бекем ұстанады. Жас жазушы З. Қабдоловтың жұртшылық жылы қабыл алған «Өмір ұшқыны» повесіндегі Тайман, Надя, Саша образдары осыны көрсетеді. Бұл повестен адал достықтың, таза махаббаттың, жалынды да жайдары жастықтың лебі еседі.

Соңғы жылдарда Қазақстанда алуан-асыр өзгерістер болды. Ғасырлар бойы тұсырап жатқан тың дала ен байлықтың, достық пен жемісті еңбектің мекеніне айналды. Бұл қаламгерлеріміздің достық тақырыбын бұ-

рынғыдан да кең бейнелеуіне, өнімді шешуіне мүмкіндік бермек. Бірақ осы тақырыпқа арналған шын мәнісіндегі реалистік тұлғалы шығармалар әзір туған жоқ. Бұл тақырыпты қайта прозаның шағын түрлері, әсіресе көркем очерктер тәп-тәуір көтерді. М. Әуезовтың, С. Мұқановтың, Т. Нұртазиннің және марқұм М. Иманжановтың очерктері бұған анық мысал бола алады.

М. Әуезовтың «Түркстан солай туған» деген көлемді очеркін оқып шыққанда қақаған қарлы боранға және басқа да сансыз қиындықтарға қарамай жаңа совхоз орнатқан, құлазыған далаға жан берген еңбеккер жандардың тегеурінді қимылын, достық рухын айқын сезесің. Көз алдынан тағдырлары әртүрлі, бірақ тілек-мақсаттары бір әралуан ұлт өкілдерінің жанды бейнелері өтеді. Солардың ішінде окшау танылатыны — совхоз директоры Строгов. Ол білгір басқарушы, шебер ұйымдастырушы ретінде көрінеді. Строгов — алғыр ақылдың, белсенді әрекеттің адамы. Жаңа совхоздың іргесін қалау жолындағы ұлан-асыр қиындықтардан ол тайсалмайды, қайта ол шындалып ширыға түседі. Строговтың бойындағы гуманизмді оның бай рухани дүниесін, абзал ой-сезімдерін де жазушы әсерлі бейнелей алған. Осының бәрі Строговты іші-тысымен тұтас көрінген шынайы да жинақты образ ретінде танытады.

Достық тақырыбын қозғайтын шығармалар бұл мақалада талданғандармен шектелмейді. Біз тек өткен съезден бергі уақытта әдебиеттің екі жанрында туған бірсыпыра шығармаларға ғана тоқталдық. Ал қазақ әдебиеті мен көркемөнерінің 1949 жылы Москвада болған онкүндігінен бергі уақытқа ой көзімен оралсақ, онда бұл кезеңде достық тақырыбына арналып қыруар роман, повестер, ондаған поэмалар, көптеген пьесалар туғанын көреміз. Солардың таңдаулыларының барлығы дерлік орыс тіліне аударылды. Олар қазақ әдебиеті мен көркемөнерінің алдағы онкүндігінде де қазақ халқының басқа бауырлас халықтарға деген достық лебізіндей естілмек.

Халықтар достығының жарқын идеялары социалистік реализм әдісін игеріп, кемелдену өріне бекем де толассыз көтеріліп келе жатқан қазақ совет әдебиетін бұдан былай да молықтыра, нәрлендіре бермек.

ШЫҒАРМА ЖӘНЕ ОНЫ ӨңДЕУ

Жастардың әдебиетке келу жолдары әралуан. Қайсы-бір жас қаламгерлер өз күштерін еналдымен әдебиеттің шағын түрінде біртоға сынап, барлап алған соң барып оның күрделі формаларына біртіндеп ауысады. Ал енді біреулер творчестволық тәжірибемен және суреткерлік байқаулармен, аныстармен іштей молыға, шиыршық атып толғана да іздене жүріп бірден-ақ кесек шығарма беріп тастайды. Бұл, әрине, олардың әрқайсысының қабілетіне, қалам сілтесіне байланысты. Бірақ қайткен күнде де өз талантының бар қуаты мен терекін бірден жарқыратып жайып салатын қаламгерлер сәншалықты жиі ұшыраса бермейді. Әйткенмен, таланттың аты — талант. Ерте ме, кеш пе — әйтеуір ол шарасынан аса төгіліп, өзін танытпай қоймақ емес. Ә. Нұрпейісовтың «Қурляндия» романы бұдан он жылға тарта уақыт бұрын жарыққа шыққан еді. Жас жазушының күрделі де кесек бұл қаламалдысын жұртшылық, негізінен, жақсы қабыл алды. Шығармаға бірсыпыра салмақты, саликалы сын пікірлер де айтылды. Дегенмен, оның авторының үлкен үміт күттіретіндігіне ешкім де шүбалаңбаған-ды.

«Қурляндия» романында Ә. Нұрпейісов өз талантының қуатын, әралуан қырларын бірсыдырғы жақсы байқатты. Бірақ ол творчестволық мүмкіншіліктерін емін-еркін баурай да, сарқа пайдалана да алған жоқ болатын. Қаламының балаңдығы мен тәжірибесінің кемдігінен, талантының әлі де болса толысып жетілмегендігінен жас автор көптеген көркемдік олқылықтарға бой алдырған еді. Сондықтан да ол арада талай жыл өткеннен кейін сол туындысына қайталап оралды. Бұл — жазушының өз өнеріне зер сала, мұқият қарауының, алдына жауапты да зор талап қоя алатындығының ғана белгісі емес. Сонымен бірге мына бір жәйттерді де қоса аңғарта кету кажет.

Еналдымен, «Қурляндиядан» кейін автор ұзақ жылдар бойына төл шығарма жазған жоқ. Тек Чеховтан, Горькийден және орыстың басқа да кейбір классиктерінен бірталай аударма жасады. Сөйтсе де, сол жылдар жас

жазушы үшін іштей ізденіп өсу, творчестволық жағынан түлеп жетілу кезеңі болғаны күмансыз.

Сондай-ақ, ірі жазушымыз Ғ. Мүсреповтың «Қазақ солдаты» романын былай қойғанда, Ә. Нұрпейісовтың «Қурляндиясы» жазылған шақта қазақ совет прозасында Ұлы Отан соғысы тақырыбына арналған кесек те көркем шығарма жоқтың қасы еді. Ал кейінгі жылдарда біздің жазушыларымыз бұл тақырыпқа молынан әрі тереңдеп барды. Т. Ахтановтың «Қаһарлы күндер» романы, Б. Момышұлының повестері және басқа да бірсыпыра шығармалар туды. Сөйтіп, қазақ совет прозасы Ұлы Отан соғысының отты оқиғаларын, сол бір жылдардың қатал да қайсар шындығын бейнелеуде көп ұлтты совет әдебиетінің ең іргелі, алғы легіне қосылды. Ә. Нұрпейісов прозамыздың осы салада жиған творчестволық тәжірибесіне, сөз жоқ, үнілмей де, үйренбей де кете алған жоқ.

Сөйтіп, жазушы бұрынғы «Қурляндия» романын өңдеп қайта жазып, «Күткен күн» деген атпен бастырып шығарды. Әрине, өңдеудің де өңдеуі бар. Шығармасының атын немесе кейіпкерлерінің есімдерін өзгертіп, біраз қысқартып, яки там-тұм қосып баспаға қайта ұсына салатын авторлар да болады. Ә. Нұрпейісов мұндай жүрдім-бардым жазушылардың қатарына қосылмайды. «Күткен күн» романы бізді еналдымен осы ойға ұялатады.

Жазушы, негізінен, бұрынғы романының материалдарын алғанмен, соларды қайта қараған, сұрыптап екшей түскен. Бірсыпыра кейіпкерлер мүлде алынып қалып, тыңнан көптеген кейіпкерлер енгізілген. Ал бұрынғы ірілі-уақты бірсыпыра қаһармандардың іс-әрекеті, характерлері жана қырларымен, соны сипаттарымен ашыла, толыға түскен. Сондай-ақ, романға тыңнан енгізілген сюжеттік желілер, тұтас тараулар да соншалықты мол. Мұның өзі «Күткен күн» романын белгілі дәрежеде жаңа шығарма ретінде талдап бағалауды қажет етеді. Асылы, бұрынғы туындысына іштей көңілі толмай, оған саналы түрде қайталап оралуы, оны жетілдіре ұстарта түсуі — автордың творчестволық талғампаздығының да, сол сияқты оның суреткерлік шеберлігі өсуінің де белгісі.

«Күткен күн» романының өзекті желісін, сюжеттік арқауын құраған Ұлы Отан соғысының оқиғалары — ав-

гордың өзіне де іштей жақын, таныс тақырып. Бұл тақырыпқа бүкіл совет әдебиетінде де, оның ішінде қазақ совет прозасында да көптеген кесек шығармалар тудырып жоғарыда айттық. Оларда сол бір айбарлы жылдардың батырлық шындығы, қажырлы пафосы бар. Бірақ Ұлы Отан соғысы тақырыбы әдебиетімізде өзінің жан-жақты қырымен, зор эпопеяларға ғана снымды шындығымен сарқыла суреттелді, тұтас көрінді деп айту қиын. Халқымыздың бақытын, азаттығын қорғап қалған еңіреген ерлердің білек күшімен, жүрек қанымен жазған батырлық дастандары көркем образ тіліне терең де толық түсіріліп болған жоқ.

Ұлы Отан соғысының героикасы, халқымыздың елдігі мен ерлігіне толы сол бір кезеңнің сұсты бейнесі қаламгерлеріміздің назарын болашақта да аударып бермек. Сондай-ақ, бұл тақырыпқа барған әрбір үлкен суреткер қазір тарихқа айналып бара жатқан сол жылдардың оқиғаларына өз тұрғысынан үңілмек және өзінше суреттеп көрсетпек.

Совет жазушыларының бүкілодақтық екінші съезінде көркем проза туралы жасаған баяндамасында Қ. Симонов Ұлы Отан соғысы тақырыбына арналған шығармалардың бәрін бір қалыпқа салып бағаламақ болған. Олардың авторларының творчестволық даралығына жіті үңілмеген сыншыларды кіналаған болатын. «Кейбір сыншыларға,— дейді Қ. Симонов,— Б. Горбатовтың «Бас имегендері» бейнебір публицистика түрінде, В. Некрасовтың «Волгоград окоптарындасы» тым қарадүрсін күйде, А. Бектің «Арпалысы» тым ойнақы түрде, О. Гончардың «Ту ұстаушылары» тым көтеріңкі сазда жазылған тәрізді көрінді... Ал шындығында бұл кітаптар әртүрлі төрт суреткерге хас әралуан стильмен жазылған еді».

Расында да, Ұлы Отан соғысы туралы тақырыптың қамту шеңберінің, аясының кеңдігі тек оның ғажайып оқиғаларға бай екендігіне ғана байланысты емес. Осы бай материал өзінің сипатына, ішкі табиғатына орай әралуан көркемдік бейнелеу де талап етеді. Соғыс туралы әрбір кесек шығарманың өзіндік ерекшелігі оның авторының еналдымен сол талапқа қаншалықты дәрежеде жауап бере алғандығына, тақырыптың көркемдік шешімін өз тұрғысынан таба білгендігіне байланысты. Үлкен суреткерлердің өзіндік стильдері мен мәнерлерінің,

идеялық-көркемдік концепияларының, творчестволық тәсілдерінің әртүрлілігі белгілі дәрежеде шындықтың өзінен, оның қайшылықтары мен алуандығынан келіп туады. Оның үстіне, әдебиеттегі әрбір үлкен творчестволық тұлға — бұл стиль. Көрінікті орыс совет жазушыларын былай қойғанда, Ғ. Мүсрепов, Т. Ахтанов, Б. Момышұлының шығармалары белгілі бір тақырыпқа арналғанмен, олардың әрқайсысынан авторының шындыққа деген өзіндік қатнасын, стиль алуандығын сезетіндігіміз де осыдан. Ә. Нұрпейісов романы жайында да осыны айтуға әбден болады.

«Күткен күн» романының эпикалық тынысы кең, шындықты қамту шеңбері мол. Шығарма кейіпкерлерінің тағдыры мен талайы, іс-әрекеттері жан-жақты, терең суреттелген. Сонымен бірге онда кейіпкерлердің психологиялық сипаттаулары да соншалықты нәзік әрі шынайы түрде берілген. Жалпы алғанда, психологиялық сипаттауға шеберлік — Ә. Нұрпейісовтың жазушылық талантының ең бір жарқын қыры: оның творчествосының нағыз ерекше белгі-бедерлерінің бірі. Бұл тұста ол өзінің де алғыр аңғарымпаздығын, сондай-ақ оқиғаның сырттай қызықтылығын, жалаң ойнақылығын көп қуаламай, өмірлік құбылыстар мен фактылардың ішкі тереңіне үңіліп, уақыт рухын, өмір шындығын әралуан адам тағдыры арқылы, шынайы да кесек бейнелер арқылы суреттеуге қарай барған сайын көбірек ойысып, жемісті творчестволық арнада дамып келе жатқан ұлттық көркем прозамыздың үлкен шеберлерінен жақсы тағлым алғандығын да анық сездіреді. Ә. Нұрпейісов авторлық баяндауларының өзінде де әрбір құбылыстың немесе оқиғаның сипатын, әсерін кейіпкерлерінің сезім елегінен өткізіп береді. Бірер мысал келтіріп қаралық. «... Жоғары қарағанда Баянның зәресі ұшты. Қап-қара тұңғиық аспаннан тұмсығымен шаншылып, сорғалай ағып шыға-шыға келген оннан астам «юнкерс» аса қорқынышты еді. Әсіресе төмендеп төніп келіп, төңкеріліп, шалқасынан аунай құлағаны бір сұмдық. Сол бетінде бірінің артынан бірі шүйлігіп станцияға төніп қалған (оған дәл өзіне шүйліккендей боп көрінген) әлгі бәледен бір кереметтей бажыл құлақты жара, ышқына шықты. Шүйліккен бомбардировщик те, Саска ештеңе де емес, мына түнерген қап-қара аспанның дәл өзі қарап боп, бойындағы бар жұлдызы, бар бұлтымен бұлардың

үстіне құлап келе жатқандай. Баянның төбе құйқасы шымыр етті. Ол басын бұға қап еңкейіп, аласа бұта лрасымен жүгіре жөнелді. Жоғары қарауға жүрегі дауылар емес. Осы қазір дүниедегі бар қауіпті өз бойынан танып; атылған оқ өзіне ұшып, бомба да бір өзіне түсеіндей. Ол бассауғалап жүріп, немістердің темір жол бойын қалай бомбалағанын көрген жоқ. Қарсылықтың күшейіп баратқанын да тек соңғы жағынан байқап еді. Шұбыра жарысқан қызылды-жасылды жалтырауық оқтар кең әуеден қуыс орын тастамай, шұрк-шұрк тесіп жатқандай. Әуеде жарылған снарядтар қараңғы түннің қабағын бір жаптырмай, найзағайдай ойнап жарқ-жүрк етеді. Мына бір бастан прожекторлар жарығы түсті. Құс жолындай екен. Ұзын, ақшыл сәуле қаратүнек аспанды кеулеп кіріп, арлы-берлі былғандап, кең биікті тынымсыз кезіп, шар қылады» (32—33-беттер).

Өмір мен өлім арпалысқан, ажал аранын ашқан ауыр да қысылшаң бір сәтті автор осылайша береді. Мұнда алапатты майданның жан қорқытып, жүрек тітіретерлік қаупін алғаш рет көріп бастан кешірген адамның үрейлі сезім дауылдары да, сұрапыл соғыстың сұсты суреттері де бар. Жазушы соларды өзара ұластыра, астастыра шебер суреттей алған. Романның соңғы беттеріндегі Ивановтың жауынгерлерді шабуылға бастардағы және қайтыс болар алдындағы жан толқулары суреттелетін жерлер де осындай сезім шындығымен ерекшеленіп көрінеді. Кейіпкерлерінің әр-алуан көңіл күйлерін, кат-кат сырларын ақтарып ашқанда жазушының «адам психикасына» (Луначарский) осылайша тереңдеп үңіліп, әсерлі суреттей алатындығын, анық шеберлігін айқын танытатын мұндай мысалдарды романның кезкелген тарауынан, әрбір эпизодынан да алуға болады. Романның негізгі сюжеттік желісі 1944 жылдың күзінен бастап соғыс біткенге дейінгі уақытта Курляндия майданында болған оқиғалардың аңғарында өрістеп дамиды. Әрине, қандай күрделі, кесек шығарма болса да өз аясына бүкіл майданның жауынгерлік өмірін тұтас сиғыза алмақ емес. Ә. Нұрпейісов та көбіне полк, батальон, дивизия өмірін суреттейді. Сөйтсе де, ол бүкіл майдан өмірінің тынысын, соғыстың сипаты мен психологиясын дұрыс та шынайы сездіре алған. Романның алғашқы вариантында жазушы шығармасының денін Джукста ұрысын суреттеуге арнап шұбалаң-

кылыкка ұрылган болатын. Романның майдан өмірін тікелей бейнелейтін тарауларында бірін-бірі қайталайтын, өзара үксем ситуациялар да баршылық еді. «Күткен күн» романында автор оқиға желісін басқаша құрған. Мұнда совет жауынгерлерінің Тукумс, Джукстэ қалаларын, тіпті кейбір жекелеген қыстақтарды азат ету жолындағы ерлік күрестері де, теңіз жағалауындағы ұрыстар да, сондай-ақ олардың шабуылға шыққандағы, кейін шегінгендегі немесе бекініске тұрақтағандағы жай-күйлері де кеңінен суреттелген. Романға маршал Говоровтың, генерал Разумовтың бейнелерін енгізу арқылы және әскери ұрыстар мен қимылдарды сондай үлкен қолбасылардың ойы, дәрежесі тұрғысынан қарап бағалау арқылы автор бүкіл Құрляндия майданының жалпы сипатын, тынысын жақсы аңғартады.

Бұл тұста да Ә. Нұрпейісовтың тактика жөнінен, негізінен сауатты екені, оның әскери өнерді, майдан өмірін көп бақылап зерттегені байқалады. Жалпы алғанда, романдағы батальдық көріністер оқиғалар тізбегінің қызықтылығымен де, кейіпкерлердің сол бір қысылшаң шақтағы толқынған көңіл күйлерінің, психологиялық сәттерінің тереңдеп ашылуымен де оқушыны иландырып, еліктіріп отырады. Романды оқып отырғанда оны қанды майданның қиян-қилы оқиғаларын өз басынан кешірген, сұрапыл соғыстың шындығын өз жанымен сезінген адамның жазғанына еш шүбаланбайсың. Бұл, әрине, автордың өз шығармасына арқау етіп алған өмір шындығын терең зерттегенін, ол жайында көп толғанғанын және соны суреткерлік алғырлықпен айқын елестете алғанын көрсетеді.

Тұтастай алғанда роман сол бір отты кезеңнің шындығына, халқымыздың қайрат-қажырының рухына толы. Маршал Говоровтан бастап латыш шалы Пийге дейін өз елін, жер мекенін емірене сүйіп қана қоймай, оны азат етуге, қорғауға да өз үлесін қосады. Жазушы совет адамдарының осындай терең патриотизмін, олардың батырлық қимылдарын көптеген жанды образдар арқылы бейнелейді.

Романда қиян-қилы адам тағдырлары, әралуан характерлер мол. Бұл заңды да. Өйткені, біздің кең тынысты, мол сырлы үлкен өмірімізді, әсіресе аясына сансан адамдарды тартып, қабындап өрбитін оқиғаларға,

дағдылы өмір ағысында ұшыраса бермейтін тұтқиыл ситуацияларға толы майдан шындығын бейнелегенде біздің жазушыларымыз көп планды роман жанрына, қатта тіпті эпопеяға қарай ойыспай кете алмақ емес. Ә. Нұрпейісов романынан да осы қасиет мол сезіледі. Онда сюжеттік желілер, оқиға өрбуі қалың, кейіпкерлер де көп. Автор бір кейіпкерін баса суреттеп, оны оқушының көз алдында көлденеңдете беруден, сондай-ақ екінші бір кейіпкерін одан қасақана көлегейлеп қалудан аулақ. Кейбір жазушыларымыз тәрізді ол өз кейіпкерлеріне деген авторлық қатнасын да тікелей таныта бермейді. Бірақ, бұл оның осалдығы емес, қайта өзіне хас творчестволық ерекшелігі. Жазушы өз кейіпкерлерінің психологиялық сипаттауларын терең де нәзік беруге, олардың характерлерін іс-әрекет, оқиғалар тізбегі барысында ашып көрсетуге әсіресе онтайлы. Романда жазушының алғы лекте алып бейнелеген кейіпкерлерінің өздері де көп әрі алуан түрлі. Солардың бірі — Есей.

«Курляндия» романында да Есей өзінің кесек қимылдарымен біртоға жақсы көрінетін. Бірақ автор оның «жан диалектикасын» терең аша алмаған еді. Образдың өсу, жетілу жолы да дәйектілікпен, көркем түрде суреттелмеген болатын. «Күткен күнде» автор бұл кейіпкерінің бейнесін толықтыра түскен, оның характерін тереңдеп ашқан.

Оқушы романның ең алғашқы беттерінен бастап-ақ Есеймен танысады. Шығарма экспозициясының өзі осы Есейдің оқыс бір қимылына құрылған: Подполковник Бобровтың полкы теңіз жағалауында жүргізген ұтымды ұрыстардан кейін майданның жана бір шебіне қарай ауысады. «Сондықтанда, бұл арадағы жау сырының көп жайы жұмбақ; көп нәрсе бұлардың көзінен қағас, таса. Тіпті, кейбір неміс батареяларының тұрған жерін дәл анықтай алмай, құр долбармен белгіге алып жүр еді. Осыны ескерген Есей жау түкпірін бір сүзіп қайтқысы кеп, талай рұқсат сұраған; бірақ сақтық ойлаған Скориков оны ірке түсетін-ді» (22-бет). Есей ақыры қасына бір топ барлаушыларды ертіп жау тылына кетеді. Романның оқиғалық желісі дәл осыдан басталады да.

Осы барлау сапарында Есейлер көп қиындықтарға ұшырайды. Бірақ олар ақыры немістердің контрразвед-

ка жұмысын басқаратын бір полковнигін тұтқынға түсіріп қайтады. Қауіпті сапарға рұқсатсыз кеткені үшін Есей әскери жаза да тартады. Мұның бәрі де оны шырықтыра, шыңдай түседі.

Жазушы Есейдің қарулас жолдастарымен бірге жау қоршауында қалған шақтағы ғажайып ерлігін және оның неміс фашистерінің қолына тұтқынға түскендегі қайсар шыдамдылығын, қисапсыз рухани қуатын соншалықты кеңінен толғап, нанымды суреттеген. Романда Есейдің жолдастарына деген қалтқысыз достық көңілін, таза да пәк сүйіспендік аңсарларын, шынайы адамгершілік қасиеттерін жақсы аңғартатын эпизодтар аз емес. Автор бұл айтылғандарды кейіпкерінің бойына жасанды түрде, қолдан телімейді, қайта оның табиғи сипаттары ретінде суреттейді. Есейдің Зағипамен, латыш қызы Эрикамен қарым-қатнастары, махаббат драмасы да шынайы, нанымды бейнеленген. Жалпы алғанда, романның соңғы нұсқасында жазушы Есей образын іштей өспейтін, семіп қалған күйде емес, қайта жан-жақты толысу, тереңдей түсу түрінде көрсете алған. Есейдің Петр Денисов, Қожақ, Самед, Гогоедзе, Ғиззатуллин сияқты жауынгер жолдастарының, қарулас достарының бейнелері де романның тынысын кеңітіп, ажарын келтіріп тұр. Жазушы оларды әралуан ұлттың өкілдері ретінде әншейін ала салмаған. Романда олар халықтар достығы идеясының құр сұлдері, рупоры ретінде емес, керісінше өмір шындығынан алынған, өзіндік бітім-тұлғалары, табиғи даралығы бар жанды бейнелер түрінде суреттелген.

Осылардың ішінен жазушының әсіресе мейірлене, беріле суреттейтіні — Петр Денисов. Өзінің ақжарқын, адал мінезімен, кірбеңсіз көңіл күйлерімен, жан сергітер жайдары қалжыңымен ол шығармаға әрдайым бір жарқындық, мойымаушылық рухын дарытып жүреді. «Күткен күн» романында бұрынғыдан әлдеқайда биіктеп, жарқырап көрінген тұлғалардың бірі — Скориков. Оның қасына үш жауынгер ертіп, жау тылына өтуі, рация арқылы біздің артиллерияны жаудың ең маңызды соғыс объектілеріне туралауы, ақыры фашистердің қоршауында қалғанда тірідей қолға түсуден ерлікпен қаза табуды артық санап артиллеристерімізден өздеріне оқ атуды өтінуі — нағыз батырлық қимыл, Отанын,

халқын емірене сүйген еңіреген ердің ғана қолынан келетін кесек әрекет.

Жазушы Скориковтың семьялық өмірін, оның әкелік мейірімін де соншалықты шыншылдықпен, тебірене суреттейді. Алыс тылда қалған әйелін, екі баласын әруақыт сағынышпен еске алып ойлаған сайын Скориков өзінің де жан иірімдерін, жүрек түпкірін солғұрлым ақтара ашып, тереңдеп таныта түседі. Сұрапыл соғыстың от-жалынын кешіп, қауіп-қатердің өтінде жүріп ол бейбіт күнде, дер шағында өзі қадірін білмеген, бағалай алмаған ұяң мінезді абзал жарын әсіресе тебірене еске алады, сол бір ағат қылықтарына өкіне ұялады. Әйелінің ауыр науқасқа шалдығып қайтыс болған хабарын естігеннен кейін оның бұл өкініш-наласы бұрыңғыдан да бетер ауырлап, күшейіп кетеді. Романдағы Скориковтың осы рухани драмасы суреттелетін беттер өздерінің психологиялық мезеттерінің ғажайып тереңдігі, татаусыз шыншылдығы жағынан, көркемдік бояу-нақыштарының суреттілігі мен айқындығы жағынан жас жазушының емес, тіпті майталман шебердің, шын мәнісіндегі алғыр да сезімтал, кемел суреткердің қалам сілтесіне орайлас келіп қалады.

Скориковпен бірге көбірек көрінетін офицерлердің бірі — Тайнов. Бірақ Тайнов — жеріне жеткен, толысып шыққан образ емес. Онда даралық сипат, өзіндік ерекшелік жоқ. Ол көбінесе Скориковтың тасасында, басқа кейіпкерлердің көлеңкесінде қалыңқырап қойған.

«Күткен күн» романының ұтымды бір жағы — оның авторы совет офицерлері мен қатардағы жауынгерлердің рухани тұтастығын, берік ұжымдастығын шынайы суреттей алған. Бұл ретте ол біздің әскери романдарымыздағы елеулі бір олқылықтың есесін едәуір өтеген тәрізді. Генерал Разумовтың, полковник Сидлердің бейнелері осы пікірді растай түседі.

Генерал Разумов соғыс стратегиясына, әскери өнерге жетік көреген қолбасы ретінде бейнеленген. Ол белдескен жауының ішке бүккен сырын, оның күшті әрі осал жақтарын алыстан андап, алдын-ала сезіп отырады. Романда генерал Разумовтың адамгершілік қасиетін сипаттайтын эпизодтар да аз емес. Ол, әрине, жауынгерлерге орынсыз елжіреп, арқаға қаға беруден аулақ. Бірақ ол жауынгерлерімен әрдайым тіл тауып сөйлесе біледі, олардың тағдыры жайында әкелік қам-

қорлықпен тебірене ойлайды. Өзгесін былай қойғанда, Разумовтың не бір қиындықтарды бастан кешіріп жау қоршауын бұзып оралған әрі әйелінің қайтыс болған хабарын естіп қатты рухани күйзеліске ұшыраған Ско-риковты қабылдағаны суреттелген эпизодта қаншалықты жылылық, абзал мейірбандық бар.

Романның соңында генерал Разумовтың неміс генера-лы Бегемен келіссөз жүргізгені баяндалады. Разумов өзінің сөзінен де, кескін-кейпінен де, көзқарасынан да жеңген адамға тән астамшылық сездірмейді. Разумов характерінің күшті бір қырын, мінез ірілігін автор осы тұста әсіресе әсерлі суреттей алған.

«Генерал Беге оған сыртын беріп тұрған. Осы тұста ол шұғыл айланып, жалт қарады. Оның қансыз құп-қу кескінінде үрей бар екен. Құты ұшқан үрей оның Разумовқа қараған көзінен айрықша айқын көрінеді.

— Осы жайды ескертем. Ойлан, генерал! Соңыра кеш болады,— деді Разумов.

Беге мундірінің түймесін ағытты. Дірілдеген қолымен мандайының терін сүртті. Оның көзінде жас тұрған.

— Я, біз жеңілдік!— деді де, алақанымен бетін басып, еңіреп жылап жіберді.

Ашық терезеден Разумовтың бетіне самал соқты. Сол самал ақ перденің етегін ақырын қозғап, бұлаңдатып толқытып қояды» (369-бет).

Романның жеңіс рухына толы бұл соңғы тарауының осылайша генерал Разумов бейнесі арқылы, оның ты-ныштық тынысымен дамылдап, сая тапқан көңіл күй-лерін суреттеу арқылы аяқталуы тегін емес. Осы сәтті табылған аяқталым Разумов образын бұрынғыдан да биіктете, ірілендіре түскен.

Жалпы алғанда, шығармаға ірі-ірі қолбасылардың бір-нешеуінің кесек образдарын енгізу арқылы, олардың әскери өнерін кеңінен суреттеу арқылы жазушы майдан шындығын, оның стратегиялық ерекшеліктерін кең тұр-ғыдан бейнелей алған. Романның ең құнды қасиетте-рінің бірі де осында.

Ә. Нұрпейісов шындықты бір жағынан ғана көретін су-реткер емес. Ол өмір ағысын бар күрделі күйінде тұ-тас қамтып бейнелеуге ұмтылады. «Күткен күн» рома-нындағы подполковник Бобровтың, майор Долгушов-тың образдары бұған анық мысал бола алады.

Жазушы бұл екі кейіпкерін де ұнамсыз планда алған. Сонымен бірге өзара мүлдем ұқсамайды. Бобров — уақыт талабынан қалып қойған, қазіргі заманғы әскери өнердің өрісінен тым аласа жатқан кейіпкер. Рас, ол Азамат соғысы кезеңінде жақсы командир болған. Бірақ, Бобров сол жылдардың дәрежесінде қалып қойған. Сондықтанда ол басқаларға басшылық етудің орнына енді ортақ іске оралғы бола бастаған. Жазушы оның әскери командир ретінде де, адам ретінде де өмірден ысырылып, ұсақтап кеткенін көркемдік жағынан нанымды суреттей алған.

Ал Долгушов образы бұған карама-карсы. Ол Бобровтай бойкүйез, салбөксе емес. Сымбатты тұлғасымен, сұлу көркімен, оған қоса құбылмалы қыры көп мінезімен Долгушов сынаптай сырғып, бойына онайлықпен дарытпайды. Әйел затын көрсе, қызыл көрген құзғындай құтырынып, қозданып, есіріп кететін, өз тұрғыластары мен лауазымы кішілерді келекеге айналдырып, ғансып жүретін Долгушов үлкендердің алдында бәйек болып, құрдай жорғалайды.

Жазушы кейіпкерінің бұл характерін реалистік штрихтар арқылы әрдайым шебер ашып тастап отырады: «Сидлерді көргенде Долгушов Бобровтан да қаттырақ сасып қалды. Айрықша, ол Сидлер кіргендегі өзінің отырған түрінен қысылды: полк командирінің алдында аяғының үстіне салып, шалқайып жоғары қарап отырғанның өз басына лайықсыз екенін комбриг үстіне кіргенде ғана білді. Әшейінде шаң жұқтырмайтын кара хром етігінің тым жылтырлығы да оған осы арада ерсі көрінді. Өз ішінен: «көп киілген лас етігім, көнетоздау шинелім болар ма еді» деп ойлады. Оған өзінің бағана, бері шығарда ғана қырынған бұғақты, толық беті де ұнамай, қай тесікке тығыларын білмей тұр еді. Сидлердің отыра беріп, көз қырын суықтау тастаған түрінен шошып қалды. Оның мына қарасынан: «Ох, ты нахал!» — деп жақтырмай қалғандай түрін танып, майор Долгушовтың үрейі ұшып кетті. «Мені, сөз жоқ, жаяу әскерлерге жібереді» — деп ойлады» (127—128-беттер).

Міне, осы үзіндінің өзінде-ақ Долгушов бүкіл іш-тысымен тұтас танылады. Ұнамсыз кейіпкерлерді бейнелеуде де жазушы реалистік мәнерден танбайды. Кейіпкерлерінің іс-әрекетін олардың характерлерінің шындығы-

нан туындатып өрбіту, образ табиғатын тереңдеп ашу сияқты көркемдік принципіне ол бұл тұста да бекем күйінде қалады.

Романда жау жактың адамдарын бейнелеуге де біраз орын берілген. Жазушы көбінесе фашист генералдарының, басшы офицерлердің өмірін, іс-әрекеттерін суреттейді. Бұл оның дұрыс та өнімді тәсіл ұстанғанын аңғартады. Өйткені, жау армиясының жинақты сипатын, оның стратегиялық және тактикалық тәсілдерін тек осылай ету арқылы ғана шынайы суреттеуге болады. Немістің гитлершіл генералдарын кейбір романдардағыдай топас күш ретінде, сайқы мазақ түрінде суреттеуден Ә. Нұрпейісов аулақ.

Жазушы неміс генералдарын еңалдымен өзіндік характерлері, дара-дара бітім тұлғалары бар жанды бейнелер ретінде көрсетеді. Сонымен бірге автор гитлершіл генералдар мен қолбасылардың қаныпезерлігін, қаталдығын, өздерінің әскери уставтарында жазылған жалаң ұрыс әдістері мен жаттанды тактикалық тәсілдеріне ғана сүйенген жадағайлығын да шынайы суреттей алған. Олар пруссактардың қорқытып үркітуге, таяқ күшіне сүйенген қазадан бетер қаталдығын одан да гөрі асқындырып, ұшықтырып жіберді. Бірақ бұл да оларды сақтап қала алған жоқ.

«— Менің бұйрығымды орындадың ба?— деді Шернер. Бұл айтып тұрған бұйрығы бүгін азанда бар әскеріне: «Тырнақтарыңмен жер бүр... Ақырғы демдерің біткенше қарсылас!» деген бұйрық еді. Онымен қашаннан сырмinez Беге бұл сылтау екенін, сотқар Шернердің соқтығар алдындағы жөнсіз сүйкенуі екенін білді. Бұнан ары оның ашу отын қоздырмай, ыңғайын алып, ығына жығыла беруің керек. Әйтпесе, бойындағы у-зәрін тісіне жиып ап, ықырып кеткен жыланның өзіне ақырғы, ең соңғы атылуы ғана қалғандай. Солай сезген генерал Беге бұнымен кездескен жердегі өзінің маймақтығына бақты» (83-бет). Өзара арбасқан, жанталаса арпалысқан фашист генералдарының сиқы осы. Тағы да бір сурет: «Бірақ, фон Рубинштейннің де, генерал Бегенің де, тіпті әр сөзінен ызғар сезілген Шернердің де әмірі штаб босағасынан шыққанша кәрлі болса да, әрірек барып көк-ала түтінге, тарсыл-күрсілдің ішіне кірген соң зәрі сынды. Атыс ішінде ажалды әр минут сайын он рет тосып жүрген адамға алыста отырып «атамын бәрінді

де!...» деп телефоннан айқайлаған генерал, шынында да, ақыл-есі ауысқан жынды секілді. Сөйтіп, қысым көрген мотобригада шегіне берді» (87-бет).

Гитлер армиясының күйрей жеңілуінің негізгі бір сыры фашист генералдары мен солдаттарының рухани мүдделерінің өзара алшақтығында, қарама-қарсылығында екенін автор осындай эпизодтар арқылы шебер аңғартады.

Шығарманы оқып шыққанда сан-сан адамдардың тағдырымен, әр-алуан талайымен танысасың. Әрине, олардың кейбірінің әдеби прототиптері болғанымен, көпшілігі — жазушы қиялынан туған жанды да жинақты кейіпкерлер.

Ал шығармада суреттелген майдан өмірі тұтастай алғанда тарихи шындықпен қабысып, астасып жатыр. Онда Курляндия майданының жалпы сипаты, біздің Армияның стратегиялық тәсілдері, совет жауынгерлері өткен сұрапыл соғыс жолының қиян-қилы өткелдері шынайы суреттелген. Оқушы солардың бәрін ой көзімен көріп те, сезініп те отырады. Осы тұрғыдан алғанда «Күткен күн» романын белгілі дәрежеде тарихи роман деп атауға да болады.

Еңалдымен, «Күткен күн» романы күні кеше ғана бүкіл дүниені дүр сілкіндіріп, енді тарихқа айналып бара жатқан уақытты қамтиды. Онда Ұлы Отан соғысының жеңіс рухына толы сол бір қаһарлы кезеңіндегі тарихи оқиғалардың іздері айқын сақталған. Осы тарихи шынайылықпен дәлдік совет жазушыларының соғыс тақырыбына арналған таңдаулы шығармаларының барлығына да тұтастай хас. Бұл тұрғыдан алғанда советтік әскери тарихи роман мүлдем соны, жанашылдық сипат танытады.

Әскери тарихи роман ескі буржуазиялық әдебиетте де бар болатын. Онда кейіпкерлердің тағдырлары тарихи қозғалыстың тайталас-тартысы барысында тікелей өрістемей, соның көлеңкесінде, ығында ғана өрбитін. Тарихи дамудың тенденциясын айқындаған негізгі факторлар, тұтас елдер мен халықтардың тағдырын шешкен сұрапыл соғыс оқиғалары шеттеп, тасаланып қалатын да, тәж-тақытынан айрылған патшалар мен хандардың трагедиялық халі, ойдан алынған жасанды кейіпкерлердің сүйіспендік драмасы алғы лекке шығарылатын.

Бұл дәстүр, әрине, совет әдебиетінің, сондай-ақ оның аса бір күрделі саласы саналатын советтік әскери бел-

летристиканың табиғатына мүлдем жат. Біздің әдебиетімізде ең алғы лекте халық және оның тарихи тағдыры бейнеленеді. Советтік әскери романның кейіпкері — дүниені қайта құрған айбарлы, айбынды оқиғаларды сырттан бақылаушылар емес, керісінше, соған тікелей қатысушылар, яғни тарихты жасаушылар.

Әдебиетте халықтың тағдырын, елдік сипатын барынша айқын суреттеудің творчестволық ең өнікті жолы — өз бойына сол халқының ең жақсы, жарқын қасиеттерін мол сіңірген кесек те көркем, дара-дара образдар жасай алу. Кейіпкер образында өзіндік сипат, даралық қасиет неғұрлым мол, айқын болса, ол халықтың қасиетін, мінезін де солғұрлым терең әрі жарқын бейнелемек. «Күткен күн» романындағы әралуан ұлт өкілдерінің тұлғалы, бедерлі образдары оқушы көңілін осы ойға анық уялатады.

Ә. Нұрпейісовтың жазушылық шеберлігінің ең басты қуаты оның шыншылдығында, реализмінде. Ұлы Отан соғысының оқиғалары, оның батырлыққа толы ғажайып шындығы қаламгерлерімізге, әсіресе романтикалық асқақ стильдегі суреткерлерімізге творчестволық кең өріс береді. Мұны қазақ совет әдебиетінде туған кейбір шығармалардан да анық көреміз. Мәселен, романтикалық лептілік, көтеріңкі рух Ғ. Мүсреповтың «Қазақ солдаты» романының бүкіл стилінен мол сезіліп отырса, ал Б. Момышұлының повестерінде бұл сипат еңалдымен жазушы суреттеген оқиғалардың өзінен туындап жатады. Ә. Нұрпейісов болса, ол әрдайым дерлік реалистік мәнерден ауытқымай отырады. Ол патетикалық бояуларға көп бара бермейді. Тағы да бұл — оның творчестволық әлсіздігі емес, өзіндік ерекшелігі. Сондықтанда «Күткен күн» романында образдар мен характерлер шынайылығы, оқиғалар мен ситуациялар шынайылығы мол сезіледі.

Жазушы психологиялық сипаттауға әсіресе шебер екендігін атап өткен едік. Романдағы көптеген кейіпкерлердің жан дүниесінің тереңдеп ашылып, ақтарыла суреттелуі еңалдымен оның осы шеберлігіне байланысты. Бір мысал келтіріп қаралық. Әйелі қайтыс болғаннан кейін демалыс алып үйіне келген Скориковтың көңіл күйлерін жазушы былай толғайды: «Былтыр келгенде әйелі мен екі баласы бұны бұл арадан да емес, Москваның өзінен, аэродромнан күтіп алған. Маңдайынан сүйгелі еңкей-

ген Скориковты нәзік денелі, кішкентай әйелдің өзі құшақтай алып, ыстық шекесін күйеуінің бетіне басқан. Сол арада, күйеуінің қасы-қабағына көбірек қарап, қаймығып үйренген әйелдерге тән жасқаншақтықпен Наташа бұған сағынышты сөздерін сыбырлап жатқанда, екі баласы етегіне оралмап па еді? Сол сәтте бұл дүниеде менен бақытты адам бар деп пе еді? Қайда сол бақыты? Қайда сол нәзік денелі, әп-әлжуаз әйел?.. Қайда?.. Скориковтың қимылсыз көзінен ыстық жас мөлт-мөлт тамып кетті. Ол қайда барарын, кімге барарын әлі анық білген жоқ. Беті ауған жағына жүріп келеді. Біраз жүргесін ғана осы мен қайда келе жатырмын деп ойлап, жан-жағына көз салып караса... өз үйіне кеп тоқтаған екен. Көршісінен кілт алып, үйіне ауыр тартқан сезіммен кірді. Кішілеу екі бөлменің дүние-мүліктері дәл бір әйелі бардағыдай, әдемілеп, рет-ретіне келтіріп жиналғанын көрді. Үй ішіндегі аз ғана мүліктің бәріне ұсынақты, іскер әйелдің қолы тигені көрініп тұр. Бұрын үйінің бір бұрышын қопарып әкетсе де көңіл бөлмейтін Скориков қазір әйелінің үй шаруасына қаншалық ұқыпты болғанын бір қарағаннан байқап өтті. Тозығы жеткен штордың сетінеп, көз-көз ойылған жерлерін өзі түстес ақ жіппен әдемілеп, мін түсірмей жамағанына шейін көріп, әйеліне деген аянышы ұлғая түсті. Көңіл призмасы өткен өмірінің кірбеңін ошап сайын ұлғайтып, ауыр өкінішке салады. Ал талай рет төзбес мінез көрсеткенде де төзім тапқан, бұны бастапқы ыстық жалынымен бір қалыпты сүйіп өткен әйелі асыл текті, артық адам боп, тек адалдық, айнымастық жағынан танылып еді, «Қандай асыл жанды... асылды қорлағанмын, ә?» деп ойлап, ауыр тартқан сезіммен әйелінің үлкейткен суретіне жақындап келді. Наташаның өңінен тірісінде, тіпті ең бір көңілді кездерінде де байқалатын реніш пен ұяң наразылық айықпайтын. Сол ұяң наразылық Наташаның мына суретінде де бар екен. Ондай ажар оның әжім ұялаған көзінде де бар. Сәл түйілген жіңішке қасының екі аралығына түскен қос сызықшада да көңіл кірбеңіндей болмашы қымжылу бар. Күйеуінің от басындағы салқын шырайы Наташаның мына суреттегі бет ажарына көлеңкесін түсіріп, күнгірттеп кеткендей. Осындай сезіммен өз күнәсі ауырлап, жанын өкініш пен аяныш қысқан Скориков әйелінің суретіне бетін басты да, еңкілдеп жылап жіберді...» (216—217-беттер).

Біз осы үзіндіні әдейі тұтас келтірдік. Скориковтың ішкі монологы ретінде берілген бұл сурет-көріністе қаншалықты терең психологиялық шындық бар. Автор романда Наташаны тікелей суреттемейді. Бірақ, Скориковтың еске алулары, ой-толғаныстары, сағыныш сезімдері арқылы біз Наташаның да бүкіл тұлғасын, мінез-кұлқын қоса танып отырмыз. Сондай сәттерде Скориковтың өзінің де рухани келбеті анағұрлым мол да терең ашылып отырады. Сөйтіп, жазушы психологиялық сипаттауды образ жасаудағы ең онтайлы, орайлы тәсілдердің бірі ретінде қолданады. Дәрігер әйел Зинаида Яковлевнаның образы жайында да осыны айтуға әбден болады. Автор бұл кейіпкерінің де жүрек жарды сырларын, жан иірімдерін соншалықты нәзік сезімталдықпен үзілдіріп, жеріне жеткізе суреттей алған.

Ә. Нұрпейісовтың образ жасаудағы тәсіл-амалдары бұл айтылғандармен шектеліп, таусылып қалмайды. Ол кейіпкерлерінің іс-әрекеттерін де, репликаларын да орнымен, оралымды пайдалана біледі. Мәселен, бөксесін снаряд жұлып әкеткенде де, телефон сымын тісімен тістеп жалғастырған күйінде қатып қалған Хмара бейнесін енді қайтып ұмытпайсыз.

Сол сияқты, Есейдің Аралға демалысқа келуі суреттелетін тарауда ара-кідік қана көрінетін қара кемпір бейнесі жайында да осыны айтуға болады. Оның әрбір сөзінен көп мән аңғарылып отырады. Бір ғана мысал келтіріп қаралық:

«— Әже, сіз де балық аулайсыз ба?

— Е, ауламай ше... Сенің әкең кұрлы балық аулай алмас деп пе едің?

Есей тік мінезді шамшыл кемпірді ашуландырып алдым ба деп қысылып қалды.

— Шалым болса, ана Насырдың қатыны құсап жаулықты шекелетіп тартып, жылы пештің түбінде шалжайып отырып алуды мен де білем. Жан тыныштықты білмейтін қара кемпір ақмақ емес,— деп ол әңгімені үдете түсті.— Амал қанша шал жоқ... жаман шалды менсінбей жүріп, жалмап ерте жұтып алдық. Жалғыз бала әскерде... Келін жас. Жалғыз баланың қойнында жатқасын амалың жоқ. Әйтпесе, сараң қатыннан сұрап алған бұзаушық тәрізді сорлының өзі де тұмшадай ғана бірдене» (288—289-беттер). Міне, бұл сөздерден қара кемпірдің адуын, омырау мінезін, тура тілділігін және

соған қоса ақ көңіл ашықтығын, татаусыз пейілін аңғармай, аңдамай қалмайсыз. Жазушы көп реттерде кейіпкерлерінің характерін осы тәсілмен, яғни олардың өздерінің сөздері, репликалары арқылы ұтырлы байқатып тастайды.

Портреттік сипаттауға шеберлігін Ә. Нұрпейісов «Күткен күнде» романында да жақсы аңғартқан еді. «Күткен күнде» өз талантының осы қырын ол ұштай, жетілдіре түскен. Бұл ретте де ол дәстүрлі суреттеу тәсілдеріне бой ұрмай, өз тарапынан көп ізденген, сөз азабын көп көшкен. Жазушы кейіпкерлерінің кескін-келбетін, мүсін-тұлғасын бірден үйіп-төгіп бере салмай, сыздықтатып, шым-шымдап жеткізеді. Оның қолдануында портрет кейіпкердің жан дүниесінің, ішкі сарайының хал-халеттерімен, іс-әрекеттерімен, мінез-құлқымен астасып жатады. Бұл ретте үлкен суреткер А. Н. Толстойдың мынадай бір пікірі тілге оралады: «... Геройдың портретін тұтас он бет бойына жазуға, оның кейпін, бойын беруге, оның өзі қандай екенін айтып шығуға, содан кейін барып қана бұл герой әрекет ете бастасын деуге болмайды. Бұл — теріс әдіс. Бұл қызғылықсыз әрі сахналық сипаттан жүрдай, өйткені, бір орында қозғалыссыз тұр. Бұл статика. Геройдың портреті қозғалыстан, күрестен, қақтығыстардан, мінез-құлықтан көрінуге тиіс. Портрет жекелеген жолдардан, жол-жолдың арасынан, сөз-сөздің арасынан туады. Бірте-бірте туады және оқушы ешқандай сипаттаусыз-ақ оны көз алдына елестете алады. Өйткені, егер геройдың портретін сіз бірінші бетте оқысаңыз, онда ендігі сіз ұмытып қаласыз және оның қараторы немесе жирен екенін әр уақыт қайта-қайта еске түсіріп отыруға мәжбүр боласыз».

Сонымен бірге жазушының жекелеген кейбір кейіпкерлеріне портреттік сипаттау бергенде өзін-өзі қайталайтын мезеттері де бар. Бұл әсіресе Бобров пен Долгушов бейнелерінен көп байқалады.

«Күткен күн» романының көркемдік қуатының ең негізгі тамыры оның тілінде. Ә. Нұрпейісов жас прозаиктарымыздың ішіндегі тілге мейлінше бай авторлардың бірі деуге әбден болады. Жоғарыда келтірілген мысалдардан да мұны аңғару қиын емес. Небір күрделі құбылыстарды, кейіпкерлерінің алуан түрлі сыр-сезімдерін, жан-нәрімдерін суреттегенде жазушы тіл тапшылығына ұрынбай, қаламын кең көсіліп, емін-еркін сілтейді. Ол автор-

лық баяндауларда да, психологиялық немесе портреттік сипаттауларда да, диалогтар мен ішкі монологтарда да өз ойын, негізгі идеясын анық та ашық әрі жеткізе білдіруге қажетті, жарамды тіл табуға, сөзді орнымен, оралымды қолдануға оңтайлы.

Романды оқығанда оны нағыз қазақ жазушысы, туған халқының тіл байлығын мол баураған суреткер жазғандығын сезіп те, сүйсініп те отырасын. «Күткен күнде» ара-тұра арханизмдар ұшырасатын сияқты. Бірақ, тек халық тілін, оның байлығын білмейтін адам ғана солай болуы мүмкін. Әйтпесе, көп реттерде Ә. Нұрпейісовтың әдеби немесе сөйлеу тілімізде бекер ұмытылып бара жатқан сан-сан сөздерді аршып алып, тың тыныс беріп, жаңғырықтыра қолданғанын аңдау қиын емес.

Ал диалектизмдер романда бірсыдырғы мол ұшырасады. Суреттеліп отырған өлкенің өзіндік ерекшеліктерін, колоритын жеткізіп беру үшін диалектизмдерді қолдануға әбден болады. Мұндай мезеттерде олар әдеби тілді, оның сөздік қорын молықтыра, ажарландыра түспек. Бірақ Ә. Нұрпейісов ара-тұра осы шектен шығып кетеді. Жекелеген кейіпкерлердің сөздерін, репликаларын былай қойғанда, романдағы авторлық баяндауларда да диалектизмдер баршылық. Бұл, әрине, шығарманың тіл тазалығына, автордың стиль сындарлылығына нұқсан келтірмей қоймаған. Мақала көлемімен шектелгендіктен біз оларға кеңінен тоқталып жатпаймыз. Бірақ романды қадағалап оқыған адамның көзі бұған анық жетсе керек.

Қазақ прозасының М. Әуезов, Ғ. Мүсрепов сияқты ірі шеберлерінен жемісті де мол үйренетіндігін Ә. Нұрпейісов «Курляндия» романында да терең байқатқан болатын. Ал мынау роман авторының орыс жазушыларының суреткерлік тәжірибесінен де көп тағлым алғанын қоса аңдатады. Онда күрделі синтаксисқа, құрмалас сөйлемдерге ұмтылушылық мол сезіледі. Романда бұл көркемдік жағынан ақталған да. Сан-салалы құбылыстарды, кейіпкерлердің буырқанған көңіл күйлерін, сезім дауылдарын, алуан-асыр хал-халеттерін үзік-үзік етпей, күрделі күйінде, бар тереңімен бейнелеу үшін осылай етпеске болмайды.

Қорытындыда тек мынадай бір жәйді арнайы айта кетер едік. Ә. Нұрпейісов тілінің байлығы мен бейнелілігін, орамдылығын жоғарыда атап өттік. Бірақ сонымен

бірге автордың сол бай тілін рет-ретімен мыскалдап пайдаланбай, батпандап қолданатын, шұбалаңқылыққа ұрынатын, белгілі бір құбылысты тым қазбалап, орынсыз артық тәптіштеп суреттейтін мезеттері де бар. Мұндай тұстарда оның реализмі әлсіз тартып, босансып, күңгірттеніп кетеді. Тілді төгіп-шашпай, тап басып, оралымды да жинақы пайдалану — нағыз ұшталған шеберлік үшін мейлінше қажет көркемдік үнемділіктің ең бір негізгі белгісі екенін жазушы болашақта естен шығармауға тиіс.

Романның оқиғалық өрбуінде де автордың көркемдік шындықтан тая сокқап, жаза басқан жәйттері бар. Романның бас жағында Есей бастаған барлаушылардың контрразведка жұмысын басқаратын бір неміс полковнигін қолға түсіргені жайында айтылады. Я, тек айтылады. Ал жазушы мұның орнына олардың осы ерлік қимылын нанымды да көркем бейнелеуге тиіс еді. Оның үстіне мұның, яғни бұл эпизодтың шығармада бұдан әрі өрбитін оқиғаларға ешбір қатысы, әсері де жоқ. Тек оқиғаны сырттай қызғылықты ету үшін және Есейдің оқыс қимылы ақтау үшін ғана автор осылай еткен тәрізді сезіледі. Сол сияқты, Скориков пен оның қасына ерген үш жауынгердің адам айтқысыз алапаттан, астанкестен ұрыстан, жау қоршауынан дін аман шығуы да нанымсыз суреттелген. Бұл ретте де автор көркемдік мотивировканы жеткілікті етіп бере алмаған.

Жазушының болашақта мол ойланyp, көп толғанатын мәселелерінің бірі — композиция жайы. Оның суреткерлік шеберлігінің әлі ұшталып жетпеген, олқы да тапшы соғып жатқан жағы еналдымен осында дер едік. «Күткен күн» романында композициялық тұтастық, бірегейлік бастан-аяқ сақтала бермеген. Көп реттерде шығарманың жекелеген эпизодтары, әралуан оқиғалар, ситуациялар өзара жымдаса бірікпей, үндесе үйлеспей, олпы-солпы күйде қалыптанған. Сондықтанда олар шығарманың негізгі сюжеттік арқауына ажырамастай болып сіңісіп тұрған жоқ. Тіпті, мұны романның кейбір сюжеттік желілері, тұтас тараулары жайында айтуға да болар еді.

Мәселен, Иванов, оның әйелі Зинанда Яковлевна және Долгушовтардың арасындағы махаббат драмасын алып қаралық. Осы желі романның бүкіл өн бойына дерлік қосарлана жүріп отырады және осы тұста жазу-

шының адам жанына үңілгіш те көргіш, сезінгіш алғырлығы, шеберлігі де тамаша танылады. Бірақ осының бәрін автор не мақсатпен алған және шығарманың негізгі идеялық бағытын, әлеуметтік тынысын анықтап белгілеуге мұның қаншалықты қатысы, қажеттілігі бар? Романдан бұл сұраққа жауап табу қиын.

Сондай-ақ, романның төртінші бөліміндегі Есейдің Аралға қайтып келгені және кейін оралар сапарында ауырып қалып, Рига қаласындағы госпитальда жатқаны суреттелетін тарауларда да қосалқы жәйттер баршылық. Қайткен күнде де олар шығарманың композициялық тұтастығына селкеулік келтіріп-ақ тұр. Шынтуайттап келгенде, шығарманың сюжеттік желілері де, композициясы да жазушының өмір шындығын өзінше көріп тануына, характерлерді кесек те айқын етіп ашуына қызмет етуге тиіс.

«Курляндия» романында партия жетекшісі Ивановтың образы әлсіз, көмескі жасалғандығын кезінде сыншылар атап көрсеткен болатын. Соңғы романда бұл кейіпкерлердің өз басы характерінің кейбір қырлары толыға, ашыла түскен. Бірақ оның саяси жетекші, партия басшысы ретіндегі тұлғасы әлі де болса өз дәрежесіне көтерілмей, аласа соғып жатыр. Осы реуішті кемшілікке әскери тақырыпқа жазатын басқа көптеген авторлар да бой алдырып жүр.

Романның алғашқы нұсқасындағы оқшау бейнелердің бірі — Сайкин еді. Жауға сатылып кеткен, отансыз бұл сұмырайдың опасыздығын, жексұрындығын жазушы ұтырлы суреттермен жеріне жеткізе әшкерелейтін. Ал «Күткен күнде» осы образ мүлдем түсіп қалған. Әрине, жазушы бұдан тек ұтқызған. Шығармасына қайта оралып өндегенде ол бұл желіні бұрынғыдан да гөрі тереңдете, өткірлей түсуге тиіс еді. Өкінішке қарай, автордың бұл өзгерісі романның реалистік қуатына, шынайылығына салқынын тигізбей қоймаған.

Көркем шығармада табиғат суреттерінің ерекше орын алатыны аян. Пейзаж арқылы жазушы шығарманың оқиғалары өрістеп өрбіген ортаны, жағдайды реалистік қалыпта суреттейді, кейіпкерлердің көңіл күйлерін психологиялық жағынан нанымды етіп ашады. Біздіңше, Ә. Нұрпейісов шығарма композициясының ұтырлы компоненттерінің бірінен саналатын осы көркем пейзаждың авторға беретін бейнелеушілік мол мүмкіншіліктерін

емін-еркін пайдаланбаған. Тек Есейдің демалыс алып, сағынған аулына қайтып келе жатқаны суреттелетін тарауда ғана Арал төңірегі табиғатының жанды көріністері бар және олар кейіпкердің сол сәттегі сыр-сезімдеріне ұласа үйлесіп те тұр. Бірақ шығарма оқиғалары дамып өрбитін негізгі ая — Курляндия аймағының табиғат көріністері өзіндік бояу-нақыштармен жарқырап ашылмаған. Ал романда берілген күзгі күн көріністері, теңіз жағалауының кейбір суреттері оқушы зердесінде сақталып қалмайды, оған терең әсер етпейді.

Ә. Нұрпейісовтың жазушылық стилін тұтас алғанда одан бір кемшілік айқын байқалады. Ол — сылбырлық, босандық, ширап жетпеушілік. Романдағы авторлық баяндаулар соғыс қимылдарының, әскери өмір ағысының жіті де жүрдек барысына ара-кідік ілесе алмай баяулап, бөгеліп қалады. Шығарманың жоғарыда аталған бір көркемдік кемшілігі, яғни композициялық шұбаланқылығы да көп реттерде осыған байланысты болса керек. «Күткен күн» романына берілген азды-көпті талдауды Ғ. Мүсреповтың Қазақстан жазушыларының төртінші съезінде айтқан мына бір сөздерімен аяқтауға болар еді: «Бұл ретте менің Әбдіжәміл Нұрпейісовтың мазмұны терең, өрісі кең «Күткен күн» атты романын атағым келеді: Өңделіп, түзеліп, қайта басылғаннан кейін бұл шығарма қазақ әдебиетінің құнды қазынасының қатарына қосылды. Жас жазушының бұл романы Совет Одағындағы халықтар тілінде де, шет ел тілдерінде де өтімді болатынына күмән болмасқа керек».

Ә Нұрпейісов қаламалды шығармасына арада талай уақыт өткеннен кейін қайталап оралып, оны кемеліне келтіре өңдеп, кесек те көркем туынды жасады, өзінің суреткерлік талантын, шеберлігін танытты. Ал болашақта ол осындай талантпен және шеберлікпен шын мәнісіндегі ірі, кең тынысты, толысып туған шығармаларды бірден-ақ әрі бірегей етіп жасауға ұмтылуға тиіс.

ІС-ӘРЕКЕТ ПАФОСЫ

Жазушылардың немесе ақындардың әрқайсысы әдебиетке әртүрлі жолдармен, әр алуан дайындықпен келеді. Қайсыбіреулер өздерінің творчестволық жолын шағын жанрлардан бастап, көркем сөз өнерінің кең өрісіне біртіндеп барып шығады. Ал енді бір авторлар толассыз іздене жүріп, өмірлік тәжірибе мен суреткерлік байқауларға молыға келіп, бірден-ақ кесек те кемел шығарма беріп тастайды. Біздіңше, шығармасы сөз болғалы отырған жазушы Зейін Шашкин осы соңғы аталғандар сынды авторлардың қатарына жатады. Рас, З. Шашкиннің әдеби қызметі отызыншы жылдарда басталғанды. Ол бірсыпыра әңгіме-очерктер мен сын мақалалар жазған болатын. Бірақ олар авторының жазушылық бетін айқын таныта алған жоқ еді. Түрлі себептермен біраз уақыт бойы творчестволық қызметтен қол үзіп кеткен З. Шашкин жазушылық өнерге қайта оралды және сәтімен оралды. Оның «Ұядан ұшқанда» повесі — осының айқын айғағы.

Повесть аса маңызды тақырыпқа, бірақ әдебиетімізде тым аз қозғалған тақырыпқа арналған. Яғни, онда Жетісуда совет өкіметі қалай орнағаны, жаңа өмірдің таңы қалай атқаны жайында баяндалады.

Бірақ бұл кезеңдердің оқиғалары Қазақстанның әртүрлі өлкелерінде жергілікті жағдайларға байланысты өзіндік ерекшеліктермен өрбіп дамыды. Өкінішке қарай, халқымыздың тарихындағы осы бір аса елеулі, шешуші кезеңнің күрделі де мол шындығы біздің әдебиетімізде әлі де болса толық, тұтас камтылған емес. Бұл ретте әдебиетіміздің ең жетекші жанры — проза әсіресе қарыздар. З. Шашкиннің повесі — осы олқылықтың есесін белгілі дәрежеде өтей алған шығарма.

Повесте өрбитін оқиғалар негізінен алғанда Жетісу өлкесінде совет өкіметі орнап, жаңа өмірдің таңы атқан кезенді камтиды. Сондай-ақ, лирикалық шегіністер арқылы автор 1916 жылғы ұлт-азаттық қозғалысының көріністерін де елестете кетеді. Жалпы алғанда жазушы алуан түрлі әрі күрделі оқиғаларға толы сол бір қысылшаң кезеңнің сипаттарын, уақыт рухын аңдата алған.

1916 жылы көтеріліс күшпен басылғаннан кейін Сынның аяғына өтіп кеткен қазақтар совет өкіметі орнағаннан кейін Жетісуға қайтып келеді. Олардың мұндағы жерлеріне бай қазақтар орналасып алған. Совет өкіметінің жаулары — контрреволюционерлер, ұлтшылдар, дін иелері осы ұрымтал жағдайды әккілікпен пайдаланады. Олар қазақ және орыс халықтарының арасына араздық отын тастайды. Өздерінің бұл арамза ниеттерін іске асыру жолында олар Орта Азиядағы керітартпалық күштермен де астыртын байланыс жасайды. Сөйтіп, автор повесть кейіпкерлерінің арасындағы тартысты — сол бір қысталаң шақтың қиян-қиялы тартысын жуыпшаймайды, қайта оны бар күрделі де өткір күйінде шынайы бейнелейді.

Осылайша, шығармасының тартыс желісін өмір шындығына сәйкестендіре отырып өрбітуі, кейіпкерлерінің өзара алыс-жұлықтағы арасалмағын дұрыс анықтап алуы автордың өзі тандап алған тақырыпты шынайы да көркем шешуіне мүмкіндік берген. Жалпы алғанда, повесте өрбитін тартыстың өткірлігі мен шынайылығы және оның нанымды шешім табуы — шығарманың аса бағалы қасиеттерінің бірі. Автор мейлі Жетісу өмірін суреттесін, мейлі Орта Азиядағы, Бұхардағы оқиғаларды бейнелесін, ол осы бағытынан танбайды, тартыс талқысын бәсеңсітпейді.

Сырттай қарағанда, осы Бұхарда болған оқиғаларды повестің сюжеттік желісіне енгізудің онша қажеттілігі жоқ сияқты. Бірақ байыптап қарағанда бұлай емес екендігіне көз жеткізу онша қиын емес. Ең алдымен, автор Орта Азияда сол кезде болған оқиғаларды бастан аяқ толық қамтып, тізбектеп жатпайды, қайта олардың ішінен повестің негізгі кейіпкері Жүністің тағдыры мен талайына тікелей қатынасы бар және сол қалың ортасында жүретін оқиғаларды ғана іріктеп алады. Сонымен қатар бұл оқиғалардың Жетісуда болған өрелі өзгерістерді толықтыра түсу үшін, олардың мәнін тереңірек ашу үшін, жалпы сол бір кезеңнің рухын, тынысын тұтастай сездіру үшін де ерекше маңызы бар.

Сөйтіп, повестің оқиғалары осылайша көптеген жерлерді қамтып, қабындап дамиды, өз аясына алуан түрлі адамдарды тартады. Шығарма кейіпкерлерінің тағдыры да осы оқиғалар өрбуінің барысында айқындалып отырады.

Повесте кейіпкерлер мейлінше мол. Бұл, бір жағынан, онда суреттелетін оқиғалардың күрделілігіне байланысты болса керек. Повестегі ең басты, тұлғалы образ және біздің ойымызша ең шынайы жасалған образ — Жүніс. Жүністің өмірлік жолы, тағдыры соншалықты күрделі әрі қиын-қиын. Халықтың қалың ортасынан шыққан, оның қайрат-қажыры мен ыза-кегін, еркіндікті аңсауы мен ар-намысын бойына мол жинаған Жүніс кезеңі келгенде сол халықты азаттық жолындағы айқасқа бастайды. Бірақ Жүніс бастаған көтеріліс жеңіліс табады. Осының салдарынан торыққан әрі бұдан кейін болған оқиғалардың барысын андай алмаған Жүніс жаза тайып, жаңылыс басады. Жүніс әділдікті жақтайды да, аңсайды да, бірақ сол әделет қайткен күнде және қалай салтанат құратындығын ол түсіне алмайды. Оның елден айрылып, теріс жолға түсу трагедиясының сыры осында. Жүніс — табиғатынан діндар адам емес. Бірақ дін иелерінің теріс ықпалына түскен ол дін халықтың басын қосып біріктірудің, оны әделетті өмірге жеткізудің құралы деп түсінеді. Жүністің осы түсінігі өмір шындығына әрдайым қайшы келіп отырады. Ол ел ішінде болған шақта да, Ағзамға еріп Орта Азияның түкпір-түкпірін шарлаған кезде де өзінің бұл түсінігін бекерге шығаратын жағдайларға тап болады. «Мен Мұхаммедтің туы астында топтасқан халықты көрсем деп ем. Бакытты елде өмір сүрген бакытты мұсылманды көрсем деп ем...» дейді ол Бұхардың әміріне. — Ал мен сол мұсылмандардың күні қарап болғанын көрдім, зар илеген үнін естідім... Оларды жұрттың бәрі де зәбірлейді... Әрине, Жүністің мұсылман деп отырғаны — зәбір-жапа шеккен қарапайым халық. Осы қарапайым жандарға дін иелері де, әмір де ешбір жақсылық жасамайтынын білгеннен кейін Жүніс олардан қол үзеді. Жат жандардың арасында, адасу жолында жүріп әбден қалжыраған әрі осы жаза басуы үшін іштей таусылып, жаны жүдеген Жүніс ақыр-аяғында Жетісуға қайтып келеді. Повесть Жүністің баласы Сахамен және басқа да жора-жолдастарымен табысуы, олардың бүкіл Жетісуды шапағына бөлеп, Алатаудан асып атқан танды қарсы алуын суреттеумен аяқталады. Мұнда үлкен мән бар. Бұл таң — Жетісуда орнаған жаңа өмірдің таңы, азаттық таны еді. Ал бұл таңға әркім әртүрлі жолмен жетті. Егер Саха, Бәкен, Төкейлер осы танды атыру жолын-

дағы күрестің ыстығына күйіп, суығына тонса, ал Жүніс бұған бұлтағы көп бұралаң жолмен келді. Халықтаң қол үзген адамның күні қаран, ал кімде-кім халықпен бірге болса, ол өз бақытын табады. Міне осы ойды жазушы Жүніс образында көркем түрде бейнелей алған. Жүніс образының ең бағалы қасиеті осында, яғни оның халықтың қайрат-қажырын бейнелейтіндігінде.

Повестің негізгі кейіпкерлерінің бірі — Саха Сағатов. Жүністің баласы болғанымен, ол әке тәрбиесін көп көрген адам емес. Авторлық шегіністер мен баяндаулардан, сондай-ақ Саханың өзінің де ой толғаныстары мен еске алуларынан оның Тоқаш Бокин сияқты революционерлермен байланысты болғанын, сөйтіп оның жастайынан азаттық үшін күрес жолына түскенін білеміз. Бірақ осы қасиет шығармада бейнеленген Саханың тұлғасына табиғи түрде сіңісіп тұрған жоқ. Саха — партияның Жетісу облыстық комитетінің секретары. Яғни, ол осы өлкеде жана өмір орнату жолындағы күресті ұйымдастырушы. Өкінішке қарай, повестегі Саха шындықтағы Саханың осындай тұлғалы бейнесіне лайық дәрежеге көтерілмеген.

Автор Саханы қат-қабат қиыншылықтарға, шытырман шиырларға әрдайым кезіктіріп отырады. Бірақ Саханың сол асулардан қалай асканы шығармада шынайы да нанымды бейнеленбеген.

Саханың әкесі Жүніске деген қатынасы да оқушыда екіұдай пікір тұғызатын тәрізді. Сахамен алада болған түсініспеушіліктен кейін Жүніс ұшты-күйлі жоқ болып кетеді. Ол жайында әркім әртүрлі аңыздар таратады. Бір ғажабы сол — әке есімін Саха әрдайым түйткілдене, тітіркене еске алады. Айрылысқан, адасып кеткен әке жайында ең болмағанда оған іштей жаны ашып күйзелу, тебрену Сахада жоқ. Ол көбінесе әке қырсығы өзіме де тиеді-ау деген үрейлі ойда жүреді. Өзгесін былай қойғанда, Саха тіпті шешесі Фатиманың жай-күйі қапдай екенін де онша біле бермейді. Осының бәрі Саханың жан дүниесін біраз жадау тартқызып тұр. Жалпы алғанда, Саханың образы тұлғалы да шынайы болып шықпаған. Оның бойында революциялық жігер, жасампаздық әрекет аз. Осыған орай оның рухани дүниесі де көп реттерде терендеп ашылмаған. Саханың бойында даралық, өзіндік сипаттар бар, бірақ жинақтаушылық қасиеттер тапшы. Көркем әдебиетте типтендіру прин-

циптері даралау мен жинақтауды бөле-жара қармайтындығы, қайта оларды ажырамас тұтастықта алатындығы белгілі.

Біздіңше, повестің екінші басылуында немесе оның қазақша вариантын дайындағанда автор Саха образына қайта оралуға, сөйтіп оның бейнесін жетілдіре, шындай түсуге тиіс.

Ал повестің екінші қатардағы кейіпкерлерінің образдарын жазушы бұдан әлдеқайда тартымды, қызғылықты етіп жасай алған. Байсалды да табанды Төкейдің, жігерлі де намысты Бәкеннің, арамза да адуын Сотниковтың, жырынды да жымысқы Сүгірбаевтың аз көрінгенмен, есте қалып қоятын бейнелері — бұған айқын дәлел. Жазушының адам образын жасаудағы, характер даралаудағы шеберлігі повестің Бұхардағы оқиғалар суреттелетін тарауларынан да анық байқалады. Автор сол кездегі Орта Азиядағы тарихи әлеуметтік жағдайды, Бұхар әмірінің маңын төңіректеген адамдардың психологиясын, олардың өзіндік философиясын, әдет-ғұрпын. Шығыстық дипломатияның алуан түрлі қыры мен жолжорасын жетік біледі. Сондықтан да ол Бұхар әмірінің, Ағзамның, Ибраһим-бектің, Бурхан — Әддиннің, Мұхиддин-ибн — Аль-Араби деген лақап атпен жүрген ағылшын шпионы полковник Терренстің бейнелерін олардың өздеріне тән қалыпта нағыз суреткерлікпен мүсіндей алған.

Әрине, повестің барлық кейіпкерлері жайында түгелдей мұндай пікір айтуға болмайды. Олардың ішінде характері айқын дараланбаған, сондықтан да оқушы зердесінде қалмайтындары да бар. Мұның бір тамыры повесте кейіпкерлердің тым көптігінде болса керек. Өйткені автор геройларының барлығына бірдей қажетті іс-әрекет, идеялық-көркемдік қызмет тауып бере алмаған және бұлай ету шағын шығарманың көлемінде мүмкін де емес.

Повестің сюжеттік желісі, композициялық құрылысы қызғылықты әрі шеберлікпен тартылған. Ондағы оқиғалар әрі драмалық өткірлікпен, әрі динамикалық зор күатпен қабылдап, барған сайын өрши түсіп өрбиді. Сондай-ақ, автор оқушыны оқиға дамуына байланысты алуан түрлі жерлерге, тарихтың әрқилы кезеңіне әкетеді, бірақ оны негізгі тартыс желісінен жаза бастырмайды. Повестен 3. Шашкиннің бұрын жарияланып жүрген ән-

гімелеріне тән ерекшеліктерді — бейнелілік пен тұжырымдылықты, шағын да ұшқыр фразаға ұмтылушылықты аңғару қиын емес. Кейіпкерлерінің ұлттық ойлау ерекшеліктері мен өзіндік сөз саптауларын да автор шебер жеткізіп бере алған.

Жалпы алғанда З. Шашкиннің бұл повесі қазақ совет әдебиетінде елеулі үлес болып қосылмақ.

Біздің әдебиетіміз жана дүние орнату жолындағы күрескерлердің, жалынды революционерлердің тұлғалы бейнелерін жасауға әрдайым беріле ден қойып отырды. Бұл ретте әдебиетіміздің кең арналы, өскелең де өржелен жанры — көркем прозаның творчестволық жемісі әсіресе мол. С. Сейфуллиннің «Тар жол, тайғақ кешу», С. Мұқановтың «Өмір мектебі», «Ботакөз», Х. Есенжановтың «Ақ Жайық» романдары және басқа да көптеген шығармалар — бұған анық айғақ. Осы тақырыпты, яғни халқымыздың тарихындағы революциялық дәуірдің ғажайып шындығын, сол бір дауылды жылдардың отты оқиғаларын суреттеуді, көркем образдар тіліне түсіруді өз творчествосының өрісті өзегі етіп ұстаған жазушыларымыздың бірі — Зейін Шашкин.

Оның прозалық тұңғыш көлемді шығармасы саналатын «Ұядан ұшқанда» повесі осындай тақырыпқа арналғанын жоғарыда атап өттік. Жазушы кейін осы тақырыпқа қайта оралып, «Тоқаш Бокин» атты роман жазды. Егер «Ұядан ұшқанда» повесінде біз Тоқаштың есімін шығарманың басты кейіпкерлерінің бірі Саха Сағатовтың ол жайындағы естеліктерінен, ой-тебіреністерінен ғана білсек, ал соңғы роман атақты революционердің өмірі мен күресін, тағдыры мен талайын бейнелеуге тұтастай арналған.

«Тоқаш Бокин» — тарихи роман. Ондағы басты қаһарман мен көптеген кейіпкерлер — өмірде болған, сол кездегі қиян-қиял тартыс талқысына қызу араласқан жандар. Оның үстіне, роман, негізінен алғанда, тарихтың нақтылы материалдарына құрылған. Әрине, шығармада өрбитін оқиғалардың барлығы да дәл сол күйінде болған еді, қазір тарихқа айналып кеткен фактілерге олар айна-қатесіз сайма-сай еді деп кесіп айтуға, тұжырым жасауға еш болмайды. Сөз өнері ретіндегі әдебиеттің шынайылығы оқиғаларды жалаң көшіре салуда емес,

қайта солардың қат-қат сырларын, әлеуметтік астарын ашыл, рухын сездіруде, өмірлік болмыстың мәнамағнасын, сипатын белгілі түрде аңдатуда. Тұтастай алғанда осы қасиет «Тоқаш Бокин» романынан да мол танылады.

Автор тарихи фактілерге мұқияттылықпен, зер сала қараған, шындықта болған оқиғалар мен ситуациялардың ауқымынан алыстап кетпеуге тырысқан. Өйткені, тарихтың өзі жазушыға драмалық өткір тартысқа, әлеуметтік мазмұнға толы мол материал берген. Бірақ, ол сол оқиғаларды тізбектеп тіркемейді, тұтас та көркем суреттейді, олардың ішкі тереңіне үніледі. Осы айтылғандар романның өзіндік бір көркемдік ерекшелігін құрайды. Бұл — онда реалистік бекем стиль мен басты-басты оқиғалық желілердің жанды тарих материалдарына сәйкестігі, жақындығының өзара ұласып, ұштасып жатқандығы.

Роман 1917—18 жылдардың оқиғаларын қамтиды. Сол сияқты, онда жазушы негізгі кейіпкері Тоқаштың ой-тебіреністері ретінде берілген лирикалық шегіністер арқылы он алтыншы жылдың айбарлы шындығынан да көп нәрсе елестетеді. Бірақ ол бұған ала-бөтен дара мақсат көздемей, кейіпкерлерінің өткенімен таныстыру үшін және олардың іс-әрекеттерінің көркемдік мотивировкасын нанымды етіп ашу үшін барған. Автордың бұл талабы шығармада тарихи-әлеуметтік жағынан да, көркемдік жағынан да ақталған.

«Тоқаш Бокин» романында халықтың өмірі, оның тарихи тағдыры мен революциялық күресі айқын да талантты суреттелген. Шығарманың көптеген эпизодтары мен көріністерінен автордың Жетісу өлкесінің өткенін, оны мекендеген халықтардың әдет-ғұрыптары мен тілін терең білетіндігі, өмірлік байқауларға бай сендігі байқалады. Шындықта болған оқиғаларды неғұрлым көп қамтып суреттеуге тырысушылық және сонымен бірге жекелеген адамдардың тағдыры мен талайын да қағас қалдырмауға ұмтылушылық — жазушының суреткерлік дарынының ең басты ерекшеліктерінің бірі. Кейіпкерлерінің психологиялық жағынан шынайы, алуан түрлі портреттерін беруде, олардың өмірі мен күресін революциялық кезеңнің айбарлы оқиғаларымен тығыз байланыста алып, астастыра көрсетуде де автордың шеберлігі анық сезіліп отырады.

«Тоқаш Бокин» романында оқиға қалың, әрекет мол

Шығарма оқиғаларын қабындата өрбітіп, тартыс талқысын күрделі де өткір күйінде суреттеуге онтайлылығын жазушы бұрынғы туындыларында да айқын аңғартқан болатын. Ал көркем прозаның роман сияқты соқталы формасы оның творчестволық қабілетінің осы бір қырының емін-еркін ашылуына әлдеқайда мол материал да, зор мүмкіндік те берген.

Романның оқиғалары бірде Алматы қаласында, біресе кең сахрада қабаттаса, түйдектеле өрбіп отырса, ал енді бірауық оқушының көз алдына Қытайдағы Құлжа қаласының өзгеше бір алуан суреттері елестейді. Шығарма кейіпкерлерін революциялық күрестің от-жалынында, тайталас-тартыс үстінде де, семьялық немесе жеке бастық тіршілік тұрмыстың әрқилы мезеттерінде де тұтас көреміз. Мұның бәрі, әрине, жазушының дәуір сипатын, уақыт философиясын, революция рухын барынша мол да шынайы аңдатуға ұмтылған талабынан туған. «Токаш Бокин» романында сылдыр сөзуарлық, ой жаландығы, риторикалық сарын жоқ. Онда кесек қимылдың, іс-әрекеттің пафосы басым. 3. Шашкиннің жазушылық стиліне ерекше хас белгілердің бірі де дәл осында. Романда ұнамды және ұнамсыз кейіпкерлер образдарының тұтас галереясы бар. Олардың әрқайсысы, тіпті кейбір эпизодтық кейіпкерлер де шығармала өздерінің болмыс-бітіміне, шама-шарқына орай, характерлеріне меңзес идеялық-көркемдік қызмет атқарады. Кітаптың бүкіл өнбойына киян-қилы драмалық өткір тартыс түйіндері шиеленісе ширап, адамдар өзара арпалыса алысып, әралуан характерлер қақтығысы болып жатады. Оның бастан-аяқ ықласпен, қызғылықты оқылатындығы да осыдан.

Романдағы ең басты, ірі тұлға — Токаш Бокин. Шығарма осы Токаш өмірінің бір кезеңін көрсетуден басталады және оның қаза тапқанын суреттеумен аяқталады. Оның характері тұтас та айқын әрі бастан-аяқ динамикаға толы.

Он алтыншы жылғы көтеріліс күшпен басылғаннан кейін сол қозғалыстың ұйтқысы болғандардың бірі Токаш Бокин түрмеде азап шегуде. Романның басты кейіпкерін оқушы ең алғаш осы халде көреді. «Адамды қанша байлап, тұтқында ұстаса да, көңгісі, үйренгісі келмейді екен. Токаш осы ойын кеше қатардағы камерада отырған Сәт ағасына сыр ғып та жазды. Осы сегіз айда

Токаштың көксегені бостандық»,— деп суреттейді автор. Міне, роман бастан-аяқ осындай бостандықты аңсау рухына толы. Тоқаш та сол жолда аяусыз алысады. Халықтың еркіндігі, елдігі жолындағы күреске араласу оған қисапсыз көп сезім қуатын береді, оның өзі арман еткен идеалдарға деген ықлас-сенімін нығайта түседі. Ол әрдайым алған бетінен қайтпайтын, тұра тілді, өткір мінезді адам ретінде бейнеленген. Революциялық шайқастардың от-жалынында суарылған сайын оның характерінің осы бір қыры да шыңдала, ширыға түседі. Тоқаш абақты азабын да тартады, оған алаш-ордашылар мен дін иелері, контрреволюцияшыл бүлікші казактар талай рет қанды тор құрады, қара күш содырлары қапысын тауып, оны сокқыға да жығады. Бірақ соның бәріне де ол жасып мойымайды, қайта революцияның жеңісі жолындағы күреске солғұрлым батыл, құлшына кіріседі. Аштықтан күйзелген халықты тығырықтан шығару, революцияның жаулары болған жуан жұдырық байлардың малын Қытайдан қайта көшіп, жүдеп-жадап келген жарлыларға алып беру кезінде де Тоқаш қайралған қанжардай өткірлік, уыттылық көрсетеді. Сондықтанда, қала мен қырдағы тап жауларының, контрреволюцияшыл қаралы күштердің барлығы да Тоқаштың соңына түсіп, жолына ор қазады. Олар қапысын тауып, Тоқашты қолға да түсіреді. Ақыры, солардың қолынан Тоқаш қаза табады. Жаулары оны өртеп жібереді.

Автор Тоқаштың өлімін күтпеген жерден, кездейсоқ бола салған оқиға ретінде суреттемейді. Бұл ретте де ол тарихи шындықтан алыстамаған. Тоқаш революция үшін, халық үшін құрбан болады. Оның қазасының қапыда келіп, қапняда тап болған өкінішті мезеттері де бар. Жазушы мұның да көркемдік мотивировкасын шынайы етіп бере білген. Тіпті, Тоқаш қазасының өзі де ол мұрат еткен күрестің ақиқаттығы мен әделеттігіне ең соңғы бір өлмес-өшпес айғақ сияқты. Жалпы айтқанда, автор өзінің басты кейіпкерлерінің есте қаларлық, жанды да жарқын бейнесін жасай алған. Романдағы Тоқаш образын толықтыра, тереңірек аша түсетін бейнелердің бірі — Құрышпай. Шаршап-шалдығуды, тайқаксуды білмейтін осы образдың бойында ұлттық сипат та соншалықты мол. Ол өзінің мұқалмас қажырымен, өнерімен, «сегіз қырлы, бір сырлы» мінезі-

мен оқушыны әрдайым сүйсіндіріп отырады. Оның характері тұтас, бітімі айқын.

Токаштың орыс достарының ішінен романда өз тұлғасымен көрінетіні — Березовский. Ол — бір кезде революциялық қызметі үшін айдауда болған, ыстық-суықты көп көрген кәнігі күрескер. Верный қаласындағы революциялық күреске де ол жанын сала араласады. Жасырын саяси газет шығарады, большевиктік үгіт таратады. Токашты да түбегейлі күрес арнасына салып, бағыт беретін сол. Бірде не істерін білмей дағдарған Токашқа ол былай дейді: «— Не істейміз, қалай? Қазақ революцияның өгей баласы ма еді? Кеше олар көтеріліс отын кім үшін жақты? Біле-білсең, Жетісу сияқты әр ұлттың басы түйіскен елде жалғыз орыстар ғана революцияны құра алмайды... Жетісудағы революцияның тағдыры — қазақ халқы қатынаса ма, жоқ па, соған байланысты». Бұл сөздер үлкен ой аңғарын, терең толғамды танытады. Шынында да қазақ халқының революцияға қатысы, араласуы — романның ең іргелі тақырыптарының бірі және ол шынайы көрініс тапқан да.

Романда қарсы жақ өкілдерінің, ұнамсыз кейіпкерлердің бейнелері де соншалықты ірі, кесек жасалған. Бір кезде революцияшыл күрескерлерді қуғынға ұшыратып, кейін оның жасырын жауына айналған арамза Фальковский, қазақ халқының қанын судай шашқан атаман Малышев, шаш орнына бас алатын баукеспе Загаруля, қазақ саудагері Зәкір, Кәрден бай және басқалар — әрі өзара етене жақын, әрі бір-біріне мүлдем ұқсамайтын жанды кейіпкерлер. Бұл образдардың бірі күшті, екіншісі солғын жасалған деп айту қиын. Жазушы олардың әрқайсысының да бейнесін, ой-тілегін, таптық тұлғасын тарихи дәл, психологиялық жағынан нанымды суреттеген.

Қайта, бұларға қарағанда Виноградов, Еремін, Емелев сияқты революционерлердің образдары әлдеқайда солғын, көмескі шыққан. Бұларда кесек іс-әрекет, терең характер жоқ. Олар көбінесе тарихи тұлғалардан гөрі революциялық тақырыпқа арналған басқа бір шығармалардан ауысып жүрген, бұрыннан таныс бағзы бір схемалық кейіпкерлерге ұқсайды.

Оқушыға «Ұядан ұшқанда» повесінен мәлім Сақаның да осы романда тындырып жүргені шамалы. Ол да жанды бейне дәрежесіне көтерілмеген.

Тоқаштың сүйгені Айгүлдің образы арқылы романға тамаша бір лирикалық тақырып кіруге тиіс еді. Бірақ оқушының бұл үміті ақталмады. Жазушы қанша тырысып баққанмен, кейіпкерінің бейнесі жан аялайтындай тартымды болып, толысып шықпаған. Қайта, оған қарағанда ұнамсыз кейіпкер ретінде алынған Бикеннің бойында жастық қуаты, тіршілік, өмір белгісі мол.

Сол сияқты, атаманның қызы Глафира мен Сәт болыста: — көркемдік шындықтан шалғай, әрі-сәрі бейнелер. Бұл образдарды мүсіндеудегі жазушының авторлық позициясы соншалықты айқын да бекем емес.

Романда бұлардан басқа да әрқилы, әралуан тартырлы сан-сан кейіпкерлер бар. Бірақ солардың бас-басына тоқталудың мүмкіндігі де, қажеті де жоқ.

«Тоқаш Бокин» романының кейбір көркемдік ерекшеліктеріне, көңіл ұялатар құнарлы жақтарына, автордың тарихи шындық пен көркемдік шындықты, әлеуметтік сарын мен жеке адам тағдырын ұластыра суреттеудегі шеберлігіне жоғарыда аз-мұз тоқталдық. Соған қоса мына бір жәйттерді айтуға болар еді.

3. Шашкин — оқиғаны қалың алып, қабындата өрбітуге, шығарма композициясын тұтас, қызықты етіп құруға шебер жазушы. Бірақ оның кейде уақиға өткірлігін, ситуация күрделілігін көрінеу қуалап, жасандылыққа, детективтік жайларға ұрылатын, межеден асып кететін мезеттері де бар. Мәселен, Тоқаштың Құлжадағы хикаяларынан осыны байқаймыз, т. б. Осы романға Жүніс образының енгізілуі де көркемдік жағынан ақталмаған. Бұл шығарманың композициялық тұтастығына селкеулік келтірген әрі «Ұядан ұшқанда» повестіндегі сюжеттік желілерге мүлдем қайшы.

Романда тіл жөнінде де автордың өзіндік ізденулері, ерекшеліктері мол. Ол күрделі синтаксисқа көп бармайды. Оның бейнелілік пен тұжырымдылыққа, шағын да ұшқыр фразаға ұмтылатындығы сезіледі. Жазушының оқиғаны, іс-әрекетті қарбыта қамтып, жедел өрбітіп әкететін стиліне бұл орайлы да сыйымды. Бірақ автордың тілінде, сөз қолданыстарында салақтық, кедір-бұдырлық, тіпті олақтық аз кездеспейді. Романда, тікелей орысша ойланып құрылған, тек айтылуы қазақша сөйлемдер тіпті көп-ақ. Сондықтан да, олар сөзбе-сөз беріле салған олақ аударма тәрізді сезіледі. Соңғы кезде бұл басқа да бірқатар авторлардан байқалып жүр.

Кейіпкердің ұлттық болмысын, ойлау және сөйлеу ерекшеліктерін бедерлі таныту үшін кейде осылай ету керек те. Бірақ, бұл — әдебиетімізді көріктендірудің, тілімізді байытудың, орыс әдебиетінен өнікті үйренудің соншалықты бір таптырмас тәсілі бола бермесе керек. Романды оқып шыққанда алған азды-көпті әсерлеріміз осындай. Түйіндеп айтқанда, «Тоқаш Бокин» — эпикалық тынысы кең, өресі биік, құнарлы шығарма. Бұл романы арқылы жазушы әдебиетімізге терең характерлі, кесек бітімді көптеген жанды бейнелер қосты.

АБАЙДЫ ҚАЙТА-ҚАЙТА ОҚЫҒАНДА

Бұдан жарты ғасыр бұрын қазақ халқының рухани өмірінде ерекше бір оқиға болды: ұлы ақышымыз Абайдың тұңғыш жинағы С-Петербургта басылып шықты. Әрине, дәл басылып шыққан кезінде бұл кітап соншалықты бағалана да, елене де қоймаған тәрізді. Мұның да сыры халқымыздың ғасырлар бойғы самарқаулығы мен көрбалалығында екендігі хақ. Ал дәл қазір, яғни ақынның ұлылығын, кемеңгерлігін барша адамзат танып білген шақта оның тұңғыш кітабының туған халқы мәдениетінің тарихындағы сарқылмас ғажайып бастау болғандығын соншалықты терең әрі айқын сезесін.

Абай шығармаларының тұңғыш жинағы қалай басылып шыққандығы жайында ақынның өз тәрбиесінде болған немересі Әрхам Кәкітайұлы Ысқақовтың естелігінен мынадай бір үзінді келтіре кетудің орайы бар сияқты:

«1906 жылы жаз шығып, киіз үй тіккенде Кәкітай қос тұрғызып Мүрсейіт молланы шақырып алды да:— сен мына біз жинаған Абай өлеңдерін реттеп жаз,— деп оңаша қосқа отырғызды. Мүрсейіт асықпайтын, арапша сұлу жазатын адам еді. Бір ай шамасында көшірімді әзірлетіп алып Кәкітай Семейге жүріп кетті. Жол шығынына екі семіз ат, екі семіз түйесін әкеткенді. Мәлін Семейде ақшалап алып,— Омбы қаласына кеттім,— деп хат жазды. Одан кейін Омбыда бастыра алмадым, Қазан қаласына жүріп кеттім деп тағы хат жазды. Бір жұмадан соң:— Қазан қаласындағы баспаханалардың басуға уақыты болмады. Сондықтан Петербург баспаханаларымен шарт жасастым. Тез 200 сом ақша салыңдар,— деген телеграмма келді. Кәкітай бір айда қайта оралды. Кітаптың корректорлық міндетін өз мойнына алыпты.

Баспахана әр баспатабақты Семейде Абай түсіп жүретін Әнияр үйіне жіберіп тұратын болыпты. Әнияр Кәкітайға жеткізіп тұрды, Кәкітай оның қатесін түзеп, қайта Петербургке жіберіп отырды. Осындай сергелдеңмен жүріп Абай өлеңдерінің бірінші жинағы 1909 жылы, яғни үш жылда зорға жарыққа шықты. Әріп терушілердің қазақтың сөзін ұқпауынан қатесі көп болды, толық

түзеуге мүмкіндік болмады. Абайдың қысқаша өмір баянын Кәкітайдың өзі жазды».

Ақын шығармаларының басылуы және зерттелуі осылайша басталды. Содан бері олар халқымыздың рухани серігі, сырласы болып келеді және ақынның мол мұрасы әрдайым зерттеушілер назарын аударып, келелі пікір тудырып отырды. Абай жайында қазір де көп жазылады. Өйткені, оның шығармаларын тек өткеннің ғана мұрасы деп қарауға болмайды. Творчествосының бүкіл рухымен, терең гуманизмімен, адамды ең жарқын мұрат-мақсаттарға баулитын қуат-күшімен, кемел көркемдігімен ол — бізге ең жақын, хатте замандас ақын.

Пушкин туралы мақалаларының бірінде Белинский: «Пушкин ажал тап болысымен ұмыт болып қалмайтын, қайта қоғамның санасында өркендей беретін, мәңгі өшпей, өрістей түсетін тұлғалардың қатарына қосылады. Олар жайында әр дәуір өз пікірін айтатын болады», — деп жазған еді. Данышпан сыншының ұлы Пушкин жайындағы осы сөздерін Абай творчествосына арнаудың да әбден лайығы бар. Өзінің көзі тірісінде-ақ Абайдың шығармалары ауыздан-ауызға көшіп, жан сергітер самалдай бүкіл сахараға кен, бірақ баяу ғана таралса, советтік дәуірде оның творчестволық мұрасы лайықты бағасына ие болды. Ақынның есімі бар ғаламға мәшһүр болды. Оның творчествосы тағлырының болашағы да осындай. Келешекте де талай ұрпақтар мен буындар Абай мұрасының тереңіне үнілетіндігі және үнілген сайын сол тереңнің таусылмас қайнары мен ғажайып сырларын мол танып, аша түсетіндігі де күмансыз.

Ақынның шығармалары туған халқының мәдениеті тарихындағы тұтас бір дәуірді құрады. Ол қазақтың жаңа әдебиетінің негізін салушы, бастаушы болды. Кемеңгер ақын өзінің тамаша шығармаларында сол кездегі заман шындығын, халық өмірін терең де мол бейнеледі. Ол өзінің творчествосымен дәуір тілегіне жауап берді, өз халқының көркемдік қажетін өтеді. Өзі айтқандай, Абай «өленді ермек үшін» жазған жоқ. Ол көркем әдебиеттің әлеуметтік маңызын терең түсінді және зұлымдық пен надандыққа қарсы кекті күресінде оны пәрменді құрал ретінде шебер пайдаланды. Абайдың ақындық өнерге, творчествоға қоғамдық мәні зор құбылыс ретінде қарағандығына оның әлеуметтік терең мазмұнға толы, асқан көркем шығармалары айқын дәлел.

Қазақ халқының арман-тілегі мен ой-сезімі, жарыққа, еркіндікке қарай оның қажырлылықпен ұмтылуы Абай творчествосынан өз көрінісін мол тапты. Абайды оның өзі өмір сүрген кезіндегі қоғамдық өмірден, қазақ халқының тарихындағы саяси-әлеуметтік жағдайлардан бөліп алып, жеке-дара қарауға болмайды. Абайдың творчествосы ақын өмір кешкен дәуірдің прогресшіл сипатымен тығыз байланысты және соның жемісі іспетті.

Абай творчествосының салмағы оның поэзиясында. Оның шығармаларының дені лирикалық өлендер болып келеді. Ол өзінің үздік таланты мен асқан шеберлігін сол лирикалық шығармаларында әсіресе жарқын танытты. Абай лирикасының аясы мол, тақырыптық қамтуы кең. Қай тақырыпқа жазса да, Абай өзінің лирикалық шығармаларында қазақ даласында оған дейін естілмеген ойлы да сырлы сөзін айтты және оны мейлінше жана түрле айтты.

Ақын шығармаларының ғажайып ерекшелігі, құндылығы олардың халықтық сипаты мен реализмінен әсіресе айқын танылады. Ол өзінің көптеген шығармаларында еңбекші халықтың азапқа толы азалы өмірін мейлінше шынайы әрі жаны ашып тебірене, күйзеле отырып суреттеді. Абай өлендерінен халық өмірінің кең көріністерін ғана байқап қоймаймыз, сонымен қатар оның арманы мен үмітін танимыз, қайрат пен жігерге, ашу-ызаға толы даусын есітеміз. Сөйтіп, патриот-ақын сол кездегі «сабырсыз, арсыз, еріншек, көрсе қызар жалмауыздардың» дүниесіне қарсы өзінің кекті даусын көтерді, халық мүддесін қорғады. Өз халқын бар жүрегімен сүйген, оның алдыңғы қатарлы ел болуын қалтқысыз ансаған Абай «қалын елі — қазагының» бейуақыттағы сорлы тағдырына күйінді, оның надандығы мен қараңғылығына жаны күйзеле налыды. Патриот-ақынның көп өлендері өз халқының тағдырын ойлап толғанудан туған азалы арман мен қасиетті шерге толы болып келеді. Бұл өлендерден біз ақынның таза көз жасын көреміз, оның мұң-наласын, шер-шеменін сеземіз. Философиялық терең мазмұнға әрі лирикалық сыр-сазға толы «Сегіз аяқ» атты белгілі өлеңінде Абай «тәні ауырмай, жаны ауырғанын», «көкірегі тарылып, жүрегі қысылғанын», жас төккенін айта келіп, өз жанының мынадай бір күрсіністі күйін шертіп кетеді:

Қайратым мәлім,
Келмейді әлім,
Мақсұт — алыс, өмір — шақ.
Өткен соң базар,
Қайтқан соң ажар,
Не болады құр кожақ?!
Кеш деп қайтар жол емес,
Жол азығым мол емес!

Бұл сөздерде үлкен мән бар. Расында да, Абай арман етіп күрескен мақсұт қаншалықты қасиетті болса, сол дәуір үшін ол соншалықты алыс та болатын. Өзі армандаған мақсұтқа жету үшін қайрат-күші де аз екенін, «өмірі де шақ» екенін Абай саналы түрде түсінген. Бірақ патриот-ақын сол игі мұраттың түбінде бір орындалатынына қалтқысыз сенді және сондықтан да сол мұрат жолындағы күреске оның бар қиындығына төзіп, қобалжымай, бекем кірісті. Өйткені, арман мен үмітке толы, бірақ алыс та қиын бұл сапар — «кеш деп қайтар жол емес» екенін Абай жақсы таныды және сол жолдан өмірінің ақтық сағатына дейін танған да жоқ. Ақын өлендерінің жоғарыда аталғандай шерлі шыншылдығымен, сыршылдығымен қатар өзінің оптимистік қуатын жоғалтпайтындығы да осыдан.

Абайдың реалистік шеберлігі оның «Қансонарла бүркітші шығады аңға» дейтін өленінде тұңғыш рет жан-жақты, мол көрініс тапты. Мұнда қазақтың саятшылық өнерінің асқан шеберлікпен берілген гажайып көркем әрі мейлінше дәл суреттері бар. Осы өлендегі жақсы ат мініп, тату жолдас ертіп, қансонарда аңға шыққан бүркітші, тау басындағы аңшы мен ойдағы қағушы, қайқан қағып аспанға шыға келген қанды көз, құтылмасын біліп кере тұра қалған қырық пышақпен қыржындаған түлкі-екеуінің жарқ-жүрқ еткен айкасы, қыран құстың да, иесінің де алпыс екі айлалы түлкі алғанға қоразлануы, тымақты сілке киіп, жайланып насыбай атуы, жасы үлкендердің түлкіні байлануы — бәрі де суреті, бояуы жағынан қандай әсерлі, ойнақы және психологиялық жағынан қаншалықты терең әрі шыншыл. Мұндағы тіршілік — болмыс белгілерінің барлығы да — тек қазақ өмірі шындығынан алынған және тек қазақтың нағыз ұлттық ақынының ғана түйсініп сезінетін, суреттеп елестете алатын жәйттері.

Бұл өленде Абайдың реализмі оның жанашылдығымен де нық байланысты, өзара астасып жатыр. Яғни мұнда

жер-мекен көріністері, табиғат суреттері, адамдардың іс-әрекет, мінез-құлқы ауыз әдебиеті дәстүріне орай дерексіз, бұлдыр күйде жырланбай, шынайы да нақтылы бейнеленген. Сонымен бірге бұл өленде ақын әлеуметтік өмірдің алыс-жұлқысынан, тайталас-тартысынан сырт берген, бойын аулақ салған сыңай да сездіреді:

Көкіректе жамандық еш ниет жоқ,
Ал болады кенесін құс салғанда.
Ешкімге зияны жоқ, өзім көрген
Бір қызық ісім екен сұм жалғанда.

Бұл өленнен Абайдың алғашқы кездегі шығармаларының реализміне тұтастай дерлік хас сипат-салғыртық, сырттан қарап бақылаушылық та біртоға жақсы аңғартылатындай. Ал творчествосына өз дәуірінің қымқуыт, қос қыртыс шындығының әралуан қырлары, әлеуметтік сарындар неғұрлым мол араласқан сайын ақынның реализмі де солғұрлым айқындала, бекемдене әрі терендей түскенін аңдаймыз.

Мәселен, осыдан біраз жыл өткеннен кейін шығарған «Жаз» атты өлеңінде де ақын адам мен табиғат туралы тақырыпты өзара ұластыра, тұтас күйде алып жырлайды. Бірақ мұнда өмір шындығы, оның қайшылықты көріністері молырақ қамтылған. Көшіп қонған ауылдың бейнесін алғашқыда сырттай суреттейтін ақын кейін оның ішкі көріністеріне де үніле көз салады, жалпылама болса да әралуан адамдар тұлғасын елестетеді. Олар: ақ білегін сыбанып, бұрала басып үй тіккен қыз-келіншек, малын аралап көңілі жайланып қайтқан бай, жалшы алдаған жас бала, «көлеңке жерге кілем төсетіп», «сары қымызды сапырып» екілесе әңгіме соғып, есіп отырған дәулеттілер. Бұлар — «әйтеуір күн өткізер әңгіме үшін» адамдар. Олардың қоғамға, ел өміріне ешбір пайдасы жоқ, «құр масыл». Міне, малшыларға айғай салып, ауылдан ақ көйлекті ақсақал шықты. Ол өзінің қарқылдап күлгеніне ғана мәз. Оның келешегі кесіліп, үміті үзілген. Қанша бақырып, байбалам салып мықтымсынғанмен, ол енді дәрменсіз. Бұл тоғышар келешегін бағдарламақ түгіл, өткен өміріне де көз жібере алмайды. Сондықтан да ақын оны:

Өткен күннің бәрі ұмыт.
Қолдап келер дәрмен жоқ,—

деп суреттейді.

Бұл өлеңде дала пейзажы, көшпелі өмір 'көріністері реалистік сипатта бейнеленген. Іс-әрекетке, динамикаға толылығына орай өлеңнің ырғақ, ұйқастары да сәт-сәт сайын жанданып, құбыла құлпырып отырады. Бірақ көшпелі тұрмыстың мардымсыздығын, ескі ауылдағы әлеуметтік қайшылықтардың сырын терең де аяусыз ашуға ақынның әлі де болса беріле ден қоймағаны байқалмай қалмайды.

Осы өлеңмен тақырыптас «Жазғытұрымды» да қайта бір оқып шығалық. Мұнда да ақынның асқан шеберлігіне сүйсінбей, таңырқамай қалмайсың. Өлеңнің алғашқы шумағын оқыған кезде-ақ қарсы алдыңнан көктемнің жылы лебі ескендей сезіледі. Көктем жұрттың бәріне де жайлы: кәрі, жас өз тұрғыларымен жайраң қағып, мәзмәйрам. Жалғыз карасы қыстан аман шығып, төлдеп өсіп екеу болғанына шаруа да қуанып жүр. Көктем мелшиген кара тас пен сол тастай суық, сезімсіз, топас, сараң байдан басқалардың бәрін де жадыратып жіберген. Сонымен бірге осы өлең ақынның пантеистік ұғымын, яғни жаратушы күдірет жаратылыстың бар құбылысынан көрініс береді деген түсінігін де қоса аңғартады. Өлеңдегі мифтік образдар да осыған байланысты туған. Бұл белгілі дәрежеде өлеңді сол кездегі қазақ шындығынан алыстатып әкетеді, оның реалистік, әшкерелеушілік қатын біраз көлегейлейді.

Ал «Күз», «Қараша, желтоқсанмен — сол бір екі ай» сияқты өлеңдерінде Абай өзін нағыз кемел реалист, шын мәнісіндегі әлеуметтік әділетті жақтаған жыршы ретінде танытады. Бұл өлеңдерде табиғат көріністері жалаң суреттелмей, сол кездегі сахра тіршілігімен тығыз тұтастықта, байланыста алынады. Олардағы көңіл аударатын бір ерекшелік сол, — мұнда ақынның таптық көзқарасы, қазақ аулындағы таптық жіктелушілікті оның айқын көре білгені байқалады.

Жыл мезгілдерінің жадау да жабыркау, қайыршыдай жұтаң бір кезін суреттеуден басталатын «Күз» деген өлеңде ақын бірте-бірте ескі ауыл тіршілігінің, кедейлердің сол күз күніндей күзелген, тоналған тұрмысын бейнелеуге ауысады.

Кемпір-шал құржан қағып, бала бүрсен,
Көнілсіз кара суық кырда жүрсен.
Кемік сүйек, сорпа-су тимеген соң,
Үйде ит жоқ — тышқан аулап қайда көрсен,—

деп суреттелі Абай жарлы ауылдың жетімек халін. Әдетте осы шумақтың соңғы екі жолына көп назар аударыла бермейті. Ал шыңтайттап келгенде осы екі жолда қаншақтың терең мағына, ашы шындық жатыр. Тіпті ітіне дейін қаңғырып, дала кезіп өткен ауылдың көрер күші не болмақ. Бұл ретте де Абай нысаналы ойын өзіне тән асқан байқағыштықпен, тапқыр тұжырымдылықпен нағыз реалист суреткерше айта білген. Оның үстіне ақын жарлы ауылдарды дәл осындай мүскін халге дұшар етуші — тағдыр емес, байлар деп біледі. Оның творчествосының халықтық сипатының терең бір тамыры да осында.

Ал енді басқа бір сала өлеңдерінде («Көлеңке басын ұзартып», «Көкала бұлт сөгіліп», «Желсіз түнде жарық ай») ақын табиғат суреттерін адамның әралуан көңіл-күйлері, сыр-сезімдері тақырыбымен ұластыра жырлайды. Бұл туған жердің табиғатын оның ақындық жүрекпен тебірене сүйе білуге де байланысты. Ол табиғаттың әсем құбылыстарын, адамның жүрегін тербеп, жан күйіне әсер ететін сұлу көріністерін байқағыш.

Мәселен, «Желсіз түнде жарық ай» атты өлеңді қайта бір оқып шығалық. Дұрысырақ айтқанда біз өлең ғана оқып шықпаймыз. Көрісінше, ғажайып сырлы үн мен солмас, сембес бояудан жасалған күйлі де келісті тұтас бір дүниені көріп өткендей боламыз: ауылдың жанындағы гүрілдеп аққан өзен, сәулесі суда діңілдеген жарық ай, манаураған желсіз түн, жаппақтары сыбдырлап, сыр шерткен тәрізді қалың ағаштар, тау жаңғыртқан ән. Міне осындай тамаша түнде, әсем табиғаттың аясында кездесіп, «бөгіліп сөз айта алмай», тіл қатпай, үнсіз ұғынысып тұрған екі жас, олардың дүрсіл қаққан жүректерінің дүпсілі — осының бәрін өз көзімен көргендей, өз құлағымен тыңдағандай боласың. Сөйтіп, Абай адам мен табиғат деген мәңгілік тақырыпты осылайша, яғни асқан зор ақындық мәдениет тұрғысынан қарап шешеді.

Осы орайда Белинскийдің «Әдеби армандар» атты мақаласындағы: «Ақын неғұрлым данышпан болған сайын табиғатқа тереңірек араласып, оны құшағына тұтас қамтып алады. Сөйтіп, бізге табиғатты өмірмен барынша байланыстыра алып көрсетеді» деген ойлары еске түседі. Өйткені, Абай да өз өлеңдерінде табиғатты адам қоғамынан аулақ алып жырламайды, қайта сол

кездегі қазақ халқының әлеуметтік жағдайлары, қоғамдық тіршілігі, күнкөріс әрекеттерімен байланыстыра суреттейді. Оның лирикасын аса көркем, мейлінше терең еткен сипаттардың бірі осы болатын.

Абай поэзиясының ең бір өрісті, өзекті саласы — оның сатиралық шығармалары. Сатиралық сарындар Абайдың тұтас, аяқталған сатиралық шығармаларында ғана емес, әлеуметтік тақырыпқа арналған басқа шығармаларында да, тіпті ғибраттық өлендерінде де жиі ұшырасып, акынның творчествосына ерекше бір сипат, реңк беріп отырады.

Абайдың сатиралық таланты оның алғашқы кездегі шығармаларынан, импровизациялық өлендерінен де айқын танылады. Егер «Кім екен деп келіп ем түйе қуған», «Шәріпке» сияқты өлендерде ирония, зілсіз кекесін ғана болса, ол «Абралыға» атты өленде акынның ыза-өшпенділігімен астасып жатқан ұятты, өткір мысқыл бар. Мұнда акын «Құржан-құржан етіп» намаз оқи беретін, бірақ сол не оқығанын да дұрыстап білмейтін діндар адамның «пақырлығын», онда «құлақ бар, ми жоқтығын» аяусыз ажуа етеді.

Абайдың алғашқы кездегі арнау өлендері сырттай алғанда ауыз әдебиетінде, сондай-ақ Абаймен тұстас талай акындардың творчествосында кездесетін мысқыл өлендермен ұқсас, үндес сияқты көрінгенмен, тереңдеп, барлай қарағанда олардың арасында іштей үлкен айырмашылық, ерекшелік барлығын аңдау қиын емес. Абай арзан ажуа айтудан, әйтеуір күлкі етуден аулақ. Ол өзі мысқылдап отырған құбылыстың ішкі мәніне тереңдеп үңіледі және сол кеселдің туындап жатқан төркінін тап басып, дәл табады, өзінің ызалы тілінің зілі мен кәріні соған қадайды. Сондай-ақ Абайдың алғашқы кезеңдегі сатиралық арнау өлендерінде нағыз эпиграммаға тән жинақылық пен алмастай тілгір өткірлік те бар.

Абайдың творчествосы неғұрлым кемелденіп, биіктеген сайын ондағы сатиралық бағыт та солғұрлым тереңдей түседі. Егер алғашқы сатиралық өлендерінде Абай жекелеген адамдардың басындағы, мінез-құлқындағы ұнамсыз жәйттерді мінеп, шенесе, енді ол сөз семсерінің өткір жүзін әділетсіз қоғамға және сол қоғам туғызған әлеуметтік мәселелерге тереңірек дарытады. Абай сатирасындағы бұл ерекше сипат оның сатирашылық талантының толысуынан ғана емес, акын творчество-

сындағы ұлы да үлкен бетбұрыстан — орыстың классикалық әдебиетінен нәр алудан, үйренуден келіп туған еді.

Абай орыстың классикалық әдебиетінің халықтық, реалистік принциптерін ғана емес, сатиралық өткірлігін де қабылдады. Пушкин мен Лермонтовтың, Некрасовтың әсерімен нағыз халықтық, азаматтық поэзияның классикалық тамаша үлгілерін жасаған Абай әлеуметтік мәні зор, шынайы сатиралық шығармалар жазуда да орыстың көрнекті сатирик жазушыларынан, әсіресе ұлы Салтыков-Щедриннен мол үйренді, көп үлгі алды. Өзі көп үміт артқан жастарға Абайдың данышпан сатирик Салтыков-Щедринді өнеге тұтуы тегін емес-ті. Бұл орыстың ұлы сатиригі творчествосының зор маңызын терең түсінген, тұшынған әрі одан мол сусындаған адамның ғана айта алатын сөзі еді.

Орыстың сатирик жазушыларының творчестволық тәжірибесін қорыту, одан үйрену арқылы Абай, ең алдымен, көркем сатираның әлеуметтік зор роль атқаратынын, оның күрес құралы екенін терең түсінді және сол құралды кімге қарсы, қалай жұмсаудың жолдары мен тәсілдерін тапты.

Орыстың классик-сатириктері өздерінің шығармаларында қанауға, әділетсіздікке негізделген қоғамның тағылық сипатын, жексұрындығын жеріне жеткізе әшкереледі. Олар өз сатирасының алмастай өткір жүзін қанаушы таптың негізін қаусатуға, халықты езушілерді жер бетінен аластауға, қоғамдық құрылыстың тірегін шайқалтуға бағыттады. Сол сияқты, Абай да өзінің сатиралық өлеңдерінде үстем тап өкілдерінің халыққа жасаған зорлық-зомбылығын, олардың жиіркенішті қылықтары мен жексұрын мінездерін өлтіре сынады. Бұдан Абай Салтыков-Щедрин сатирасының идеялық және көркемдік биігіне көтерілді деген пікір, әрине, тұмайды. Абай творчествосынан Салтыков-Щедрин сатирасының революцияшыл рухының лебін іздеу мейлінше ағат болар еді. Өзі ортасынан шыққан үстем таптың қатал өктемдігіне қарсы тұрып, халықтың мүддесін қорғауы, соған қызмет етуінің өзі Абай творчествосының халықтық, прогрестік зор сипатын айқын танытады. Ұлы ақынның мұрасын ескірмейтін, өшпейтін еткен де — осы қасиет, осы сипат болатын. Өз халқын үлкен болашаққа — орыс халқымен достыққа, оның мәдениетінен үлгі алуға, өнерлі-білімді

ел болуға шақырған Абай — осы игі мақсатына жету жолында кедергі болған құбылыстардың, кеселдердің барлығына қарсы «мыңмен жалғыз алысты», «улы сыя, ашы тілін» соларға қарсы жұмсады. Абай ақын жайындағы бір өлеңінде:

Қыранша карап Қырымға
Мұң мен зарды қолға алар.
Кектеніп надан, зұлымға
Шиыршық атар, толғанар,—

деп жазды. Бұл өлең Абайдың ақынға қоятын талабын да және оның өз творчествосының сипатын да анық байқататындай. Расында да, қыран көрегендікпен алысты болжай білген Абай халық мұңын жырлады. Оның творчествосында ұшырасатын зар сарыны — халықтың кәсіреті мен зары, соның көкейкесті арманы болатын. Бірақ бұл зар мен арман ақынды мүлдем түңіліп, жолынан адастыра алған жоқ, надандық пен зұлымдыққа кектенген ол шиыршық ата толғанды, өзінің «ызалы жүрегі» мен «долы қолына» ерік берді. Міне, өктемдік, зорлық дүниесіне, надандық атаулыға өлтіре соққы берген, халық тілегін білдірген кекті жыр осылайша келіп туды.

Абай өзінің сатиралық өлендерінде сол кездегі қазақ қоғамында орын алған кеселді құбылыстардың барлығын да аяусыз түйреді, жеріне жеткізе әшкереледі.

Абай көптеген сатиралық шығармаларында ақынның мысқыл ететін кейіпкері жинақты образ ретінде алынып отырады. «Сабырсыз, арсыз, еріншек», «Болыс болдым мінекей», «Адасканның алды жөн, арты соқпақ» тағы басқа өлендер бұған айқын мысал бола алады. «Бір сен емес, жазғаным — жалпақ жұрт қой», — деп өзі айтқандай, Абай бұл шығармаларында кейіпкерлерінің тысы мен ішін актара көрсету арқылы бүкіл заман шындығын шебер суреттеді, бірдің емес, көптің жинақты бейнесін жасады. Бұл ретте Абайдың сатиралық шығармаларының кейіпкерлері типтік дәрежеге көтерілген деп айтуға әбден болады.

«Сабырсыз, арсыз, еріншек» атты өлеңнің басқы жолдарының өзі-ақ өленде суреттелетін кейіпкерлердің кескін-келбетін ғана емес, оның ішкі дүниесінің сыйқын да танытады. Ақын кейіпкердің мінез-құлқындағы, іс-әре-

кетіндегі жағымсыз, ұнамсыз белгілерді терең ашады да, оған «пысық» деген ат береді:

«Пысық» кім деп сұрасаң:
Қалыға шапса, дем алмай,
Өтірік арыз көп берсе,
Көргендерден ұялмай.

Сыбырдан басқа сыры жоқ,
Шаруаға кыры жоқ,
Өтірік, өсек, мақтанға
Ағып тұрса бейне су.
Ат-шапаннан кем көрмес
Біреу атын қойса «ку».

«Пысықтың» әрекетінің, тіршілігінің сыйқы осы. Абай «пысықты» осылайша қазбалап, терең суреттей отырып, оның мінез-құлқындағы екінші бір белгіні — тоғышарлықты, надандықты да аша кетеді. Еңбек етуді ұнатпайтын, өтірік пен өсекке судай аққан бұл «пысықтың» бұдан басқа әрекет жасауға мұршасы да, құлқы да жоқ. «Қызмет қылып, мал таппай, ғылым оқып, ой таппай, құр үйінде жататын» бұл тоғышарлардың жаңалыққа, мәдениетке жандары қас. Қоғамдағы ең зарарлы, қауіпті кеселдер де — солар. Сондықтан да Абай оларды өткір тілімен аяусыз шенеп қана қоймайды, жастарды, халықты солардан аулақ болып, сақтанып жүруге шақырады:

Бұл сөзімде жалған жоқ,
Айтылмай сөзім қалған жоқ,
Абайлаңыз, байқаңыз
Елдің жайы солайды.

Бұл өлең Абай творчествосының сатиралық сипатын ғана емес, сонымен бірге оның халықтық бағытын да әйгілей түседі.

Абайдың «Болыс болдым мінекей», «Мәз болады болысың», «Дұтбайға» сияқты өлеңдері де — оның сатирасының биік шоқтығы, үздік үлгілері болып саналады. Бұл өлеңдерінде Абай болыстың нағыз типтік дәрежеге көтерілген сатиралық образын жасайды. Бұл өлеңдердің тақырыбы, мысқыл ететін объектісі бір болғанмен, оларда сатиралық образдың жасалу жолдары, тәсілдері әртүрлі. Алғашқы өлең болыстың өз атынан баяндала-

ды. Осылайша Абай оның барлық сырын, ішкі дүниесін ақтарып салады. Бұл өлеңді оқығанда күштілердің алдында шығындап, бас изеітін, әлсіздің сөзін салғырт-сып, шала ұғатын екі жүзді оолыс өзінің дарақы мінезімен, оар жексұрын бейнесімен көз алдымызға келеді. Ал соңғы екі өлең мейлінше өткір сарказмға құрылған және мұнда сатиралық оораз автордың өз тарапынан тікелен сипаттауы арқылы суреттеледі. Бұл өлеңдерінде де Абай болыстың қулық-сұмдығын, сұрқиялық мінезін, топастығын тереңдеп ашып, қатал сынады.

Абайдың шығармаларынан біз болыс, атқамінер, қу-сұмдардың ғана емес, дін иелерінің, молдалардың да сатиралық бейнесін кездестіреміз. «Қөзінен басқа ойы жоқ» атты белгілі өлеңінде Абай молданы былайша суреттейді:

- Кітапты молда теріс оқыр
Дағарадай болып сәлдегі;
Малқұмар көңлі бек соқыр
Бүркіттен кем бе жем жесі?

Бұл өлеңде ақын басына дағарадай сәлде ораған молданың монғалылығын, арамзалығын, қараулығын шебер әшкереленді, оның жауыздығын тағының жыртықтығына балайды.

Абайдың сатиралық шығармаларындағы ұнамсыз кейіпкерлер өздерінің іс-әрекетімен, мінез-құлқымен бірін-бірі қайталамайды, қайта толықтырып отырады. Олардың барлығы жиналып келіп жауыздық дүниесін бейнеленді, жексұрын типтердің тұтас бір галереясын құрайды.

Нағыз сатирада суреттеп отырған құбылысты жоққа шығарумен бірге онда ұнамды идеалға деген сенім де болады. Орыстың классик сатириктерінің шығармалары міне дәл осындай еді. Олар өздерінің творчествосында билеуші тап өкілдерін аяусыз шенеу арқылы, ескі дүниеге әділ де өткір үкім анту арқылы халықтың қалың бұқарасының ой-тілегін білдірді, халықтың идеалын жақтап қалды. Осы ерекшелікті Абайдың сатирасынан да кездестіреміз. Ол өзінің өткір сатиралық шығармаларында жауыздық, үстемдік дүниесін қатал сынады, халықтың арман-мүддесін қорғады. Абайдың сатиралық шығармаларында ұнамсыз күштермен күресетін негізгі тұлға — ақынның лирикалық қаһарманы. Сонымен бірге Абайдың творчествосынан ұнамды кейіпкерлердің бей-

несін де кездестіреміз. Ол «Жаңа жылдың басшысы» Абдрахман. Ақын «Таланттың тұлпарын мініп» ғылымға ұмтылған Абдрахман мен интернатта оқып жүрген жастарды өзі өлтіре сынайтын ұнамсыз типтерге қарама-қарсы қояды.

Әделетсіз дүниеге, өктемдікке, надандыққа қарсы өзінің кекті күресінде Абай сатираны өткір де пәрменді құрал етіп пайдаланды, сөйтіп қазақ әдебиетіндегі тың бағыттың — сатиралық жанрдың негізін салды. Абайдың сатиралық дәстүрлері қазақ әдебиетінің одаи кейінгі дамуына ерекше жемісті әсер етті. Сұлтанмахмұт Торайғыров пен Сәбит Дөнентаевтың творчествосынан Абай сатирасының әсерін, ізін табу қиын емес.

Абай реализмінің күші түптеп келгенде оның асқан шеберлігіне де байланысты. Қазақ поэзиясына түр, ұйқас, өлшем жағынан енгізген ұлан-асыр жаңалықтарын айтпағанның өзінде Абай қазақтың қарапайым халықтық тілі арқылы адамның көңіл күйі мен сыр-сезімдерінің алуан түрлі реңктері мен қайталанбас сәттерін бар бояуымен жеткізіп бейнелеуге болатындығын көрсетті. Тұтастай алғанда оның поэзиясы — нағыз «сөз патшасы», «тас бұлақтың суындай сылдыраған өңкей келісім», өзгеше көркем, мол сырлы дүние.

Ақын өзінің үздік шеберлігін тағы да лирикасында әсіресе жарқын, оқшау танытты. Рас, ғибраттық сарында жазған өлеңдерінде Абай поэтикалық бейнелеулерді көп түрлендіріп қолдана бермейді. Мұндай шығармаларында ол өнегелі ойлары мен тағлымдарын арнау ретінде өз атынан тікелей айтады. Бұл ретте ол өз оқушыларының ой өрісі, интеллектуальдық дәрежесімен санасқанын ең алдымен айтуға керек. Ал замана, өмір жайындағы толғауларында, ақындық туралы және адамның көңіл күйлеріне, рухани бітіміне байланысты өлеңдерінде Абай поэтикалық бейнелеудің, көркем суреттеудің не бір ғажайып үлгілері мен өрнек-нақыштарын барынша мол әрі құлпырта да жайната қолданады. Мәселен «Көлеңке басын ұзартып» деген өлеңінде Абай адамның көңіл күйін, жан толқындарын ерекше бір көркемдік тәсілмен суреттейді:

Күнгірт көңлім сырласар
Сұрғылт тартқан бейуаққа.
Төмен қарап мұндасар
Ой жіберіп аулаққа.

Мұнда ақын өзінің тебіренген жан күйін бірден айтпайды, табиғат суретін беру арқылы соған ая жасайды. Сондықтан да көкжиектен асып күн батқан сұрғылт бейуаққа ақынның күнгірт көңілі үндесе, сырласа кетеді. Өйткені, мұнда табиғат стихиясы мен ақындық шабыт стихиясы ұласа, астаса берілген. Абайдың адам жанына үңілгіш, оның қат-қат көңіл толқындарын шебер суреттегіш үлкен психолог-ақын екендігін қалтқысыз аңдататын мысалды оның кез келген өлеңінен дерлік табуға болады. Ақынның ғажайып көркем мұрасына қайта-қайта үңілген сайын бір тоқтамға көңілің бекем ұялай түседі: ол туган халқының жүрегі мен жанында ғасырлар бойы сақталып, бірақ жыр болып төгіле алмай қыстығып келген аяулы да абзал сезімдерге тіл бітірді. Оларды тар кеуденің қапырық қысымынан көркемдік өмірдің самал лебіне алып шықты (Белинский).

Абайдың ақындық өнердің шырқау биігіне көтеріле алуына жағдай жасаған негізгі факторлардың бірі оның орыстың классикалық әдебиетімен терең де тығыз байланыстылығында, одан творчестволық түрде жемісті үйрене алғандығында екені де баршаға аян. Бұл жайында мол да, жақсы да жазылды. Сондықтан оларға тоқталып, қайталап жатудың қажеті де жоқ. Біздіңше, Абай творчествосына орыс әдебиетінің әсерін сөз еткенде мынадай шешуші, негізгі екі жәйтті естен шығармау керек. Ең алдымен, орыс әдебиетінен үйрену, үлгі алу Абайдың төл творчествосының ерекшелігін, оның өзіндік тұлғасын, соны бітімін бекерге сайып, әлсіреткен жоқ. Қайта, орыстың классикалық әдебиетінің дәстүрлерін қабылдау Абай творчествосын идеялық және көркемдік жағынан кеңейтіп молықтырды, оның шығармаларының ұлттық сипатын тереңдете түсті.

Сондай-ақ, орыс әдебиетінің Абайға тигізген әсерін оның кейбір жекелеген өлеңдерінің орыстың классик ақындарының шығармаларымен сырттай ұқсастығынан ғана іздеуге болмайды. Абайдың орыс әдебиетімен жақындығы, үндестігі, оның творчествосының бүкіл рухынан, көркемдік-эстетикалық көзқарастарынан терең де айқын сезіледі. Абай орыстың жекелеген ақындарының ғана творчествосынан үйреніп қойған жоқ, ол орыстың бүкіл классикалық әдебиетінен тұтастай үйренді. Орыс мәдениеті мен әдебиеті жайында және орыстың

классик акын, жазушылары жайында Абайдың тікелей айтқан пікірлері тым аз. Бірақ Абайдың орыс әдебиетіне қандай қатынаста болғаны оның бүкіл творчествосының сыр-сипаты мен бағыт-бағдарынан және орыстың классик акындарының көптеген шығармаларынан жасаған тамаша аудармаларынан анық байқалады. Ол орыстың классикалық әдебиетінің шығармаларына нағыз халықтық, азаматтық поэзия жасаудың асқан үздік үлгілері ретінде қарады.

Абай орыстың классикалық поэзиясын аса жоғары бағалап қана қойған жоқ, сонымен қатар оның өзіндік белгі-бедерлерін, ерекшеліктерін жете білген де, өйткені егер Абай орыс поэзиясын соншалықты жетік танымаса және оны соншалықты сүймесе, онда ол орыс акындарының шығармаларын дәл біз білетін осындай дәрежеде аударма алмаған да болар еді. Орыс акындарының шығармаларын аудару арқылы Абай классикалық орыс поэзиясының тереңіне үнілді және өзін ойға қалдырған, толғандырған жайларға содан жауап тапты.

Орыс поэзиясының үлгілерін аудару ісіне Абай творчестволық жолының әр кезеңінде-ақ ден қойып отырды және оның әр кезде жасаған аудармалары әртүрлі. Ол орыс акындарының қайсыбір шығармаларын тұтас аударса, кейбірлерін қысқартып ықшамдап, болмаса өзінің жанынан қоса отырып аударарды. Әрине, мұның алуан түрлі себептері болуға керек. Бірақ қайткен күнде де бұл ретте Абайдың сол кездегі қазақ қауымының мүмкіндігімен, тілегімен санасқанын, сондай-ақ кейде Абай кезегі келгенде өз жүрегінің сырын шертіп кететінін ескермей қоюға болмайды. Орыс акындарының тәжірибесін творчестволық жолмен игеруде де, орыс поэзиясының шығармаларын шебер аудару ісінде де Абай қазіргі акындарымыз үшін үздік үлгі.

Нағыз ұлы акын, оза шыққан классик болғандықтан Абай өмір кешкен дәуірінің бейнесін беріп қана қойған жоқ, сонымен бірге өзінің де қайталанбас, енді қайтып тұмас автопортретін жасады. Оның творчествосының бүкіл ұзына бойынан «қалың елі — қазағының», адам баласының ұлы болған, еңбегі еш кетпесін сезіп, халқына ұстаздық қылудан жалықпаған ойшыл да сыршыл акын-адамның нұрлы тұлғасы тапылып отырады.

Абайдың уақыт туралы және өзі туралы, акынның қоғамдағы орны туралы өлеңдерінен бұл қасиет әсіресе

мол сөзіледі. Осы тұста ол қай халықтың қандай ұлы ақынымен де үзенгі жарыстырып, деңгейлесе алады. Оның сондай өлеңдерінің ішіндегі ең кереметтілері — «Әлсе өлер табиғат, адам өлмес» пен «Өлсем, орным — қара жер сыз болмай ма?»

Алғашқы өлеңде акын табиғатты «менікі», яғни тән мағынасында, ал адамды «мен», яғни ақыл-ой, рух бейнесінде жырлайды. Өлеңнің екінші шумағында акын философиялық тұрғыда алып, осылайша тұспалдап отырған ойын, басқаша атағанда «менін» ашық айтады:

{ Көп адам дүниеге бой алдырған,
Бой алдырып, аяғын көп шалдырған.
Өлді деуге сия ма — ойландаршы —
Өлмейтұғын артына сөз қалдырған?

Егер бұл өлеңінде акын өлместік тақырыбын шартты түрде алынған жинақты тұлғаны бейнелеу ретінде жырласа, ал екінші өлеңінде тікелей өз басына, өз творчествосының болашақ тағдырына байланыстыра отырып шешеді. Сондықтанда, 1898 жылы жазылғандығына қарамастан, бұл өлеңді акынның өз творчестволық жолын қорытындыларан туындысы, жүрек-жарды сыры деп атауға өте қолайлы.

{ Жүрегінің түбіне терең бойла,
Мен — бір жұмбақ адаммын, оны да ойла.
Соқтықпалы, соқпақсыз жерде өстім,
Мыңмен жалғыз алыстым — кінә қойма! —

деп тебіренді Абай. Бұл оның болашақ ұрпаққа арнап тіл қатуы, сондай-ақ өз жанының да бар түкпірі, сыры мен шыны еді. Мұнда данышпан акын келер ұрпақтың, туар дәуреннің бейнесін ғажайып шебер һәм көреген суреткерге тән елес-емеурінмен сездіреді. Бұраланы көп бұлдыр өміріне ой көзімен үнілген акын «соқтықпалы, соқпақсыз жерде өскенін, мыңмен жалғыз алысқанын», ерте оянса да, етекбастыны көп көріп, дегеніне жете алмағанын келешек оқушысына әдейі, саналы түрде сыр етіп шертетіндей. Өйткені, акынның аңғартуынша, ол — жүрек түбіне, жан түкпіріне терең бойлай алатын, парасатты, ойлы және әделетті адам және оның өмір кешер уақыты да соқтықпалы, сандалмасы жоқ еркін де кең дәурен, өзгеше бір заман болмаққа керек. Өз кезі үшін жұмбақ болған Абай сол бола-

шақ заманның, келер буынның өзін терең танып, дән разы пейілмен қабыл алатындығына кәміл сенген тәрізді. Өлім жайын күңірене толғаумен басталған өлеңінің соңында ақынның өлместік, өшпестік сарынына ауысуының да сыры осында. Ұлы ақынның болашаққа деген осындай нұрлы сенімі, жарқын үміті біздің дәуірімізде жүзеге асты.

Ақынның тұңғыш жинағында оның шығармалары «Халық туралы», «Өлең туралы», «Ғашықтық туралы» және басқа да бірнеше (небәрі — 17) бөлімге жіктеліп жарияланған еді. Әрине, байсалды ғылыми принципке негізделмегенмен, бұл ақын творчествосын тақырыптық қамтуы жағынан талдап-жіктеудегі тұңғыш талпыныс болғандығы да хақ. Абай шығармалары бұдан кейін Қазанда (1921), Ташкентте (1922) және Алматыда талай рет басылып шықты. Сонғы жылдары ақын шығармаларының академиялық басылымдары бірнеше рет жүзеге асырылды. Сөйтіп, совет дәуірінде ақын творчествосы өзінің лайықты мұрагерін тапты. Ол жайында көптеген ғылыми зерттеулер жасалды және даңқы бүкіл әлемге таралған ұлан-ғайыр эпопея жазылды.

Өз дәуірінің, өз халқының нағыз ұлы, шын мәнісіндегі ұлттық ақыны болған кемеңгер Абай сонымен бірге бүкіл адамбаласына тұтастай хас мәңгілік тақырыптарды мәңгі өшпестік дәрежеге көтеріп жырлай алды. Сондықтан да оның ғажайып мұрасы болашақ сан ықлым буындармен де бірге мәңгі-бақи жасай бермек.

ЖАЗУШЫ ЖӘНЕ ГЕРОИ

Творчествосында өзі өмір кешкен дәуірдің шындығын бейнелеу, оның алдыңғы қатарлы идеяларын көркем образдар арқылы білдіру — суреткер үшін аса қажетті әрі бағалы қасиет. Осы ерекшелікті басқа көрнекті жазушыларымызбен бірге Ғабиден Мұстафиннің творчествосынан да айқын көреміз. Оның таңдаулы шығармаларының барлығы да совет шындығын суреттеуге, заманымыздың әр кезеңдегі маңызды оқиғаларын бейнелеуге арналған. Жазушының жұртшылық жылы қабылдаған және халыққа кеңінен танылған «Шығанақ», «Миллионер», «Қарағанды» романдары бұған айқын айғақ болып табылады.

Әдебиетімізге жиырмасыншы жылдардың аяқ кезінде келгенмен, Ғ. Мұстафиннің жазушылық қызметінің кеңінен өрістеп, творчестволық мол өнімдер берген кезеңі — соңғы жиырма жылдың шамасы. Оның жоғарыда аталған шығармалары — дәл осы кезеңнің жемістері. Жазушы өзінің бұл романдарында жаңа дүниені жасаушылардың қажырлы еңбегін бейнеледі, замандастарымыздың кесек те айқын образдарын жасауға ұмтылды. Аталған шығармалар жазушының өз творчествосының елеулі табыстары болумен қатар жалпы әдебиетіміз үшін де ерекше қызмет атқарды, яғни әдебиетіміздің бетін бүгінгі күнге қарай батыл бұрып, онда совет адамдарының жасампаздық еңбегі мен жаңа тұрпатын бейнелеу тақырыбын көтеру ісінде Ғ. Мұстафин өзінің шығармалары арқылы елеулі еңбек сіңірді.

Жазушы Ғабит Мүсірепов қазақ совет жазушыларының үшінші съезінде жасаған қосымша баяндамасында Ғ. Мұстафин творчествосының осындай ерекше сипаттары мен маңыздылығын атап көрсете келіп былай деді: «Екі съездің арасындағы он бес жылдың ішінде үш роман берген Ғабиден Мұстафин осы дәуірдің ішінде қазақ совет прозасынан өзінің тиісті орнын алумен бірге әдебиетіміздің бетін бүгінгі өмірімізге бұруымызға да үлкен жетекші болды. Бұл оның творчестволық биографиясындағы елеулі ерекшелігі. Басқа жаққа ауытқымай, бүгінгі совет шындығын жырлау екінің бірінде кездесе де бермейді. Оның үстіне жазушының іздену талап-

тары тұтас бір бағытта болғандықтан табысы да олқы емес. Ғабиден типтерді де, типтік жағдайларды да өзіміздің совет шындығынан алып өсіп келді»¹.

Жазушының бұл өсу жолы біркелкі болған жоқ. Творчестволық өсу, іздену бағытында ол талай қиыншылықтарға кездесіп, жалаң натурализм мен арзан қарадүрсінділікке бой алдырған шақтары да болды. Бірақ Ғ. Мұстафин бұл «өсу жолындағы ауруға» шалдығып қалмай, кездескен қиындықтарды батыл түрде жеңуге, өзінің жазушылық шеберлігін шынықтырып, жетілдіре беруге әрдайым ұмтылып отырды. Оның осы ізденулері мен ұмтылулары босқа кеткен жоқ. Ол бір кітаптан екінші кітапқа ауысқан сайын қаламы ұшталып, буыны бекіп, биіктей түсіп келеді. Жазушының сол шығармаларына, оның осы өсіп, биіктей түсіп келе жатқан творчестволық жолына көз жіберіп қаралық.

Өзінің ең тұңғыш көлемді шығармасы — «Өмір не өлім» романын Ғ. Мұстафин отызыншы жылдардың аяқ кезінде жазды. Жазушы бұл романында сол кездегі қазақ совет прозасында әлі кеңінен көтерілмеген ең бір қиын да игі тақырыпты — өндіріс тақырыбын қозғайды. Романда суреттелетін оқиғалардың негізгі өрбитін орны — Қарағанды. Автор патшалық Россия тұсында ағылшын капиталистерінің қолында болған, құр сүлдері ғана бар Қарағанды көмір өндірісі совет өкіметі жылдарында бұл мешеуліктен құтылып, одақтағы аса ірі өндіріс орындарының біріне айналғанын реалистік түрде суреттеуге ұмтылады.

Жазушы Қарағанды көмір өндірісін жасаудағы қиындықтарды жуып-шаймайды, қайта оларды ешбір бүркемелеусіз шынайы түрде суреттейді. Совет адамдарының тегеурінді еңбегі арқылы өзгергенге дейінгі Қарағандының сиқын, мүшкіл халін мына бір көріністерден айқын аңғаруға болады:

«Сусыз, бұтасыз сұлап жатқан құбажонның жотасында тырнаның мойнындай сорайып, бұзылған заводтың жалғыз тұрбасы тұр. Сауысқан басына қонып алып, шықылық-шықылық етеді. Тұрбаның бауырында сыры кетіп, сыны ғана қалған жалғыз кірпіш үй, қожалақ-қожалақ бес-алты тас барақ бар. Бұлармен аралас төбе-төбе,

¹ «Әдебиет және искусство» журналы, № 11, 1954 ж. 64-бет.

жота-жота болып жатқан көмір қордалары, жер болуға айналған крест, айшықты адам молалары...»

Міне, моладай жансыз, безеріп, құлазып жатқан осынау меніңсіз далада еңбек адамдарының қажырлы еңбегі мен қажымас қуаты арқылы өндіріс алыбы салынады, жаңа дүние орнатылады. Еңбектің осындай зор майданына араласқан адамдардың тағдыры мен тартысы «Өмір не өлім» романында белгілі дәрежеде тартымды да қызғылықты бейнеленген.

Дегенмен, бұл романда елеулі-елеулі кемшіліктер болды. Жазушының творчестволық тәжірибесінің аздығынан, оның өмірлік мол материалдан көркемдік жинақтау жасай алмауынан «Өмір не өлім» романының көптеген кейіпкерлері шынайы образдар дәрежесіне көтерілмеді, онда қозғалған тақырыптар жеткілікті түрде көркем де терең шешілмеді. Сондықтан да кейін, яғни творчестволық жағынан есейіп, тәжірибесі молайған шақта жазушы Қарағанды тақырыбына қайта оралды. Осының нәтижесінде «Қарағанды» романы туды. Әрине, «Қарағанды» романы — «Өмір не өлімнің» жалғасы немесе өңделген варианты емес. Жазушы Қарағанды жайында соны да дербес жаңа шығарма жазды. Бірақ бұл ретте ол «Өмір не өлімнің» материалдарын және оны жазу үстіндегі бұрынғы тәжірибесін екшей отырып, әсіре, тереңдете отырып мол пайдаланды. Сондықтан да біз кейін кезегі келгенде «Қарағанды» романына кеңінен тоқталамыз, ал «Өмір не өлім» романына терең де толық талдау жасап жатпай-ақ, жоғарыда айтылғандармен ғана шектелеміз.

* * *

Ғ. Мұстафиннің творчествосындағы ең бір бағалы да ерекше қасиет — оның бүгінгі күннің оқиғаларын, өз өміріміздің шындығын бейнелесуге басқалардан гөрі бұрын барып, батыл қадамдар жасайтындығы екендігін жоғарыда атап айтқан болатынбыз. Жазушының «Шығанақ» романы да оның творчестволық осы ерекшелігін айқын танытты.

Социалистік реализм әдебиетінің негізін салған кемеңгер Горький совет әдебиетінің негізгі геройы — еңбекті творчество дәрежесіне дейін көтерген жаңа адам екенін

кезінде атап көрсеткен болатын Шынында да, совет халқының творчестволық еңбегі әдебиетіміздің ең басты, қозғаушы тақырыбына, ал еңбек адамы әдебиетіміздің ең негізгі және сүйікті героюна айналды.

Ғ. Мұстафиннің «Шығанақ» романы да осы игі тақырыпқа яғни еңбек адамын суреттеуге, оның гажайып істерін мадақтауға арналған. Жазушы бұл тақырыпты тары егісінің үздік маманы, аты бүкіл дүние жүзіне мәлім Шығанақ Берсиевтің өмірі мен еңбегін шынайы түрде суреттеу арқылы нақтылы шешеді.

Романда суреттелетін оқиғалардың қамтитын кезеңі үлкен. Яғни, колхоздасудың алғашқы жылдарындағы оқиғаларды суреттеуден басталған шығарма Ұлы Отан соғысы кезіндегі колхоз өмірінің алуан түрлі көріністерін бейнелеумен аяқталады.

Роман үш бөлімнен тұрады. Оның алғашқы бөлімінде суреттелетін оқиғалардан біз колхоздасу кезеңінің көптеген көріністерімен танысамыз. Колхоздасу жылдары біздің еліміздің тарихындағы аса бір елеулі, ұлы кезең болып саналады. Коммунистік партияның даналық саясаты мен басшылығы арқасында бұл жылдарда бұрын жоқшылық көріп, тұйық та бытыранды өмір кешіп келген миллиондаған шаруалар дамудың жаңа жолына, социалистік шаруашылық жолына түсті. Бірақ бұл онай, жеп-жеңіл бола қалған жоқ. Кейбіреулер бұл жолға алғашқыда жаза басып, көп қиындықтарды бастан кешіріп барып келді. Роман геройларының бірі Олжабек те осындай бұралаң жол өтеді.

Роман осы Олжабектің жайын суреттеуден басталады. Негізінен алғанда, совет өкіметін жақтайтып, бірақ колхоздасу сияқты тарихи бетбұрыстың маңызы мен мақсатын дұрыс түсінбейтін Олжабек колхоздан қашып ауз көшеді. «Аспан асты кең», колхозсыз ел табылады деген тұлдыр үмітпен ол талай жерлерді аралайды. Бірақ, колхозға ұйымдаспай отырған елді Олжабек, әрине, таба алмайды. Сөйтіп жүріп ол бақытсыздыққа ұшырайды. Иесіз тауды мекендеген ұрылар оны соққыға жығып, мал-мүлкін талап әкетеді. Оның әйелі Жамал мен баласы Сағынтай да жаудың қолында кетеді. Сөйтіп коллективтен бойын аулақ салған Олжабек айдалада қаңғырып жалғыз қалады. Талықсып жатқан оны Шығанақ тауып алады. Екеуі танысып достасады. Шығанақ Олжабекті өз колхозына әкеледі. Мұнда Олжабек

жаңа өмірге бет бұрған адамдардың ауқаттана бастаған тұрмысын, шаруашылығын көреді. Ол колхоз туралы бұрынғы теріс түсініктерінен арылады. Жазушы кейіпкерінің тағдыры мен ой-сезіміндегі осындай өзгерістерді өзара салыстыра суреттеу арқылы колхозды өмірдің, коллективтік шаруашылықтың артықшылығын ұтымды түрде ашып тастайды.

Шығанақтың тары өнімін арттыру жолындағы қажырлы күресінде Олжабек оған сенімді көмекші болады. Ойыл өзенінің суын пайдалану арқылы құлазып жатқан далаға жан кіргізу, тары егісінен мол өнім алу сол өлкені мекендеген халықтың ежелгі арманы болатын. Халықтың осы игі арманының жаңа дәуірдегі жокшысы — Шығанақ. Бірақ колхоз құрылысының ең алғашқы жылдарында ол бұл арманын орындау жолында аршынды әрекеттер жасай алмайды. Өйткені, ол көптеген қиындықтарға кездеседі. Бұл қиындықтар, бір жағынан, сараң табиғаттың қатыкез жағдайларына және оған қарсы қолданылатын техниканың тапшылығына, екінші жақтан, колхоз құрылысы жауларының қастандық әрекеттеріне байланысты болып келеді.

Шығанақ және оның серіктері бұған мойымайды. Олар жоғарыда аталған қиындықтардың барлығын да батыл әрі табысты түрде жеңе алады. Өйткені олар партиялық басшылыққа және қалың көпшіліктің қолдауына сүйенеді. Міне, романның алғашқы бөлімінен колхозды ауылда туындап дамып жатқан осындай алуан түрлі өзгерістер мен күрделі жаналықтарды және ондағы Шығанақ сияқты еңбек озаттарының тас мінез табиғатты бағындыру жолындағы тегеурінді де қажырлы күреске қажетті дайындықтар жасап жатқанын көреміз.

Романның екінші бөлімі «Рекорд алдында» және «Алғашқы рекорд» атты тараулардан құралған. Бұл тарауларда суреттелетін оқиғалар жасампаздық еңбектің тамаша поэзиясы мен романтикасына толы. Алғашқы тарауда Шығанақтың және оның серіктерінің рекордтық өнім алу жолында алдын-ала еткен еңбегі, алуан түрлі іс-әрекеттері баяндалады.

Жер жайын, топырақ бабын жақсы білетін Шығанақ егістік участоктың орнын өзгертеді. Бұл, әрине, оп-оңай бола салмайды. Осыған байланысты қосымша көп еңбек сіңіруге тура келеді. Жаңа егістік участок пен Ойыл өзенінің арасында үлкен арық қазылады. Сол арқылы

су барып, қуаң далаға жан бітіреді. Егістікке су шашатын машина да сол жерге барып орнайды. Бұл тарауда жазушы екі нәрсені баса суреттеуге ұмтылады. Олар — өзінің мол тәжірибесіне сүйенген, ой көзі көреген Шығанақтың көпшілікті шебер ұйымдастырып, жаңалыққа қарай бастай білуі және қалың көпшіліктің жемісті де қажырлы еңбегі. Қолхоз игілігіне қызмет ету, қоғамдық дәулетті молайта беру мақсатына қалтқысыз берілген адамдардың жанқиярлық еңбегін жазушы әсіресе мейірлене суреттейді. Социалистік жарыс — еңбек өнімділігін арттырудың шешуші шарттарының бірі екендігі де бұл тарауда образды түрде ұтымды ашылған. Жазушы еңбекті тек жасампаздық әрекет ретінде ғана емес, сонымен қатар адамды тәрбиелейтін мектеп ретінде де бейнелеуге ұмтылады.

«Алғашқы рекорд» аталатын тарау Шығанақтың алғашқы рекордтық өнім алуын және осындай тамаша нәтижеге жету (ол тары егісінің әрбір гектарынан жүз жнырма бес центнерден өнім жинайды) жолын суреттеуге арналған. Шығанақтың диханшылық мол тәжірибесі және оның агротехникалық әдістермен шебер де табысты ұштасқаны бұл тарауда шынайы суреттелген. Сөйтіп, автор Шығанақтың рекордтық нәтижеге жетуін — сараң табиғаттың әшейін бір жомарттығы ретінде емес, қайта ғылым, тәжірибе және еңбек ұласа келіп, сол табиғаттан күшпен еріксіз алынған жеміс ретінде, адам әрекетінің жемісі ретінде бейнелейді. Сондықтан да оқушы автор суреттеген жәйттер мен оқиғаларға қалтқысыз сеніп отырады.

Ал романның соңғы, үшінші бөлімінде Шығанақтың және оның серіктерінің Ұлы Отан соғысының қаһарлы жылдарындағы қажырлы еңбегі суреттеледі. Қиындықтар мен қатерге, еңбек пен жеңіске толы сол бір жылдар әркімге де ауыр сын болды. Егер Төкен сияқты қастық ниеттегі адамдар жауыздық әрекеттерін өршітуге тырысса, ал Шығанақ сияқты еңбек адамдары өздерінің патриоттық қасиеттерін екіталай шақта әсіресе айқын әрі мол танытады. Жазушы алуан түрлі осы күштерді бір-біріне қарсы қоя, салыстыра отырып суреттейді.

Романдағы ең негізгі, басты герой — Шығанақ. Бұл — тек жазушының өз творчествосындағы ғана емес, сонымен қатар бүкіл қазақ совет әдебиетіндегі еңбек адамдарының ең бір жарқын, шынайы образдарының бірі.

Шығанақ образының көркемдік және әсер етушілік күші оның реалистік, жинақтаушылық қуатында.

Оқушы Шығанақпен романның ең алғашқы тарауларынан бастап-ақ танысады. Шығармада суреттелетін оқиғалар өрбуінің алғашқы кезеңінде ол романның басқа кейіпкерлерінен онша дараланып көрінбейді. Бұл тұста Шығанақ еңбек майданында да асып кеткен көрсеткіштер жасамайды. Бірақ Шығанақ характерінің кейбір ерекше белгілері, яғни еңбексүйгіштік және алған бағыттан, негізгі максаттан қайтпаушылық — оқушыға салған беттен-ақ айқын да әсерлі танылады. Жазушы романның өн бойына Шығанақтың осы қасиеттерін тереңдете отырып бейнелейді және оның арман-тілектерін іске асу, орындалу үстінде көрсетеді.

Ойыл өзенінің суын пайдалану, шөлейт даланы игеру, сол арқылы тарыдан мол өнім алу жайындағы халықтың ғасырлар бойғы арманы Шығанақтың бойында тоғысқан. Бірақ ол халық арманын арқалаушы ғана емес, сонымен қатар жүзеге асырушы да. Өйткені жана дәуір, жаңа адамдар Шығанаққа оның бұл игі ойының жүзеге асуына кең мүмкіндік береді. Осы бір оптимистік ой Шығанақтың жүрегіне әбден ұялаған. Шығанақтың тарыдан мол өнім алуға шексіз сенетіндігін автор оның өз сөздері арқылы ұтымды аңдатады. «Әкем Берсе сақал, шашы ағарғанша құды. Өзім он жасымнан бері қуып келемін. Құйрығын ғана шалдырады. Талай отырғызып кеткен уақыттары да болды. Онымен адастырған жоқ. Қайда барар дейсің бұл шіркін. Осы сапарда бір жүйрік мініп қайтсам, тары құтылмас менен», — дейді Шығанақ. Бұл — оның өз күші мен қол жететін мүмкіндіктерді салмақтап, барлап барып айтқан сөздері.

Шығанақтың жүйрік деп отырғаны — жер суландыратын машина. Осындай қуатты, «жүйрік» машинамен қаруланса, арманына тез жететінін Шығанақ жақсы түсінеді. Ойыл жері құнарсыз, оны машина арқылы суландырғанмен, ештеңе өнбейді дейтін мешеу көзқарастарға қарсы шыға келіп, ол былай дейді:

«... Әкемнің әкесі егінді кетпенмен салған. Әкем Берсе ағаш соқамен салды. Өзім темір соқаға түйе шығырды қостым. Осының бәрі тарыны көп салып, көп алудың алға басқан амалы еді. Сонда кетпеннен ағаш соқа, ағаш соқадан темір соқа көп бермеді ме? Бұл дұрыс бол-

са, енді машинаның көп беретіндігіне дауласу күлкі емес пе?».

Сөйтіп, Шығанақ техниканы жоғары бағалайды, оны еңбек өнімділігін арттырудың ең қажетті шарттарының бірі деп біледі. Бірақ ол бәрін де техника шешеді деген сыңаржак ойдан аулақ. Шығанақтың түсінігінше тарыдан мол өнім алудағы ең шешуші күш — адам және соның еңбегі мен білімі. «Машина, машина дегенмен, ол бәрін бітірмейді,— дейді ол,— машина тек су тарту үшін керек. Сусыз егін жоқ. Бірақ, су да өздігінен жарылқамайды. Тарының дәні қандай көп болса, бабы да сондай көп. Бабын тапсаң, бермегенді береді. Сонда «жоғары көңілге қысқа қол да жетеді».

Шығанақта халыққа тән оптимистік үміт қана емес, сонымен қатар қажымас қайрат, жалын атқан жігер де бар. Сондықтан да ол өзінің алға қойған мақсатын орындау жолындағы күресте байсалды да сенімді. Оның жоспарының іске асуына көп адамдар кедергі жасайды. Біреулер батыл ойдың, үлкен мақсаттың тереңдігі мен күрделілігінен жасқанса, ал Төкен сияқты арам ниетті адамдар көрінеу қастандық әрекеттер жасайды, халықты алдауға, іріткі жасауға тырысады.

«— Әлі күнге берген жоқ, не керек соқыр үміт! — дейді Төкен,— машина жұмысы өнімді екенін әркім біледі. Жері келіскен күннің өзінде оған кадр, мұнай, мастерская... керек. Мұның бірі бар ма сенде? Қаңғырған далада машинаның соқа басы сояудай боп немді бітірмек? Құр далбаса. Бұл — малдың даласы — құм...»

Төкеннің бұл екіұдай, арам ойлы пікіріне Шығанақ халықтың жасампаздық еңбегі мен жарқын үмітін, өзінің тәжірибесін карама-карсы қояды. «Қалауын тапса, қар жанады». Бабын тапса, құм да жанады,— деді ол,— Осы қазақ жерінің бетін көріп, астын әлі көрмей жүр. «Төкен, Төкен» дегенге лепіре бермей, артыңа, мына бізге де бір қарашы! Ел аузындағы аруана алты атаға барғанда туады. Еңкейген кәрі — еңбектеген жасты ержетеді деп қуанады. Машина жемісінің пісуі осыдан ұзақ боп па? Әйтпесе, жақсылық тіпті жақын көрінеді маған. «Ақыл ойдан артық емес», көре келе осы отырғанның бәрі машинаның құлағында ойнайды. Бір қаупін май болса, анау тамның түбін тартып қалшы, май атқып кетеді. Бәрін айт та бірін айт, тәуекелді айт».

Бұл — жақсы ниет пен игі арманнан ғана туған, жалаң

да жалатай сөздер емес. Өзінің бүкіл іс-әрекеті, қажырлы да жемісті еңбегі арқылы Шығанақ тәуекелмен айтылған осы сөздерін орындайды, өз ойының дұрыстығын дәлелдеп шығады.

Жазушы Шығанақтың тары егісінен рекордтық өнім алуын, оның осындай тамаша нәтижеге жету жолдарын панымды әрі жан-жақты суреттеуге ұмтылады. Шығанақ — халықтың арманы мен үмітін ғана емес, сонымен қатар оның диханшылық даналығы мен тәжірибесін де бойына мол жинаған адам. Ол Ойыл төңірегіннің жер қыртысын, өзгешеліктерін басқалардан жақсы таниды, топырақтың бабын келтіре біледі, тары тұқымын шеберлікпен сұрыптап жинап алады. Шығанақ ауа райының өзгерістері тары егісіне қаншалықты жағымды және зиянды әсер ететінін де барлай біледі. «Қаспийден соғатын бір жел бар, тұқымды сол өткен соң себу пайдалы», — деген тұжырым жасайды. Шығанақтың еңбек тәжірибесімен, диханшылық лабораториясымен таныстыратын мұндай эпизодтар романда мол ұшырасады.

Шығанақтың рекордтық өнімге жетуінің басты сырларының бірі — оның ежелгі диханшылық тәсілдерді, өзінің тәжірибесін ғылым жаңалықтарымен ұштастыра білуінде. Сонымен бірге ол ғылым табиғаттың құпия сырларының барлығын да ашып үлгерді, оның қағидалары мүлдем өзгермей қалуға керек деген түсінікке де қарсы. Шығанақ пен жас агроном Сергейдің арасындағы мына бір диалогты мысалға алып қаралық:

«— Жырту мен себудің арасындағы мерзім сақтала ма? — Бірде сақталады. Бірде оған қарамаймыз, — деді Шығанақ. Сергей бұған да бір қынжылып қойды.

— Агротехниканы ескермегеніңіз бе тіпті?

— Соның өзі топырақтың, дәннің бабын табу емес пе? Сіздер кейде кітапты құшақтап қатып қаласыздар. Күн кітаптың айтқанымен жүре бермейді. Кейде амал, кейде жаңбыр, суық. Мұндай райда сепкенмен, дән босқа бұғып жатады. Мен күн қызуы жерге өте бастағанда себемін. Сонда іле көтеріледі».

Тағы бірде Шығанақ осы ойын тұжырымдай келіп, Сергейге былай дейді: «— Сен бала ылғи менің осал жағымнан шыға бердің. Осы ілім дегенің кітаптың бетінде ғана ма, жоқ мына жер бетінде де бірдеңе қалды ма?» Бұл — әрине, тегін айтыла салған сөздер емес. Рас, Шығанақ ғылымға, оның әдістеріне қарсы емес. Жер өңдеу-

де, тарыны күтіп баптауда ол агротехникалық тәсілдерді мол қолданады. Бірақ ол барды мәз тұтып, қол қусырып отырудан аулақ. Ізденгіш, талаптанғыш Шығанақ тәжірибе мен ғылым әдістерін ұштастыра отырып, әлі кітап бетіне түспеген, бірақ жер бетінде жасырынып жатқан гажайып сырларды ашады. Жазушы Шығанақ еңбегінің осы саласын нанымды да мол суреттеген. Романның бағалы қасиеттерінің бірі де осында.

Романда Шығанақтың өмірі мен іс-әрекеттері кеңінен бейнеленген. Бұлай болуы, әрине, тек заңды ғана емес, қажет те еді. Автор Шығанақтың еңбегі, іс-әрекеттерімен бірге оның көңіл күйлерін, жан толқындарын да терең суреттеуге ұмтылады. Шығанақ семьялық өмірде де, басқа адамдармен қарым-қатнастарында да өзінің ұнамды қасиеттерін мол танытады.

Шығанақ—мейрімді әке ғана емес, сонымен қатар жақсы тәрбиеші де. «Баланы тым есіртіп, тым мәпелеу де пайдалы емес. Ол өскенде не данғой, не әйеншек болып шығады. Оған дейін өзінді де мазалап бағар. Нәзік баланың тәжірибесі де нәзік»,— дейді ол. Өзінің балаларын тәрбиелеуде Шығанақ осы принципті берік ұстанады. Шығанақтың адамгершілік мол сезімдері оның Олжабекке жасаған қамқорлығынан, Амантай мен Жанботаны жемісті еңбекке жалықпай үйретіп баулуынан да анық байқалады. Жазушы Шығанақтың Отанға шексіз берілгендігін, халық игілігі жолында аянбай қызмет ететін патриоттығын да шынайы суреттейді. Шығанақтың патриотизмі оның Отан соғысы жылдарындағы іс-әрекеттерінен әсіресе айқын танылады. Ол еңбек қуанышымен, майдан жеңісімен қоса тыныстайтындай. Майдан хабарына үнемі құлақ түріп жүретін Шығанақ ұрыс даласындағы кейбір сәтсіздіктерге жаны ауыра, қабырғасы қайыса қайғырса, совет жауынгерлерінің тамаша жеңістеріне шын жүректен қуанады.

Шығанақ майдан қажетінен, жеңіс мүддесінен қолда барын, бойындағы бар қуатын аямайды. Ол, бір жағынан, өзінің қорыған майданға көп көмек жөнелтсе, екінші жағынан, көпшілікті еселеген еңбекке жұмылдырады, ұйымдастырушылық қызмет атқарады. Өйткені, ол әрбір дән жауға қарсы жұмсалар оқ екенін саналы түрде түсінеді. Жасының ұлғайғандығына әрі ауру мендеткеніне қарамастан, Шығанақ ел игілігі үшін еңбек етуден танбайды. Ол тары егісінің өнімін бұрынғыдан да молай-

тып, дүниежүзілік жана рекордтар жасайды. Атақты тарышыға академик Лысенко мынадай хат жазады: «Аса құрметті Берснев Шығанақ жолдасқа! Сіздің телеграммаңызды алғанда нанар-нанбасымды білмей көп сенделдім. Ің білдім деген ғалымдар гектарынан 200 центнерден артық астық алу мүмкін емес дегенге бекіген еді. Бұл жай айтылмаған. Өсімдіктер күн қуатын бойына қанша сіңіре алатындығын есептеп барып айтылған болатын. Сіз осы есептен асып түсіп, егін шығымының мөлшері адамның өз қолында екенін дәлелдеп бердіңіз...» Міне, бұл сөздерде Шығанақ еңбегіне берілген әділ де тамаша баға бар. Совет адамдарының жасампаздық еңбегінің қуатын Шығанақ бүкіл әлемге танытты. Оның ісі — социалистік ауылшаруашылығы қызметкерлері үшін үлкен өнеге. Шығанақтың өмірдегі осы биік тұлғасы романда да сол шынайы күйінде бейнеленген. Жазушы Шығанаққа жасанды қасиеттер қоспайды, қайта оны шындықта болған қалпында, реалистік түрде суреттейді. Романнан Шығанақтың жеке өз басына, тіршілік әрекеттеріне байланысты көп жәйттерді көреміз. Бірақ бұған қарап романдағы Шығанақ — өмірде болған Шығанақтың жалаң көшірмесі, жадағай сұлдері ғана деген жаңсақ қортынды шығаруға, әрине, болмайды. Жазушы Шығанақ образын жасай отырып, өмірлік материалдан көркемдік шындық дәрежесіне көтерілді. Сөйтіп, ол колхоз құрылысы, жана дәуір тудырған еңбек адамының жинақты, типтік образын жасады. Романда Шығанақ жалғыз, жеке-дара алынбайды. Ол өзінің айналасымен, жолын қуған шәкірттерімен бірге, солардың қалың ортасында көрінеді. Романның Шығанақтан кейінгі кейіпкерлерінің ішінде басқалардан гөрі молырақ суреттелетіні — Олжабек. Автор Олжабек образын бар шындығымен, күрделі күйінде бейнелейді. Роман осы Олжабектің колхоздан қашып, көшіп жүруін суреттеуден басталатынын жоғарыда айтқан болатынбыз. Бұл оқиға, бір жағынан, колхоздасудың алғашқы жылдарындағы кейбір шындық жайларды образды түрде ашады, көптеген жеке шаруалардың коллективтік шаруашылық жолына түсуі әрқилы, әрі қиын болғанын аңдатады. Жазушы Олжабектің мұндай оспадар әрекетінің себептерін оның жекешілдік көзқарасынан, ұсақ шаруаға тән психологиясынан іздейді. Бұл өмір шындығына жана-

сымды да. Расымда да, Олжабек совет өкіметіне, оның әділ саясатына қарсы емес. «— Бұның тәртібіндей тәртіп бар ма шіркін! — дейді ол совет өкіметі жайында.— Ұрыға, байға қандай қас. Момынды сүйеді-ақ қой. Жәрдемін бір жағынан беріп жатады. Обалы не, «қара бұқараның табанына қадалған тікен маңдайыма қадал», — деп отырды... Жайсыз тигені — осы бір колхозы...» Міне, Олжабектің ой-өрісі мен түсінігі де және ондағы қайшылықтар да оның осы бір сөздерінен анық байқалады. Ол колхозға енсем, қолымдағы азын-аулақ мал-мүлкімнен айрылып қаламын деп қорқады. Сөйтіп, шағын дәулетін «қызғыштай қорғап», қалың көпшіліктен даралануы, бойын аулақ салуы — Олжабектің жекешілдік психологиясына, болмысына сыйымды. Оның бұл әрекеті романда көркемдік жағынан ақталған да.

Олжабек — еңбек адамы. Ол адал көңілмен, шын пейілмен еңбек етуді ұнатады. Көшіп бара жатып, колхоздың жыртылған егістік даласын, ондағы адамдардың еңбегін көргенде Олжабек қасындағы Жамалға былай дейді: «Шіркін-ай, жаңағы бір егінді ұқсатып-ақ жыртқан екен! Байқадың ба!.. Егер жұрттың бәрі жаңағы шалдай пейілмен істесе, бұл колхоз дүрілдеп-ақ кетер еді...» Әрине, Олжабек сол «қыңыр» күйінде кете бермейді. Ол колхозға енеді. Ал Олжабектің жоғарыда аталған қасиеті, яғни еңбексүйгіштігі оның колхозға енгеннен кейінгі өмірі мен іс-әрекеттерінен әсіресе анық байқалады. Колхоз құрылысының артықшылығын, коллективтің қуаттылығын саналы түрде түсінетін дәрежеге жеткеннен кейін Олжабек сол коллективтегі алдыңғы қатарлы адамдардың біріне айналады, еңбек майданында тамаша табыстарға жетеді.

Шығанақ пен Олжабектің арасындағы еңбектің ортақ мүдделері тудырған достық та романда әсерлі суреттелген. Шығанақ өзінің игі бастамалары мен рекордтық өнім алу жолындағы іс-әрекеттерінде Олжабектен көп жәрдем алады.

Олжабектің семьялық өмірі, оның Жамалға деген сүйіспеншілік сезімдері де шығармада қызғылықты бейнеленген. Ол бақытсыздыққа ұшырағанда жоғалтқан Жамалынан күдер үзбейді, оған деген ыстық та адал сезімдерін суытпайды. Ақыр аяғында ол сүйіктісі Жамалмен қайта табысады.

Романда өзінің характерімен де, іс-әрекеттерімен де ен

бір дараланып бейнеленген кейіпкерлердің бірі де — осы Олжабек. Өз ісіне қалтқысыз, адал берілген Олжабектің жан тазалығын, ұяндығы мен аңқаулығын автор мырпамен суреттейді. Жазушының юмористік шеберлігі де оның осы Олжабек образын жасаудағы суреттеу тәсілдері мен ерекшеліктерінен анық байқалды.

Қорыта келгенде, Олжабек образы арқылы да автор еңбек адамының өзіндік ерекшелігі мен даралығы мол, жарқын бейнесін жасай алды.

Жазушы Шығанақтың еңбектегі тамаша нәтижелерін кеңінен суреттеумен бірге оның ісін — қанатын кең жайып, молая түсетін құбылыс ретінде бейнелейді. Шығанақтың өзі баулып өсірген шәкірттері Амантай мен Жанботаның және басқалардың іс-әрекеттері бұған айқын дәлел. Өзара ұқсас, бір алуандас бұл екі образ көп реттерде бірін-бірі толықтыра түседі.

Амантай мен Жанботаның образдары арқылы жазушы қандай қиындықтар кездесе де жасымай, жайнай түсетін, тап басып, тіліп айтатын өткір тілді еңбексүйгіш адамдардың бейнесін берген. Амантай мен Жанбота Шығанақты еңбекте ғана қолдап қоймайды, сонымен қатар оның жаңалық бастамаларын да дер кезінде қуаттап отырады. Сөйтіп, автор Шығанақтың ой-арманы тек оның өзінің ғана тілегі емес, сонымен қатар бүкіл халықтың да көкейкесті мұраты болғанын, сондықтан да Шығанақ қалың көпшіліктің ішінен қолдау тауып отырғанын нанымды суреттейді.

Жанботаның адамгершілік мол сезімдері мен жемісті істері романның үшінші бөлімінде әсіресе ұтымды көрсетілген. Ер-азаматтардың көпшілігі майданға кетіп, Шығанақты ауру меңдеген қысылшаң шақта бар ауыртпалықты өз нығына алатын да — осы Жанбота. Бұл тұста ол өзін жігерлі, шебер ұйымдастырушы ретінде танытады. Шығанақтың жолын қуған, оның ақыл-кеңесін беккем ұстаған Жанботаның звеносы еңбек майданында тамаша көрсеткіштерге жетеді. Жанбота тек еңбексүйгіш қана емес, сонымен қатар аяулы ана, айнымас жар да. Жанботаның жан тазалығын, тұрақтылығын оның Амантайға деген сүйіспеншілік сезімдерінен айқын танимыз.

Жанбота мен Амантай образдарының осындай бағалы жақтарын атаумен бірге осы кейіпкерлердің бейнелерін жасаудағы автордың бір кемшілігі жайында да айтпас-

қа болмайды. Жазушы Амантай мен Жанботаның тура мінезділігін, өткір эля-калжыцын баса көрсетемін деп отырып кенде шектен шығып кетеді. Мұндай реттерде бұл кейіпкерлер, әсіресе, Амантай сыпанылық сезімдерден жалаңаштанып қалады, ал жазушы натурализмге бой ұрады.

Романда ыркелкі сараң көрінгенмен, өзінің характерін бірсыпыра айқын танытып тастантын кейіпкер — колхоз председателі Шаңгерей. Ол колхоз дәулетінен ешқандай шашау шығармай, оны байыған үстіне байыта түсуді ойлайтын адам. Бірақ ол өзі басқарып отырған колхоздың шаруашылығын жан-жақты дамытудың кең өрісін тани білетін және таба алатын адам емес. Ол тек қолындағыдан айрылмауға, алдындағыдан көз жазбауға ғана тырысып қалт-құлт етеді. Бірақ осы Шаңгерей образын жасау арқылы көтерген батыл идеясын автор романда жеріне жеткізе, терең аша алмаған. Сондықтан да даму үстінде көрінуге лайық, ішкі мүмкіншіліктері мол бұл образ еркін жетілмей, орта жолда қалып қойған.

Романның жоғарыда айтылған бағалы жақтарымен қатар онда бірсыпыра елеулі кемшіліктер де бар. Бұл, ең алдымен, романның кейбір кейіпкерлерінің толыққанды образ дәрежесіне көтерілмегендігіне байланысты. Романда партия қызметкерлерінің жарқын да шынайы образы жасалмаған. Әрине, шығармада бірнеше кейіпкерлер — партия қызметкерлері бар. Олар — партияның облыстық комитетінің секретары Василий Антонов, аудандық комитетінің секретары Ермағамбет, ауылдағы парторг Кәрібай. Бірақ, гәп кейіпкерлердің санында емес, қайта олардың образдарының көркемдік қуатында, жинақтаушылық сипатында. Міне, осы тұрғыдан алып қарағанда жоғарыда аталған кейіпкерлердің бірде-бірінің образы елардың шынықтығы дәрежесіне сәйкес болып шықпаған. Бұлардың ішінде романда суреттелетін оқиғалар тікелей өрбіп жатқан жерден алыста болғанмен Антонов басқалардан гөрі көбірек көрінеді.

Бірақ ол есте қаларлық бір іс-әрекетімен немесе айқын характерімен танылмайды, жалаң да жалпылама сөздермен ғана көрінеді. Болып жатқан оқиғалардың байыбына барып, нақтылы басшылық етудің орнына Антонов көбінесе әсерсіз, жадағай үгіт айтып жүреді. Партия қызметкерінің лайықты образы, әрине, мұндай оңай

да арзан тәсілдер арқылы жасалмақ емес. Ал Ермағамбет пен Кәрібай образдары тіпті бұл дәрежеге де көтерілмеген. Романда олардың тек аттары ғана аталады, әйтпесе ешқандай іс-әрекет жасамайды. Партия қызметкерлері ретінде алынған бұл үш кейіпкердің тіпті бірде-бірінің образы шынайы дәрежеге көтерілмеуі — романның елеулі кемшілігі.

Агроном Сергейдің образы да көңілдегідей болып шықпаған. Романда Сергей ауыл шаруашылығы туралы советтік озат ғылымның өкілі есебінде алынған. Бірақ автордың осы игі идеясы жеткілікті көркемдік шешімін таба алмайды. Романда Сергейдің Шығанаққа бергені, үйреткені аз. Ауыл шаруашылығы туралы ғылымның өкілі ретінде суреттелген бұл кейіпкердің образын шынайы түрде жасау арқылы, Шығанақтың тарыдан дүниежүзілік рекордтық өнім алу ісіндегі, сол ғылымның шешуші ролін көрсетуге болатын еді. Шығанақты қолдап, оның үстіне ғылыми тұрғыдан бағыт, көмек беріп отырудың орнына Сергей көп реттерде қайта Шығанаққа қарсы келеді, оның диханшылық тәжірибесіне шүбәлі көзбен қарайды. Әрине, Шығанақ пен Сергейдің арасында келіспеушіліктер, пікір таластары болуы мүмкін. Бірақ жазушы бұл екі кейіпкер образдарының арасалмағын ауыстырмауға, негізгі нысанадан көз жазбауға тиіс еді.

Романдағы кемшіліктердің бір тамыры ондағы тартыстардың үнемі бірдей өмірлі, өткір болып келмей, жібі босап, сұйқылт тартып кететіндігінде. «Шығанақта» совет адамдарының тасбауыр табиғатқа қарсы қажырлы да қайсар күресі шынайы суреттелген. Ал адамдар арасындағы тартыс өткір күйінде берілмеген. Тіпті романның алғашқы бөлімінде, яғни әлеуметтік шиеленіскен қақтығыстарға толы кезеңді суреттейтін эпизодтарда да тартыс тым босаң, сылбыр өрбиді. Романның екінші, үшінші бөлімдерінде тартыс тіпті де өрістемейді, ал оның автор қолдан жасаған кейбір схемалық көріністеріне оқушы иланбайды.

Мысал ретінде Шығанақ пен Төкеннің арасындағы тартысты алып қаралық. Жазушының таныстыруынша Төкен — бұрын ірі байдың баласы. Ал кейін ол бой тасалап, совет мекемесіне орналасып алған, яғни аудандық су бөлімінің бастығы болып істейді. «Төкен — осы Ойылдың бел баласы. Шығанақ — оның төңірегіндегі

жатақтың бірі. Көптің бірі болған Шығанақты Төкен байқамауы мүмкін. Көп ішіндегі жалғыз Төкенді Шығанақ жақсы біледі. Кебеже қарын, салпы бұғақ байбатша, біресе жуан жұдырық Төкен бүгін маман болып тағы да әмір етсе, Шығанақ шыдар емес»,— деп жазады автор. Міне осыдан кейін оқушы Төкен мен Шығанақтың арасында өткір тартыс өрістейтін болар деп үміттенеді. Бірақ оның бұл үміті ақталмайды.

Рас, тек романның алғашқы тарауларында Шығанақ пен Төкеннің арасындағы тартыс сәл ғана белгі береді. Жер суландыратын машинаны пайдаланып, тары өнімін арттырмақ болған Шығанаққа Төкен қарсы шығады. Бірақ Шығанақ бұған мойымайды. Ол облыс орталығына дейін барып, өз дегеніне жетіп, жер суландыратын машина алып қайтады. Міне Шығанақ пен Төкеннің арасындағы тартыс, шындығында, осымен аяқталады да. Бірақ автор осы тартыс желісін жасанды түрде үзбеуге тырысады. Төкен Шығанақты аяқтан шалып, оған қастандық ойлайтын сияқты болып көрінеді. Әйтсе де, ол аршынды әрекет жасай алмайды. Оның үстіне Төкеннің тартыс тәсілдері мен жолдары да тым жұпыны, жандағай. Төкен осылайша сүйретіліп келіп тек соғыс кезінде, онда да Ахмет ұсталғаннан кейін барып қана әшкереленеді. Сөйтіп, Төкеннің іс-әрекеттеріне байланысты алынған тартыс қаншалықты сұйық та сылбыр өрбісе, оның шешілуі де соншалықты жасанды, нанымсыз.

Ахметке байланысты жәйттер де оқушыда осындай жасандылық сезімін туғызады. Романның басқы тарауларында көрінгеннен кейін Ахметтің шығармада кейін суреттелетін оқиғаларға ешқандай қажеті жоқ және оның тағдырының немен тынатыны оқушыны қызықтырмайды да. Егер Ахмет романның соңғы тарауларында қайта бой көрсетпесе, онда бұдан романның идеялық-композициялық тұтастығына ешқандай нұқсан келмеген болар еді.

Жазушы өз кейіпкерлерінің не бір аяулы сезімдерін, жүрекжарды ойларын, жан толқындарын әсерлі де нәзік бейнелеудің орнына кейбір реттерде натурализмге бой алдырады. Мысалы, романның ұнамды кейіпкерлері Амантай мен Жанботаның бір-біріне құштар ықыластылығын білдіретін эпизод былай берілген:

«Жанбота таранып, қаранып тұрып-тұрып, суға қойып кетті. Амантай атып түсіп, бар киімін сыпырып алды. — Ой әдепсіз! — деді Жанбота көре салып.

— Сен әдепсіз! — деді Амантай киімді астына басып алып.

— Мен неге әдепсіз?

— Е, менің көзімше неге жалаңаштанасың?

— Қашан сенің көзіңше? Жаңа келдің ғой жалақтап.

— Жок, мен манадан бері көріп жатқанмын.

— Көзің тойса, киімді бер.

— Көңлім әлі тойған жок. Шық бері!

— Сен көрген етімді шабақ жесе болмай ма!

— Ендеше отыр осылай, — деді де, Амантай киімді қолтықтап жүре берді.

— Токта, токта! — деді Жанбота шыдай алмай. Амантай қайта оралды:

— Не айтасың?

— Сен қазақтың ескі салтын істедің. Лайық па осы бойыңа?

— Өзгесін білмеймін, қазақтың осынысы ұнайды маған.

— Мәдениеттен безіп пе ең?

— Милталап езер уақытым жок. Мәдениетің сол болса, сорлыға берсін. Мен балталап, домбайлап-ақ келтіре берем.

— Махаббат — нәзік нәрсе, домбайыңа көне бере ме?

— Жок. Махаббат — берік нәрсе, балталасаң да сынбайды. Кейбіреулер өңдеймін деп мойнын қылдай, сирағын шидей қылады да, сынып кетсе, ойбай сап отыра қалады. Менің махаббатым дөкірлеу болар, бірақ сынуға жок, өмірге кетеді». Міне, Амантай мен Жанботаның сүйіспеншілік жайында алғаш рет «сыр шәртуі» осылай бейнеленген. Мұндай бейпіл де жалаңаш суреттеулер кейіпкерлердің характерін ашпақ емес, қайта оқушыда ұнамсыз әсерлер қалдырады.

Романда табиғат суреттері аз. Ал ұшыраса қалған күнде де олар кейіпкерлердің сезінулері мен түйсінулеріне, шығармадағы оқиғалар өрбуіне тығыз байланысты болып берілмейді. Рас, бұрын шөліккеп, құлазып жатқан даланың көңілсіз де сұрқай суреттері біркелкі тәуір бейнеленген. Бірақ совет адамдарының қажырлы да қуатты еңбегі арқылы келбеті мүлдем өзгерген өлкенің жар-

қын, ажарлы көріністері романда бояуы қалың суреттер арқылы берілмеген.

«Шығанақ» романының тілі, жалпы алғанда, түсінікті де көркем. Жазушы халықтың өмірі мен тағдырын, суреттеп отырған өлкенің тұрмыс өзгешеліктерін, сөйлеу ерекшеліктерін реалистік түрде танытуға ұмтылады. Бұл романның көркемдік қуатына, оның тілінің халықтық сипатының мол болуына әсер етпей қоймаған. Халықтық юмор мен өткір әзіл-қалжың, шешендік үлгілер «Шығанақ» романының тілдік ерекшеліктерінен әсіресе айқын байқалады.

Қорыта келгенде айтарымыз, «Шығанақ» романы — жазушының елеулі шығармасы. Жоғарыда аталған кемшіліктер оның жалпы идеялық-көркемдік бағалылығын жокқа шығара алмайды. Бұл романның біз үшін ең басты құндылығы мен қасиеті сол — жазушы онда заманымыздың ұнамды геройының, еңбекті творчество дәрежесіне дейін көтерген адамның типтік образын жасай алды.

* * *

Жазушының 1948 жылы жазған «Миллионер» атты повесі де колхоз тақырыбына арналған. Бірақ негізгі тақырыбы жағынан «Шығанақпен» ұқсас болғанмен, «Миллионердің» одан ерекше өзгешеліктері мен айырмашылықтары бар. Егер «Шығанақ» романында колхоздасудың алғашқы кезеңіндегі, советтік бесжылдықтар және Ұлы Отан соғысы тұсындағы оқиғалар қамтылса, ал «Миллионер» повесі колхозды ауылдың соғыстан кейінгі өмірін суреттеуге арналған. Әрине, бұл екі шығарманың өзара негізгі ерекшеліктері олардың әртүрлі кезеңді қамтитындығына байланысты емес. Жазушы «Шығанақ» романында колхоз құрылысының қуаттылығы мен артықшылығын образды түрде бейнеледі. Ал «Миллионер» повесінде суреттелетін кезең үшін бұл — әлдеқашан шешілген, дұрыстығы тарихи дамудың барысында әбден ақталған, талассыз мәселе.

«Миллионер» повесінен біз өрлеудің жаңа дәуіріндегі колхозды ауыл өмірін, ондағы жаңа адамдардың іс-әрекеттерін көреміз. Яғни, «Миллионер» повесінде суреттелетін «Аманкелді» колхозы — біздің елімізде социалистік құрылыс біржолата жеңіп, халқымыз коммунизмге

карай батыл кадам басқан кезеңде тұрған колхоз. Сондықтан да повестің негізгі кейіпкерлері болып алынған колхозты дуылдың жаңа адамдарын жазушы коммунистік қоғам орнату жолындағы күрескерлер ретінде бейнелейді. Міне, «Миллионер» повесінің ең басты ерекшелігі оның осындай жасампаздық пафосына, коммунизм үшін жұмсалып жатқан қажырлы күрес рухына толылығында.

Жазылып біткен уақытынан бері қарай «Миллионер» повесі қазақ және орыс тілдерінде бірнеше рет жеке кітап болып басылып шықты. Ол көптеген шет ел халықтарының тілдеріне аударылды. Бұл айтылғандар да повестің құндылығын, оның әсер етушілік зор қуатын айқындай түседі. «Миллионер» повесі республикалық және одақтық баспасөз беттерінде де татымды баға алды. Повесте көтерілген кейбір мәселелер әдебиет жұртшылығының арасында қызу да өткір пікір таластарын туғызды. Мұның өзі, еңалдымен, бүгінгі күннің толғағы жеткен, аса маңызды кейбір мәселелерін жазушының қызғылықты да батыл түрде қозғай алғандығын және жұртшылық назарын сол құбылыстарға баса аударуға ұмтылғанын көрсетеді.

Повесте қозғалған осы мәселелер мен тақырыптар қандай еді және жазушы оларды қалай көтеріп, қапшалықты дәрежеде көркем де терең шеше алды? Міне енді осы жайларға ауысалық.

«Қызу жиын. Керіс сөздер....»

Жомарт: Жақан кем өлшеп, қанағат қылады. Қанағаты кейін тартады. Өскелең тілек кең өлшеп, алға тартады. Алға, жолдастар, алға!...

Жақып: Арындама. Алдың жар...

Бейсен: Әуелі Жақып асқан белдерден асып ал...

Повесть колхоз жиналысында болып жатқан осындай қызу пікір таластарын суреттеуден басталады. Бұлай ету арқылы жазушы оқушы назарын салған жерден тартыс өрісіне мензейді. Сонымен қатар осы бір қысқа да ұшқыр, отты сөздерге кейін шығарманың өн бойына тартылатын желілі тартыстың түйіні де бар.

Колхоз председателі Жақып шаруашылықты өркендеудің өзі жасаған және басқарма бекіткен жоспарын ұсынады. Ал агроном Жомарт бұл жоспарды тым шағын, тапшы көріп, оған қарсы шығады. Сөйтіп, сырттай қарағанда Жақып пен Жомарттың өзаралығындағы келіс-

пеушілік сияқты болып көрінетін бұл талас, шын мәнісіне келгенде, тіпті де олай еместігін, яғни бұл — нағыз жаңа мен ескінің арасындағы өткір тартыс екенін оқушы повесті оқыған сайып айқынырақ аңғара түседі.

Расында да, кейбір әдебиетшілер айтқандай, Жомарт пен Жакыптың арасындағы тартыс — жақсы мен тәуірдің арасындағы келіспеушілік емес, керісінше, жаңа мен ескінің арасындағы нағыз өткір тартыс.

Талай жылдар бойы колхозға адал басшылық еткен, оған көп еңбек сіңірген Жакыпты басқалар сияқты Жомарт та ұнатады, сыйлайды. Бірақ колхоз шаруашылығы өрлеудің жаңа биігіне көтерілгелі тұрған шақтағы Жакыптың тапшы тілектеріне, шағын мақсаттарына Жомарт мүлдем қарсы. Өйткені, Жомарт колхоздың шаруашылық резервтері мен ішкі мүмкіншіліктерін терең өлшеп, ескере келіп, княға көз салады, алысқа құлаш ұрады. Сөйтіп, «кем өлшеп, қанағат қылған» Жакып пен «кең өлшеп, алға тартқан» Жомарттың арасында принципті, өткір күрес басталады. Әрине, жақсы идея ұстанғанмен, Жомарт бұл күресте оп-оңай жеңіске жете алмайды, ол көптеген қиындықтар мен тосқауылдарға ұшырайды. Жакыпты бұрыннан сыйлайтын және Жомарттың жоспарының жүзеге аса қоюына соншалықты шүбәсіз сене қоймаған көпшілік Жомарттың жоспарын қабылдамай тастайды да, Жакыптың жоспарын бекітеді. Ауданның кейбір басшы қызметкерлері де Жомарттың ұсынған ойларына қарсы шығады. Бірақ Жомарт бұған мойындамайды. Партия ұйымының қолдауымен және өз жоспарының орындалу мүмкіншіліктеріне колхозшылардың қалың көпшілігінің көңілін сендіру арқылы Жомарт ақыры жеңіп шығады. Жакып өтініш беріп орнынан түседі де, бұрынғы агроном Жомарт колхоз председателі болып тағайындалады.

Бірақ, шығармадағы негізгі өзекті тартыс мұнымен тынып, таусылып қалмайды және осылай болуы әбден заңды да. Рас, Жомарттың жоспары қабылданды, ол ұсынған идеялар өтті. Бірақ, ең маңызды, басты мәселелер сол идеялардың шындыққа айналуында, жүзеге асуында. Сондықтан да жазушы өз назарын осы мәселеге әсіресе мол аударады.

Повестің екінші бөлімінде Жомарттың және ол бастаған еңбек адамдарының жоғарыда аталған жоспарды орындау жолындағы қажырлы күресі суреттеледі. Ал повес-

тің соңғы, үшінші бөлімінен олардың сол жасампаздық еркі мен тегеурінді еңбегінің тамаша көріністерін, игілікті нәтижелерін көреміз. Колхоз электр қуатына ие болып, ондағы ауыр жұмыстардың барлығы механикаландырылады. Колхоздағы қоғамдық малдың тұқымы асылдандырылады. Сөйтіп, колхозшылар ауыл шаруашылығы мен мал шаруашылығынан бай өнімдер алады. «Аманкелді» — миллионер колхозға айналады. Колхозшылардың тұрмысының мәдени дәрежесі де көтеріледі.

Осылайша, повесть шаруашылығы зорайып, қоғамдық дәулеті шалқып тасқан, мәдениеті де жоғары көтерілген колхозды ауылдың еңбек пен қуанышқа толы бүгінгі өмірін және оның бұдан да жарқын болашаққа қарай ұмтылған қажырлы беталысын суреттеумен аяқталады. «Миллионер» повесінде жазушы колхозшы ауылдың бүгінгі өмірін, негізінен алғанда, шынайы бейнелей алды. Ол уақыт алға тартқан көптеген маңызды мәселелерді дер кезінде қозғады және олардың бірсыпырасын өмір шындығына сәйкес, шеберлікпен шеше алды. Рас, біздегі колхоздардың барлығы бірдей «Миллионердегі» Аманкелді атындағы колхоздай емес. Бірақ сол «Аманкелді» колхозы алдыңғы қатарлы, озық колхоздарымыздың жиынтық көрінісі болумен қатар, оның артта қалған колхоздар үшін өнеге аларлық үлгі болуы да даусыз. Міне, «Миллионер» повесінің идеялық құндылығы, әсер етушілік қуаты осында. Бұл шығарма адамдарымызды өткенге қарайлай бермей, алға көз тігуге, ілгері ұмтылуға шақырады.

Повесте өздерінің алған түрлі характерлерімен, іс-әрекетімен дараланып, жіктеліп көрінетін көптеген кейіпкерлер бар. Солардың ішінде ерекше көрінетіні — Жомарт.

Шығармада көтерілген негізгі идея, яғни колхозды дамудың жаңа сатысына шығару туралы басты идея осы Жомарт образы арқылы бейнеленген. Жомарт — халық игілігіне қажет жаңа ойларды жалаң ұсынушы ғана емес, сонымен қатар сол максаттарды іске асырушы, орындаушы, яғни, Жомарт — әрі жүйрік қиял мен алыс арманның, әрі қажырлы еңбектің, іс-әрекеттің адамы. Ол — қиялшыл да, күрескер де. Жомарт образының ерекше бір сипаты осында.

Жомарт колхозшылардың қалың көпшілігінің еңбек май-

данындағы белсенділігін жасампаздық қуатын жоғары бағалайды. Сондықтан да ол өз жоспарының орындалатындығына шүбәсіз сенеді. Міне оптимистік осы сенім Жомартқа жігер береді. Ол колхозды ауыл өміріндегі әрбір құбылысқа, әрбір жаңа шыңдарға салмақты да байыпты көзқараспен барлай қарайды және солардан тиісті қортынды жасап отырады.

Әрине, Жакып сияқты, Жомарт та колхозшыларға, олардың еңбегіне сүйенеді. Бірақ ол сол еңбекті орнымен, ұтымды жұмсауды, сөйтіп еңбек өнімділігін арттыруды мақсат етеді. «Бәрінің бабы бар,— дейді Жомарт,— бабын таппаған еңбек құмға құйған су сияқты. Бабын тапсаң, ана сияқты. Ие береді, не береді. «Қалауын тапса, қар жанады» деген мақал — үлкен философия. Дүние кірпіші бір қалыптан шыққан жоқ. Оның қиюын табу — адам алдында әрдайым соны міндет. Көргеннен, білгеннен аспау, барды қанағат қылу, жоқты іздемеу — ой мешеулігі. Жомарттың тынбай алға ұмтылатын талабы мен еңбексүйгіштігі оның осы бір сөздерінен айқын аңғарылатындай.

Жомартқа нағыз коммунистке тән принциптілік, тұрақтылық, көздеген мақсатқа жету жолында табанды болу сияқты қасиеттер мол. Өзі ұсынған жоспардың дұрыстығына және оның орындалатындығына қалтқысыз да саналы түрде сенген Жомарт сол жоспарын ақырына дейін қорғап, қабылдаттырады. Ал осы жоспарын жүзеге асыру үстінде ол көпшілікке шебер басшылық істейді, сөйтіп өзін білгір ұйымдастырушы ретінде танытады. Повесте Жомарт белсенді іс-әрекеттерімен ғана емес, сонымен қатар бай жан дүниесімен де көрінеді. Жазушы оның кейде қызба, албырт, кейде байыпты мінезін, әрдайым алға көз салып армандап жүретін ойшылдығын әсерлі суреттейді. Өз еңбегінің жемісті нәтижелерін көріп қуанған шақтардағы Жомарттың көңіл күйлері, жан толқындары повесте әсіресе тартымды бейнеленген.

Жомарт образы арқылы жазушы председателдің жаңа типін, яғни әрі теориялық мол білімі бар, әрі сол білімін тәжірибемен ұштастыра алатын, шаруашылыққа басшылық етуге творчестволық түрде қарайтын басқарушының бейнесін ұсынды. Уақыт жазушының батыл көтерген бұл идеясының дұрыстығын көрсетті.

Повестегі тартымды образдардың бірі — Жанат. Бұл

образ арқылы жазушы советтің алдыңғы қатарлы жас қызының әсерлі бейнесін жасай алған. Жанат — жоғары дәрежелі білімі бар маман. Ол өзінің туған ауылындағы мектепте мұғалім болып істейді. Бірақ Жанат осы мамандығына байланысты қызметпен ғана шектеліп қалмайды. Оны туған колхозының бүкіл өмірі, бүгінгісі мен жарқын болашағы — барлығы да қызықтырады. Білімді, парасатты Жанат — тек балалардың ғана емес, үлкендердің де ұстазы сияқты. Өз жоспарын көлденең тартып, Жомартқа қарсы шыққан әкесі Жақыпқа Жанат былай дейді: «— Көнсеңіз де, көнбесеңіз де аброй алмассыз. Жомарт жоспары — шытырманы көп, оқусыз аламды шатастыратын жоспар. Көнсеңіз, шатасасыз. Көнбесеңіз, айып арқалап жалғыз қаласыз. Менінше, осы абройлы күнде басқа жұмысқа ауысқан жөн болар».

Бұл сөздерді Жанат тек әкесінің қамын, соның бас амандығын ойлағандықтан ғана айтып отырған жоқ. Сонымен қатар бұл бүкіл колхоз өмірін және оны жарқын болашаққа апаруды көздеген Жомарт жасаған үлкен жоспардың тағдырын толғана ойлаудан туған сөздер.

Жанат шындықты жақтайды, көпшілік мүддесін барлығынан да жоғары қояды. Жомарт жоспарымен танысып, оның тереңіне үңілген және оған болашақтың ақиқат тамаша көріністерін таныған Жанат өз әкесінің қателіскенін біледі. Сондықтан да ол әкем ренжір деп сол қылдақтық жасамайды. Сөйтіп, Жомарттың жоспарын қуаттайды. Жанат бұл жоспардың қабылдануында ғана емес, сонымен қатар оның орындалуында да Жомартқа көп жәрдем көрсетеді.

Жанат — ойлы, парасатты жас. Ол үлкеннің де, кішінің де жан дүниесіне үңілуге, әркіммен лайықты тіл тауып сөйлесуге ұмтылады. Повесте Жанат тек іс-әрекетімен, ұйымдастырушылық қабілеттерімен ғана емес, мөлдір жан дүниесімен, терең сезімдерімен де жарқырап көрінеді.

Жазушының Жанат образын жасаудағы осындай табысты жақтарымен бірге елеулі бір кемшілігі де бар. Яғни, ол Жанатты өзінің негізгі мамандығы — мұғалімдікке байланысты өте сараң көрсетеді. Бірер эпизодта ғана суреттелетін оқиғаларды айтпағанда, Жанаттың тіпті мектеп өміріне ешқандай қатнасы жоқ сияқты. Мі-

не, осы кемшілік, негізінен алғанда, тәуір де тартымды жасалған Жанат образының толыққандылығын едәуір әлсіретеді.

~~Повестегі шынайы жасалған образдардың бірі — Жақып. Ол өз өмірінің он бес жылын «Аманкелді» колхозын басқаруға жұмсаған. Өзінің осы сүйікті қызметіне адал берілген, еңбексүйгіш, тәжірибесі мол Жақып — колхоздың шаруашылығын дамытып, мәдениетін көтеруде көрнекті істер жасаған адам. «Аманкелдідегі» бір кездегі отыз үй — жүз елуге, отыз бас мал — он мыңға, отыз гектар егістік — мың жарымға жеткен. Міне колхозды ауылдағы осы өзгерістердің барлығы — Жақып басшылық еткен жылдардың жемістері.~~

Жақып дәулеті молайып, шаруашылығы өскен осы ауылды шын жүректен жақсы көреді. «Айсыз ашық аспан. Жұлдыздар сайрап тұр. Үркер төбеден ауып кеткен. Тымырсық аяздағы тымық әуені сіміре, Жақып күндегі әдетімен колхоз ауылын аралап келеді. Шықырлаған өз аяғынан өзге тырп еткен дыбыс жоқ. Аппақ, кең далада ауыл көсіле ұйықтап жатыр. — Ақ бесікте құндақтаулы бала сияқты. Жақып байыппен қарап келеді. — Түн ұйқысын төрт бөліп, бесік маңында күйбеңдеген ана сияқты. Қай үйдің жанынан өтсе, сол үйдің тарихы есіне түседі. Қай ағашқа көзі түссе, сол ағаштың шыбық кезі елестейді...»

Жақыптың түйсінулері арқылы берілген осы бір суреттерден өз еңбегінің жемісті нәтижелерін көріп қуанған адамның ой-сезімдері айқын аңғарылады.

Осындай жақсы нәтижелерге жеткен әрі көпшіліктің кадір-құрметіне бөленген Жақыптың бойында үлкен кемшілік те бар. Оған өзінің көз алдында, өз басшылығымен жасалып өсіп-өнген дүниенің түймедей — түйедей, ескісі жаңадай болып көрінеді. Колхозды ауылдағы өзгерістер мен жаңалықтарға шын жүректен қуана жүрсе де, Жақып оның бұдан да жарқын болашағына үнілмеген және соған жеткізетін күштер мен мүмкіндіктерді көре алмай қалған. Сөйтіп, оның өз колхозының табыстарына ден қойған көңіл ырзалығы токмейілдікке, тіпті кертартпалыққа айналған. Жақыптың бойындағы ең негізгі кемшілік осында, яғни, оның болашаққа көз тікпей, өткенге қарайлай беруінде, алға ұмтылмай, қолда барға ғана қанағат етуінде.

Жақып — адал адам. Ол шындықты ұнатады, тура айт-

қанды жаратады. Ол Жомартқа қарсы шыққанда оның жеке басын ұнатпағандықтан, жек көреңдіктен қарсыласпайды. Жомарт сенің орныңды тартып алғысы келіп жүр деп жел бергендерге ол былай дейді: «Менікі — шен таласы емес. Егер жұрттың көздегені председателдік болса, мен күзетші-ақ бола салам. Бірақ, талас басқада... Колхоз тізгінін сыналмаған сенімсіз ойға билету... қиын. Іш осыған ашиды. Біткен іске сыншы көп, піскен асқа жеуші көп. Сыншының бәрі бірдей мінші ме? Жеудің бәрі бірдей енші ме? Қабылдай беруге болмайды. Қабылдамасаң, тартысады. «Тартысуға қайрағ жете ме, бассауғаға ар жете ме?» дегенім — мансап қамы емес, жарғақ құлақ жастыққа тимей, жалындаған еңбекпен жасаған осынау жаңа дүние, жаңа ауылдың қамы..»

Жақыптың Жомартқа қарсы шығуының себептері де және оның бұл ретте қателесіп, жаза басқандығы да осы бір сөздерден анық танылады. Жақып Жомарттай жалын атқан жасқа және сол Жомарттың іс-әрекеті арқылы бейнеленетін озық ой мен ілгерішіл мақсатқа сенбейді. Сөйтіп, болашаққа ұмтылмай, кейін тартатын, колхоз шаруашылығын онан әрі дамытуға оралғы бола бастаған Жақып жеңіліс табады. Озат ой, өршіл идея өз дегенін істейді.

Әрине, Жақыптың мұндай жаза басып, мүлт кетушілікке ұшырауының себебі оның жаулық, қастандық ниетіне байланысты емес. Онда мұндай жат қасиет атымен жоқ та. Қайта, ол колхоз шаруашылығын өркендетуге, көпшілік мүддесі үшін қызмет етуге қалтқысыз берілген. Бірақ ол көз алдындағыдан басқаны көрмей, шау тартып қалған адам. Оның жеңіліс табуының басты себебі осында. Бұл қателіктерін түзеуге Жақыпты өмірдің, колхоз тіршілігі шындығының өзі бастайды. Кейін ол колхоз председателінің орынбасары болады. Осылайша, өмірден өзіне лайықты орын тапқан Жақып еңбек қызығына қайтадан беріледі. Сөйтіп, жазушы Жақып образын орта жолда қалдырып қоймайды. Қайта ол бұл образдың ішкі қайшылықтарын шынайы түрде ашып, оны көп қиындықтар мен кедергілерді жеңу үстінде, жанару үстінде нанымды суреттейді.

Повесте суреттелетін басқа кейіпкерлердің ішінде арнайы тоқталуды қажет ететіні — Ахмет.

Шығармада көтерілетін басты, негізгі мәселелердің бірі

осы Ахмет образына байланысты. Жалпы алғанда, Ахмет образы — әдебиетіміздегі жаңа, тың образдардың бірі. Жеке меншіктегі дәулет пен қоғамдық дәулеттің бір-бірімен ұтасып, қосылып кетуі сияқты аса маңызды мәселені автор осы Ахмет образы арқылы шешпек болған. Кезінде «Миллионер» повесіне баға бергенде әдебиетшілер арасындағы алуан түрлі, даулы пікірлер, әсіресе, Ахмет образының төңірегінде өрістеді. Әрине, бұл заңды да еді.

Кейбір сыншылар Ахмет образы — уақыт алға тартқан мәселелерге жауап беретін, автордың болашаққа көз жібере білуінің нәтижесінде туған бағалы образ деген пікірлер айтты. Ал бірсыпыра әдебиетшілер Ахмет образы — өмір шындығынан алынбаған, ойдан шығарылған образ деп танып, жазушының бұл мәселе жайында ұстаған бағытын сынады.

Расында да, Ахмет образы — күрделі де, қызғылықты да образ. Жазушы Ахмет образы арқылы аса маңызды мәселені қозғауды, бүгінгі күннің шындығы мен болашақтың романтикасын ұштастыруды мақсат еткен. Әрине, бұл — аса бағалы қасиет. Жазушының бұл бастамасы, игі талабы құпталуға да, қуатталуға да тұрарлық. Бір-ақ гәп тек белгілі бір мәселені тыңнан әрі батыл көтеруде ғана емес, соны дұрыс та көркем шешуде. Міне осы тұрғыдан карағанда, автор Ахмет образы арқылы көтерген маңызды мәселесін жеткілікті дәрежеде шынайы, көркем шеше алмаған.

Жазушы Ахметті мейлінше бай, ауқатты тұратын колхозшы ретінде суреттейді. Ол колхоздың ұстасы болып істейді. Өз жұмысына тыңғылықты да маман Ахмет сол еңбегінің арқасында шоласыз, ештеңеге мұқтаж емес дәрежеге жеткен. Тіпті оның байлығы, мол дәулеті енді аяққа оралғы бола бастаған. Сондықтан да ол жеке меншігіндегі малдары мен байлығын колхоздың қоғамдық дәулетіне қосып жіберуді, сөйтіп қажет кезінде керегіне қарай содан алып жұмсап отыруды тілейді. «Сен... ештеңе білмейсің, — дейді ол зайыбы Злихаға, — Мен дүниенің өзін өзіне жұмсап, рахатын көрмекпін. Сен дүние жұмсап, бейнетін көріп отырсын. Дүниені тапқанша — бейнетің дұрыс. Ал тапқан соң не бейнет? Тапқан үстіне таба бер. Тапқаныңның тек қызығын көр. Әйтпесе, немене керек бұл шіркін!»

Міне, Ахметтің «философиясы» осындай. Ол осы пікі-

рінен қайтпайды. Ақыр аяғында Ахметтің тілегі орындалып, оның жеке меншігіндегі малдары колхоз фермасына алынады. Ал Ахмет сүт, қымыз, тағы басқа қажет нәрселерді осы фермадан алып тұратын болады. Бұл ретте жазушы мынадай жағдайларды ескермеген. Колхоздың қоғамдық дәулеті әбден кемеліне жетіп дамығанда, ол колхозшылардың барлық қажеттері мен мұқтаждығын толық өтей алатын дәрежеге жеткен кезде ғана колхозшылардың жеке меншігіндегі байлығының, малдарының қажеттілігі болмай қалады. Ал мұндай дәрежеге көтерілгенге дейін колхозшылардың жеке меншігінде қажеттілігіне қарай малы, байлығы болуы керек. Ал Ахмет жоғарыда айтылған әрекеттерін жасап жүрген кезде ол еңбек ететін «Аманкелді» колхозында мұндай қажетті жағдайлар жоқ. Сондықтан да Ахметтің іс-әрекеті ақталмаған. Өзінің малдарын колхоз фермаларында бактыру арқылы, түптеп келгенде, Ахмет, мұны өзі де байқамай, колхозға масыл болуға айналған. Шындығында, жеке меншігінде малдары болуы Ахметтің өзі үшін де пайдалы. Үйіне қонақ келіп қалғанда ол құрдасы Мәметтің қойын алып сояды. Сөйтіп, тұрмыс қажеттігі мен Ахметтің тілектері бір-біріне қайшы келіп жатады.

Жоғарыда аталғандардың барлығы да өзінің іс-әрекеттері, түсініктері жағынан Ахмет уақыттан, өзін қоршаған ақиқат жағдайлардан жеке-дара бөлініп алынған образ екенін көрсетеді. Ахмет образы арқылы көтерген аса маңызды мәселесін жазушы шынайы дәрежеде, көркем де нанымды етіп шеше алмаған. Ахметтің сол әрекеттеріне байланысты оқиғалар повестің жалпы сюжеттік желісіне тұтаса, қабыса еніп тұрған да жоқ.

Повесте бұлардан басқа да біраз кемшіліктер бар. Егер повестің алғашқы екі бөлімінде шығарманың негізгі арқауып құрайтын тартыс оқиғалар өрбуі арқылы, адам тағдырының қақтығысы арқылы бейнеленсе, ал повестің үшінші бөліміндегі тартыс желісі жөнінде мұны айтуға болмайды. Яғни повестің соңғы бөлімінде өткір тартыс жоқ. Сондай-ақ осы бөлімде жазушы колхозды ауылда болып жатқан оқиғаларды кеңінен суреттемеген, қайта сол оқиғалар мен істердің нәтижесін ғана баяндауға көбірек бой ұрған. Осы кемшілік повестің көркемдік тұтастығына, әсер етушілік қуатына біраз нұқсан келтірген.

Жазушы романтикаға барамын деп отырып кейбір реттерде өмір шындығынан алыстап кетеді. Мысалы, Алматыда Москваға барып, өзі шығарған «Күншуақ» күйін Ұлкен театрдың сахнасында орындауы, тағы басқалар — повесте жеткілікті көркемдік мотивировкасы берілмеген, тым әсіреқызыл оқиғалар. Қайта, жазушы бақытсыздыққа ұшыраса да мойымаған, совет адамдарының арасында болғандықтан жалғыздық көріп, қасірет шекпеген осы кейіпкерінің жан қуатын артықшылығын мұндай көріну әсірелеусіз-ақ, шынайы оқиғалар арқылы нанымды суреттеуі керек еді.

Жомарт, Жанат, Алма үшеуінің арасындағы драма да өрістей түсіп, саябырлап тынып қалған. Осы драманы өткір де шынайы суреттеу арқылы жазушы кейіпкерлерінің гуманистік қасиеттерін мол да терең ашуға мүмкіндік алған болар еді. Бірақ өкінішке қарай, ол осы мүмкіншілікті жеткілікті пайдаланбаған.

«Миллионер» повесі жазушының творчестволық іздену, шеберлігін жетілдіру жолында екенін көрсетті. Повесть суреттелген кейіпкерлердің көпшілігі өздерінің іс-әрекеттерімен, характерлерімен дараланып берілген. Повестьтің тілі де көркем, бейнелі. Жазушы бұл шығармасында да халықтың мақал-мәтелдерін, шешендік сөз нақыштарын мол әрі орнымен қолданған. Сонымен қатар жазушының өз тілінде де мақал-мәтелдерге, нақылға айнылып кетерлік сөз орамдары жиі ұшырасып отырады.

«Правда» газеті өзінің 1949 жылғы 17-июньдегі санында басылған «Жаңалықты сезіну» атты мақаласында Ғ. Мұстафиннің «Миллионер» повесін талдай келіп, бұл — «белсенді колхозшылардың батыл бастамалары мен қажымас күрестерін жырлайтын, жаңалықтың сезімін бойына сіңіре алған» шығарма деп жазды. «Миллионер» повесінің құндылығы мен маңыздылығы осы бір сөздерде айқын айтылған.

* * *

«Қарағанды» романы — Ғ. Мұстафиннің ең көлемді, әрі күрделі шығармасы. Жазушының ұзақ уақыт бойғы еңбегінің, творчестволық ізденулерінің жемісі ретінде туған бұл роман 1952 жылы жеке кітап болып басылып шықты. «Қарағанды» орыс тіліне және сол арқылы басқа да көптеген халықтардың тілдеріне аударылды. «Қарағанды» романы оның авторының өзіне бұрыннан да

таныс тақырыпқа, яғни социалистік Қарағандының жа салып, өркендеуі және ондағы жұмысшы табының қалыптасып дамуы тақырыбына арналған. Жазушының отызыншы жылдардың аяқ кезінде туған «Өмір не өлім» атты романы да осы тақырыпқа арналып жазылғаны белгілі. Өзін көптен бері толғандырып жүрген бұл тақырыпқа қайта оралуы Ғ. Мұстафиннің әдебиетіміздегі осы игі тақырыпты сүйетіндігін, онымен қабысып кеткендігін ғана көрсетіп қоймайды, сонымен бірге оның творчестволық талғампаздығын да айқын танытады.

Расында да, «Өмір не өлім» көптеген сәтті, табысты жақтарына қарамастан, өзі арналып жазылған үлкен де жауапты тақырыпқа шын мәнісіндегі лайық, татымды шығарма болып шықпағанды. Ал «Қарағанды» романында жазушы өзіне бұрыннан таныс сол материалдарды жете зерттеп, сұрыптап, оларды көркемдік шындық дәрежесіне көтерген, сөйтіп советтік Қазақстанның ірі өнеркәсіп орталығы Қарағанды туралы кесек те шынайы шығарма жасай алған.

Романда суреттелетін оқиғалар отызыншы жылдардың бас кезінен бастап қыркыншы жылдарға дейінгі кезеңді қамтиды. Бұл — бүкіл елімізде, сондай-ақ советтік Қазақстанда ауыр индустрияның қарыштап дамыған шағы, даңқты бесжылдықтар кезеңі.

Жазушы еліміздің өміріндегі осы аса бір елеулі кезеңнің типтік оқиғалары мен тартыстарын дұрыс тандап, сұрыптап ала білген және соларды қажетті, лайықты көркемдік түрге бөлеп бере алған. Сондықтан да біз романды оқып отырғанда адамдарымыздың жанқиярлық еңбегіне, жасампаздық қуатына толы сол бір жылдардың тамаша шындығын көреміз, уақыт лебін аңдағандай боламыз.

«Қарағанды» — көп планды, кең тынысты роман. Онда өзара тығыз байланысып, туындап өрбіп жататын мол оқиғалар, қат-қабатымен алынған алуан түрлі құбылыстар бар. Жазушы осылайша оқиғалар күрделілігіне, тартыс өткірлігіне ұмтылу арқылы сол өзі суреттеп отырған кезеңнің шындығын терең де мол ашады, өмір көріністерін кеңінен бейнелейді.

Қарағандының ауыр азапқа, жоқшылыққа толы ескі өмірінің сұрқай суреттері, құлазып жатқан далаға совет адамдарының жап беруі, Коммунистік партияның кемеңгер басшылығы мен халықтың қайрат-жігерінің

арқасында ескі Қарағандының орнына социалистік жаңа өнеркәсіп алыбының салынуы, осы жолда кездескен зор қиыншылықтар мен тосқауылдар, жасырынған жаулар мен ұлтшылдардың қастандық әрекеттері, олардың тамырларына балта шабылуы, қазақ совет жұмысшы табының қалыптасып дамуы — міне «Қарағанды» романында осылай алуан түрлі тақырыптар мен оқиғалар өзара тұтастықта алынып, шынайы да көркем суреттелген.

Әрине, жазушы осындай мол, кесек оқиғаларды құр тізбектей бермей, қайта соларды образды түрде бейнелей отырып, олардың әлеуметтік мәнін ашады. «Қарағанды» романының құндылығы оның осы әлеуметтік тынысының кендігінде, онда суреттелген оқиғалардың типтік жағдайларда алынуында, шығарма желісіне өзек болған тартыстардың өткірлігі мен өмірлілігінде.

Жазушы романның ең алғашқы тарауларынан бастап-ақ жарқын суреттеулерге және мағна тереңдігіне, тұжырымдылыққа ұмтылады. Бір ғана мысал келтірелік. Роман былай басталады:

«Жан-жағынан темір арқандармен тартып тастаған түпсіз темір труба биік дөңнің бетінде тұр. Оны төңіреккей, ертеде салынған бес-алты тас барақ тым аласа, қайсы бірі жарылып қалуға бейімделген, сыртынан тіреп қойыпты. Бірақ маңы жота-жота көмір күлдері, жел лүпетсе, қара боран тұрады. Бірақ, жер әлі қызбаған, дымкыл, көктем жаңа басталды. Шаң-тозаң жоқ. Жалаңаш, байтақ жонның бетінде, беттегі мендей боп қарауытқан осы Қарағандыға көктеммен бірге бір көш еніп келеді».

Міне, романның дәл осылайша басталуында көп мән бар. Еңалдымен, сараң да тұжырымды, бірақ шебер берілген осы бір суреттерден совет адамдарының жасампаздық еңбегімен өзгергенге дейінгі ескі Қарағандының жалаңаш та жүдеу көріністерін танимыз, жаңа өнеркәсіп алыбын жасау жолында олар қандай қиыншылықтарға тап болғанын білеміз. Ал қарағандылықтар осындай адам айтқысыз қиындықтарды тек Коммунистік партияның көреген басшылығы, ұлы орыс халқының аялдық, адал жәрдемі арқылы ғана жеңе алды. Жоғарыда көрсетілген. «Қарағандыға көктеммен бірге еніп келе жатқан» көш — орыс халқының осы қарағандылықтарға жәрдемдесуге келген өкілдері еді.

Сөйтіп, жазушы романда қозғалатын негізгі тақырыптарға, яғни жаңа, социалистік Қарағандының жасалуы және бұл өр істегі орыс халқының қамқорлығы мен көмегі туралы тақырыптарға оқушы назарын салған жерден ақ аударады. Өзара тығыз байланыста алынған осы екі тақырып романның бүкіл өн бойына барған сайын өрістеп, тереңдей түсіп отырады.

Шет елдік концессионерлер мен капиталистерден «мұраға» қалған нәрселер — қирап қалған бірен-саран шахталар мен бұзылған жер барақтар және жұмысшылардың көкірегінде ұялаған ескі өмірдің жантүршігерлік елестері ғана еді. Донбастықтарды Қарағандыға бастап келген, болашақ трест бастығы Щербаковқа қазақтың бір кемпірі өз мұңын шағып былай дейді: «...Әкемнің қабірі, көкірек ауруынан кетті. Мынау күйеуімдікі, шахтада өлді. Мынау — баламның қабірі, жанып тұрған от еді! Ағылшындармен жанжалдасты. Ағылшындарға урядник Кудря болысты. Кудрямен төбелесте қылыштан қаза тапты. Бұл жатқандардың көбі азап, шермен өткендер... Жалғыз немерем, аты Әкім, жетім бала. Әуелі құдайға, сонан соң саған тапсырдым, шырағым. Адам қыл!» Қарт ананың аузынан айтылған осы бір сөздерде бүкіл халықтың өткен өмірден қалған ауыр, аянышты ойлары мен болашаққа артқан аяулы үміті бар.

Осы моладай жансыз, безерген даланы еңбек күйі кермейді. Болашақ өндіріс алыбы аз уақыттың ішінде-ақ еңсесін жоғары көтереді. Әрине, мұның барлығы ешқандай қиындықтарсыз, оп-оңай бола салмайды. Романда суреттелетін ұнамды кейіпкерлер осы қиындықтарды жеңу үстінде өседі.

Романның ең алғашқы тарауларынан бастап-ақ жазушы бізді жаңа Қарағандының жасалу процесімен таныстырады. Тәжірибелі, маман жұмысшылар механикалық цех құрыстырады, жер астынан көмір атбарабан арқылы тиртылитин болады, қолда бар мүмкіншіліктердің бәрі сарқия пайдаланылады. Көмір алыбының салынуына республика, тіпті бүкіл ел көмектеседі. Темір жол арқылы Қарағанды ірі өндіріс орталықтарымен байланысты. Оған маман кадрлармен бірге техника да келеді. Совет адамдарының уақыттан озған тегеурінді қарқынына бұл да өлшем бола алмайды. Механикалық цех кейін механикалық заводқа айналады. Вагонеткалардың орнына электровоздар заулайды. Жер астындағы

шахталардың саны молаюмен бірге олардың көпшілігінде жұмыс механикаландырылады. Сонымен қатар ашық шахталар арқылы көмір өндіру ісі де қолға алынады. Сөйтіп, автор үлкен Қарағандыны жасауда совет адамдарының белсенді еңбегімен бірге өндірісті социалистік жолмен ұйымдастыру және оған техникалық прогресті кеңінен енгізу ісі де ерекше роль атқарғанын шынайы көрсетеді.

«Қарағанды» романының табысты болып шығуын қамтамасыз еткен басты себептердің бірі — жазушының өзі суреттеп отырған өмірлік материалдарды жақсы білетіндігінде. Ол шығарма кейіпкерлерін өндірісте, іс-әрекет үстінде мол көрсетеді және олардың әрқайсысының жасайтын еңбегінің ерекшеліктерімен де жете таныстыруға ұмтылады. Яғни, романның беттерінен жасампаздық еңбектің кең де алуан түрлі көріністерін табамыз.

«Қарағанды» романының ең негізгі, басты геройы — халық. Жазушы халықтың жинақты тұлғасын айқын дараланған, типтік образдар арқылы ғана емес, сонымен қатар қалың көпшіліктің іс-әрекетін тұтастай суреттейтін жекелеген арнаулы эпизодтар арқылы да бейнелейді. «Майқұдық», «Нұра» канауларының қазылуы, тұрғын үйлердің салынуы, ақ түтек боран мен үскірік аязда және өрт шыққан уақытта шахтаның аман сақталып қалуы сияқты жинақты оқиғалар суреттелетін эпизодтар бұған толық дәлел бола алады. Бұл эпизодтардан қалың көпшіліктің мұқалмас қайрат-жігерін, өктем тегеуірінін сезіп те, сүйсініп те отырамыз.

Романда қозғалатын негізгі мәселелердің бірі — қазақтың советтік жұмысшы табының жасалуы, қалыптасуы туралы мәселе. Қарағандыны алып өнеркәсіп орталығына айналдыруда шешуші роль атқарған, ұйытқы болған күштер — бұрыннан келе жатқан жергілікті маман жұмысшылар мен көмекке келген донбастықтар. Бірақ жаңа Қарағандыны жасау жолындағы қажеттіліктерді өтеу үшін бұлар да жеткіліксіз еді. Сондықтан да жұмысшы кадрларының санын молайту, олардың еңбектегі шеберліктерін жетілдіру ісі кезек күттірмейтін міндет ретінде алға тартылды. Коммунистік партия бұл міндетті де жемісті түрде шешеді. Күні кеше ғана мал баққан, көшпелілік өмір кешкен жарлы-жақыбайлар енді маман жұмысшыларға айналады. Осы процесс, яғни жергілікті халықтан өндіріс кадрларын жасаудың, ұй-

ымдастырудың жолдары мен тәсілдері романда шынайы әрі нағыз бейнеленген. Жұмысшы табының осы жаңа қасиеттерінің тағдырларымен, олардың жарқын дәлсізін образдарымен таныса отырып, оқушы, олардың арқылы өсу жолын көреді және бұл игі істе коммунистер мен орыс жұмысшыларының қамқорлығы, көмегі қаншалықты мол болғанын жете аңғарады.

«Қарағанды» романы өзінің осындай алуан тақырыптылығымен, көп пландылығымен ғана ерекшеленіп қоймайды. Бұл ретте жазушының мол қамтылған сол тақырыптарды өзара байланыстыра әрі дұрыс та көркем шешіп алғанын ең алдымен атауға керек. Романның көркемдік қуаты да оның осы қасиетінде.

«Қарағанды» романы Ғ. Мұстафиннің образ бен характер жасауда бұрынғы шығармаларындағы дәрежесінен едәуір биіктегендігін, оның жазушылық шеберлігі ұшталып түскенін көрсетті. Романда кейіпкерлердің толыққанды образдарының тұтас галереясы бар. Бұл ретте ұнамды геройлардың бейнелерін жасауда жазушының қол жеткен табысы әсіресе мол екенін ерекше атап айту қажет.

Романның осы ең негізгі ұнамды геройларының бірі — Мейрам. Бұл образ саяси басқарушының, партия қызметкерлерінің тұлғасын бейнелейді. Осы алуандас кейіпкерлер Ғ. Мұстафиннің бұрынғы шығармаларында да ұшырасатын. Бірақ олардың ішінде партия қызметкерлерінің типтік бейнесін таныта алатын шынайы образ жоқ еді. Сөз болып отырған шығармасында жазушы сол бұрынғы кемшіліктерінен арылған. Ол Мейрам образы арқылы партия қызметкерінің жинақты бейнесін жасаған, партияның жетекшілік, ұйымдастырушылық ролін шынайы суреттей алған. Сондықтан да Мейрам образын Ғ. Мұстафиннің творчествосындағы бір қадам алға басу, ілгерілеу деп санау керек.

Жазушы оқушыны Мейрамның өткендегі өмірімен толық таныстырып жатпайды. Бірақ геройның ой толғаулары мен естеліктері арқылы автор оның бұрын кім болғаны жайында оқушыға бірсыпыра мәлімет бере алған.

Мейрам — тәрбиені де, білімді де тек мектептен алған жас кадр. Міне оқушымен алғаш рет кездескенде Мейрам осындай алаң ретінде көрінеді. Партия Мейрамды жасалып жатқан Қарағанды өндірісіне жібереді. Бұл —

бір жағынан Мейрамның өз тілегі еді. Жаңадан құрыла бастаған Қарағанды сияқты өнеркәсіп атыбы іс-әрекетке кең өріс беретінін Мейрам жақсы түсінеді. Күні кеше құлазып жатқан далада болып жатқан ғажайып өзгерістердің пафосы, еңбек романтикасы оны қатты қызықтырады. Мейрамның дәл Қарағандыға баруды қалауы да осыдан. Сонымен қатар болашақ істердің қиындығы мен жауапкершілігі оны қатты толғандырады да.

Мейрам Қарағандыда қайнаған еңбек дүниесімен, алуан түрлі адамдармен бетпе-бет кездеседі. Ол бұрын білімді, «даналықты кітаптан, алыстан іздесе», Мейрам сол керегін енді халықтың қалың ортасынап, соның өмірінен табады. Қарағандыға келісімен-ақ Мейрам жергілікті жағдайлармен, жасалып жатқан істермен жете танысады. Алғашқыда Мейрам тап болған қиындықтарды жазушы жуып-шаймайды, қайта оларды бар күрделілігімен, шынайы түрде суреттейді.

Институт қабырғасынан жаңада ғана шыққан Мейрамға шахта жайы, Қарағанды өмірі мүлдем таныс емес. Бұл жағдай оған көп қиындық келтіреді. Шахтадағы жұмыстармен, көміршілердің өмірімен, іс-әрекеттерімен байыпты түрде таныса келіп Мейрам өндірістегі қиындықтар әсіресе мол әрі күрделі екенін біледі. Шахталардағы еңбек өнімділігі нашар екенін көреді ол. Бұл, бір жағынан, техниканың тапшылығына, екінші жақтан, жұмысшылар кадрларының аздығына байланысты еді. Ал шахталарға ауылдан келген жаңа жұмысшылардың көпшілігі тез маманданып кете алмайды. Қалың көпшілікті үйрету, тәрбиелеу мәселесімен бірге оларға қажетті жағдайлар жасау міндеті де алға шұғыл тартылады. Міне кездескен қиындықтардың осындай күрделілігі мен жасалып жатқан істердің алуандығы Мейрамды үрейлендірмейді. Қайта сол қиындықтарға қарсы ол батыл құлаш ұрады және осы жолда өзінің бойындағы барлық қайрат-жігерін аямай жұмсайды. Сөйтіп, Мейрам өзін байыпты басшы, алғыр ұйымдастырушы ретінде танытады.

Мейрам образының бұл қуаттылығы оның халықпен, қалың көпшілікпен тығыз байланыстылығында. Ол өзін сол көпшіліктен, соның мақсат-мүдделерінен бөле-жарып қарамайды. Мейрамның негізгі тірегі коллективте. Жұмысшылардың еңбекке деген шын пейілі, құштарлы-

ты Мейрамның жанына жігер қосады. Мысалы, маман жұмысшы еңбек озаты Ысқақпен сөйлесе келіп, Мейрам оның бойынан «көмір теңізіне шөгіп жатқан шоппар белді төңкеріп тастайтын сана табады». Мейрамның Ысқаққа: «— Ағай, қолындағы шамыңнан кеудендегі шамың жарығырақ екен»,— деуі оның тек ризалық сезімін ғана білдіріп қоймайды. Бұл сөздерден жұмысшылардың социалистік еңбекке деген саналы қатнасын Мейрамның жоғары бағалайтындығын және содан өзі де қуат-жігер табатындығын танимыз.

Қайнаған еңбек дүниесінің қалың ортасында, алуан түрлі адамдармен бірге істес бола жүріп, Мейрам ширыға шынығады. Оның ой-өрісі кеңейіп, алғырлығы да арта түседі. Мейрам үшін жұмыстың үлкен-кішісі, жақсы-жаманы жоқ. Социалистік жаңа Қарағандыны жасау жолындағы ұлы-кішілі істер оны түгелдей толғандырады. Сондықтан да Мейрам әрбір құбылысқа сырттай болмашы көрінетін жайларға үлкен байыптылықпен, зер сала қарайды. Мысалы, Бондаренко, Жұмабай сияқты жұмысшылардың арасындағы жанжалға Мейрам ерекше мән береді. Өйткені, осындай елеусіз фактының сыртында жасырын сыр барын, яғни бұл — тап жауларының айлап салуының салдары екенін ол жақсы түсінеді. Сондықтан да Мейрам мұндай арандатушылық әрекеттерге қарсы леру және дұрыс шара қолданады.

Мейрам образында оптимистік қуат мол. Ол қолда барды қанағат етіп, шектеліп қалмай әрдайым алға ұмтылуды көздейді. Ол әрбір құбылысқа коммунистік саналылықпен қарайды, болашақтың биігінен қарап көзгітеді. Мейрам коммунизм жеңісін армандайды, ол жарқын идеал үшін күреседі. Бұл ретте де ол іскерлік пен саналылықты өзара тығыз байланыста алып қарайды. «Коммунизм бір күнде орнай ма! Бөгеттерді біртіндеп жеңе отырып жетеміз... Қалада қазір жүздеген шофер басшыларын жетелеумен жүр. Өз үйін баға алмаған хозяйка, өз машинасын жүргізе алмаған басшы «мүгедек» емес пе?» — деп ойлайды Мейрам.

Жазушы Мейрам мен Шербаковтың арасындағы достық қарым-қатнастарды да әсерлі бейнелей алған. Олардың бір-бірімен достығы нағыз коммунистке тән абзал қасиеттер негізінде, Қарағанды сияқты көмір өнеркәсібінің алыбын жасау жолындағы игі мақсат пен үлкен мүдделердің тұтастығы негізінде келіп туған. Егер тәж-

рибесі мол, көргені мен түйгені көп Шербаков Мейрамға ақыл-кеңесін айтып, ұстаздық жасап отырса, ал жігерлі алғыр жас Мейрам өзінің іскерлігімен, ұйымдастырушылық қабілетімен Шербаковты әрдайым қолдап, қуаттап отырады. Сөйтіп олардың арасындағы қалтқысыз, адал достық үлкен күшке айналады. Бірақ бұл достық олардың ортақ іс мүддесі үшін бірін-бірі коммунистерше сынауына бөгет жасамайды. Мысалы, іскерлігі жетпейтін Сейтқалыны шахта бастығы етіп орынсыз жоғарылатқаны, Жаппар мен Ырымбекті таңдамай жауапты қызметке алғаны үшін Шербаковқа Мейрам: «Сізде жақсы ниеттен туған жарамсыз бір мінез бар. Қазақты талғамай сүйесіз»,— деп қатты сын айтады. Шербаков Мейрамның бұл әділ сынынан тиісті қортынды шығарады. Уақыт, өмір шындығы Мейрам пікірінің дұрыстығын көрсетеді.

Халықтың қалың ортасынан шыққан, оның ауыр тұрмысын, ащы мұңын жастайынан көріп өскен Мейрам сол халық мүддесі үшін қызмет етуді өзінің ең басты, игі борышы санайды. Кейін сұрастыра келе өзінің жакын ағайыны болып шыққан қарт Жайлаубайға қандай мейірімділік жасаса, жаулардың қастық әрекеті салдарында зәбір-жапа шеккен Маусымбайға да Мейрам сондай жылы шырай көрсетіп, қамқорлық жасайды. Мейрамның бойындағы осындай гуманистік қасиеттерді жазушы сол образдың табиғи сипаты ретінде ұсынады. Романда Мейрам өзінің іскерлігімен, алғырлығымен ғана емес, сонымен қатар нағыз коммунистке тән рухани-моральдық тазалығымен, адалдығымен, аяулы сезімдерімен де тұтас, жарқырап көрінеді.

Қандай тосқауылдар кездессе де, тайғақтық жасамай, қиындықтарға төтеп беру, қысылшаң жағдайлардан көрегендікпен жол тауып шығу, қалың көпшілікті еңбек майданында ұйымдастырып, бастай білу және сол көптің пікірімен санасып, одан әрдайым үйреніп отыру сияқты, партия қызметкерлерінің бойына лайық абзал қасиеттерді жазушы осы Мейрам образы арқылы жинақтап бере алған.

Қарагандыға алғаш шахтадағы партия ұйымдастырушысы болып келген Мейрам кейін партияның қалалық комитетінің секретары болып істейді. Романның соңғы тарауларында Мейрамның республикалық жауапты қызметтердің біріне жоғарылатылғаны жайында айтылады.

Сөйтіп ол қатардағы қызметкерден мемлекет қайраткері дәрежесіне дейін көтеріледі. Мейрамның бұлайша биіктеуін социалистік, жаңа Қарағандының жасалуы мен өсуі процесінен бөліп алып қарауға болмайды.

Романда Мейрамның осылайша заңды да лайықты түрде, сатылап өсу жолының нанымды да көркем шындығы бар.

Сөз болып отырған шығармадағы тұлғалы, бедерлі образдардың бірі — Сергей Петрович Шербаков. Автордың экспозициялық баяндауынан оқушы Шербаковтың ата-бабалары да шахтер болғанын, өзі де он төрт жасынан бастап шахтада істегенін, кейін Москвада өндіріс академиясын бітіргенін біледі.

Партия Шербаковты Қарағандыға трест бастығы етіп жібереді. Қарағандыға келісімен-ақ ол шұғыл іске кіріседі. Ағылшын капиталистері қашып кеткеннен кейін шахтаны күзетіп қалған ескі жұмысшы Ермек заводтың кілтін Шербаковқа табыс етеді. Осы эпизодта символикалық үлкен мән бар сияқты. Ермек берген кілтті қолына алып тұрып, Шербаков көпшілікке қарап былай дейді: «...Осы далада Апақ Байжанов қой бағып жүріп, суыр інінен Қарағанды көмірін тапқалы жүзге жуық жылдар өтіп барады. Содан бері орыс-ағылшын капиталистері қазақ жерінің байлығын, қазақ халқының арманын осы кілтпен жауып ұстағандай болса, біз енді осы кілтпен бәріміз ашамыз. Коммунист партиясы, совет өкіметі жіберді бізді... Жұмыс көп, қиындықтар көп, бірақ халық күші одан да көп. Ол күшті ұйымдастыра білсек, біз алмайтын қамал жоқ...»

Ермектің Шербаковқа ұсынған осы кілті ескі Қарағандыны жаңа өндіріс алыбына айналдыру жолында жұмсалатын зор еңбектің эстафетасы тәрізді. Бұл эстафета сенімді де берік қолда. Романның басқа кейіпкерлері сияқты, Шербаков та өзі айтқан сол «көп қиындықтарды, көп жұмысты» игеру үстінде суреттеледі.

Еңбек майданында шыныққан Шербаковтың өмірлік мол тәжірибесі бар. Ол өзінің іскерлігін жаңа Қарағанды жасалуының алғашқы кезеңінде, яғни қиындықтар мол да күрделі болған шақта әсіресе айқын танытады. Шербаков жұмысшыларды творчестволық еңбекке шеберлікпен жұмылдыра біледі. Шербаковтың күші оның коллективпен тығыз байланысында. Коллективке басшылық жасап, оған арқа сүйеумен бірге ол сол көпшілік-

тен өзі де әрдайым үйренсе, өнеге ала жүреді. Шербаковтың үлкен адамгершілік сезімдері оның Мейраммен қарым-қатнастарынан анық көрінеді. Ол Мейрамға әкелік қамқорлық сезімімен, жылы мейріммен қарайды. Шахтаға алғаш келгенде тәжірибесі аздықтан қиындық көрген Мейрамға ақыл-кеңес беріп, оны жаза басудан, жаңсақ әрекеттер жасаудан сақтандырып отыратын да — сол Шербаков. Осы екі кейіпкерінің арасындағы достықты жазушы зор көркемдік қуатпен, әсерлі бейнелеген. Мейрам мен Шербаковтың өзара бұл достығы жұмыстың ортақ мүдделері үшін олардың бірін-бірі сынауына бөгет жасамайды. Қайта, олар осы достықты ұлттар арасындағы татулықтың белгісі деп танып, оны қастерлеп, жоғары ұстауға ұмтылады. Романның соңғы тарауларының біріндегі Шербаковтың: «— Бізде не жасалса, бірлестік күшімен жасалады... Ұлт достығындай, жолдастық достықтар да мызғымасын!» — деген сөздері осы игі ниетке, шын ықылас сезіміне толы.

Шербаков образының осындай құнды жақтарын атап көрсетумен бірге осы кейіпкерінің бейнесін жасаудағы жазушының елеулі бір кемшілігі жайында да айтпауға болмайды. Бұл кемшілік романның соңғы көптеген тарауларында Шербаков образының өсу үстінде берілмей, статикалық күйде қалып қоюына байланысты. Жаңа Қарағандыны жасаудың алғашқы кезеңі суреттелетін тарауларда мол да жарқын көрінетін Шербаковқа автор кейін кесек қимылдар, аршынды әрекеттер жасатпайды. Осының салдарынан бұл ұтымды геройдың өсу өрісі, әрекет шеңбері едәуір тарылып қалған.

Бірақ, негізінен алғанда сәтті де шынайы жасалған Шербаков образының көркемдік құндылығы мен әсер етушілік қуатын бұл кемшілік, әрине, әлсірете алмақ емес. Шербаков — өмір шындығынан алынған, айқын да жанды образ. Бұл образ арқылы жазушы Қарағанды құрылысының алғашқы кезінде трест бастығы болып істеген, Донбастан келген тәжірибелі, кәнігі кенші Корней Осипович Горбачевтың тұлғасын бейнелеген. Бірақ Шербаков образы — осы прототиптің жалаң көшірмесі емес. Шербаков бейнесінде автор орыс адамына тән тандаулы қасиеттер мен жақсы сипаттарды жинақтап, типтендіріп көрсеткен.

Романда жұмысшылардың көптеген тартымды, қызғылықты образдары бар. Егер Сентқалы, Ермек, Ысқақ

сияқты кейіпкерлердің бейнелерінен Қарағандымен бірге жасасып келе жатқан ескі жұмысшылардың тұлғаларын танысақ, ал Жанәбіл, Боқай, Балжан, Жұмабай образдарынан жұмысшы табының жаңа буынының, яғни жұмысшылардың ауыл кедейлері мен малшылардың арасынан шыққан өкілдерінің өмірі мен тағдырын көреміз. Бұл кейіпкерлердің өмірлік жолдары қандай әралуан болса, олардың характерлері, ой-сезімдері де өзара соншалықты өзгеше. Бірақ, өздері мұрат етіп күресіп жүрген мақсат-мүдделердің ортақтығы оларды бір-бірімен соншалықты жақын табыстырып жіберген. Геройларының характерлеріндегі осындай ортақ сипатты баса бейнелеуге жазушы ерекше назар аударған.

Бұрын ағылшын капиталистерінің езгісінде болып, әбден титықтап қалған Ермек, Ысқақ, Сеитқалы сияқты қарт жұмысшылар жаңа Қарағандыны жасау жолындағы күресте өздерінің жанқиярлық еңбегімен көзге ерекше түседі. Олардың бойларындағы мұндай өзгерістердің мотивировкасын жазушы Ысқақтың мына бір сөздері арқылы ұтымды ашып тастайды. «Ағылшындар, подрядшіктер үшін де төгілген бұл тер. Төбеден су сорғалап, тізеден саз кешіп, еңбектеп тартатынбыз шананы. Сөйтіп тапқан тиыннан да жейтін олар. Енді жеуші жоқ. Ұқсата алмасаң, өз обалың өзіңе»,— дейді Ысқақ, өзі көзімен көрген екі дәуірді салыстыра келіп. Азат еңбек және оған деген социалистік, саналы көзқарас адамның жасампаздық қуатын молайтып, еселендіре түседі. Осы бір ойды жазушы образды түрде көркем бейнелей алған.

Аталған кейіпкерлердің ішінде жазушының көбірек назар аударғандары — Ермек пен Жанәбіл. Бұлар жұмысшы табының екі түрлі буынының өкілдері болып табылады. Ермек — тәжірибелі, көнігі шахтер. Ол өзінің мамандығын шын жүректен сүйеді. Рас, оның әр кезеңдегі шахтерлік еңбекке деген көзқарасы бірдей болған жоқ. Бұл заңды да. Егер Ермек бұрын шахтерлік еңбекті әйтеуір күштелудің амалы деп санаса, ал советтік дәуірде оның өз еңбегіне қатнасы мүлдем өзгереді. Ол енді еңбектің қоғамдық сипатын дұрыс түсінетін дәрежеге көтеріледі. Ермек өзі ғана еңбек озаты болумен шектеліп қалмайды. Сонымен қатар ол басқалардың да жемісті еңбек етуін көздейді. Әкім сияқты жас шахтерге оның ұстаздық қамқорлық жасауы осыны көрсетеді.

Ермек — өсу үстінде берілген образ. Ол қарапайым жұмысшыдан шахта бастығына дейін көтеріледі. Бұл ретте жазушы оны әйтеуір өсіре салмайлы. Қайта Ермектің осындай өрлеу жолы романда кеңінен әрі шынайы бейнеленген.

Романдағы қызғылықты образдардың бірі — Жанәбіл. Жазушы Жанәбілдің образын жеткілікті дәрежеде даралай алған. Ол ең алғаш көрінген сәттерінен бастап-ақ өзінің характерімен оқушыға айқын танылады. Оның бойында жалын атқан қайрат, еңбекке деген құштарлық бар. Алдына қойған мақсатына жету жолында Жанәбіл қандай қиындықтардан болса да жалтармайды. Қайта ол қиындықтар кездескен сайын еселеген жігермен күреседі. Тәжірибелі орыс жұмысшыларының көмегімен Жанәбіл тез уақыттың ішінде-ақ ысылып, маманданып алады. Ол алғашқыда токарь-техник болып істейді, кейін Москвадағы жоғарғы партия мектебінде скиды. Романның соңғы тарауларында партияның қалалық комитетінің секретары болып тағайындалған Жанәбілдің осы салада да белсене еңбек етіп жүргенін көреміз. Сөйтіп, бір кездегі «ойы қолынан шорқақ, қолы ойынан шорқақ» жалшы Жанәбіл енді зор коллективке саяси басшылық ететін үлкен ұйымдастырушыға айналады. Жазушы Ермек пен Жанәбілді және өзінің басқа да көптеген кейіпкерлерін осылайша өсу үстінде көрсеткенде әсірелеушілікке де, схематизмге де ұрынбаған. Жоғарыда аталған кейіпкерлердің еңбекте, қызметте ғана биік дәрежеге көтеріліп қоймағаны, сонымен қатар олардың ой-өрісі кеңейіп, жан дүниесі байығандығы да романда реалистік түрде бейнеленген. Күні кеше ғана азапты тұрмыстың ауыр тақсіретін тартқан, совет өкіметі жылдарында бақытты өмірге қолы жеткен осы жандардың жарқын тағдыры социалистік қоғамымыздың, Коммунистік партияның қайта жасаушылық, тәрбиелеушілік қуатына айқын айғақ болып табылады.

Романның негізгі тақырыптарының бірі — жаңа дәуір әлеуметтік қызметтің кең өрісіне шығарған қазақ әйелінің тағдыры туралы тақырыпты жазушы Ардақ образы арқылы шешкен.

Ардақтың тағдыры мен өмірі оқушыны қатты қызықтырып, толғандырып отырады. Ол — бұрын елді зар жылатқан, «шынжыр балақ, шұбар төс» болыс болған, кейін атын өзгерттіп жасырынып жүрген Әлібек сияқты

адамның қызы. Бірақ ол Әлібектің тәрбиесінде де болмаған, оның әкелік мейірімін де сезіп көрмеген. Оның ес біліснен кейін көргені — совет шындығы, тәрбие алған орны — совет мектебі. Ардақ — советтік дәуір тудырған жаңа адам. Ол әке ырқына көнбістікпен табына беруден аулақ. Қарағандыға алғаш келген шақта Ардақты онда жасалып жатқан зор істер қатты қызықтырды. Жігерлі, жанарлы жас Ардақ та көппен бірге еңбек етуге, сол ортақ іске өз үлесін қосуға ұмтылады. Өйткені, ол өз өмірінің мағнасын еңбектен, халық игілігіне қызмет етуден іздейді. Бірақ Ардақ үлкен өмірдегі өз орнын бірден және оп-оңай тауып ала қоймайды. Сөйтсе де ол коллективке пайдалы болу тілегінен танбайды. Оның құрбысы Майпаны қасына ертіп қанау қазу жұмысына қатнасуы, маман жұмысшы болуға талаптануы бұған айқын дәлел.

Мейрамның және Шербаковтың ақыл-кеңесімен Ардақ кейін жұмысшылардың сауатын ашатын мектепте мұғалима болып істейді. Өйткені осы қызмет үшін Ардақ әсіресе қажет еді. Сауатсыз, қарт жұмысшыларды оқыту, үйрету оңайға соқпайды. Ардақ көп қиындықтарға кездеседі. Бірақ ол мойымайды. «Буыны қатып» кеткен қарт жұмысшыларды Ардақ шын ықыласпен оқытады. Ол өзінің қуанышы мен бакытын да осы игі қызметтен табады. Сөйтіп жазушы Ардақтың образын оның әлеуметтік қызметте неғұрлым көбірек көрінуіне сәйкес терең де мол ашады.

Жазушы Ардақтың іс-әрекетін, еңбексүйгіштігін бейнелеумен бірге оның рухани тазалығын, адамгершілік сезімдерін суреттеуге де көп көңіл бөлген. Бұрын қанды-балақ, жыртқыш болған әке жаулық ниеттен тиылып, түзелді ме, әлде ол қастандық ойларын бүркемелеп, жасырын жүр ме? Міне осы бір күдікті сұрақ Ардақты ұзақ уақыт бойы қинай толғандырады. Бұл жағдай Ардақтың Мейрамға деген сүйіспеншілік сезімдеріне де көп салқынын тигізеді. Ардақтың осындай рухани драмасын жуып-шаймай, бар күрделілігімен жеткізе аша отырып, жазушы сүйікті кейіпкерінің моральдық тазалығын, жан дүниесінің байлығын шынайы суреттей алған.

Сонымен қатар жоғарыда Шербаков образына тағылған сынды осы Ардақ бейнесіне байланысты да айтуға болады. Яғни, жазушы Ардақтың Мейраммен қосылған

нан кейінгі өмірін сараң да үсірт суреттеген, оның әлеуметтік қызметінің өрісін тым тарылатып жіберген. Ардақтың аспирантурада оқытылдығы, диссертация жазып жүргендігі жайында жазушының өз тарапынан берген сырдаң баяндаулары бұл образды, әрине, өсіре алмақ емес. Романның соңғы тарауларында да автор Ардаққа оның өзіне лайық іс-әрекеттер жасатуға, сөйтіп кейіпкерінің характерін дамыта суреттеуге тиіс еді. Бірақ ол бұлай етпеген.

Жалпы алғанда, кейбір жекелеген кемшіліктеріне қарамастан, жазушы Ардақ образын қызғылықты да тартымды етіп жасай алған.

Романның ұнамсыз кейіпкерлерінің ішінде басқалардан гөрі оқшау да мол көрінетіні — Әлібек. Бұрын еңбекші халықты сүліктей сорған, совет өкіметінің қас жауы болған бұл қорқау сол қара ниетінен әлі қайтпаған. Бірақ ол енді алыс-тартыстың жаңа, жасырын тәсілдеріне ауысқан. Әлібек өзінің өктемдігі жүріп тұрған өткен өмірді өгейлейді. Ал зор қарқынмен жасалып, еңсесін биік көтеріп келе жатқан жаңа дүние оның апшысын қуырып, жаныштай түседі. «Шіркін кең дүние?» — деп көкірек жара, шерлене күрсінугі оның іштей таусылып, өзін өзі жегідей жеп жатқанын аңдатады. Бірақ ол қарап өлмеуге, шамасынан келгенше зарарлы уытын көбірек жаюға тырысады. Басқа жау кейіпкерлерге қарағанда Әлібекте кимыл, әрекет мол. Шахтаны құлатып, зиянкестік жасайтын да, жұмысшылардың арасында ұлт араздығын қоздыруға тырысатын да, жекелеген маман кадрларды өлтіретін де, Махмет сияқты ашық ауыз адамдарды өзінің қастық мақсатына көлгірлікпен пайдалана білетін де — осы Әлібек. Оның өткені қандай күңгірт болса, келешегі де сондай қараңғы, үмітсіз.

Әлібектің адамгершілік сезімдерден жұрдай болған жауыздығы оның туған қызы Ардаққа деген қарым-қатынасынан да анық байқалады. Қашып кеткен жерінен қайтып келіп, Ардақты өз қолына алғанда Әлібек мұны әкелік сезімі оянғандықтан жасамайды. Совет мектебінде тәрбиеленген, білімді, парасатты Ардақты қолында ұстау арқылы Әлібек өзінің өткендегі айыпты іздерін жасыруға тырысады. Ал кейін Ардақтың советтік идеяға шын жүректен берілгендігіне көзі жеткеннен кейін Әлібек оны өзіне жау санайды. Ол тіпті Ардақты өлтіру жөнінде де ойлайды.

Әлібектің осындай зиянкестік әрекеттерін, жаулық ниеттерін, оның рухани жағынан құлдырап азғындағанын жазушы шынайы суреттейді. Осы тұрғыдан алып қарағанда Әлібек бейнесін типтік дәрежеге көтерілген образ деп санауға болады.

Ал романның басқа ұнамсыз кейіпкерлері (Жаппар, Ырымбек) жөнінде мұны айту қиын. Бұларда аршынды іс-әрекеттер де, айқын характер де жоқ. Жаппар мен Ырымбектің зұлымдық әрекеттерін жеріне жеткізе әшкерелеудің, сөйтіп олар өкілдері болып табылатын жау әлеуметтік топтың түп төркінін терең ашудың орнына жазушы схемалық үлгілерге салынған, шаблонға ұрынған. Бұл кейіпкерлердің образдарының терең ашылмауы, олардың зиянды іс-әрекеттерінің жете көрінбеуі романдағы негізгі тартыстың өткірлігін едәуір әлсіреткен.

Романда бұлардан басқа да образдары толық та айқын көрінбеген көптеген кейіпкерлер бар. Әшірбек, Чайков, Қозлов, Лапшин, Майпа сияқты геройлардың бейнелері бұған анық дәлел. Жазушы бұларды көркем образ ретінде жеткілікті даралай алмаған.

Романның композициялық құрылысында, ондағы тартыстардың шиеленісе өрбуінде де бірсыпыра кемшіліктер бар. Бұл ретте романның үшінші бөлімін мысалға алуға болады. Жазушының көтерген негізгі тақырыптары романның алғашқы екі бөлімінде өздерінің қажетті көркемдік шешімін тапқан. Қарағанды сияқты өндіріс алыбының қалай жасалғаны туралы да оқушы жеткілікті түсінік алады. Романның негізгі кейіпкерлері де өздерінің характерімен, іс-әрекеттерімен көрінеді. Осы жеткілікті де. Шығарманың оқиға желісін бұдан әрі жасанды түрде соза беру қажетсіз еді. Бірақ автор мұны ескермеген. Соның салдарынан романның үшінші бөлімі шығарманың жалпы идеялық-көркемдік арқауымен заңды түрде қабыспай, тек эпилогтың қызметін ғана атқарып тұр.

Романның атап айтуды қажет ететін тағы бір кемшілігі бар. Жазушы еңбек процесін мол көрсетемін деп отырып, кейде негізгі нысанадан алыстап кетеді. Мұндай реттерде ол жалаң технологияны баяндауға ұрынып, кейіпкерлерінің жан дүниесін, сезім күйлерін біраз көлегейлендіріп алады. Романның жоғарыда аталған бірсыпыра кейіпкерлерінің образдары жарқын болып шықпағандығының себебі осында.

Жазушы оқиғалар өрбуі арқылы ашылуға тиіс көптеген жәйттерді көркем бейнелеудің орнына кейде жалаң баяндаулармен ғана шектеледі. Мысалы: «Айлар, жылдар өтті. Шахталар мүлде өнерді. Шахта өзгерісі бүкіл Қарағандыны өзгертті. «Техника бәрін шешеді» демейді қазір. «Кадр бәрін шешеді» дейді. Техника жасалды, енді соны еркін меңгеру жарысы кетіп барады. Жаңа техникадан туған стахановтық қозғалыс шеттегі кішкентай шұрфтарға, дала кезген бұрғышы партияларға дейін жайылды». Образдық нақтылығы жоқ мұндай схемалық баяндаулар шығарманың сюжеттік өрбуін сырдаң тартқызып, оның көркемдік қуатын әлсіретеді. Бұл баяндаулардан оқушының көңлінде де ештеңе ұялап қалмайды.

Рас, мұндай жалаң да жадағай көріністер романда көп кездесе бермейді. Бірақ аз ұшырасқанмен, шығарманың көркемдік тұтастығына ақау салатын осындай сұрқай суреттерді жазушының көрінеу байқамауы таңқаларлық нәрсе.

Романда бұлардан басқа да үлкенді-кішілі кемшіліктер бар. Бірақ біз оларды жіпке тізгендей санап жатпай-ақ, осы айтылғандармен шектелеміз.

«Қарағанды» романы Ғ. Мұстафиннің жазушылық шеберлігі жетілу, кемелдену жолында екенін танытты. Бұрынғы шығармаларымен салыстырғанда бұл романда жазушы өмір шындығын толық та жарқын бейнелейтін оқиғаларды барынша мол қамтуға және оларды типтік жағдайларда суреттеуге ерекше назар аударады. Яғни, «Қарағанды» — көп планды, көп тақырыпты роман. Атап айтатын бір нәрсе — шығармада қозғалатын осындай көптеген тақырыптар мен онда жарыса, кезектесе өрбитін бірнеше сюжеттік желілердің әрқайсысы өз алдына бөлек, дара күйде қалып қоймаған. Автор оларды бір-бірімен шебер байланыстыра, алған. Сондықтан да, романды оқып шыққанда онда көрсетілген өмір шындығын, яғни жаңа Қарағандының жасалуы көріністерін көз алдымызға тұтас та айқын елестете аламыз.

Ғ. Мұстафиннің образ жасаудағы өзіндік ерекшеліктері мен шеберлігі оның алғашқы шығармаларында да байқалған болатын. Бірақ ол бұрын көбінесе негізгі, басты геройларының образдарын терең ашқанмен, екінші қатардағы кейіпкерлерінің бейнелерін жеткілікті дараландырып бермейтін. Ал «Қарағанды» романында жазушы

кейіпкерлерінің қай-қайсысын болса да өзіндік пілмен, тұлғасымен айқындап, суреттеуге ұмтылған және көп реттерде ол бұл мақсатына жете алған да. Романның көптеген героилары өздерінің іс-әрекеттерімен ғана емес, сонымен қатар жан дүниесінің, характерінің тереңдеп ашылуымен де дараланып көрінеді.

Жазушы образды айқындай түсу үшін суреттеу құралдарын мол әрі түрлендіре отырып қолданады. Бұл ретте оның кейіпкерлердің диалогтары мен репликасын әсіресе ұтымды пайдаланатынын еңалдымен атап айтуға керек. Бір мысал келтірейік:

«— Жанәбіл, ау Жанәбіл! — деді шалқасынан жатқан шоқша сақал, басын көтермей, сақалын ширатып жатып, — сен қайда істемексің?

Шелск танау жігіттің аты Жанәбіл екен. Теріс қақпай жауап қайырды:

— Совет жерінде істеймін.

— Бар болғыр, дұрыс сөйлесеңші.

— Ендеше өнер дүкенінде істеймін.

— Онысы қай жер?

— Анау тұрбаның түбінде мехцех бар. Мехцехта үйтен-тек Бәйтен бар. Қасақана сонымен бірге істеймін.

— Ауылдағы мінезді қойсаңшы, шырағым, — деп шоқша сақал басын көтерді. — Ескі жұмысшымен байланыспа. Нан тауып жүре бер.

— Бұға берсен, сұға береді, — деді Жанәбіл, — мінезде де, жұмыста да тайталас керек. «Он сегіз жыл стажым бар» деп қожандайды Бәйтен. Өзі егеуді қалай ұстауды білмейді. Мен екі-ақ жыл батырақ болдым, қой бағуды сұрашы, кәне? Екі жыл мехцехта істесем, Бәйтеннің әкесін танытам».

Міне, оқушы осы диалогтағы сөздерінен Жанәбілдің алған бетінен қайтпайтын қайсар мінезін, намысшылдығын танып қана қоймайды, сонымен қатар оның бұрын кім болғанын және енді не істеуге бел байлағанын да біледі. Сондай ақ, осы диалогтан Жанәбілмен сөйлесіп отырған шоқша сақалды аламың бұйығы, жасқаншақ мінезі де айқын көрінеді және Бәйтеннің қандай адам екендігі жайында да оқушы бірсыпыра мәлімет алады.

Бұрынғы шығармаларымен салыстырғанда бұл романында жазушы портреттік сипаттауларды да мол қолданған. «Әлібек малдасын құрып, төмен тұқырына қарап, төр алдында отыр. Бұрын басын мұнша еңкейтпей-

тін майлы бұғақ суалған. Көлденеңі шығыңқы, жалпақ беті де қалың еттен айрылып, ұрты ортая, бет сүйектері шыға бастаған. Көмірдей қара шашыпа, тығыз, дөңгелек қара сакалына алашабыр ақ еніпті. Төмен қарап тұнжырап, табжылмастан отырса да, тереңде жатқан жылап көз анда-санда жылт етіп, жар қабақтың астынан бәрін бақылап қояды. Үлкен денелі қара кісінің дәл осы отырысы, тышқан андыған үлкен қара құстың отырысы сияқты еді». Бұл келтірілген үзіндіден Әлібектің амалы таусылып, іштей қалжырап құлдырағандығы және оның зияндылығы мен аярлығы бұрынғыдан бетер асқына түскендігі айқын аңғарылады. Кейіпкерлердің жан күйін, психологиясын терең ашып, жете танытатын мұндай жарқын портреттік сипаттауларды романнан мол ұшыратуға болады.

«Қарағанды» романы өзінің тілдік ерекшеліктерімен де айрықшаланып көрінеді. Сөз болып отырған шығарманың тілі мол ғана емес, сонымен қатар образды әрі орылымды да. Жазушы халықтық сөйлеу тілдің және әдеби тілдің ерекшеліктерін жақсы сезінеді және кейіпкерлерінің образдарын жете аша түсу үшін сол тілдік ерекшеліктерді орнымен, шебер қолдана біледі.

Романда өндіріс процесіне байланысты атаулар, шахтерлердің тұрмыс ерекшеліктері мен кәсібіне сәйкес алынған жекелеген сөздер мен сөз тіркестері мол кездеседі. Мұндай сөз орамдары оқушының түсінігіне ауырлық келтірмейді, қайта бұл жазушының өзі суреттеп отырған өмірінің колоритын терең ашуына, кейіпкерлерінің сөйлеу ерекшеліктерін, ой-өрісін танытуына көбірек мүмкіндік береді.

Жалпы алғанда, «Қарағанды» романы Ғ. Мұстафиннің елеулі де көрнекті творчестволық табысы болып табылады. Бұл шығарма жазушының өнер биігіне өрлеу жолында екенін көрсетті, оның творчестволық мүмкіншіліктері мол екенін танытты.

Совет Одағы Коммунистік партиясының XX съезінде сөйлеген сөзінде А. Сурков көптеген совет жазушылары өмірмен тығыз байланыста болудың арқасында көркем де келелі шығармалар жазғандығын айтты. Осындай жазушылардың қатарында ол Ғ. Мұстафиннің де есімін атады. Расында да, Ғ. Мұстафиннің шығармаларының, әсіресе оның соңғы романының жұртшылыққа кең таралып, ол танылғандығының сыры жазушының өз ге-

ЕСЕЮ КЕПІЛІ

Кемелденіп өскен әдебиет өзін тудырған халықтың өмірі мен тағдырының көркем шежіресі болумен бірге өзге жұрттардың да тарихына, тіршілігіне назар аудармай қоймақ емес. Қазіргі қазақ әдебиеті осындай қасиетті барған сайын жақсырақ та молырақ танытып келеді. Рас, өзге жұрттар тақырыбына арнап шығарма жазу дәстүрі қазақтың өткендегі әдебиетінде де ара-тұра бой көрсетіп қалатын-ды. Бірақ мұндай дәстүрді қолданған ақындар шет жұрттардың өмірін, тарихи ортасы мен тағдырын, әралуан кейіпкерлерді тек шартты түрде ғана алып, солардың бәр-бәрін өздерінің адамгершілік идеалдарына, ғибратшылдық ой-армандарына қабыстыра, ұштастыра отырып жырлайтын немесе басқа елдердің әдебиетінде бұрыннан бар сюжеттерді кәдеге жарататын.

Ал қазіргі ақын, жазушыларымыз шет жұрт тақырыбына арналған шығармаларында да тарихи шындықтан шалғай кетпейді, көркем бейнелеудің реалистік принциптерінен тая соғып, жаза баспайды. Олар әр халықтың өткені мен бүгінгісін, тағдыры мен тартысын шынайы суреттеумен бірге өздерінің сол тарихи шындыққа деген суреткерлік қатнасын, сол халықты іш тартқан гуманистік ықласын да анық аңғартып отырады. Кезінде осындай қасиетті шет жұрт тақырыбына арналған повестерінде Сабыр Шәріпов айқын сездірген еді.

Соңғы жылдары қазақ совет әдебиетінде шет жұрт тақырыбына арналған шығармалар соны бір жанр тудырып келеді. Олардың дені — жол-сапар очерктері. М. Әуезов, С. Мұқанов сияқты аға жазушылардың бұл саладағы еңбегі әсіресе жемісті де қызғылықты екені баршаға аян. Бұл очерктерде авторлар өздері болған елдердің арғы-бергі тарихы, қолтума мәдениеті мен өзгеше өнері жайында, әралуан халықтардың мінез-құлқы, салт-санасы, этнографиялық ерекшеліктері жайында қазақ оқушысына көп-көп мағлұмат берді. Сонымен бірге осы очерктер авторларының ойлы топшылаулары мен айқын әсерлеріне де толы болып келеді. Сол сияқты, енді шет жұрт тақырыбына арналып көркем де кесек, ірі-ірі шығармалар да туа бастады. Осын-

дай сүйекті туындылардың бірі — жазушы Ж. Тілековтың «Жоңғар даласында» атты романы. «Жоңғар даласында» Қытайдың Шыңжаң өлкесін мекендеген халықтардың өмірі мен азаттық жолындағы қиын-қиын күресіне арналған. Атақты ақын Қ. Аманжоловтың «Құпия қыз» поэмасын былай қойғанда, бұл роман — осы тақырыпқа арналған тұңғыш әрі бірден-бір кесек шығарма болып табылады. Оның оқушы назарын ерекше аударуының негізгі бір сыры да осында болса керек. Ж. Тілеков өзінің романында тың тақырып қозғағанын, қазақ совет оқушысына бұрын бейтаныс өлкенің өмірін суреттегенін жоғарыда атап өттік. Осының өзі-ақ жазушының творчестволық көп азапты, талай-талай қиындықтарды басынан кешіруге тура келгенін байқатады. Өйткені, әлі қалам тимеген тың нәрседен гөрі әдебиетте талай рет суреттелген жәйттер жазушының творчестволық ізденістерінің өрісін кеңейтіп, оның шындықты бейнелеуіне оңтайлырақ соғатыны да болады.

Автордың аңғартуынша бұл — көп томды романның алғашқы кітабы. Онда 1943—1945 жылдардың оқиғалары баяндалады. Бұл Қытай халқының империализмге қарсы азаттық соғысының қанатын кең жайып барып, жеңіспен аяқталған кезеңі. Осы кезде Қытай коммунистік партиясы бүкіл халықты біртұтас майданға біріктіріп, революциялық шешуші шайқасқа бастады. Бұл күрес Шыңжаң өлкесінде әсіресе қиын, қым-қуыт жағдайда өтті. Өйткені, Шыңжаңда біртұтас майданның ұйымдасып, өрістеп кетуіне жергілікті ұлтшылдықтың, панисламизм мен пантюркизмнің көп кеселі тиді. Сондықтанда онда бүкілқытайлық жаңа демократиялық революция қалың бұқаралық қозғалыс түрінде жүргізілді.

Романның алғашқы үш тарауында осы қозғалыстың стихиялық сыйпаты суреттеледі. Ал кейін күреске халық қаһармандары, революцияшыл демократтар, қытай жұмысшы табының шындалған өкілдері, шыныққан коммунистер араласқаннан соң қозғалыстың мақсаты бүкілқытайлық революцияның мұрат-мүдделерімен ұштасады. Осы тарихи шындық романның одан арғы тарауларында бейнеленеді.

«Жоңғар даласында» оқиға қалың, тартыс талқысы мейлінше өткір. Бұл — оның ең бағалы көркемдік қасиеттерінің бірі. Рас, романның алғашқы тарауларында баяндалатын оқиғалардың қызғылықты болумен бірге ішінара

детективтік сипат сездіретін мезеттері де баршылық. Бірақ шығарма кейіпкерлерінің дүниетану, интеллектуальдық дәрежесіне және олардың характерлерінің шынайдығына снымды, жапасты алынғандықтан сол оқиғалар соншалықты жасандылық байката бермейді.

Мәселен, жас қыз Ю-ланның генерал-губернатор сарапында жасаған батыл қимылына да, Арыстан мен Саррашавтың оқыс әрекеттеріне де риясыз сеніп отырасың. Романның соңғы тараулары да оқиғаларының қоюлығымен әрі шынайылығымен ерекшеленеді. Бұл тұста шығарма шын мәнісіндегі байсалды, реалистік прозаға қас қасиеттерді тұтастай алғанда тәуір аңғартады. Өмір оқиғаларының ішінен ең кенеулілері мен авторлық идеяға, негізгі нысанаға дөп тиетіндерін сұрыптап жинақтай білу, эпикалық серпін мен драмалық өткірлікті табиғи түрде ұштастыра алу, тартыс талқысы өрістеген, кейіпкерлердің іс-әрекеттері желіленіп, характерлері қалыптасып айқындалған орташы реалистік түрде таңыту, тарихи шындық пен көркемдік шындықты ажырамастай етіп қабыстыра ұштастыру тәрізді сыйпаттарды және басқа да көптеген көркемдік компоненттерді жазушының мол игеріп, ысылып қалғандығын атап айтпасқа болмайды.

Ж. Тілеков өмір шындығын бетінен қалқымай, қарбытып қамтуға, бір күрделі күйінде алуға ұмтылған. Романда мақсаты, күрес нысанасы бірыңғай біртұтас майдан өкілдері де, жаңалыққа талпынған жас күштерге қарсы қаспыса алысқан керітартпа, дүлей күш иелері де схемалық түрде, сырдаң да жадағай алынбай, өздеріне тән мінез-құлықтарымен, іс-әрекеттерімен, ішкі қайшылықтарымен тұтас көрінеді. Бұл роман кейіпкерлерінің мол болуымен бірге олардың тағдыры мен талайының қиян-қиялы, әралуан болып шығуына әсер еткен.

Шығарманың Алмас Қарим, комиссар Чжан, Ахмеджан Қасыми, Арыстан, Ю-лань, Асқар сияқты басты-басты соқталы бейнелерін былай қойғанда онда Адаләт, Барлық, Асылжан, Самед Авази, Серік тәрізді екінші қатарда алынған образдар да баршылық. Роман оқиғалары өрбіп дамитын хал-халеттер мен жанды адам тағдырларын айқындап ашатын да, шығармаға көп реттерде шынайы өміршенділік пен қасиет-қуат бітіріп тұрған да— сол бейнелер.

Бұл да — романның бағалы сипаттарының бірі. Өйткені, автор бір кейіпкерін әдейі жете суреттеймін деп оты-

рып, басқа бір образды орыпсыз көлегейлеп қалуға бой алдырудан аулақ. Кейіпкерді өсірудің жолы осы екен деп, сны отқа да, суға да сала беруге болмайды. Әр кейіпкер өз характерінің шындығына, өзінің табиғи тұлғасына, болмысына лайық іс-әрекет етуге тиіс. Көркем шығарманың жаны, өзегі болып табылатын реализм, шынайылық ссыны талап етеді. Автор осыны жақсы аңғаратын сияқты.

Әдетте, бізде белгілі бір шығарма жайында сөз бола қалса және соның кемшін жақтары қозғалар болса, онда жазушы мынадай бір құбылысты көрсетпеді немесе сонау бір жәйтті ашып бермеді деген тәрізді кінә көбірек тағылады. Осы тұжырымның белгілі дәрежеде дұрыстығы болумен бірге көп реттерде бұрыстығы да бар. Өйткені, өмірде оқиға көп, құбылыс көп. Ал жазушы көркем шығарманың аясына соның бәр-бәрін сиғыза алмақ емес және мұның еш қажеті де жоқ. Сондықтанда көркем шығармада автордың дәл нені көрсетпек болғанын іздеп табуға, танып білуге ең алдымен ұмтылу ләзім. Жазушының идеялық нысанасына, ой түйініне меңзес өмірлік материалдың қамтылу, сұрыпталу сипаты да әр алуан болмақ. Осы орайда Добролюбовтың: «Егер шығармада бір нәрсе бар болса соны бізге көрсетіңіз; шығармада не нәрсе жоқ және не нәрсе болуға тиіс екендігі жайында ұзақ сонар пайымдаулар айтудан бұл әлдеқайда абзалырақ»,— деген пікірін еске түсіре кетудің еш артығы жоқ сияқты.

Міне осы тұрғыдан, яғни авторының өзі көздеген идеялық нысанаға қаншалықты жеткендігі, өзі қозғаған тақырыпты қандай дәрежеде көркем түрде шеше алғандығы тұрғысынан қарағанда «Жоңғар даласында» романы әдебиетіміздегі соны, қызғылықты бір құбылыс екендігі, жазушының творчестволық табысы саналуға тұрарлық шығарма болып туғандығы даусыз.

Әдетте негізгі авторлық идея шығармадағы басты-басты кейіпкерлердің образдары арқылы берілетіні аян. Бірақ екінші немесе үшінші қатардағы кейіпкерлер де шығармаға тек қара көбейту үшін ғана енбей, өз шамашарқына қарай жүк көтеруге тиіс. Автор осыны қапысыз ескеруге тырысқан. Роман кейіпкерлерінің талай-талайының ақ бойынан, іс-әрекеттерінен автор сыйның төркінін, оның слес-емеуіріндерін аңғарып стырасын. Ал басты кейіпкерлердің ішінен бізге әсіресе ұнап, ең жақсы

әсер қалдырғаны — Арыстан. Бұл образ әрдайым өсу, толысу үстінде берілген. Оның бойында зор тұлғасына сәйкес қайрат бар. Манас өзені бойындағы тұңғыш айқаста кесек әрекетімен көзге түскен Арыстан бейнесі барша сайын әрі нанымды түрде өсіп отырады. Жазушы Арыстанның аңғалдығын, көзсіз ерлікке басып жіберетін омыраулығын да сұпайы көрсетеді. Мұның бәрі кейіпкер образының шынайылығын күшейтіп, оның характерінің алуан қырын аша түседі. Арыстанның Ю-ланьмен бірге қолға түсіп қалып, жау алдында қайсарлықпен жауап бергені суреттелетін эпизодты мысалға алып қарайық. Бұл — әдебиетте талайдан бері қайта-қайта бейнеленіп, сарқа суреттелген жәйт. Бірақ автор әдеби канондарға бой алдырмаған, өз тарапынан шыншыл да көркем шешім тапқан. Бұл эпизод психологиялық жағынан да соншалықты нанымды.

Арыстанның Зәуремен арадағы махаббат драмасы суреттелетін тұс та романның мейлінше қызғылықты, әсерлі жазылған беттерінің қатарына қосылады. Бұл беттерді, әсіресе Зәуренің аянышты тағдыры суреттелетін тұстарды тебіренбей оқи алмайсың.

Осы ретте бұған қоса мына бір жәйді арнайы атап айту керек. Біздің арғы-бергі әдебиетімізде әделетсіз өмірден, феодалдық-патриархалдық қырсау әдет-ғұрыптардың қаталдығынан зар илеген, зәбір шеккен қазақ қызының трагедиялы тағдырын бар аянышты, шерлі күйінде бейнелеген шығарма аз емес. Өткен тақырыпқа арнап үлкенді-кішілі шығарма жазған авторлардың бұған соқпай өткені жоқ десе де болғандай. Бірақ солардың бәр-бәрінде уылжыған жас қыздың өлмелі шалға ықтиярсыз сатылып зарлай-зарлай кеткені суреттелуші еді. Қазақ қызының басында бұдан басқа да бір ащы трагедия болатын. Ол — жасы келген, бойжеткен қызды әлі сәбилік шақтан шықпаған жас балаға зорлап телу. Дәулетке масыққан жуандар «қызық» көру үшін дүниені осылай да шайқайтын». Осы бір ащы шындықты Ж. Тілеков өзінің романында тұңғыш рет әрі соншалықты бедерлі бейнелеп берді. Жоғарыда аталған Зәуренің тағдыры — осының анық айғағы.

Рас, Арыстан мен Зәуренің махаббат драмасы романда әлі жетер жеріне жетіп, шешіліп тұрған жоқ. Өйткені, ол бұл бірінші кітаптағы оқиға желісінің аясына симақ емес.

Романның соңғы тарауында ұлт-азаттық армиясының бригада командирі Арыстанның гоминдан армиясының қолға түскен генералы Гаомен айтысып, пікір таластырығаны суреттелетін бір эпизод бар. Арыстан тамаша тапқырлық жасап, Мангау үшін болған шайқаста аз шығынмен тап-ірі жеңіске жетеді. Осы тұста Арыстанның әскери стратегия мен тактиканы жете игерген қолбасы ретінде де, өмір ағынын дұрыс болжайтын қайраткер ретінде де соншалықты биіктеп өскендігі анық көрінеді. Жалпы алғанда Арыстан — өз характерінің шындығына сай әралуан қырымен, жан-жақты көрінген, аса тартымды жасалған қызғылықты бейнелердің бірі. Негізгі кейіпкерлердің ішінен әсіресе мол көрінетіні — Қәрім Алмас. Романда суреттелген тартыс талқысының талай-талай тауқыметін көтеріп тұрған да — сол. Арыстандай емес, Қәрім Алмас күрес жолына ерте әрі саналы түрде түскен. Бірақ оны да жазушы оқиға желісіне қалыптасқан, пісіп толған данын күйінде енгізе салмайды. Бұл образ да ішкі қалшылықтарымен көрінеді. Әлі күрес мақсатын анық аңғарып болмаған әрі оның тәсілдерін баурап жетпеген қалың көпшілікті бастай жүріп, одан үйрене жүріп Қәрім Алмастың өзі де шындалып өседі.

Сонымен бірге осы кейіпкердің образына байланысты авторға мынадай бір жәйтті айтуға болар еді. Халықтың азаттық жолындағы күресін басқаруға Ахмеджан Қасым араласқаннан кейін Қәрім Алмас екінші қатарға қарай ойысып кетеді. Сондықтан да романның соңғы тарауларында оның бейнесі биіктеп өспей, көмескі тартып, статикалық күйде қалыңқырап қойған. Сол сияқты Қәрім Алмас пен Ю-ланның арасындағы сүйіспеншілік желісі де оқушыда сқіұдай, әрі-сәрі әсер қалдырады. Автор бұл желіні түптен тартып, тереңдеп ашудың орнына жасандылыққа қарай ойысып кеткен, өз кейіпкерлері характерінің шындығына қайшы келген. Біздің әдебиетімізде басқа халықтардың өкілдерін шынайы бейнелеу ісінде көптеген творчестволық тәжірибе жиналғаны хақ. Кәнігі суреткерлеріміздің бұл саладағы жемісті еңбегінен мол тағлым алуға боларлықтай. Бірақ Ж. Тілеков үшін бұл проблема өзінің маңыздылығын да, қиындығын да зәредей жоғалтқан жоқ еді. Қайта осы ретте оның өте көп ізденуіне, еңбектенуіне тура келді. Шынында да, романның оқиға желісіне араласатын

онға тарта халықтың әралуан өкілдеріне олардың өзіндік, ұлттық ерекшеліктеріне сай мінез-құлық, сыр-сипат, бояу-нақыш тауып беру оңай міндет емес-ті. Жазушының сол міндетті ада қылып, баурап әкете алғаны қуаңға әбден жарарлық.

Бұл ретте комиссар Чжан мен монғол жігіті Сарэнжавтың бейнелерін сналдымен атауға болар еді. Автор Чжанның өткен өмірінің өткелдеріне аялдап жатпайды. Өйткені бұл шығарманың композициялық тұтастығына селкеулік келтірер еді. Сондықтанда ол кейіпкерлерінің өткен өмір жолын романның бір жерінде ғана бірақ бірегей танытып тастайды. Біз Чжанның революцияшыл қызметі, өмірі мен күресі жайында біраз мағлұмат аламыз

Жазушы Чжанның азаттық жолындағы күресті баставшы, ұйымдастырушы ретіндегі тапқырлығын, кең толғамдылығын мол көрсетумен бірге оның өз басының адамдық қасиеттерін де кеңінен ашып суреттеген. Чжан—характерінің тұтастығымен, өмір шындығына жанасатындығымен романның ұнамды кейіпкерлері образдарының галереясында ерекше орын алуға тұрарлық тұлға.

Ал Сарэнжавтың образы бұдан гөрі өзгеше планда алынған. Бұл реттегі автордың ұстаған позициясы да басқарак. Сарэнжав та азаттық жолындағы күрес идеясына қалтқысыз берілген. Бірақ оның өз басы да жас, тәжірибесі де аз. Бұл бір моюды, жабырқап жасуды білмейтін адам. Аздап мақтап сүйгіштігі, алыпқашпа қызбалығы да бар. Жайлары, сергек қалпынан қашанда таппайды. Ол өзі жүрген жердің бәрінде де көңілді күй туғызып жүреді. Сондықтан да романның осы кейіпкердің іс-әрекеттеріне арналған беттерін серпіліп, езу тартпай отырып оқымайсын.

Сырттай қарағанда Сарэнжавтың жақ иіп, садақ тартып жүруін автор оқиганы әншейін қызықты ету үшін енгізген тәрізді. Бірақ шындығында олай емес. Еналдымен, Сарэнжавтың бұл әрекеті — оның мінез-құлқына, ұлттық қалпына сымалы орайлас. Оның үстіне шығарманың оқиғалық өрбуін шиеленістіре қабындату үшін әрі кейіпкерлерінің іс-әрекеттерінің көркемдік мотивировкасын нанымды етіп беру үшін жазушы мұны әрдайым ұтырлы, шебер пайдаланып отырған.

Асқар, Қарсыбай, Серік, Ботақара, Сқақбек, Ю-лань бейнелері де романда өздерінің шама-шарқына, болмыс-

бітіміне лайық идеялық қызмет атқарып тұр. Олардың қай-қайсысы да — өмір шындығынан алынған, өзіндік сипаттарымен дараланып жасалған образдар. Романның ұнамсыз кейіпкерлерін бейнелеуде де жазушының қолы жеткен табысы аз емес. Бұлардың ішінде генерал-губернатор Шэнь Ши-цай, шет елдік империализмнің өкілдері Маккернан мен Джонсон, Ғабдул-Ғафур қажы мен Ғалихайдар қожа, Бектас бай және басқалардың образдары әсіресе ірі, кесек жасалған. Бұлар—өзара етепе жақын әрі бір-біріне ұқсамайтын кейіпкерлер. Жазушы олардың іс-әрекеттерін, зымындық сйларып, таптық максаттарын көркемдік жағынан нанымды етіп, саралап көрсете алған.

«Жоңғар даласында» аттары аталғанмен, тындырар іс-әрекеті мардымсыз, бейнелері тым солғын берілген әрі-сәрі әредік кейіпкерлер де баршылық. Мәселен, Дулат төре, Байшұра Бағланов, фекс Холмс, Карниса, Жапымхан хажы және басқа да бірсыпыра ірілі-уақты кейіпкерлердің бейнелері жайында осыны айтуға болар еді. Жазушы бұлардың бейіна өзіндік ерскшеліктер, жанды сипаттар дарыта алмаған. Бәлкім, олардың кейбірлері өз характерінің әралуан қырлары мен сырларын романның болашақ жазылмыш кітаптарында бұдан гөрі айқынырақ та тереңірек көрсетуі де ықтимал.

Бұл романда оқиға қандай шытырман, мол болса, соған қатысушы, соны тындырушы адам да көп. Суреттейтін кейіпкерлерінің молдығы жағынан «Жоңғар даласында» романы ерекше назар аударуға тұрарлық. Ең жақсысы — сол кейіпкерлердің талай-талайы-ақ әдебиетімізде бұрын ұшыраспаған, тыңнан бей көрсетіп отырған соны тұлғалар, жаңа бейнелер әрі «таңыс бейтаныстар» болып табылады. Бірақ макала көлемімен шектелгендіктен біз романның образдар жүйесіне барынша толық талдау жасап жатпай, кейбір жәйттерді ғана әдейі баса атап өттік.

Ж. Тілеков романының кейіпкерлері өрі мен еңісі, шытырманы мен шиыры мол қиын да қысталан жол өтеді. Творчество тұрғысынан қарағанда иірімі көп сол жолдан автор да өтті. Романда автордың сол қичала толғануларының, ізденістерінің жемісі, із-бедері аз емес. «Жоңғар даласында» тартыс талқысы өте ширақ, оқиға мейлінше ксю екендігі жсғарыда айтылды. Бұл автордың суреттеліп отырған кезеңнің, тарихы шындықтың рухын,

тынысын кең сездіруге ұмтылған талабынан туған. Оның үстіне кейіпкерлер өмір кешіп, әрекет еткен мекен мен сиртаны, уақыт пен жағдайды терең де мол бейнелеу арқылы ғана олардың образдарын толыққанды, шынайы етіп шығаруға болады. Романда осы екі жәйт қабысып, тұтас бітім тапқан.

Екінші бір атап айтарлық нәрсе — автордың адам образын нақтылы, шынайы етіп жасауға төселіп машықтанып қалғандығы. Романда мүлдем аз бой көрсетсе де, оқушының есінен бейнесі кетпейтін қосалқы кейіпкерлер аз емес. Өзгесін айтпағанда, Садық Омар деген ұйғыр шалын мысалға алып қаралық. Ол романда бір-ақ жерде көрінеді және жазушы оны өзінің репликалары арқылы сипаттайды. Бірақ оқушы соның тағдыры, тіршілігі, өзіндік қалпы жайында көп нәрсені аңғарып қалады.

Автордың портреттік және психологиялық сипаттауларды ұластыра, ұштастыра беруге ұмтылатындығы да байқалады. Мәселен, американдық вице-консул Маккернанды автор былайша суреттейді: «Маккернан киген көзілдірік өзіне сыртқы дүниені қалай көрсететінін кім білсін, оған қараған адам көзінің қандай екенін айыра алмайды. Екі үлкен қаракөк әйнектің томағасы қасын қапсыра, кушық бетінің сүйегін қамти бүркеп қоңқиған мұрнын ғана қалдырған. Сол орақ мұрны екі езуі шықшыттай созылған жайын аузына телміріп тұр. Иминген ұзын бойлы, тарамыс денелі, шикіл сары, қасқа бас жасы қырықтың жуан ішіндегі вице-консул ислам ғұламаларын сыртқы есігінің алдынан қарсы алып, кабинетіне кіргізді».

Мұнда біз кейіпкердің рухани келбеті, ой аңғары жайында да біртоға жәйді анық сеземіз. Бірақ жалпы алғанда жазушының кейіпкерлеріне портреттік сипаттау берудегі тәсіліне мынадай сын айтуға да болар еді. Ол кейіпкерлерінің түр-тұлғасын, пішін-кейпін үйіп-төгіп бір жерде-ақ беріп тастауға үйір.

Бір мысал келтіріп көрелік. Романның бас жағында автор Ю-ланнің сыртқы келбетін былайша суреттейді: «Бұрын шағын көрінетін бойы да едәуір өскен. Бақа өкше ботинкасын тастап, биік өкше туфли, көлкіген ұзын көйлек киген, талдырмаштау бойжеткен дерлік. Қыпша белі толыспаған да, сәл төстектеу болып, өрім талдай тік өсіп келеді. Ұйғыр қыздарына еліктеп, қос

бұрым өріпті, онысы әзір келтелеу. Қытай қыздарының дәстүрінен де жапылмай, маңдай шашын күлтелеп, қасының үстінен киган да, құлак-шскеге лента-қызғалдақ қадаған. Қаймыжықтай жұқа ерпі қып-қызыл, дөп-дөнгелек кішкене қаракат көзінің кірпігі ұзарып, жіңішке қасы кигаш өсіпті». Осы үзіндіден сол бұрын автор Арыстанды да дәл осылай тәптіштеп, егжей-тегжейіне дейін қалдырмай суреттейді. Рас, автор бұл кейіпкерлерінің екеуінің де портреттік сыйпаттамасын Кәрімнің көзімен қарап берген. Белгілі дәрежеде онысы көркемдік жағынан ақталған да.

Біз автордың мұндай тәсіліне қарсы емеспіз. Реалист жазушы шағын шығарма ішінде бір жердің өзінде-ақ орайын тауып кейіпкерінің естен кетпес келбетін тастан ойып қашағандай етіп, ашық та айқын бере алады. Ал үлкен ойылып, мол пішілген кесек шығарма үшін бұл аз. Өйткені, өмір өткелдерінен, тартыс талқысынан өтіп шырыққан, толыққан сайын кейіпкердің сыртқы тұлғасы да, рухани келбеті де әрдайым тереңдеп, жарқырап ашыла түспек. Әдебиеттің сөз өнері ретіндегі ерекше, өзіндік сипаттарының бірі де осында. Сондықтан да көркем шығармада кейіпкердің портреті оның қимыл-қозғалысынан, іс-әрекетінен де және сөз-сөздің, жол-жолдың арасынан шым-шымдап туып жатуы керек. Сонда ғана ол жанды сипат алмақ.

Ж. Тілековтың ойлы ықшамдылыққа, көркемдік үнемділікке ұмтылатыны да байқалады. Бұл шығарманың шынайылық сипатын әрлендіре түсетіндігі даусыз. Бір ғана мысал алып қаралық: «Быттыр фокс Холмс: «Болашақ халифат гербі арыстан бейнесі болуы тиіс»,— дегенді айтып шошындырған. Сонда бұлар: «Астагфиролла, айта көрмеңіз, мистер... Ай бейнесі ақ жалаудың астында... Арыстан аң патшасы болса да, айға шауып мерт болыпты»,— деп шу ете түскен-ді». Мұнда ағылшын империализмі өкілінің қорқау пейілі де, дін иелерінің көңіл қалтарыстары да соншалықты ұтырлы ашылған.

Романда әдемі берілген табиғат суреттері мол және олар негізгі авторлық идеяға жанасып, кейіпкерлердің тұлғасын, характерін, іс-әрекеттерін толықтыра, шынайыландыра түсіп тұр. Майтау төңірегінің, Нылқы тауының суреттері ойнақы да әсерлі. Автор дала табиғатын, сахра көркін тамылжыта, бояуын құлпырта көрсетеді. Мына бір суретті көз алдымызға елестетіп өтелік: «Құ-

зартқа дейінгі жазық жер қалың ақ селеу жамылғыны, осы атырапқа ақ масаты жайып тастаған тәрізді. Соның үстіне тамған қап сияктанып әр жерде бір топ тобылғы көрінеді. Алда-санда аяқ астынан пыр етіл ұшқан безгелдектен басқа көз көрер төңіректе мал да, жан да жоқ, дала жым-жырт. Аспанда ақ түйелі керуендей тіркесе көшкен кесек-кесек ақша бұлттар астында самғаған аққу сол керуеннің нәзік қонырауын қапатпен қағып бара жатқандай.

Арыстан бір қыраннан аса беріп, шағын аймақты көлге киікті де, соны жағалап орағытты. Жаз айларында ауыл конған көл сықылды, қоғасы жығылып, құрағы қырқылып калған». Мұны оқығанда жанды суреттерге үнілесін, дала табиғатының таныс та жақын көріністері бояу-нақыштарымен көз алдынан тағы да бір елес беріп, үн-сарын сездіріп кеткендей болады.

Сол сияқты, романның екінші тарауында берілген Тянь-Шань тауының тамаша суреттері, қыран бүркіттің қасқыр ілгені баяндалатын көріністер енді қайтып көз алдынан кетпейді. Өйткені, оларда автор бояу реңктерін шеберлікпен таба білген әрі соларды кейіпкерлерінің көңіл аңсарларымен, психологиялық хал-халеттерімен оңтайлы табыстыра, ұластыра алған.

Бір ғажабы сол — сахра көріністерін келістіріп бере білетін жазушы қала кейіпін бейнелегенде кең көсіліп, еркін жазылып кете алмайды. Романдағы қала суреттері құрылым, нақтылы емес.

Бұрынғы прозалық шығармаларында Ж. Тілековтың тілі қалың бояулы, суретті болып келе бермейтін. Қайта ол жергілікті сөздерді, диалектизмдерді көбірек қолданатын. Лингвистер мен сыншылар мұны талай рет атап көрсеткен-ді. Ал соңғы романдағы жазушының тілдік ізденулері мол әрі жемісті екендігі жақсы аңғарылады. Суреттеп отырған ортаның өзіндік колоритын, кейіпкерлерінің ұлттық ойлау ерекшеліктерін, әлеуметтік мұрат-мүдделерін танытып сездіруде автор тіл құралдарын ұтырлы пайдаланған. Мәселен, ол кейіпкерлеріне сөздік сыпаттаманы орайлы тауып бере біледі. Партизан отрядін құрып, қалың елді өктемдік иелеріне қарсы бастаған Асқардың жалын атқан мінезіне меңзес оның тілі де өткір, ұятты әрі афористік өрнек-нақыштарға толы. «Жүкті — нар, қайғыны — ер көтерер болар... Мың қайғы бір борышты өтемейді Жолға салса —

жорға, жонға салса жүйрік сағынып, білімдінің асыл ойын, көрегенінің ақылын аңсап отырған күндерімізге бәріңіз де жақсы келдіңіз... Ескіні еске алмай, жаңа жадына түспейтін сықылды». Бұл сөздерден халық өкілі Асқардың тұрашылдығы, тәуекелшіл мінезі, тапқырлығы анық сезіледі.

Автордың зорлық-зомбылық дүниесі өкілдеріне, діп нелеріне берген сөздік сипаттамалары да суреттілігімен, дәлдігімен көбінесе нысанаға дәп тиіп, қажетті көркемдік қызмет атқарып жатады. Бұған мысалды романның қай бетінен де табуға болар еді. Сондықтан да автордың кейіпкер репликасын орнымен пайдаланатындығын көрсету үшін бір ғана мысал келтірілдік. Зәурені өзінен мүшелі жас Малтабардай шикі өкпеге зорлап телігені оқушыға аян. Әке-шешенің ынғайына көшіп сол жаман енді Зәурені басынбақ, ықтырмақ болады. Осыны көзімен көрген Сарзипжавтың аузына автор мынадай сөздер салады: «— Әй, сен қортық, Зәурені неге сабайсың, ә? Бері келші өзің, машинаның саңдығына салып ала кетейін,— деп ұмтылып еді, Малтабар да, басқа балалар да зыта жөнелісті». Мұндағы тамаша шынайылықпен, тапқырлықпен берілген нәзік юмор қандай ащы ажуадап, өткір мысқылдан кем соғып жатқан жоқ.

Халықтың әдет-ғұрпы, салты мен дәстүрі, ойын-сауығы, ісмерлік өнері де романның осы тарауларында кенінен әрі әсерлі суреттелген. Бұл тұстарда да автор шиыр болған әдеби машықтардың шылауында кетпей, өз қаламының табын, өз ізденістерінің белгі-бедерін ашық танытады, тұрмыс көріністерін өрелі оқиғалардың эпикалық кең тынысымен ұластыра отырып береді.

Жоғарыда романда оқиға қалың екендігі айтылған еді. Бұл, әрине, жақсы. Бірақ автордың кейде екінші шекке соғып, оқиғаның жалаң өзін қызықтап кететін мезеттері де бар. Соның салдарынан болуға керек — жазушы уақыт сипатын, тарихи шындықты танытатын оқиғаларды, арпалысқан күресті, қиян-қиялы тартысты терең философиялық тұрғыдан гөрі стратегиялық планда көбірек алып кеткен.

Сондай-ақ автордың оқиға өрбуін, тартыс желісін кейіпкерлердің характерін зерттеп ашу үшін жете пайдаланбайды.

Сәтімен табылған кейбір ұтырлы мезеттерді айтпағанда жазушы психологиялық сипаттауға әлі де сараң соға-

тын тәрізді. Кейіпкерлерінің рухани сыр-сезімдерін, көңіл күйлерін ағыл-тегіл ақтарып тастайтын, төгіп-төгіп жіберетін талай-талай жерлерде автордың тартыпшақтай беретін байқалып қалып отырады.

Романның әр тарауын қайталап оқыған сайын автордың баяндаушылық талантының көркемдік, суреткерлік шеберлікке ұласып келе жатқандығы байқалады. Жазушының болашақта осы бағытынан танбауы, әлі де болса көп ізденуі, ширыға ізденуі керек сияқты.

Кейіпкерлерінің сөздерін, репликаларын ара-тұра соншалықты тап басып, дөп тиіп жеткізіп беретін жазушының диалог құруға жалпы олақтығын атап айтпасақ болмайды. Романдағы кейбір диалогтардың тұтас беттерге созылып кететіні де бар. Мұндай шұбаланқылық шеберлікті де сездірмейтіні, кейіпкерлердің де ішкі құпияларын ашпайтындығы хақ.

Ж. Тілековтың тілінде басқа кейбір жазушыларымыздың шығармаларында ұшырайтын риторикаға үйірлік, сылдыр сөзуарлық жоқ десе де болғандай. Бірақ тілдегі реализм үшін әлі де көп ізденуге, азап шеге еңбектенуге тиіс екендігін оның ескеруі, естен шығармауы ләзім. Автор болашақта романының соңғы кітаптарын жазатындықтан бұл пікірлерді қадай айтудың орайы әсіресе келіп тұрғандай.

Тұтастай алғанда «Жоңғар даласында» романы тақырыбының сонылығы, материалының тындығымен ғана емес, сонымен бірге осыған орай көркемдік қырларымен, өзгеге ұқсамайтын өзіндік бітімімен де әдебиетімізге мүшелі туынды болып қосылатындығы, оның ешкім аспаған жана бір беттерін құрайтындығы күмансыз.

Бұдан он шақты жыл бұрын шыққан прозалық тұңғыш көлемді шығармасы үшін Ж. Тілековтың қатал да әділ сынға ұшырағаны аян. Ең қиыны — соған қарап кейбіреулер оның авторының жазушылық талантына шұбаланғанды. Бірақ сол шұба бекер екен. Жазушының сан жылдар бойына шын тебіренген азабы, қиын еңбегі босқа кетпеген. Жазушы бұрынғы шұба атаулыны серпіп тастап, ауыз толтырып айтуға, сүйсінуге тұрарлық ірі шығарма берді. Бұл — оның болашақта бұл деңгейде де аялдап қалмай, биіктей беруінің, есейе түсуінің кепілі болса керек.

ЖЫР АЛЫБЫ

Есімі барша әлемге аян болған атақты ақынымыз Жамбылдың творчествосы советтік дәуірде қайта туған қазақ халқының ұлттық мақтанышына айналды, оның әдебиетіндегі, әсіресе халық поэзиясындағы тұтас бір кезенді құрады. Тамаша шығармаларын қайталап оқыған сайын жыр алыбы ұлы қарт өзінің зор ақындық бейнесімен көз алдында айқын елестейді де тұрады, қазіргі шадыман өміріміз, ғажайып заманымыз, ұлы халқымыз туралы небір әсерлі сезімдерге бөлейді.

Өз дәуірінің шындығын аса көркем образдар арқылы бейнелеген, өзі өмір кешкен кезеңнің алтынғы қатарлы идеяларын білдірген, халықтың өмірі мен ой-арманын жырлаған ақындардың шығармалары ұрпақтан ұрпаққа мұра болып қалып, халықтың сапасы мен жүрегінде ұзақ жылдар бойына сақталмақ. Советтік дәуірдің шабытты жыршысы, халық поэзиясының алыбы Жамбыл Жабаев дәл осындай ақындардың қатарына жатады.

Жолаушы алыстаған сайын өзінің аспанмен тілдескен асқарын оған айқынырақ көрсете түсетін заңғар Алатау сынды Жамбыл да өзінің ақынлық тұлғасын уақыт озған сайын биіктете бермек. Жамбылдың есімі бүкіл дүние жүзіне өзінің көзі тірісінде-ақ кең таралды, оның ақындық дауысына бүкіл прогресшіл адам баласы құлақ тосты, оның тамаша шығармалары дүние жүзінің көптеген халықтарының тілдеріне аударылды. Ақын данқының мұншалықты кең жайылтуының себебін оның творчестволық тағдырының әншейін бақыттылығынан іздеу қате болар еді. Советтік заман қайта тұғызған Жамбыл ақындық өнердің мұндай биігіне осы бақытты заманды шын жүректен жырлау арқылы, туысқан Коммунистік партияның қамқорлығы мен қолдауы арқылы көтерілді.

Кавказға Шота Руставелидің юбилейіне барған сапарында Жамбылға шетелдік бір жазушы:

— Жамбыл мырза, сіз жер бетінде құрдастарыңыздың аз қалғандығына бақыттысыз ғой! — дегенді айтады. Ақын оған былай деп жауап қайырады:

— Сіз қателесесіз, менің бақыттылығым қайта менде құрдастардың көптігінде. 172 миллион совет азаматта-

ры — менің құрдастарым. Олар да, мен де, менің бүкіл Отаным да өзіміздің нағыз өмір сүре бастағанымыз! Ұлы Октябрь революциясынан бері ғана деп білеміз... Мен 70 жыл бойы көкसेген, халықпен бірге ұмтылған бақыттың, дәулеттің, қуаныштың ертегідегідей алқабын таптым. Бұл бақыт алқабы дегенім — менің ұлы Совет Отаным...

Қандай тамаша сөздер! Өз бақытын жаңа өмірдің таны атқаннан кейін ғапа тапқан және осыны заңды түрде мақтан ететін адамның жүрек жарды сыры мен көңіл кернеген қуаныш сезімі осы бір сөздерде соншалықты әсерлі айтылған. Расында да, Жамбыл — асқан бақытты адам. Оның тағдыры да — мейлінше қызық және кісі қызығарлық та тағдыр.

Жүз жасаған Жамбыл өз халқының ғасырлық шежіресі, оның өшпейтін ақындық үні есепті. Жамбыл қазақтың өткен ғасырдағы классигі Абаймен замандас болды. Сүйімбай, Шөже сияқты атақты ақындарды өз көзімен көріп, солардан тағылым алды. Ол жиырмашыңшы ғасырдың не бір дауылды да ұлы кезеңдерін де бастан кешірді. Ол ескі дүние қаусай қирап, оның орнына жаңа дүние жасалғандығының куасы ғана болып қойған жоқ, сонымен қатар осы жаңа өмірдің қайнаған ортасында болды.

Жамбыл қазақтың халық поэзиясы мен советтік жазба поэзиясының арасындағы жанды көпір тәрізді. Халықтың ғасырлар бойғы даналығы мен дарындылығының жемісі болған оның поэзиясынан мол сусындап, мейірлене қанған Жамбыл өзінің творчествосында, әсіресе совет дәуіріндегі шығармаларында сол халық поэзиясының ең таңдаулы, игі дәстүрлерін дамытты, жетілдіре түсті. Сөйтіп ол бұл дәстүрлерді бүгінгі советтік поэзиямызға әкеліп ұластырды. Оның творчествосының ең бір ерекше, бағалы сыйпаты да осында.

Жамбыл — шын мәнісіндегі халық ақыны. Халықтың өмірі мен ой-арманын, сезім-тілегін жырлау — оның шығармаларының негізгі бағыты, идеялық арқауы болып келеді. Ақын шығармаларының бұл қасиеті тіпті оның революцияға дейінгі шығармалары мен толғауларынан, айтыстары мен дастандарынан да айқын танылады. «Кедей күйі» атты өлеңінде ақын жокшылық тақсіретін тартқан, әділетсіз өмірде өгейлік көрген жарлылардың аянышты халін жырлай келіп, былай дейді:

... Қалт-күлт етіп жүргені
Қысы, жазы қарны аш.
Қайтіп жанын ашымас?
Неткен заман қатыбас?
Еткен еңбек, төккен тер
Қалай түкке татымас?

Бұл өлеңдегі жокшылық көрген жандарға деген аяныш сезімдері мен солардың азапты, мұңды тағдырларына ортактасу сарындары Жамбылдың басқа көптеген шығармаларынан да мол ұшырасады. Ақынның «Жылқышы» атты өлеңі бұған әсіресе анық айғақ болғандай.

Сары түнге сарылып, кірпік ілмей,
Салқын кезде бір жылы үйді білмей,
Сахарада салақтап күндіз-түні
Бұралқы ит пен малшының сиқы бірдей.

Саяқ іздеп Саркемер, сартау құмнан
Табыла деп — жонымыз бір тілінбей.
«Байпал түгіл, бас қайғы» болып жүріп,
Қайтпекші едік төсектен біз түнілмей!

Әрине, бұл өлеңді дымқыл тұман басқан күз бен ызғарлы қыс суретін асқан суреткерлікпен айнытпай берген әрі соны мал баққан елдің жадау тіршілігімен қабыстыра, ұластыра көрсеткен Абайдың табиғат лирикасымен салыстырудың, қатар ксюдың срайы келмес. Сөйтсе де, осы екі шумақ өлеңге ақынның тұтас өмір суретін сыйғыза алған шыншылдығына ден қоймасқа болмайды.

Енді бір өлеңдерінде Жамбыл өз басының күйлерін шертеді. Солардың ішіндегі ең қызғылықтысы — «Шағым». Мұнда бала Жамбыл дүмше молдадан көрген қиянатын әкесіне шағына жырлайды, татаусыз шын сырын ақтарады:

Оқымаймын молдадан,
Не оқытпақшы ол маған?
Бала келсе сабаққа
Жем дәмектен дорбадан.
Ақ сәлдеңін төңкеріп,
Көзін жұмып төңселіп,
Боз інгендей боздаған.
Қайтіп сабақ береді.
Айтқаны ішке қонбаған?
Оқымаймын енді одан.
Домбыраны қолға алам.

Өлең кірген түсіме
Жөргегінде мен болам.
Қинама, әке, қинама!
Болмас енді зорлаған.

Ашы мысқылға, өткір ажуаға толылығына, дүмше молданың бар мүскін халін тып-типыл еткен уыттылығына қоса бұл өлең жас Жамбылдың ақындық өнерге ерте бой ұрып, емірене бас қойғандығын да анық аңғартады. Жамбыл өзінің революцияға дейінгі шығармаларында халықтың ауыр тұрмысын, мұң-наласын жырлаумен, оның қайғы-қасіретіне ортақтасумен ғана тынған жоқ. Халыққа деген сүйіспеншілік оны халық мүдделері үшін күрескер етті, оның творчествосында халықты қанап езушілерге деген кекті қарсылық сарынын туғызды.

Әлеуметтік теңсіздіктердің түп төркінін, мұның себептерін Жамбыл ол кездерде айқын да терең түсіне алған жоқ және бұлай болуы мүмкін де емес еді. Бірақ ол халықты қанаушы атаулының барлығына да мейлінше қарсы болды. Қараңғы, надан елді алдаған қожа, молдалар да, халықты зар илеткен би-болыстар да, оларды қолдап отырған патша әкімшілігінің ұлықтары да ақынның алмастай тілгір сөзіне, уытты кекесініне ілікпей қалмады.

Осы ретте оның «Сәт сайланарда» атты өлені әсіресе назар аударарлық. Өткен ғасырдың тоқсаныншы жылдарында шығарған бұл өлең-эпиграммасында ақын елді жегідей жеген сімер болыстың зымияндығын, қорқаулығын былайша түйрейді:

Лашын құстай таранып
Сыртың сұлу көрінген.
Нәнді медеу саналық
Жел еседі жеріңнен.
Қайымады түбелер,
Қысырады биелер,
Қыста қырсыз жұт болдың,
Елге жүгінді үйе бір
Шығынмен де шаршаттың.
Енді қайтіп күш енер?
Көргеніміз сол болса,
Неміз қалды сүйенер?
Қатбасам да мен онша,
Елдің өзі-ақ жүйелер.

Мұнда елге жұт болып тиген жебір болысқа жыр семсерін аяусыз қадаған, оның қатыгездігін қарама-қарсы

суреттер арқылы қапысыз танытқан ақынның тура тілді батылдығына да, ерен тапқырлығына да таңырқамай, анық сүйсінбей қалмайсың.

1913 жылы Алматы қаласында Романовтар патшалығының үш жүз жылдығына арналған көрмеде Жамбылдың патшаны дәріптеп өлең айтудан бас тартуы және ұлықтардың алдында құрдай жорғалаған жағымпаздарды жермен жексен ете түйреуі — ерекше назар аударуға тұрарлық, аса елеулі факт.

Халықтық сарындар Жамбылдың революцияға дейінгі толғаулары мен жырларында ғана емес, сонымен қатар айтыстарында да өзекті орын алады. Айтыс — Жамбылдың ұшан-теңіз творчествосының аса мол, мейлінше бай саласы. Оның құлан аян Құлмамбетпен, Сарыбаспен, Досмағамбетпен және басқа да көптеген ақындармен антысы сол кездің өзінде-ақ ел арасына кең таралды. Жамбыл айтысқан ақындарының барлығын да жеңіп отырды. Бұл да кезденсоқ бола қалған жоқ. Жамбылдың мұндай жеңімпаздығының сыры оның сарқылмас ақындық қуатында, тап басып, тіліп айтатын тапқырлығында, өмір өткелдерін мол өтіп, жадына көп нәрсе тоқығандығында ғана емес. Басқа шығармаларындағы сияқты, айтыстарында да Жамбыл халықтың ой-тілегін білдірді, халықтың атынан сөйледі және қарсы антысқан, байларды мадақтаған жарамсақ ақындардың барлығын да тып-тыйпыл ете жеңді.

Айтыстарында Жамбыл өзін жаңашыл ақын ретінде танытты. Өз руының байлары мен билерін дәріптеп, солардың буына масыққан Құлмамбетке Жамбыл былай дейді:

Адамдықты айт, ерлікті, батырлықты айт,
Ел бірлігін сақтаған татулықты айт.
Қарымбайдай сараңдар толып жатыр,
Оны мақтап әуре болмай жөніңе қайт!

Бұл сөздер — Жамбылдың революцияға дейінгі ақындық қызметінің программасы есепті. Шындығында да, Жамбыл сол кездегі шығармаларының өзінде-ақ халық мүддесін, ел бірлігін жырлады, адамгершілік қасиетті, ерлікті, батырлықты мадақтады.

Жамбыл творчествосының әбден кемеліне келіп, оның ақындық қайнарының кемерінен аса төгілген кезі — біздің советтік дәуір.

Социалистік жаңа дәуір тек Жамбылды ғана емес, сонымен қатар басқа да көптеген халық жыршыларын ақындық өнердің кең өрісіне алып шықты. Олардың творчествосы ғасырлар бойы тұңғыққа камалып, тұйыққа тіреліп, кемерінен аса шалқи алмай келген жыр мұқиты — халық даналығының советтік заманда кемелдене толысқандығының айқын айғағы болып табылады.

«Жамбыл, Тоқтағұл Сатылганов, Сүлеймен Стальский, Гамзат Цадаса, Фекла Беззубова, Марфа Крюкова сияқты халық жыршыларының, ақындарының, сказителдерінің шығармалары совет құрылысы тұсында кеңінен таралды», — деп жазды М. И. Калинин өзінің «Біздің халқымыздың моральдық бейнесі туралы» деген тамаша кітабында.

Әрі кәрілік әлсіретіп, әрі қатал заман қалжыратқан қарт Жамбылдың еңсесін Коммунистік партия, жаңа заман биік көтерді, оған дариядай мол ақындық қуат берді. «Менің бақытым» атты шығармасында бұл жөнінде ақынның өзі былай дейді: «...Өмірімнің жетпіс екінші жылында мен бақытты өмірге жеттім. Әлсіреп, азап көргенімде Ленин дана қолын созды. Мен шыңыраудан шығып, тамаша гүлдерді, жұпар иісті шөптерді, қыруар малдарды, сымбатты үйлерді көрдім. Мен пағыз күнді көрдім, таудың асыл тасындай таза ауада дем алдым; менің жаным да алма ағаштай гүлдеді, көзім жұлдыздай жайпап, кеудемді шаттық кернеді, өлеңдерім көктемгі Іле өзеніндей тасыды; мен жасардым. Он сегіз жасар жігіттей шағыма келдім».

Жаны жасарған ақынның жыры да жігіттік шағына қайта оралды. Бұрын туған халқының көкей кесті тілегі мен асыл арманын толғаған Жамбыл енді оның азат, бақытты өмірін ақындық тың серпінмен қуана, шалқыта жыр етеді.

Елімізге жаңа дүние әкелген жаңалықтар мен ірі-ірі оқиғалардың барлығы да қарт ақынның жүрегін тербеп, шабытына қозғау салды. Бұл Жамбыл шығармаларының тақырыптық қамтуы мейлінше мол әрі терең болуына әсер етті. Еліміздегі, тіпті бүкіл дүние жүзіндегі алуан түрлі жаңалықтарға әрдайым құлақ түріп, көңіл қойған ақын оларға дер кезінде үн қосып отырды. Жамбылдың Қытай туралы, Индия туралы және басқа да шет елдік тақырыптарға арнап шығарған жыр-

лары өте көп. Бұл жағынан Жамбылды нағыз интернационалист-ақын деп атау лайықты.

Патриот-ақын өзінің туган халқын, Советтік Отанын шексіз сүйді және елдерге өзінің көптеген шығармаларын арнады. Ол бұл екі тақырыпты өзара тығыз байланыстыра, терең ұштастыра отырып жырлады. Ақын Отанымыздың барған сайын гүлденіп, алға баса беруін қалады және өзінің творчествосын осы мақсатқа қызмет етуге арнады.

Көктей түс, Отанымның шаттық бағы,
Келші ұшып, сайрай түсші, бұлбұл тағы.
Бұлбұлдай шаттық жырın ақтарындар,
От жүрек еркіндіктің адамдары,—

деп жырлады ақын. Оның Отан туралы жырлары осындай патриоттық ойларға, қастерлі сезімдерге толы, мейлінше көркем болып келеді.

Жамбыл ақындық өнерді халыққа қызмет етудің өткір құралы деп түсінді. Ол өзінің жалынды жырларымен үнемі халықты еңбекке, күреске шақырып отырды. Оның шығармаларының үгіттік мәні әсіресе күшті болып келетіні де осыдан. Творчествосының бұл қасиетін ақынның өзі де өте орынды аңғартады.

Винтовкасын кезеніп,
Сарбаз шықса соғысқа
Ломбығасын безеніп,
Жамбыл барад соғысқа.
Жауын мойнын жұлдыра
Сарбаз шапса қылышын.
Жау жүрегін сындыра
Жырдың салам құрышын,—

деп жырлады ақын. Жамбыл бұл сертін бейбіт шақта да, ел тағдыры сынға түскен қысылшаң кезде де аброймен орындады.

Жамбылдың бүкілодақтық оқушының алдына шыққан кезі отызыншы жылдардың орта шамасы. Ол 1936 жылы қазақ әдебиетінің Москвада болған онкүндігіне қатысып, Отанымыздың жүрегі—Москваны, қасиетті Кремльді өз көзімен көрді. Қарт ақын адам баласының теңдессі жоқ данышпаны Лениннің Мавзолейінде болып, мәңгі ұйқыда жатқан кесемге тағзым етті. Өзі көзімен көрген осы жайларды Жамбыл жырға қосып, емірене толғады.

Адамзаттың асылы
Аруағынды ардақтап,
Көпті көріп көндіккен
Ақшыл тартқан басымды
Алдына келіп иемін,—

деп жырлады ақын «Ленин Мавзолейінде» атты толғауында.

Коммунистік партияны, оның кеменгер көсемі Ленинді жырлау — Жамбыл шығармаларының ең негізгі, желілі тақырыбы. Женіс пен күреске толы тамаша өміріміздің қай көрінісін, қай саласын жырласа да, өз жүрегінің түкпірінен алынған ең бір жылы ниетке, алғыс сезіміне толы сөздерді ең алдымен Коммунистік партияға арнайды.

Бүкіл халықтың және өз басының Коммунистік партияға деген махаббаты мен ыстық мейірін Жамбыл кей жырларында тікелей арнаулар арқылы немесе жалпылама түрде, бірақ үлкен пафоспен бейнеледі. Ал басқа көптеген шығармаларында ол бұл идеясын Ленинді жырлау арқылы нақтылы білдірді.

Жоғарыда аталған толғауында ақын Ленинмен тірі адаммен сөйлескендей сөйлеседі. Сөйтіп осы бір ерекше тәсіл арқылы Жамбыл Лениннің ұлы идеялары мен ісі мәңгі жасайтындығын шебер аңғартады. Осы толғауындағы идеялары мен ойларын ақын «Ленин» атты ұзақ жырында әсіресе тереңдете әрі өрістете түсті. Бұл жырында ол Лениннің ұлы тұлғасын бейнелеу үшін халық поэзиясындағы не бір шұрайлы көркем сөздерді талғап, тандап барып қолданады. Бұл ретте ақынның өз жанынан қосқан тамаша теңеулері мен метафоралары да мейлінше мол әрі соншалықты бедерлі.

Үнін кетпес құлақтан —
Ағыны күшті, бұлақтан,
Тау суындай тасқыны
Талқандап құзды құлатқан;
Өңі кеп өрлеген,
Түбі терең мұхиттан,
Ағыны жылдам сынаптан;
Жер жүзін тараған,
Аузына әлем қараған
Қара қылды қық жарып,
Жылағанғы жұбатқан;
Солтүстік пен Оңтүстік,
Батыс, Шығыс — әлемде

Балдан тәтті сөзінің
Дәмін алған ұнатқан,
Үнін мәңгі өспейтін
Адам етінің алабы,
Бағыры сенсең — Ленин!

деп жырлады ақын. Жырдың әрбір шумағында Лениннің бейнесін осылайша сипаттай келіп, ең соңғы сөздерін ақын көсемнің өзіне тікелей арнайды. Халық ұғымына түсінікті тілде шығарылған әрі халықтың жүрегіндегі асыл ойын шебер жеткізіп бере алған мұндай жыр оның көңіліне қона кетті. Халық бұл жырды жаттап алды және оны қайталап айту арқылы өзінің де ең қастерлі, аяулы ойын білдірді.

Ленинге арнаған шығармаларында ақын кемеңгер көсемге және ол негізін құрып, құрыштай шынықтырған Коммунистік партияға деген бүкіл халықтың сүйіспеншілік, алғыс сезімін терең бейнеледі және сонымен қатар өз жүрегінің қуанышты күйлерін де тебірене шертті. Халық арасына мейлінше кең тараған «Туған елім», «Әлемді келдім аралап», «Халықтар туысқандығы», «Қымбатты сый», «Орындалған ант туралы жыр» сияқты жыр-толғауларында ақын өткендегі қайғылы, тұл өмірмен бүгінгі бақытты өмірімізді салыстыра келіп, халықтың ғасырлар бойғы арманы орындалған советтік дәуірдің артықшылығын зор ақындық үнмен, асқан қуаныш сезімімен жырлады. Адамбаласының тарихында осындай жаңа дәуір ашқан данышпан көсемнің ұлылығын шын жүректен толғады, оның ұлы өсиеттері біздің елімізде жүзеге асырылғанын әсерлі де тартымды бейнеледі. Жамбыл кемеңгер көсем Ленинмен бірге оның серіктері, шәкірттерін де жырға қосты. Рас, осы жайда ақынның жаза басқан, жеке адамға табынудың зардабына шалдыққан мезеттері де бар. Бірақ шынтуайттап келгенде бұл үшін оны кіналаудың, жазғырудың еш орайы жоқ. Өйткені, сол кеселдің зардабы тиген тек Жамбыл творчествосы ғана емес-ті. Оның үстіне сондай өлендерінде де ақын өзінің Отанға, халыққа, туысқан Коммунистік партияға деген ыстық ықыласынан, татаусыз сүйіспеншілік сезімдерінен зәредей де тая соқпай, патриоттық көңіл күйлерін риясыз, ашық танытқан болатын. Екі дүниенің айғағы мен ақындық үні болған Жамбылдың совет дәуірінде жасаған, терең мазмұн мен көркемдік қуатқа толы ғажайып творчествосы — Коммунистік

партияның ұлт саясатының біздің елімізде толық салтанат құрғандығының тамаша көрінісі. Партияның XVIII съезінде сөйлеген сөзінде жазушы Михаил Шолохов осы ойды бейнелі түрде білдіре келіп, былай деді: «Менің пікірімше, ең үлкен жетістіктеріміздің бірі — біздің жекелеген табыстарымыз емес. Ол — Лениндік ұлт саясаты салтанатының әдебиетте де гүл атып нұрланғандығы.

Туысқан ұлт республикалары акындары мен жазушыларының бұрын орыс халқына аз танылып келген творчествосы енді бүкілхалықтық творчествоға айналды. Ұлт жазушыларының соны дауыстары орыс әдебиетінің үніне тоғысты, оны молықтырды және интернационалдық әдебиет етті. Жамбылдың қарапайым болып келетін ерлік, эпикалық жырлары біздің ішімізден кімді тандадырмады? Грузин акындары өлеңдерінің ғажайып тәттілігі кімді әсерлендірмеді? Сүлеймен Стальскийдің әуезді, әсем жырларын оқығанда кім толғанбады? Тіпті аудармада өзінің алғашқы көркемдігінің біраз бөлегін жоғалтса да, бұл жазушылардың сөздері біздің жүректерімізге тура жол тапты».

Өзінің өмірін асқан зор шабытпен жырлаған және ойтілегін көркемдікпен жеткізіп бере алған акынның халық мейлінше қадірледі. Қарт Жамбыл бүкіл халықтың қамқорлығы мен сүйіспеншілігіне бөленді. Үкімет пен партия Жамбылдың ақышдық қызметін, Отан алдындағы оның еңбегін аса жоғары бағалап, оны ордендармен наградтады, оған Халық акыны деген құрметті атақ берді. 1938 жылы май айында бүкіл еліміз Жамбылдың ақындық қызметіне жетпіс бес жыл толуын кеңінен атап өтті. Советтік дәуірдің ұлы жыршысының бұл даңқты юбилейіне бүкіл прогресшіл адам баласы ерекше назар аударды. Қарт акынның атына көптеген шетелдерден құттықтау телеграммалар келді.

Батыс Еуропаның алдыңғы қатарлы мәдениет қайраткерлерінің ойып білдіре келіп, француздың атақты жазушысы, Совет Одағының досы Ромэн Роллан былай деп жазды: «Батыс Альпаның жүрегінен Қазақстан далаларының жүрегіне, өзінің қазақ халқының және жаңа адам баласының жыршысы — Жамбылға туысқандық сәлем!» Бұл сөздер Жамбылдың бүкіл дүние жүзіне советтік дәуірдің теңдесі жоқ жыршысы ретінде кең танылғандығын айқындай түседі.

Жамбыл творчествосының шарықтап өскен бір шағы — Ұлы Отан соғысы кезеңі. Зұлым жаудың бейбіт елімізге тұтқиылдан жасаған шабуылы басқа совет адамдары сияқты, Жамбылдың да ыза-кегін өршітті, оның қарт жүрегінде паныс отып қаулатты. Ақынның қуат пен қайратқа толы кекті дауысы соғыстың ең алғашқы күндерінен бастап-ақ құдіретті үнмен естіле бастады.

Асқар таудай еліме
Байтақ жатқан жеріме
Шапты фашист дегенде —
Ашүменен аралас
Жыр да келді көмейге,
Қаһар қаулап денемде! —

деп жар салды ақын. Отан соғысы жылдарында шығарған «Өмір мен өлім белдесті», «Ленинградтық өрендерім», «Москваға», «Аттан, батыр ұрпағым», «Отан әмірі», «Алынбас камал» сияқты атақты жырларында патриот-ақын социалистік Отанымыздың жеңілуді білмейтін қуаттылығын мадақтады, совет адамдарын еліміздің азаттығы мен тәуелсіздігін қорғап қалуға шақырды. Жамбылдың рухани қуат пен қажырлылық рухына толы жалынды жырлары совет майдангерлерін жеңіске үндеді, олардың бойында отаншылдық сезімін қаулатты. Бұл ретте «Ленинградтық өренім» атты әйгілі толғаудың жолы әсіресе бөлек екенін атап айтуға керек. Қарт ақынның жүрегін жарып шыққан жалынды сөздер қамауда, құрсауда қалған қаланың халқына жігер беріп, оның мұқалмас қайратын қайрай түсті. Толғау ақынның Ленин қаласын, оның гажайып көркін еске алуымен басталады.

Ұлы Ленин даланың
Атындағы қаланың
Бөсігінде телі өскен
Балаларым — жараным,
Сәулетім, сәнім, айбарым!
Анзсындай даланың
Өзендердің алабын
Байқағанда байыптап
Бейнесін көрем Неваның.
Көпірі осы Неваның
Көзіме түссе керікті
Бір серпіліп қаламын.
Аңғарсам қала аймағын,

Балтықғын терең жарларын
Қатаны нұрға шомылтып
Ымыртта жанған шамдарын,
Зәулім-зәулім үйлерге
Алғынды күмбез салғанын —
Қиырдан бөлжайд жанарым.

Ақынның осылайша Ленин қаласының бейбіт күндегі көрікті келбетін жырлауы әншейін емес. Осындай жарқын сурет ұрланып келіп шапқан опасыз жаудың зымиян сиқына, ақынның жаңа ғана құйылып тұрған қуанышты сезімі құрсанған ыззаға, қасиетті кекке ауысады. Бұл тәсіл толғаудың әсер күшінің еселене түсуіне, оның патриоттық қуатының үдеп артуына ерекше ықпал жасады. Жамбылдың бұл толғауы Ленинград қаласын қорғаушыларға радио арқылы беріліп тұрды, плакат болып шығарылып көше-көшеге ілініп қойды. Жауды мейлінше жек көруге үндейтін, еңіреген ерлікке жар салатын бұл жалынды жыр басқа майдандардағы совет жауынгерлерінің де патриоттық сезімдерін, ар-намысын өршітіп, оларға рухани қуат-қолдау берді.

Сондықтан да совет жауынгерлері ұлы ақынға ыстық сүйіспеншілігі мен алғыс сезімдерін білдіріп, майдан даласынан сансыз хаттар жолдады. Бұл хаттарға ақын өзінің патриоттық жыр-толғауларымен әрдайым жауап қайтарып, жауынгерлерге өзінің жалынды жыр-сәлемін арнап отырды. Оның осы алуандас шығармаларының ішінде «Сүйікті Отанымның ұлдарына!» атты толғауы ерекше орын алады. Ақынның осы толғауынан және майдан кезіндегі басқа да таңдаулы шығармаларынан оның ел өмірімен, жеңіс рухымен тыныстағанын айқын көреміз. Ақын Алексей Сурков тауып айтқандай: «Қазақстан өлкесін соғыс даласынан бөліп жатқан шалғай алыстық карт Жамбылдың шабытты да балғын даусының Ленинград пен Москваны қорғаушылардың, Кавказ бен Волгоградты қорғаушылардың құлағына шалынуына бөгесін бола алмады». Жамбыл творчествосында соншалықты терең жырланған Ленинградты қорғау тақырыбы халықтар достығы тақырыбына ұласты және сол кездегі бүкіл совет поэзиясына ерекше әсер етті.

Жамбыл творчествосын ұзына бойына шолғанда бір ерекшелікті анық байқағандай боламыз. Эпикалық сарынмен бірге Жамбылдың революцияға дейінгі өлең-жырларында сатиралық, әшкерелеушілік уыт басым еді.

Ал оның совет дәуіріндегі поэзиясында лирикалық саз молая түсті. Бұл оның творчестволық эволюциясын, ақындық шеберлігінің шыңдалып толысқанын да қоса байқататындай. Өзгесін былай қойғанда, ақынның баласы Алғадайға арналған өлеңдер циклынан мұны әсіресе анық көреміз. «Аттандыру», «Алғадай туралы әрбір ой», «Атаның әлдіні» атты өлеңдері композициялық тұтастығымен бірге тамылжыған терең лиризммен, шыншылдығымен, гуманистік мейрімділігімен ерекшеленеді.

Осы орайда ақынның «Абайдың суретіне» деген өлеңін қайталап оқудың артығы жоқ сияқты:

Мынау тұрған Абайдың суреті ме?—
Өлең сөздің ұқсаған құдіретіне.
Ақыл, қайрат, білімді тең ұстаған
Өр Абайдың төтеген кім бетіне!
Ақын атын таратқан әрбір тұсқа,
Өлеңімен өлмейтін салған тұсқа.
Кол бастар ер, ел сүйген ақын болған
Қандай арман бар дейсін бұл туыста!

Терең ойдың түбінде теңізі бар,
Тесіле кеп қарасаң — көңіл ұғар.
Сол тереңге ешкімді үңілте алмай
Есіл сабаз ызамен өткен шығар?!

Бұл өлең импровизатор-ақынның айтқанынан гөрі жазба поэзия өкілінің қалам сілтесіне көбірек орайлас. Шындығында да, Жамбылдың лирикасында оның жаңашылдығы, жазба поэзияның дәстүрлеріне жедеқабыл жақындап келгені анық белгі берді. Оның творчестволық эволюциясының ең басты бір сипаты да осында.

Жамбыл толғау жырларымен қатар көптеген ұзақ дастандар мен эпикалық поэмалар да шығарды. Бұл салада да Жамбыл өзін жаңашыл-ақын ретінде көрсетті. «Өтеген батыр», «Сұраншы батыр» атты кесек те күрделі дастандарында ақын өткенде ел қорғаны болған, халық қамын ойлаған батырлардың патриоттық, ерлік қимылдарын суреттейді. Бұл шығармаларында Жамбыл өткен өмірден алынған тарихи тақырыпты бүгінгі күннің биік тұрғысынан қарап, жаңаша жырлайды. Мысалы, «Өтеген батыр» дастанында ақын негізгі кейіпкерінің бастан кешірген оқиғаларын эпикалық планда баяндай келіп, шығарманың соңғы бөлімінде Қазақстанның бүгінгі гүлденген бейнесін жырлайды. Бір кезде халықтың Өтеген сияқты батырлары аңсап өткен арман енді жү-

зеге аскамын айтады. Бұл бөлімнің дастанның жалпы сюжеттік желісі мен идеялық арқауына заңды түрде, тұтаса қабысып тұрғаны соншалық, егер ол болмаса, шығарманың оптимистік зор тынысы әлдеқайда әлсіреп кетер еді.

Жамбылдың «Замана ағымы», «Туған елім» сияқты қазіргі тақырыпқа арналған шығармалары да — эпикалық поэма жасаудың жаңа үлгілері болып табылады.

Творчествоның осындай аскарына көтерілген, жыр алыбы болған Жамбылдың советтік поэзияға, әсіресе халық поэзиясына ерекше ықпал жасамауы мүмкін емес еді және дәл осылай болды да. Нұрпейіс, Доскей, Саяділ, Қуат, Төлеу сияқты өзінің ізін баса шыққан белгілі ақындардың толғаулары мен шағын өлеңдерінен де, ұзақ жыр-дастандарынан да Жамбылдың идеялық және көркемдік әсері өте айқын сезіледі.

Өз халқының тұтас бір ғасырлық өмірінің жанды куәсі болған Жамбылдың ұмытылмас жырлары — оның сол туған халқы тарихының ақындық шежіресі есепті. Ол қашанда халықпен бірге болды, азалы, ауыр күндерде оның қайғысына ортақтасып, қайрат-жігер берді, советтік дәуірде оның бақытқа толы өмірін өзінің тамаша шығармалары арқылы талмастан жырлады.

«Қазақстанның даңқты ақынының тәнсіз лиризмге, ұмытылмас образдарға толы ғажайып өлеңдерінен совет халқы өміріміздің жүрек соғысын сезеді, дәуіріміздің алға қарай ұмтылысын сезеді, өзінің көңіл күйлерінің жинақты көрінісін, өзінің қастерлі ойлары мен сезімдерінің поэтикалық бейнесін көреді», — деп жазды «Правда» газеті Жамбылдың мәңгі ұмытылмас шығармалары жайында. Бұл — сүйікті ақынның творчествосына берілген бүкілхалықтық баға еді.

Қазақ совет ақын, жазушыларының ішінде есімі бүкіл Одаққа және жер жүзіне ең алғаш әрі мол таралғаны — Жамбыл. Оның шығармалары француз, ағылшын, неміс, чех, поляк, қытай тілдеріне және басқа да көптеген тілдерге аударылды. Сөйтіп ұлы ақынның Алатаудың баурында туған жырлары бүкіл әлемді шарлады. Жамбылдың шығармаларын шет елдерде оқып қана қоймайды, сонымен қатар оның творчествосы жайында пікір де айтады. Мысалы, Жамбыл шығармаларының чех тіліндегі аудармаларын талдай келіп, «Лидова культура» журналы былай деп жазады: «Оның жырлары мазмұ-

ны жағынан бай әрі алуан түрлі. Бірақ сол жырлардың мазмұнын қайталап баяндап беру арқылы ақын творчествосының мәнін ұғындыруға болмайтыны белгілі. Жамбыл — қазақтың халық поэзиясы дәстүрлерінің мұрагері және дамытушысы. Өлеңдерінің осы халықтығы — оның творчествосындағы ең бағалы қасиет... Майдандағы солдаттар ақыннан өзінің жаңа жырларын жіберуді неге өтінгенін біз түсінеміз. Яғни сол жырлар оларды күресте қолдады, оларға ерлік қуат қосты. Ақынды барша жұрттың осылайша тануы оның поэзиясына берілген жоғарғы баға болып табылады. Осы жырлар бізді көркемдік қасиеттерінің әсемдігімен рухтандырып қана қоймайды, одан да артық әсер береді. Олар бізді жаңа ойлармен және сезімдермен молықтырады.

Қытай профессоры Цао Цзин-хуа өзінің «Совет әдебиеті Қытайда» деген мақаласында советтің аса ірі ақындарының, оның ішінде Жамбылдың да шығармалары қытай оқушыларына кеңінен мәлім екендігі және оның сол шығармаларды мейлінше сүйіп оқитындығы жайында айтады. Бұл айтылғандар Жамбыл творчествосының интернационалдық сипатын айқындай түседі.

Жамбыл өзінің өшпес, ескірмес шығармаларында халықтың өмірі мен ой-тілегін кеңінен бейнеледі және сол үшін де бүкіл халықтың құрметіне, мол мейіріміне бөленді. Ақынның жырлары да, оған деген халықтың осы сүйіспеншілігі де әрқашан әлсірмей, балғын күйінде қала бермек.

ЖЫЛДАР—ОЙЛАР

Қас суреткер қаламның ғана майталманы емес, сонымен бірге ойдың да ерені болмақ. Суреткерлік пен ойшылдық бір өзінің бойында тұтаса тоғысқан қаламгерлер ғана нағыз ұлы шеберлер бола алғандығы әдебиет тарихынан жақсы аян. Пушкин мен Гогольдің, Горький мен Фадеевтің тамаша көркем шығармалары мен өмір туралы, әдебиет туралы даналық ой-пікірлері қатар жасап келеді. Олар халықтың өмірімен де, оның арғы-бергі сөз өнерімен де мейлінше тығыз байланысты болған, туған елі-жұртының өткендегі әрі өздерімен тұстас әдебиетін зерттеген. Бұл олардың өз творчествосына да жемісті, игі әсер еткен.

Осының айқын мысалын өзіміздің көрнекті суреткерлеріміздің творчествосынан да табамыз. Атақты жазушымыз Мұхтар Әуезовтың қызметіне бұл әсіресе орайлас. Творчестволық сапарының ең алғашқы кезеңінен бастап-ақ ол туған халқының тарихы мен тағдырын, оның ежелгі сөз өнерін, қолтума әдебиетін әрі суреткер, әрі ғалым ретінде қоса зерттеп келеді. Соның нәтижесінде ол барша әлемге паш болған асқан үздік көркем шығармаларымен бірге көптеген байсалды зерттеулер, ойлы еңбектер жасалды.

Сол зерттеулер мен еңбектердің талай-талайы ғалым-жазушының «Әр жылдар ойлары» атты көлемді кітабына енген. Бұл кітапта автордың оқушы қауымға әзелден таныс еңбектерімен, мақалаларымен бірге тұңғыш рет жарияланып отырған монографиялық зерттеулері де бар. Осыған байланысты кітаптың құндылығы әсіресе арта түседі.

Кітап халқымыздың ұлы ақыны Абайдың өмірі мен творчествосына арналған көлемді зерттеумен ашылады. Абай туралы тақырып М. Әуезовтың суреткерлік творчествосының ғана емес, сонымен бірге ғалымдық қызметінің де ең өрісті өзегі, үзілмес арқауы екені аян. Ұлы ақынның тағдыры мен тартысын, өмірі мен өнерін ол талай жылдар бойына толассыз іздене жүріп, сарыла зерттеді. Осы ретте ол талай-талай шабытты зерттеулер де жазды. Оқушы жұртшылық оларға да қанық. Бірақ оның Абай жәйлі бұл көлемді еңбегі бұрынды-

сонды тұтас күйінде, қаз қалпында жарияланып, жарық көрген емес. Сондықтан да оған арнайы тоқталуды ләзім деп білеміз.

Зерттеудің кіріспе тарауында автор Абайдай ақынды тудырған тарихи-әлеуметтік жағдайларды ашады, ақын және оның өмір кешкен дәуірі туралы мәселе қозғайды. Осы орайда ол ақын творчествосына әралуан тақырып берген қосқыртыс замана шындығын, оның поэзиясын нәрлендірген көркемдік қайнар көзді де анық аңғартады. Зерттеуші Абайдың абайлық қасиет-қадірін, ұлылығын оның өмір кешкен дәуірінің ілгерішіл сипатымен және оның бірден-бір дұрыс, айнымас та адастырмас творчестволық бағыт-бағдар ұстағандығымен байланысты алып қарайды. «Тегінде, Абайдың ақындығындай ақындық қуаты Абайдан бұрынғы ақындарда да болуға мүмкін. Олардың бірталайы тіпті атсыз ақын боп та өткен болар. Сондай ақындардың ғана сапасы мен таптық тұрғысында, мәдениеттік дәрежесінде қалса, Абай классик Абай болмас еді. Өзінен бұрын жүз ақын болса, жүз бірінші, мың ақын өткен болса—мың бірінші болар да қалар ма еді, әлде қайтер еді!» — деп түйеді ол. Сөйтіп, зерттеуші Абайды еңалдымен өз дәуірінің жемісі, өз заманының үні деп қарайды. Ол осындай диалектикалық принциптен әрдайым танбайды, еш жаза баспайды.

Бұдан әрі ғалым Абайды тану жөйін азды-көпті сөз етеді, басқа авторлардың ақын туралы үлкенді-кішілі еңбектеріне әділ баға беріп, атап өтеді.

Зерттеудің көлемді де кенеулі тарауларының бірі — ақынның өмірбаяны жайындағы шолу. Абайдың ғылыми өмірбаянын жазумен М. Әуезов көптен бері шұғылданып келеді. Ол Абайдың көлемді өмірбаянын 1933 жылы жариялаған болатын. Толассыз ізденудің арқасында ол соны әрдайым тереңдетіп, толықтыра түсіп келеді.

Абайдың өз басы ешқандай мемуар жазбағанын және оның замандастарының қағаз бетіне түсірілген естеліктері жәқтығын ескерсек, онда М. Әуезовтың бұл салада жүргізген еңбегі қаншалықты қиын да күрделі болғанын анығырақ аңдай түсеміз. Ақын жайында ел арасында таралған әралуан аңыздарды, кәрі құлақты жандардың жадында сақталған жәйттерді, басқа да сан-сан материалдарды дамыл таппай, тірнектеп жинай жүріп, зерттеуші Абайдың нағыз ғылыми өмірбаянын жазуды тамамдап шықты.

Акынның М. Әуезов жазған осы өмірбаянын оқып отырғанда бір нәрсеге сүйсіне қайран қаласын. Ол — Абайдың жалпы өмірбаянының, сондай-ақ өмірінің жекелеген фактілерінің акынның творчестволық эволюциясына, суреткерлік сапарының қат-қат қырларына, сан-сан сырларына соншалықты жанасып, үйлесе кетіп тұрғандығы. Осы орайда оқушы Абайдың тарихи тағдырын, өмірін оның М. Әуезов эпопеясындағы сом тұлғалы, соқталы бейнесімен салыстырып көруге, жазушының тарихи шындықты көркемдік шындыққа қаншалықты шебер ұластырғанын аңғарып аңдауға да мүмкіндік алады.

Біздің бұрынғы-соңды акындарымыздың ішінде творчестволық мұрасы ең мол зерттелгені — Абай. Акын шығармаларын тақырыптық қамтуы жағынан қарап талдаған, оның классикалық орыс поэзиясымен байланысын, аудармашылық өнерінің сырларын ашуға арналған еңбектер бізде аз жазылған жоқ. Бірақ мынау еңбек солардың барлығынан да оқшау, үздік танылады.

Автор акын шығармаларын тақырып-тақырыпқа бөліп, үзіп-үзіп жіктемей, тұтас күйінде алған. Ол хронологиялық принцип ұстанып акын творчествосын ұзына бойына шолып зерттеп шығады. Бұл — әдебиеттану ғылымында ежелден бері қолданылып келе жатқан, өзін өзі ақтаған жемісті зерттеу тәсілі. Акын мұрасының қай саласын, қай жапырын талдаса да, автор осы тәсілден танбайды. Ал оның шеберлік қырларын, тіл ерекшеліктерін, эстетикалық және философиялық көзқарастарын және акын поэзиясындағы дәстүрлік жәйттар мен жаңашылдықты кезең-кезеңіне қарай, сап-сабымен ашып тастап отырады.

Абайдың жас шағында жазған немесе шығарған өлеңдерінің бізге жеткені онша көп емес. Бұдан он шақты жыл бұрын кейбір зерттеушілер сол азды-көпті өлеңдердің авторы Абай сендігіне шәк келтірмек те болды. М. Әуезов сондай дұдамал, ескіұдай пікірлердің терістігін анық дәлелдей отырып, акынның жас шағындағы творчествосына хас қасиеттерді терең ашып береді. Солардың бірі — Абайдың шығыс акындарымен байланысы.

Әрине, творчествосының ең алғашқы, балаң кезінде Абайдың шығыс классиктеріне көп еліктегенін талай зерттеушілер атап көрсеткен. Бұл жаңалық та емес. Тіпті кімге құлай беріліп, кімнен мәдет тілейтінін жас Абайдың өзі де риясыз ашық айтқан. М. Әуезов пікірлерінің

бағалылығы сол — ол Абайдың кімнен үйренгенін, нені үйренгенін дәлелден көрсетеді және ақынның өзінен бұрынғы қазақ поэзиясының кейбір дәстүрлерімен байланысын да аша кетеді.

Абай араптың талай жұртқа мәшһүр болған Мұтанәбби, Әбіл Ғала-Мағри сияқты классиктерін ауызға алмайды. Оның ден қыятындары — Навси, Фзули, Фердауси, Сағди және басқалар. Осылардың ішінен Абайға ең етене жақыны — Навси. Оның «Чар-диуаны» қазақ ақынының шығыстық сарындағы өлеңдеріне әсіресе орайлас. Зерттеуші осындай ой түйініне мензейді және оған қалтқысыз сенесін. Өйткені, оның пікірлері дәлелді де салмақты. Зерттеудің ең көлемді әрі аса қызғылықты, ғылыми жағынан мейлінше терең тарауы ақынның лирикасына арналған. Бұл заңды да. Өйткені, оның поэзиялық мұрасының дені де, салмағы да осы жанрда.

Автордың әділ, дұрыс атап көрсеткеніндей, Абайдың нағыз классик, реалист-ақын ретіндегі творчестволық сапары оның «Қансонамда» деген атышұлы өлеңінен басталады. Өзінің зор ақындық мәдениетін, асқан шеберлігін, жаза баспас, қалт еткізбес ғажайып шыншылдығын Абай осы өлеңінде тұңғыш рет қапысыз танытады. Сондықтан да зерттеуші оны ақын творчествосындағы нағыз жаңашыл, кезеңдік шығарма деп бағалайды. Сонымен бірге оның осы өлеңге берген жіті байқауларға, кесек-кесек ойларға толы тамаша талдауына дән разы болмай, сұқтанбай қала алмайсың. Абайды қайта-қайта оқи жүріп те, ол жайында талай-талай жаза жүріп те, ешкім барлап байқамаған, андап танымаған небір терең сырларды автор қарбыта қамтып, ақтара ашады.

Осындай тапқыр көрегендік, ақын творчествосының ішкі аныстарын бұлжытпай, тап басып танушылық тәрізді қасиет тек бір өлеңнің тұсындағы талдаудан ғана емес, бүкіл зерттеудің ұзына-бойына мол сезіледі. М. Әуезов Абай шығармаларының идеялық тереңдігі мен көркемдік келісімдеріне тек ғалым ретінде ғана емес, сонымен бірге ойлы да сезімтал суреткер ретінде де барлап үңілген. Сондықтан да оның зерттеуінен ұлы ақын творчествосының ғажайып сырларын аңғарумен бірге шын мәнісіндегі көркем шығарма оқығандай күйлі де келісті әсер аласың.

Суреткерлік шеберлігі тез кемелденген Абайдың творчествосы идеялық нысанасын, әлеуметтік тынысын бірте-

бірте айқындап, барған сайын толыстыра түсіп отырды. Ақын творчествосының бұл эволюциясын зерттеуші соншалықты нанымды ашады. Абайдың алғашқы кезеңде жазған әйгілі өлеңдерінің бірі — «Жаз» екені аян. Мұнда ақын ешқандай көмескі күйлерге, тұмайды тұспалға бармайды, шындық хал-халеттерді нақтылы, анық қалпында суреттейді. Өлеңді оқығанда көшіп қонған ескі ауыл өмірінің талай-талай реалистік көріністері көз алдына келеді. Өлең өзгеше бір динамикаға, сергек қимылға, бусанып тұрған жанлы шындыққа толы. Осындай тамаша өлеңнің бір кемшілігі де бар. Ол — сахрадағы ауыл тіршілігін, көшіп-қонып жатқан көріністерді соншалықты шебер суреттеген ақынның сол ауылдың өз ішіндегі әралуан әлеуметтік топтар арасындағы қайшылықтарды, қарсылықтарды аз көретіндігі, тек емеурінмен ғана танытатындығы. Ал осы тақырыпқа, яғни адам тіршілігі мен табиғат туралы тақырыпқа арнап жазған кейінгі өлеңдерінде ақын салт-саналық жақтан үдеп өскенін көрсетеді. Бұрын көшпелі тіршілікті мінеп, сынай бермейтін ақын енді оның небір сұрықсыз көріністерін аяусыз ашып тастайды. Зерттеуші осындай салыстырулар арқылы да ақын шығармаларының ішкі сырын терең танытады және ескі сораппен кете бермей, тың ойларға мол өріс беріп отырады.

Автор Абайдың 1886 жылы жазған өлеңдеріне әсіресе байыпты әрі кеңінен тоқталған. Өйткені, ол өз заманына да, біздің дәуірімізге де Абайды қадірлі дана, анық классик етіп танытатын ақындық жолдың нақтылы арналары дәл осы жылы салынған деп санайды. Бұл тұста ол ақын шығармаларын үлкен-үлкен төрт жікке бөледі. Біріншісі — надандықты, қанаушылықты қатты таңбалап сынаған ғибратшыл, ойшыл өлеңдері. Екіншісі — табиғат, жаратылыс тақырыбына арналғандары. Үшіншісі — жас буынға тағлым айтқан, өнер-білімге үндеген өлеңдері. Төртіншісі — көңіл күйінің лирикасы. Әрине, ақын творчествосының бағыт-бағдары, тақырыптық өрісі бұл айтылғандармен шектеліп қалмайды. Бірақ Абай сол төрт сала тақырыптан ешуақыт қол үзбей, әрдайым қайталап оралып отырған. Және оралған сайын салт-сана жағынан да, ойшылдық, даналық, тереңдік жағынан да ұдайы биіктей түсіп, үдеумен болған. Сондықтан да автор осыны ескеріп, ақынның тақырыл жағынан бірін-бірі қайталайтын шығармаларын өне бо-

йы түгел талдай бермей, солардың ішіне кейінгі жылдар қосқан жаңалық идея мен көркемдік тың сипаттарды айрықша атап отырады. Бұл оның ұлы ақынның көркемдік ізденулерін, шеберлікті шыңдап жетілдірудегі жолдарын ашуына, оның творчестволық сапарындағы саналуан эволюцияны терең де толық танытуына мүмкіндік берген.

Абай қай таптың санашылы болды, қандай идеялық мұрат-мүдделер көздеді? Оның творчествосын нәрлендірген бұлақ-бастаулар қандай? Ол қазақ поэзиясына ұлан-асыр қандай жаңалықтар енгізді? Абайдың ұлылығы, суреткерлік шеберлігі, оның реализмінің қуаты неде? Осындай және бұдан басқа да талай-талай сұрақтар Абайды зерттеушілердің алдына әрдайым қойылып келді. Бірақ соларға дәл осы еңбектегідей толық, сарқа жауап қайтарылған емес. Автор жалаң қисын айтпайды, эстетикалық-көркемдік талдауды жадағай социологиялық топшылаулармен ауыстырмайды. Ол ой-пікірлерінің барлығын да сол зерттеп отырған материалының өз ішінен ойып алады, оған терең бойлап отырып, аса қызғылықты байлаулар жасайды. Пікіріміз дәлелді болуы үшін бір ғана мысал келтірелік.

Ақынның «Өлсем, орным — қара жер...» атты әйгілі өлеңі әркімнің-ақ есінде. Бірақ осы өлеңді ақынның бүкіл өмірлік сапарының шыны мен сыры, оның ең асыл, аяулы ой-сезімдері, келешекке артқан үміті, болашақ ұрпақпен өзінше шешіліп тілдесуі түгел сиып жатқанын аңдаған адам кемде-кем-ақ болар. Зерттеуші ақын өлеңінің әр шумағының, әр сөзінің ішінде жатқан астарды, суреткерлік тебіреністері мен аңыстарды айнытпай танып, жайып салады. Бұл талдау жайында пікір айту қиын. Оны тек қайталап оқып шығу керек. Сонда сүйікті ақын Абаймен тағы бір кездескендей, оның творчествосымен тыңнан танысқандай әсер аласың.

Бұл өлең Абайдың ақын мен ақындық жөнінде, қоғам мен өз арасын білдіру жөнінде және көңіл сыры жөнінде бұл шаққа дейін айтып келген әр тақырыпты сансан өлеңдерінің сұрыпталған асылы есепті. Абай қайтыс болардан бірнеше жыл бұрын жазылса да, осындай тереңде жатқан түйіндеріне қарап, бұл өлеңді зерттеуші ақын өмірінің соңғы шағының, оның творчестволық сапарының үлкен қорытындысы деп бағалайды. Бұл монографиялық зерттеуде Абайдың лирикасы, оның

әр өлеңі егжей-тегжейіне дейін тұтас қамтылып, жан-жақты, терең талданған. Автор ақын творчествосына жіті үніліп, жете бағалаумен бірге қазақтың жана бағыттағы жазба әдебиетінің туып қалыптасуына және соны зерттеуге байланысты көптеген келелі мәселелерді қоса қозғап, тыңғылықты түрде шешіп отырады.

Абайды өмір сүрген дәуірімен, тарихи ортасымен тығыз байланыста алған зерттеуші ақын творчествосындағы қайшылықты мезеттерді, жаза басқан жаңылыс сарындарды да бүгін қалмай, ашып айтады. Бұл ретте де М. Әуезов еңбегінің тағлым аларлық өнегелі қасиеті көп.

Абай — өзіндік мектебі бар, жүйелі бағыт ұстаған философ емес. Ол философиялық еңбектер, арнаулы трактаттар жазбаған. Бірақ нағыз жаңашыл, классик ақын болған, туған халқының тарихында, қоғамдық ойды бастаушылардың бірі болған әрі өз дәуірі, заман құбылыстары жайында көп толғанған Абайдың шығармаларында философиялық ой-топшылаулар, даналық пікірлер аз кездеспейді. Сондықтан автор бұл мәселені де өз назарынан қағас қалдырмаған. Ол Абайдың философиялық көзқарастарына, дін туралы ой-пікірлеріне де біртоға кеңінен тоқталған. Оның бұл реттегі тұжырымдары да көкейге қонымды, салмақты.

Абай мұрасының өзгеше бір саласы — оның поэмалары. Лирика саласындағы шырқау биік дәрежесіне көтерілмесе де, ақын поэмалары арқылы да өз тұсындағы қазақ поэзиясын соны арнаға, алыс өріске меңзеді. Бірақ соңғы кезге дейін Абайдың сол поэмалары арнайы зерттеліп, терең талданған емес. Олар жайында айтылған азды-көпті пікірлер орта мектепке арналған оқулық шеңберінен асқан емес-ті. Зерттеушінің Абай поэмалары жайындағы пікірлері сондықтан әсіресе бағалы, қызықты бола түседі.

Лирика саласында өзі көп үйренген, мол үлгі алған әрі шығармаларын зор ақындық шабытпен соншалықты шебер аударған Пушкин, Лермонтов сияқты суреткерлердің поэма жанрындағы творчестволық тәжірибесіне Абай елікпеген, онша құлап бой ұрмаған. Олардың сюжетті кесек шығармалары кең өмірді мол қамтитын роман-поэма, кейде қалың оқигасы, шытырман тартысы бар романтикалық көркем туынды болып қалыптасса да, Абай сол жанрға ден қоймаған, беріле қызықпаған. Зерт-

теуші мұның сыры Абайдың өз заманындағы қалың көптің интеллектуальдық дәрежесін ескергендігінен және жалпы поэзиясындағыдай, бұл ретте де адамгершілік үлгі-өнеге таратып, ұстаздық қалып ұстағандығынан іздейді.

Абай поэмаларының оқиғаларын қазақ сахнасының тіршілігінен, өз дәуірінің шындығынан таттамай, шығыстық аңыз-ертегілерден алған. Солардың бірі — «Масғұт». Бірақ зерттеушінің дұрыс тұжырымдағанындай: «Поэмада Абай араптың тарихын, тірлік шындығын көрсетпек емес. Қызырдың қызырлығын да баяндамақ емес. Олардың барлығы да — поэманың идея жағынан қарағанда тек бір көмекші қосымша хал мен жайлар. Анығында олар шартты түрде алынған аңыздық жалпы шартты сұра деуге болады.

Ақынды шығарманың ішінде қызықтыратын бір-ақ геройдың, Масғұттың жайы... Масғұт аузымен Абай өз заманындағы, өз сұрасына қанықты болған жайларды айтады. Үлкен гуманист ақын сол өзі таратпақ болған мораль философиясын жаңа түрде, шартты мазмұнға байланыстырып ұсынып отыр».

Шығыстан келген аңызды ақын өз ойын баяндау үшін творчестволық материал ретінде ғана алғанын, Абайды поэманың оқиғасы қызықтырмайтынын, ол оқиғаларды, адамдарды барлық мінез-істерімен, сөздерімен өзінің дағдылы идеясына қарай ыңғайлап пайдаланатынын зерттеуші нанымды дәлелдеп көрсетеді.

Абай поэмаларының ішіндегі ең үздігі — «Ескендір». Мұнда ақын бүкіл шығыс әдебиетінде талай классиктер жырлаған Александр Македонский жайын назиргүйлік дәстүрмен өзінше баян етеді. Зерттеушінің анықтауынша, Абайдың «Ескендірі» негізгі сюжеті, композициялық құрлысы жағынан әзірбайжан халқының ұлы классигі Низамидің «Ескендірнамасына» әсіресе жақын келеді. Бірақ Абай Низами шығармасының кейбір тарауларында ғана баяндалатын оқиғалар желісін алған және оны өз тұрғысынан жырлаған. Бүкіл Шығыс әдебиетінде, соның ішінде Низами шығармасында да дәріптелетін Ескендірдің өз басына Абай қатал шыншылдық көзбен қараған. Зерттеуші Абайдың бүкіл Шығыс әдебиетінен осы тұста еңсесі биік тұрғанын, өз поэмасында анық нағыз гуманистік, адамгершілік нанымдарды бекем ұстағанын салыстыра отырып терең ашады.

Еңбекте арнайы сөз болатын мәселелердің бірі — Абайдың аудармалары. Мұнда нақтылы жәйттерге ауысар алдында автор екі түрлі нәрсені атап айтады. Біріншісі — Абайдың сол аудармаларға берген бейілі мен бағасы. Екіншісі — сол аудармалардың ақынның өз шығармаларына еткен әсері және Абайдың кейінгі қазақтың барлық жазба әдебиетіне тараған үлкен тарихтық, мәдениеттік ұстаздық дәстүрі, әсері туралы. Автор осы екі мәселені өзара тығыз байланыста алып қарайды. Монографияда Абайдың «Генри Онегиннен» жасаған аудармалары әсіресе байыпты талданған. Абайдың Пушкин романынан тек Онегин мен Татьянаның арасындағы махаббаттық хал-құбылыстарды ғана алғаны және соны эпистолярлық роман үлгісінде қалыптағаны аян. Қазақ ақынының Пушкиннен еркін аударма жасап, оның ізімен тың жайларды жырлап кетуінің сыры неде? Зерттеуші осы сұраққа жауап бере келіп, екі түрлі себеп болғанын атайды. Мұның ішінде ең негізгісі — Абай орыс жастарының сезім-сырларынан, тағдыры мен талайынан өзінің жас оқушысына өнеге танытарлық тәлім-тәрбие беруді көздеген. Сондықтан да ол Онегин бейнесін көп өзгертіп алған. Абай оны айыпты адам етіп шығармай, оны тек жұлдызынан жаңылған, жазықсыздан жазп басқан жан етіп суреттейді. Оның өкінішін үлкен трагедиялық ауыр ойға жеткізіп оған рухани азап шеккізеді. Осы арқылы Абай айнымас адалдықты, пәктікті мадақтап, үлгі-өнеге етеді. Екіншіден, «Евгений Онегинді» аударған кездегі Абайдың аударма өнері туралы ой-пікірі, көз қарасы әлі де болса өзгерек, басқашарақ еді. Яғни, ол «Ескендір» поэмасында ұстанған Назирағұйлік дәстүрді мына шығармаға да қолданған. Абайдың Лермонтовтан жасаған аудармалары мүлдем жана творчестволық сапа танытады. Сондықтан да автор бұл аудармаларға арнайы тоқталған. Ол Абайдың Лермонтов поэзиясының қолтума сырларын аңдап ұғынудағы және соны қазақ оқушысына бар әсем, шыншылдығымен жеткізіп берудегі шеберлігін, көркемдік ізденістерін соншалықты нәзік аңғарымпаздықпен, тапқырлықпен аша алған. Бұл тарауда қазіргі аудармашыларға да ой салып, толғандыратын көп жәйттер бар. Бұдан кейін автор Абай мұрасының өзгеше бір саласын — оның қара сөздерін тақырып жағынан топтап, саралап шолып өтеді, бұл шығармалардың жанрлық ерек-

шеліктеріне және олардың ақын поэзиясымен байланысына тоқталады.

Қорыта айтқанда монографияда Абайдың бүкіл творчествосы, оның тыңнан жарып жол салған жаңашылдығы, көркемдік ідейлері, ақындық шеберлігі — баршасы да тұтастай қамтылып, мейлінше терең сипатталған. Бұл ретте ғалым-Әуезовтың еңбегін ақын жайында тамаша эпопея тудырған жазушы-Әуезовтың еңбегімен ғана салыстырып бағалауға болатын тәрізді.

Кітаптағы «Орыс классиктері мен Абай», «Абай еңбектерінің биік нысанасы», сондай-ақ орыс тілінде жазылған «Жизнь и творчество Абая», «Идейно-культурные искания Абая», «Великий сын народа» атты мақалаларға арнайы тоқталмаймыз. Өйткені, олар — жоғарыда талданған көлемді еңбекті толықтыра түсетін немесе сонда айтылған жәйттерді белгілі дәрежеде қайталайтын туындылар.

М. Әуезов — ауыз әдебиеті туралы ғылымның да аса көрнекті маманы. Ол фольклорлық нұсқаларды зерттеумен тіпті жиырмасыншы жылдардан бері үзбей шұғылданып келеді. Кітапқа оның осы саладағы бірсыпыра еңбектері, мақалалары енген. Солардың бірі — «Ертегілер». Бұл еңбегінде автор қазақ ертегілерінің туып қалыптасу кезеңдері мен олардың қолтумалық ерекшеліктері жайында аса бағалы байсалды пікірлер айтады. Ол қазақ ертегілерін бірнеше топқа бөліп, олардың әрқайсысына ғылыми терең талдау жасайды, әралуан ертегілердің қоғамдық, тарихтық сырын, әлеуметтік мәнін ашады. Зерттеушінің аңыз-ертегілерге берген талдауы әсіресе қызғылықты, зор шабытпен жазылған. Еңбектің бағалы қасиеттерінің бірі сол — автор қазақ ертегілерін жеке дара бөліп алып зерттемей, ретті жерінде оларды басқа көршілес халықтардың ауыз әдебиетінің үлгілерімен салыстыра, байланыстыра отырып тексереді.

Осы қасиет «Қозы Көрпеш — Баян сұлу» дастаны жайындағы зерттеуден де өте-мөте айқын сезіледі. Мұнда автор әйгілі жырдың қазақ арасында сақталған варианттарын түгел шолумен бірге оның көршілес басқа халықтардың ауыз әдебиетіндегі сол тақырыптас шығармалармен ұқсастығын, сарындастығын да ашып көрсетеді.

Кітапқа енген «Қыз Жібек», «Айтыс өлеңдері» тәрізді зерттеулер де қазақ совет фольклористикасына қосылған кенеулі үлестер болып табылады. Рас, алғашқы

еңбекте автордың «Қыз Жібек» жырының көркемдік ерекшеліктерін, ондағы образдар жүйесін жіті де қызғылықты талдай отырып, сол жырдың ішіндегі дәуір шындығына, заман салтынан, ежелгі әдет-ғұрыптан туған кейбір қосалқы, қосынды сарындарды тым қазбалап кететін мезеттері де бар тәрізді.

«Айтыс өлеңдерінде» автор айтыстың казак ауыз әдебиетінде алатын орнын, оның жанрлық өзгешеліктері мен ерекшеліктерін ашады. Ол өте көне замандарда айтыс жанры көптеген халықтардың әдебиетінде болғанын көрсетеді. Бұл ретте ол араптардың мұғаллақатын, Орта ғасырдағы Батыс Еуропаның фильдерін, Терістік Франциядағы труверлерді, Орталық Еуропадағы мейстерзингерлер мен Скандинавия елдеріндегі скальдлерді, орыстардың скоморохтары мен ағылшындардың менестрельдерін мысалға келтіреді. Зерттеуші қазақ әдебиетіндегі айтыс жанрының туып қалыптасуы жайында айта келіп, ол алғаш фольклордағы салт өлеңдерінен басталғанын, ақындар айтысы кейін бірте-бірте барып шыққанын көрсетеді. Осы орайда ол айтыс өлеңдерін, айтыс ақындарының творчествосын зерттеуге байланысты бірқатар жүйе-жүйе проблемалық мәселелерді жинақтап атап өтеді.

Зерттеудің көлемді бір тарауы совет ақындарының айтысын талдауға арналған. Мұнда ол айтысқа жазба әдебиеттің тигізген игі әсерін, оның жанр ретінде жаңғырып өскенін, өзгерісін көптеген айтыс ақындарының творчествосы арқылы нақтылы көрсетеді.

«Жамбылдың айтыстағы өнері» атты мақала жоғарыда аталған еңбекті әдеби фактілермен, дәл деректермен байыта, толықтыра түскен. Мұнда автор Жамбылдың Сарыбаспен, Досмағамбетпен, Құлмамбетпен айтыстарына талдау жасай отырып, оның айтыс ақыны ретіндегі шеберлігін көрсетеді, оның айтыстары мен жалпы творчествосының арасындағы рухтастықты, ортақ байланысты кеңінен ашады. Бұл ретте ол Жамбылдың жалпы ақындық өнеріне, суырып салып айтқыштық, импровизаторлық шеберлігіне байланысты байқаулары мен топшылауларын да қоса айтып отырады. Кітаптағы кейбір мақалалар қазіргі қазақ әдебиетінің хал-жайына, өсу барысына арналған. Солардың бірі — «Мәлік Ғабдуллинге жауап хат».

Мұнда автор М. Ғабдуллиннің хатында қозғалған жәйт-

терге жауап қайтара отырып, қазіргі поэзиямыздың талай-талай мәселелерін қоса көтереді, барлап байқағандарын, дос тілекпен айтылған ойларын сртаға салады. Оның ерекше маңызы бере сөйлейтін мәселелерінің бірі — поэзиядағы ұлттық дәстүр жайы. Ол мұны өте кең мағынада алады: «Дәстүр мағнасына характер де, түр де, оқу мен өсу де, дами түсіп өзгеру де, мазмұн мен сыртқы сипат, көрік-күй мәселесі бәрі де түгел кіреді». Осы орайда ол қазіргі поэзиямыз өзінің ежелгі дәстүрлерінің ең таңдаулыларын бойына мол сіңіргенін, өзінің өткен тарихтық тегінен үзіліп, төркінсіз әдебиет болып кетпегенін баса көрсетеді. Сонымен бірге автор марксистік-лениндік эстетиканың қағидаларына сүйене отырып, ұлттық дәстүр мәңгі-бақи бір орында сілейіп қатып тұратын қалыпта еместігіне, оның ұдайы өсіп, жаңғырып отыруы қажеттігіне де назар аударады, бірнеше проблемаларды бас-басына атап береді. Олар — өлеңдік түрді байыту, көркейте байыту проблемасы, тіл байлығын асыра түсу, поэзиялық лексиканы көркейте, өсіре түсу проблемасы және басқалар.

Бұл ретте автор ақындарымыздың алдына оларды творчестволық кең өріске, суреткерлік ізденістерге меңзейтін талап та қояды: «Орыстың классикалық әдебиеті мен совет әдебиетінен және басқа туысқан достас елдеріміз поэзиясынан елеулі үлгі, өрнек ала отырып, қазақ поэзиясын тұрғыдан тұрғыға асыра, өсіре беру шарт. Осы ретте мысалы, біз Пушкинді, Некрасовты, Маяковскийді немесе бүгінгі Исаковскийді, Твардовскийді қазақшаға аударғанның өзінде де сол екі сала үлкен мәнді мәселені қатарынан зор табыспен, келісті көрікпен баурай білуіміз керек... Пушкинді — Пушкинше, Маяковскийді — Маяковскийше ала білсек қана біз жоғарыда аталған ұлттық дәстүрді дамыта байытамыз. Түр-өрнек үлгісін кейін өз өлеңімізге де қанықты, заңды үлгіміз, дәстүріміз есебінде мейлінше пайдалана аламыз».

Бұдан әрі автор қазіргі қазақ поэзиясының тілі және ондағы образдылық мәселесіне тоқталады, көрнекті ақындарымыздың сәтті де тапқыр ізденістерін және тая соққан, мүлт кеткен мезеттерін де атап өтеді.

Ал «Октябрь өркені» атты мақала қазақ әдебиетінің қырық жыл ішіндегі дамуын, творчестволық сапарын шолуға арналған. Мұнда автор әдебиетіміздің әрбір

жанрының туып-қалыптасу, кемелдену жайын, ондағы көпшілік кесек-кесек шығармаларды сөз етеді.

Кітапқа енген зерттеулердің, мақалалардың бірсыпырасын автор орыс тілінде жазған. Олар — «Как я работал над романами «Абай» и «Путь Абая», «Традиции русского реализма и казахская дореволюционная литература», «Киргизский героический эпос «Манас» және жоғарыда аталған кейбір мақалалар.

Алғашқы мақаласында автор өзінің атақты эпопеясын қалай жазғанын ортаға салады, өзінің творчестволық лабораториясымен таныстырады, жазушылық өнері мен толассыз ізденулерінің аралуан қырын ашып көрсетеді. Сондықтан да бұл мақала оқушыларға да, зерттеушілерге де көптеген қызықты деректер беретіндігі шүбашсыз.

Қазіргі әдебиеттану ғылымымыздағы ең аз зерттеліп, тым тапшы тексеріліп жүрген проблемалардың бірі — әдеби әсер, дәстүр туралы мәселе. Бұл проблема тіпті бүкіл советтік әдебиеттану ғылымында да әлі дәйекті түрде шешілген жоқ. М. Әуезовтың «Орыс реализмінің дәстүрлері және қазақ әдебиеті» деген көлемді мақаласы осы саладағы елеулі зерттеу болып табылады. Бұл мақала «Дружба народов» журналында басылып, кезінде А. Фадеев өте жоғары бағалаған болатын.

Бұл мақаласында М. Әуезов дәстүр туралы проблемалық мәселелерді кең тұрғыда көтереді, қазақтың революцияға дейінгі және совет дәуіріндегі әдебиетінің дамуын орыс әдебиетінің игі әсерімен, оның реалистік дәстүрлерімен тығыз байланыста алып қарайды және қазақ әдебиетінің төл қасиеттерін, ұлттық ерекшеліктерін ашуға ұмтылады.

Орыстың алдыңғы қатарлы қоғамдық ой-пікірімен, оның классик ақын-жазушыларының ғажайып шығармаларымен танысу, олардың реалистік дәстүрлерін қабылдау ХІХ ғасырдағы қазақ ойшылдары мен ақындарына не бергенін зерттеуші нақтылы материалдар негізінде дәлелдеп көрсетеді.

Сол сияқты, Октябрь алдындағы қазақ әдебиетінің көрнекті өкілдерінің творчествосында орыстың классикалық, реалистік әдебиетінен үйренудің осы дәстүрі қаншалықты көрініс тапқаны да мақалада жете ашылған.

Мақаланың соңғы бөлімінде қазіргі қазақ совет ақындары мен жазушылары Горький мен Маяковскийдің дәс-

түрлерін қалай қабылдап, қаншалықты дәрежеде дамытқаны туралы мәселе талданады. Автор бұл саладағы қол жеткен табыстарды атап көрсетумен бірге бірсыпыра проблемалық мәселелерді де міндет ретінде алға тартады.

Қазіргі советтік ұлт әдебиеттері орыс совет әдебиетінің және бір-бірінің творчестволық тәжірибесін пайдаланумен бірге өздерінің ең таңдаулы, үздік шығармалары арқылы бүкіл советтік әдебиетімізді молықтырады, өзара бір-біріне игілікті әсер етеді. Зерттеуші бұл еңбегінде мәселенің осы жағына да назар аударған.

Кітаптағы ең негізгі, көлемді зерттеулердің бірі — қырғыз халқының батырлық эпосы «Манас» жайындағы еңбек. Осы ретте мынадай бір жәйтті атай кету ләзім. Қазақтың тұңғыш ағартушысы, ұлы ғалымы Шоқан Уәлиханов «Манастың» үзінділерін тұңғыш рет хатқа түсіріп, орыс тіліне аударса, содан бір ғасырдай уақыт өткен соң қазақтың енді бір ғалымы әрі даңқты жазушысы сол «Манас» жайында монографиялық зерттеу жазады. Бұл фактінің тек әдеби ғана емес, сонымен бірге тарихи да маңызы, тереңде жатқан астары бар.

М. Әуезов «Манас» эпосымен отызыншы жылдардың алғашқы кезінде таныса бастағанда, ол жайындағы зерттеуінің алғашқы нұсқасын 1935 жылы бітірген, кейін бірнеше рет қайталап оралып жөндеген, өндей түскен. Бірақ газетте шыққан кейбір үзінділерін былай қойғанда, бұл еңбек бұрын жарияланбаған. Тұтас күйінде осы кітапта тұңғыш рет басылып отыр.

Зерттеуші еңалдымен эпос және оның айтушылары туралы мәселеге тоқталады, Сағымбай, Келдібек, Балық, Найманбай және басқа да жыршылар жайында, эпостың әралуан нұсқалары және оның халық арасына таралуы жайында деректер келтіреді.

Бұдан кейін автор эпостың мазмұны мен түріне қысқаша талдау жасайды да, оның ішінен басты-басты бірнеше желілерді, өзекті тақырыптарды бөліп алады. Солардың әрқайсысына, мәселен жорық тақырыбына, ас тақырыбына, геройдың үйленуі тақырыбына және басқа да бірнеше қосалқы, дербес тақырыптарға арнайы тоқтала отырып, зерттеуші эпостағы алуан түрлі сарындарды, діни-қияли элементтерді ашады, жырдың әрбір бөліктерінің сюжеттік құрылысына жан-жақты талдау береді.

Зерттеудің ең бағалы тарауларының бірі «Манас» эпосының туған дәуірін анықтауға байланысты. Автор көптеген тарихи деректерге және жырдың өз материалдарына сүйене отырып, «Манас» эпосының басқы жырлары IX және X ғасырларда, яғни «Ұлы жорық» жылдарында немесе соған іле-шала туған болуға керек деген қортындыға келеді. Бұл ретте ол эпиграфиялық ескерткіштерді, орхон-сунсей жазуларын және басқа тарихи-әдеби деректерді негізге алады.

Автор эпос кейіпкерлерінің образдарына да, оның сөздік-поэтикалық, көркемдік тәсілдеріне де кеңінен тоқталған және Шығыстың кейбір жыр-дастандарының «Манасқа» еткен әсеріне де көп назар аударған.

Еңбектің аяғында зерттеуші «Манас» эпосын кейбір феодалдық қосындылардан, жат жамаулардан тазартып, оның халықтық вариантын жасау туралы тұжырымды пікірлерін айтады. Осы орайда 1952 жылы «Манас» эпосын зерттеуге бағланысты Қырғызстанда өткізілген айтыста М. Әуезовтың бұл тамаша мұраның нағыз халықтық негіздерін сақтап қалуда ерекше еңбек сіңіргенін де атап айтуға керек. Жалпы алғанда қазақ ғалымының қырғыз эпосы жайында зерттеу жазуы және оны бүге-шігесіне дейін байыпты талдап, тексеруі — айрықша бағалап, қадыр тұтуға татырлық еңбек.

Осындай ұлан-ғайыр зерттеудің, үлкен кітаптың әлі де болса ойласуды қажет ететін жайлары да жоқ емес. Еңалдымен мұнда казак совет әдебиетіне тікелей арналған зерттеу еңбектер соншалықты аз екенін атап айтуға керек. Бұған автордың казіргі әдебиет мәселелерін қозғайтын талай-талай еңбектерінің кітапқа кірмей қалуы да әсер еткен болар. Мәселен, автордың С. Мұқанов, Ғ. Мұстафин, Ә. Тәжібаев сияқты акын, жазушылардың творчествосына арналған шолу зерттеулерін және «Кейбір ұлт жазушыларының романдары туралы», «Қазақтың әдеби тілі туралы», «Реалистік драма жолында» атты мақалаларын кітапқа енгізуге әбден болатын еді және әбден қажет те еді. Соңғы мақала әсіресе көңіл аударуға тұрарлық. Мұнда автор қазақ совет драматургиясының өсу жолына, оның жекелеген ірі-ірі шығармаларына байыпты шолу береді, байсалды талдау жасайды. Сонымен бірге ол реалистік драма жасаудың кейбір принциптік мәселелеріне де кеңінен тоқталады. орыстың және дүние жүзінің классикалық драматургиясына

сының, сондай-ақ таңдаулы совет драматургтарының бұл саладағы тәжірибесін творчестволық жолмен игеру жайындағы өзінің ой-толғаныстарын ортаға салады. Өзгесін сылай қойғанда, осы мақаланың кітапқа енбей қалғанына тек таңдануға тура келеді.

Автордың кейде ғылыми зерттеуге көбінесе тән болып келетін дәлдікті, тұжырымдылықты бекем ұстанбай, тасқындап төгілген шабыттың шылауына еріп, тым көсіле, жазыла сілтеп кететін мезеттері де бар. Бәлкім, бұл оның міні емес, жазушы-зерттеуші ретіндегі өнерінің бір кыры да болар.

Үлкен кітаптың кейбір тарауларында автор өзін өзі қайталап, қайрыла сөйлеп те кетеді. Бұл бір тақырыптас зерттеулерге әсіресе жанасты.

Ақыр аяғында, қай еңбектің қай жылы жазылғанын және тұңғыш рет қайда жарияланғанын көрсете отыру керек еді. Мұның оқушыға да, зерттеушіге де қажеті барлығы даусыз.

М. Әуезовтың ғылыми еңбектері мен мақалаларының бұл жинағы қазақ әдебиеттану ғылымына тамаша үлес болып қосылуымен бірге сақа да, жас та зерттеушілер үшін үлгі көрерлік, тағлым аларлық үлкен өнеге болып табылады.

Асса бүкіл дүние жүзінің, қала берді бүкіл ежелгі Шығыс пен Батыстың арғы-бергі мәдениетін жете білетін асқан білімдар ғалым кең тұрғыдағы әдеби салыстыруларға өте-мөте оңтайлы, әсіресе майталман.

Әрбір әдеби құбылысқа идеялық тұрғыдан берілер бағамен эстетикалық-көркемдік талдауды автор әрдайым ауыстырмай, тең ұстайды. Бұл жағынан да ол барша зерттеушілерге көп үлгі, өрісті бағыт-бағдар таныта алмақ.

Қорыта айтқанда, бұл кітап М. Әуезовтың аса бағи творчествосының тағы да бір өнімді өзгеше кырын көрсетеді. Онда үлкен ғалымның сан жылдар бойғы сарыла ізденген, сарқа жұмсаған еңбегінің тамаша жемісі, түбегейлі де терең ойлары бар.

МАХАББАТ ХИКАЯСЫ

Осынау кітап барықтап
Томдардан небір салмақты ай!

Фет.

* * *

Ақын айтқан осынау шыншыл сөздер іс-әрекетке, ақыл-ой даналығына толы біздің дәуірге, ол тудырған өскелең әдебиетке әсіресе орайлас. Қазір ертек айтқандай ұзақ-сонар әңгімеге, көп сөзге салынып отырар шак емес. Ең басты мәселе сол ертегіге бергісіз ғажайып шындығы бар өміріміздің ұлылығын, сұлулығын бар әсерлі күйінде шынайы бейнелесуде, жарқын елестете алуда. Осындай шыншыл да көркем келісім тапқан шығарма, мейлі оның көлемі шап-шағын-ақ болсын, халықтың кәдесіне жарап, оны рухани жағынан байыта түспек.

Қырғыздың жас жазушысы Шыңғыс Айтматовтың «Жәмилә» атты повесіне осы пікірдің өте-мөте жанастылығы бар. Повесті оқып шыққанда автордың бұл шап-шағын шығармаға үлкен өмірдің ұмытылмас слестерін, небір зяулы да абзал сезімдерді, патриоттық жарқын ойларды соншалықты мол баурап енгізе алғанына сүйсіне танданбай қалмайсың.

Жәксы кітап үшін басқа тілдің сөтендігі, басқа халықтың жаттығы жоқ Коммунист жазушы Луи Арагонның аударуымен Парижда француз тілінде басылып шыққан «Жәмилә» француз оқушысына да совет әдебиетінің соны бір бетін ашып берді. Бұл жайында Луи Арагон былай деп жазды: «Сөйтіп, менменсіген Парижда, Вийонның, Гюго мен Бодлердің Парижінде, талай корольдар мен революцияларды көрген Парижде, әрбір тасы аңыз, тарих болып айтылып, өнердің өлмес, өшпес мекені атанған Парижге, көрмегені, оқымағаны, басынан кешірмегені жоқ Парижге мен Вертер мен Клеопатраны да емес, Жәмиләні оқып шықтым.

Джульеттаның, Паоло мен Франческаның, Эрнань мен Донья Сольдің бейнелері маған көмескі тартып қалды, өйткені мен Данияр мен Жәмиләға жолықтым... Мен бұл әнді, қырғыздың кең даласында самғаған әнді бұл жақта, біздің тозығы жеткен дүниеде де шырқамай тұра

алмаймын, борандар бұлттармен бірге жерді жаңғырықтыра самғатпай қоя алмаймын. Онан кейін Шыңғыс Айтматовқа: сенің үйің бізде де естіліп, еркек-әйел өз орнын тауып, бала жарықты болжап көре бастаған ғажайып түнде өктемдік құрды,— деп айтпай қоя алмаймын». Міне қырғыз жазушысының шығармасы шет елдерге осылайша әйгілі болып, оның авторының есімін көп жұрттарға паш етті.

Ш. Айтматовтың «Жәмиләсі» бүкіл қырғыз әдебиеті үшін, оның ішінде, әсіресе қырғыздың балаң прозасы үшін тамаша көркем құбылыс болып табылады. Мұны кезінде қырғыздың арғы-бергі әдебиетін жете білетін академик-жазушы Мұхтар Әуезов те атап көрсеткен болатын. Мұнда көптеген роман, повестерде жиі ұшырасатын жалаң да жадағай баяндау жоқ. Автор кейіпкерлерінің жап дүниесін, рухани келбетін, ой-армандарын, сезім-сырларын мейілінше әсерлі, шынайы суреттеген. Бұл ретте «Жәмилә» нағыз психологиялық повесть деп бағалануға әбден лайық.

Повестің оқиғалары соғыстың алғашқы жылдарында қырғыздың бір аулында өтеді. Автор сол уақыттың сұсты шыңдығын, жеңіс мүддесімен тыныстаған қарапайым жандардың қиын тағдырын, қысталаң тіршілігін, мойымас жігерін реалистік суреттер арқылы әрдайым айқын елестетіп отырады. Осының бәрі шығармада табиғи келісім тапқан. Кейі сирек, кейбірі жиі көрінсе де, көз алдыңнан кетпейтін алуан тағдырлы адамдар, «әтір иісті Таластың» бойы, тұлап аққан күркіреу өзені, мау-жыраған кең дала, «бірде казактың ұшы-қиыры жоқ шексіз даласындай еркін шалқыса, бірде қырғыздың заңғар биік тауларындай көкке самғайтын» әсем ән, жабыркап жасуды білмейтін жандардың жарастықты әзіл-қалжыңы—шығарманың оқиғалары өрбитін өлкенің өзіндік сипаты, атмосферасы—осының барлығы шеберлікпен берілген. Жалпы алғанда, халықтың өмірін, әдет-ғұрпы мен тұрмысын, кейіпкерлердің мінез-құлқын бейнелегенде ұлттық бояу-нақыштарды барынша мол қамтуы—автордың реалистік шеберлігінің ең жарқын қырларының бірі.

Повестің оқиғалары бастан-аяқ Сейіт деген жас баланың атынан баяндалады. Бұл ретте де жазушы реалистік мәнерден зәредей жаза баспайды. Шығармада өрістеген оқиғалардың шындығына да, солардың күәгері бо-

лып жүрген жас баланың риясыз көңіл күйлеріне, балтып ой-сезімдеріне де қалтқысыз сенесін. Шығарманың негізгі кейіпкері Жәмілә болғандықтан, повестегі тартыс желілерінің барлығы да соның тағдырына байланысты түйінделген. Жазушы Жәміланың кескін-келбетін, рухани тұлғасын, мінезінің беріктігін шыншыл да әсерлі бейнелейді. Ол — соншалықты зор да аяулы сезімнің иесі. Барлай қарағанда, оның майданда жүрген Садықтан суынып, Даниярды бірте-бірте, бірақ ешуақыт көмескі тартпас үлкен махаббатпен сүйіп заңды да панымды. Жұптасып өмір сүріп жүрсе де, Жәмілә Садықты сүймеген. Ал Даниярмен кездескенде ол емірене, аңсай күткен жарып тапты. Махаббат деген асқақта абзал сезім Жәміланың жүрегінде сонда ғана шындап, әрі тұңғыш рет оянады. Кейіпкерінің басындағы осындай хал-жағдайларды, оның буырқанған сыр-сезімдерін жазушы қандай нәзік те шыншыл бейнелеген десенізші!

Жәміланы Даниярдың үлкен өнері, суынбас махаббат сезімдері, ғажайып мөлдір жан дүниесі қызықтырады. Ал Данияр осының барлығын керемет әні арқылы танытады. Даниярдың әнінен оның ел-жұртына, туған халқына, өскен мекеніне деген еміренген, ыстық сезімдері де қоса аңғарылады. Жәмілә мен Даниярды үңсіз ұғыныстырып, тілсіз табыстырған да — сол ән.

Повестің сүйсіне ден қоятын қасиеттерінің бірі оның достық сезіміне толылығында. Көптеген жазушылар халықтар достығы тақырыбын бейнелемек болса, шығармаларына әр алуан ұлттың өкілдерін кіргізеді. Сол бейнелердің ішінде ұлттық сыр-сипаттан, өзіндік даралықтан айырылып, әншейін тек жақсы идеяның жалаң сұлдері болып жүретіндері де кездеспей қалмайды. Ал, «Жәміләда» мұндай әдейі арналып алынған кейіпкерлер жоқ. Бірақ бұл повесть махаббатты қалай мадақтаса, достықты да солай дәріптеп, ардақтайды және соның өзі шығарманың бүкіл тыныс-лебінен, рухынан танылады. Мәселен, автордың да, оның кейіпкерлерінің де қазақ халқына, қазақтың ұшы-қиырсыз кең, дарқан даласына деген ыстық сүйіспеншілігін, еміренген сезімдерін аңдамай да, соған разы болмай да қала алмайсын.

Кітапта бұл повестен басқа «Бетпе-бет», «Ақ жауын» атты әңгімелер де бар. Солардың алғашқысы әсіресе ерекше атауға тұрарлық.

Бұл әңгімеде Ш. Айтматов өзінің шындыққа тура қарайтын және оны бұлтансыз бейнелейтін батыл реалист жазушы екендігін тағы да танытады.

Кітапты қырғызшадан аударған --- К. Нұрмаханов. Бұрын тәуір сыншы ретінде белгілі болып келген ол бұл жолы аудармашылық қабілетін де жақсы аңғартты. Кейбір сөз байлауларының, жекелеген орамдардың сәл қазақша естілмейтіні болмаса, аударма тұтастай жақсы әсер қалдырады.

Ш. Айтматовтың повесі де, әңгімелері де шын ақындық шабыттан туған жақсы жыр сияқты. Сондықтан да оларды сүйсіне оқысың әрі туысқан қырғыз халқының әдебиеті осындай тамаша шығармалар тудырғанына шын жүректен қуанасың.

УАҚЫТ ЖӘНЕ ПОЭЗИЯ

Сөз өнері әр халықтың рухани өсуінің, өмірі мен тағдырының көркем шежіресі, жан сыры ретінде танылумен бірге оның мақтаны, данқы болып та табылады. Әр халықтың елдік сыйпаты, жарқын қасиеттері еңалдымен сның әдебиетінде терең елес береді. Поэзия — адамбаласының мәдениетін дамытудағы ең қуатты, күдіретті құралдардың бірі. Ежелден бері поэзия өктеп өсудің, күрес пен жеңістің, жаңғырып жасарудың белгісі болып келеді. Қай халықтың поэзиясы да бұған айқын мысал бола алады. Осынау тамаша қасиет біздің поэзиямызда да мол.

Өткен ғасырда Абай ғажайып көркемдік биікке көтерген қазақ поэзиясы біздің заманымызда әсіресе қарыштап өсті, кемелдене түсті, жаңа арнада дамыды.

Қазіргі қазақ совет поэзиясының аумағы кең, өресі биік, творчестволық қыры мен көркемдік сыры саналуан. Онда роман мен поэма да, жалынды да пафосты, сыршыл да нәзік лирика мен уытты отты сатира да, мысал мен баллада да — бәрі де бар.

Әрине, осындай өскелең поэзиямызда творчестволық олықтық, мін-мүлтіктер ұшырасатындығы, қиындықтар барлығы да аян. Поэзиямыздың осындай табыстарына және кемшін жақтарына кексе ақындар да, жас қаламгерлер де ортақ. Үлкен поэзия шалқары жекелеген ақындардың жыр бастауларынан құралады. Сондықтан біз бұл мақалада поэзиямызды тұтастай алып, жалпылама сөз етпей, нақтылы бір ақынның творчестволық жолына ғана шолу жасаймыз. Ол көрнекті ақын Дихан Әбілевтің поэзиясы.

Ақынның алғашқы қадамдары жиырмасыншы жылдардың аяқ кезінде басталады. Содан бері ол талай-талай өлеңдер жинағын шығарды, оннан астап поэма жариялады. Ақынның әр кезде шыққан кітаптарына арналып жазылған рецензиялар мен юбилейлік мақалаларды айтпағанда, оның творчествосына мол, лайықты талдау жасалған емес. Д. Әбілевтің өзіндік стилі, творчестволық өзгешелігі бар ма? Егер бар болса, қандай? Ол басқа ақындарымыздан поэзиясының қандай қасиетімен ерекшеленеді? Ақын қашан және қандай көркемдік

биіктерге көтерілді? Оның творчествосының әлі де олқы соғып, аласа жатқан жақтары бар ма? Бар болса, неге бұлай?

Біз бұл мақалада осынау сұрақтардың бәр-бәріне жауап беріп жатуды көздемейміз. Өйткені, бұл — арнайы зерттеудің, келесі еңбектің міндеті. Біз ақын поэзиясын шолып шығуды, оның өлеңдері мен поэмалары жайындағы азды-көпті ой-пікірлерді ортаға салуды ғана мақсат еттік.

Д. Әбілев өзінің ақындық жолын шағын өлеңдерден бастаған. Ақынның алғашқы қаламалдылары сол кездегі ауыл өміріндегі шындыққа, өзін қоршаған ортаға байланысты туады. Бұл кезде ақынның білімі тапшы, көргені мен түйгені де аз. 1957 жылы елу жасқа толғанда өткен өмірі жайында толғанып шығарған «Ақын сыры» атты өлеңінде Д. Әбілев былай деп жазады:

— Жер жұмыр. Жер — әлем кең. Көр, шырағым! —
Деп Мәсен ұсынғанда жердің шарын,
Нанбадым... қарай бердім... білмеуші едім —
Баяннан басқа мұнша жердің барын.

Ақынның бұл шын сыры оның алғашқы кездегі поэзиясының сырын ұғуға да мүмкіндік беретіндей. Дихан тұңғыш өлеңдерін Б. Майлин, С. Мұқанов, С. Дөнентаев сияқты ақындарға еліктеп жазғанын сыншы Е. Бісмайлов бір мақаласында дұрыс байқап аңғартқан. Бірақ оның: «Бұл кітаптарда (ақынның отызыншы жылдардағы жинақтары жазында сөз болып отыр) басылған өлеңдер мен поэмалары Диханның ақындық өрісін, қалам сілтер аршынын бірден танытатын болса, сонымен бірге қазақ поэзиясындағы өзіндік орнын да анықтап берді» — деген пікіріне қосылуға болмайды. Сыншы асыра айтқандай.

Рас, отызыншы жылдарда ақын жемісті еңбек етеді, көп жазады. Солардың тәуірлерінен оның ақындық қуаты, творчестволық болашағы белгі бергені де хақ. Бірақ, «қазақ поэзиясындағы өзіндік орнын анықтаған» лирикалық өлеңдері мен поэмаларын Д. Әбілев кейінірек, яғни қыркыңшы және елуінші жылдарда жазды.

Д. Әбілевтің ақындық қуатын отызыншы жылдардағы «Шалқыма» поэмасы мен жекелеген кейбір өлеңдерінен ғана анық сеземіз. Оның «Жаңбырдан соң» деген өлеңін мысалға алып қаралық.

Күн төбеден ауғасын
Бозша бұлт шалды тау басын,
Баурынан сүті сорғалап.
Ойда, қырда жел тынды,
«Жау жанбырлап» ел тұрды,
Көк жазыққа көз қадап.

Өлең осылай басталады. Бұдан әрі жанбыр жауған кездегі табиғат суреті әсем де жанды көріністермен беріледі. Өлең мына алтыаяқты шумақпен тәмамдалады:

Жүкші қарт атын басқа ұрды,
Балағаттап тасқинды —
Көпірді кеткен қиратып.
Аралан жасыл егінді
Басекен жүр көңілді,
Қара мұртын ширатып!

Мұнда шынайы көріністер де, адам мінезінің сыйпаттары да бар. Жүкші шал да, бастық та көз алдымызға келе қалады. Ақынның шеберлігін танытатын басқа өлеңдері де баршылық. Мәселен, «Көпір», «Қырғыз қызына», «Қыңғалдақ». Бұл өлеңдерден ақынның лирикашылық таланты айқын сезіледі. Бірақ Д. Әбілевтің отызыншы жылдардағы поэзиясында мұндай шыншыл да сыршыл өлеңдер онша көп емес. Оның бұл кезеңдегі лирикалық өлеңдерінің біртадайы жалпылама, дерексіз түрде жазылған, көбінесе шұбалаңқы, отсыз болып келеді. Отызыншы жылдардағы поэзиямызда орын алған бірақтар көркемдік кемшіліктер Д. Әбілев өлеңдеріне де хас еді. Д. Әбілевтің лирикашылық талантының ерекше мол ашылған кезеңі — Ұлы Отан соғысы жылдары. Қ. Аманжолов, Ж. Санн және басқа да бірқатар ақындардың творчествосы сияқты, Д. Әбілевтің поэзиясы да осы тұста марқайып, қатты өседі.

Ақынның бұл тақырыптағы жырлары «Қоштасу» атты өлеңмен басталады. Соғыс тұтанып, дабыл қағылғанда, ел шетіне жау тигенде ер жігіт қаннен-қаперсіз жата алмақ емес. Ол жас жарымен, дарқан өмірмен қош айтысып, майданға аттанады:

Қош, ойын-той, сауық кеш,
Жүрекке жалын салды кек.
Жабыркау тартпа, жас бикеш,
«Мені қнып кеттің?» — деп.

Жеңістің күнін мен деп күт;
Кош, жас дәурен, қызық шақ!
Кетті бастап отқа үміт,
Кош тұр, ыстық махаббат!

Мұнда ақын қауіп-қатері мол, сұрапыл соғысты жалын, от бейнесінде алған да, соған сөнбес үмітті қарама-қарсы қойған. Ол—сүйікті жар жүрегінің үміті, махаббат үміті. Сондықтан да өлең оптимистік рухта, әсерлі болып шыққан. Бұл өлеңдегі осынау үзілмес сарын, сөнбес үміт сарыны ақынның «От», «Күдерінді бір сен үзбе», «Жүрегінді жүдетпе» сияқты өлеңдеріне де бірдей ортақ, тұтастай хас. Ал «Бөбегім» атты өлеңде осы сарын ерекше бір көркемдік қуатпен әрі тамаша шыншылдықпен жырланған. Өлеңді түгел оқып шығалық:

Балапаным, папанды
Жүрсін-ау іздеп, сағынып,
Мазалай берме атаңды,
Жүдей берер жабығып.

Күрсінбей өс, құлыным,
Папаян майдан өтінде.
Жорық қатты күндіз-түн,
Жара жоқ әзір етімде.

Мынау бір соңғы суретім,
Бетінді тигіз бетіме.
«Болмаймын,— деп — мен жетім»
Жазып қой, құлыным, шетіме.

Небәрі үш-ақ шумақ. Бірақ ақын соған тұтас бір сезім дүниесін жомарттықпен сыйғыза алған. Өлеңнің лирикалық қаһарманы майдандағы жауынгер болумен бірге үлкен жүректі адам да. Ол туған жерін, елі-жұртын әншейін сағынып қана қоймайды, шын жанашырлықпен, қамқорлықпен толғана ойлайды. Майдан даласы қауіп-қатерге толы. Бірақ тылдағы өмір де сән-салтанат, мереке емес. Соғыс ауыртпалығы оны да сұстандыра, қаталдандыра түскен. Өлеңнің лирикалық кейіпкерінің баласына «Мазалай берме атаңды — жүдей берер жабығып» деуі соның бәр-бәрін артығымен қамтып жатыр. Ол әзір жараланбаған. Бірақ күндіз-түн сапырылысып жатқан алапат соғыста оның жарадар болуы, хатте тіпті қаза табуы да ықтимал. Оның аузына «Әзір» деген

сөз тегін түспеген. Бірақ ол соны бай-балам салып, дүрліктіріп айтпайды, ишарамен ғана сездіреді. Осылайша әрі тыл тіршілігінің қысталандығын, әрі майданның қауіп-қатерін қоса сездірген өлең дәл аяқталар тұсында тамаша оптимистік сарын тауып, ширғаға ширап, жанданып жүре береді. Бұл — тағы да сол үзілмес, сөнбес үміт сарыны. Жауынгер әке суретін алып, жүрегіне басқан, бетіне бетін тигізген осынау жас бөбек жетім болмақ емес. Ақын жеке бастың көңіл күйін, өшпес үмітін біздің дәуіріміздің өршіл рухымен, гуманистік сыйпатымен ұластыра жырлаған. Бұл қасиет оның осы тақырыптас көп өлеңдерінен табылады.

Д. Әбілев бірқатар өлеңдерінде майдан өмірін, соғыс суретін, совет адамдарының ерлік қимылдарын нақтылы жырлайды. Ақынның мұндай өлеңдерінің ең тәуірлері — «Жан сөзі», «Біздің батыр полковник», «Москва түбінде», «Ха... ха... ха...», «Сиқын қара фашистің» тағы басқалар.

Д. Әбілевтің бұл тұстағы өлеңдерінде Қиыр Шығыс тақырыбы ерекше орын алады. Ол «Хинган», «Кәрден кесе», «Бұғы», «Ғарып», «Азияның адырынан», «Күздағы жұлдыз», «Мен күзетте тұрғанда», «Сағыныш» тәрізді айтулы өлеңдерін сол Қиыр Шығыста болған шағында шығарған. Бұл өлеңдер гуманистік қасиетімен, шыншылдығымен, ой-сезімге бірдей жомарттығымен құнды. «Россияға қайтқанда» өлеңі — ақынның майдан тақырыбына арналған жырларының қорытындысы іспетті. Бұл өлең жұртшылыққа жақсы таныс. Сөйтсе де, оның әсер күшін әлсіретпеу үшін бірер шумағын қайталап оқылық:

Амансың ба, Отан-алам!
Бәтен елден, келем шеттен.
Амансын ба, ала баған,
Жорықпенен едім өткен.

Өмір үшін еді бәрі,
Жекіп қайттым, баятақ дала!
Жаттын жері кімге дәрі —
Кетсін сенің садағана!..

Шіркін, Россия екен ғой кең —
Жазылды ғой бойым жана!
Тар секілді ед сенсіз әлем,
Шалқыды ғой ойым жана!..

Осылай кете береді. Сұрапыл соғыс дүрбелеңін бастан кешіріп, бөтен елдерде болып, енді өз Отанына қайтқан, қасиетті Отан жерінің көзге ыстық көріністерін жаза баспай танып өміреніп келе жатқан совет адамының сағынышы, патриоттық ой-сырлары, азаматтық мақтанышы өлеңнің әр шумағынан, әр сөзінен терек де айқын сезіледі.

Ұлы Отан соғысы тақырыбына арналған лирикасы Д. Әбілевтің ақын ретінде көп өскенін, шеберлігі ұшталғанын даусыз танытумен бірге оның орыс совет поэзиясының тандаулы үлгілерінен тағлым алып, жемісті үйренгенін де байқатты.

Ақын соғыстан кейінгі жылдарда да лирика жанрынан қол үзген жоқ. Ол «Жас азамат», «Алтай жырлары», «Көк жиек» атты өлеңдер жинағын шығарды. Совет адамдарының жасампаздық еңбегін, бейбітшілік жолындағы күресін жырлайтын және басқа да алуантүрлі тақырыптарға арналған бұл өлеңдердің ішінде ой тереңдігін, сезім байлығын, уақыт рухын танытатын тандаулылары да, ақынның творчестволық мүмкіндігі деңгейінен әлдеқайда төмен жатқандары, әйтеуір өлең аталып, қара көбейтіп жүргендері де бар. Мақала көлемімен шектелгендіктен біз сол жинақтардағы өлеңдерге талдау беруден әдейі бой тарттық. Оның үстіне ақын соғыстан кейінгі кезеңде поэзияның ірі формаларына көбірек ден қойғаны да аян.

Д. Әбілевтің ақындық творчасының өзекті әрі жемісті бір саласын оның поэмалары құрайды. Бұл орайда ақын қаламынан он шақты поэма, бір өлеңді роман туғанын ойға алудың өзі-ақ жеткілікті. Әрине, сол поэмалардың барлығын бір тезге салып, бірыңғай өлшеуге болмайды. Олардың ішінде поэзиямызға лайықты үлес ретінде қосылғандары да, уақыт сынына төтеп бере алмай, көне тартқандары да бар. Сөйтсе де біржәйтті бағыл айтуға болады. Д. Әбілев өзінің творчестволық өскелеңдігін, ойлы суреткер екендігін, ізденгіштігін поэма жанрында әсіресе жақсы сездірді, талғампаздығын да танытты. Өлеңдері мен поэмаларының 1958 жылы шыққан көлемді біртөмдігіне ақынның бірнеше поэмаларының еңбей қалуында, ал «Таудағы ту» дастанының тек «Кремльде» атты тарауы ғана берілуінде ерекше мән бар. Ақын «Мұңсыз Мәриям», «Майданбек», «Қуат» сияқты поэмаларын қайталап бастыруды қажет деп

таппаған. Шындығында да, бұл поэмалар, оның ішінде «Мұңсыз Мәриям» мен «Қуат» өлеңдік жағынан біркелкі тәуір болғанымен, нағыз реалистік поэзияға тән қасиеттерді кемел танытпағанды. Оларда сомдалып жасалған адам образдары, реалистік мәнерде қалыптанған ситуациялар апшы еді. Сонымен бірге оларда ақынның өсу жолдарының, шарқ ұрып ізденулерінің белгі-бедерлері барлығы да даусыз.

Ақынның алғашқы кезеңдегі поэмаларының ішінен оның эпиктік қуатты талантын айрықша айқын танытқаны — «Шалқыма» поэмасы. Бұл поэма Азамат соғысы жылдарының оқиғаларын суреттеуге арналған. Поэmanın негізгі кейіпкері Шалқыманың, оның әкесі Жаудырдың және басқа да бірнеше кейіпкерлердің өмірі мен тағдырын шынайы суреттеу арқылы дәуір сыйпатын реалистік түрде елестете алды.

Поэmanın оқиғалық желісі өмір шындығына орайлас. Балық аулап күн көрген Жаудыр шалды қара көңіл, қатыгез Қасқырбай жазықсыз азаптап өлтіреді. Ол Шалқыманың жүрегін шөмен боп қатып, кек болып байланады. Шығармада, оның басты кейіпкері Шалқыманың іс-әрекеттерінде осы кек сарыны ерекше күшті. Шалқыманың жеке басының күйлерінен туған бұл кек бірте - бірте таптық кекке айналады. Кейіпкерінің ой өрісіндегі, көзқарасындағы осы эволюцияны ашып суреттеуде де ақын реалистік бағыттан айнымайды, ауытқымайды. Зубов, Иван, Егор бейнелері өз дәрежесінде идеялық - көркемдік жүк көтерумен бірге Шалқыма образын шынықтырып, оның тұлғасын ірілендіре түседі. Осы тұста ақын халықтар достығы тақырыбын да срайын тауып, шынайы түрде шешеді.

Поэmanın аяғында Шалқыманың ата жауы — Қасқырбайды жайратып өш алғаны, қуғыннан құтылып, қызыл әскерлер отрядына қосылғаны баяндалады. Шығарманың негізгі идеялық пафосы да, ондағы шиеленіскен тайталас-тартыстың шарықтау шегіне жетіп түйілуі де ұласып барып, қажетті көркемдік тиянақ табады.

«Шалқыма» поэмасы Д. Әбішевтің ақындық өнері тереңге құлаш ұрып келе жатқанын, оның шығарма композициясын киноластырып құруға, тарихи шындықты көркемдік шындыққа ұластыра отырып бейнелеуге ден қойғандығын, творчестволық тегеурінін анық танытты. Рас, ақынның кейде жасандылыққа ұрынып, кейбір желілер-

дің көркемдік мотивировкасын табиғи қалыпқа түсіріп бермейтіндігі, реалистік саздан айнымай отырып, ара-тұра фольклорлық әсерлеулерге бой алдыратыны да байқалып еді.

Бірақ бұл айтылғандар поэманың әлеуметтік кең тынысын тарылта алған жоқ. «Шалқыма» — отызыншы жылдардағы поэзиямыздың сүйекті әрі көркем туындыларының бірі. Поэманың осындай кырлары мен сырларын сыншы Е. Ысмайылов жақсы аңғарып, срынды көрсеткен: «Ақын қалың орман қоршаған айдын көлдің, дүниені сілкіндіре долы дауыл тұрып, шатырлап нажағай ойнап, өрт қаптаған қара түннің, осы жағдайдағы Жаудыр мен Шалқыманың аянышты халдерін классикалық поэмалардың дәстүріндей көтеріңкі леппен суреттейді. Мұнда Диханның суретшілігі де, эпикалық шығарманы жазудағы құлашы да танылады. Схемаға ұратын, шартты алынған кейбір оқиға түйіндері бола тұрса да «Шалқыма» ақын творчествосының жана бетін, жана өсу сатысын көрсетеді. Қазақ совет поэзиясында сюжетті поэма жасауға қосылған үлестің бірі болып табылады». Поэманың айрықша бағалы қасиеттерінің бірі — ондағы авторлық позицияның беріктігі мен айқындығы, ақынның лирикалық толғаныстары мен шалқуларының молдығы әрі әсерлілігі. Яғни поэмада эпикалық кеңдік, тегеурінділік пен лирикалық саз араласа, ұласа келіп отырады.

Ақынның алғаш отызыншы жылдарда жазып, кейін қайта оралып сәл өндеген бір поэмасы — «Бармақ». Бұл поэмада шиеленісе өрбіп жатқан шытырман оқиға жоқ. Бірақ 1916 жылғы оқиғалардың қайғылы бір көрінісі зор драмалық түйінге жеткізіле суреттелген. Поэма кейіпкері Зілқараның трагедиясын ақын аяусыз, қатал шындықпен ашады. Шығарма ездікті, қорқақтықты айыптап, елдік пен ерлікті мадақтайды. Өз басының және халықтың азаттығы үшін айқастан тая соғып қорыққан өзін ит өліміне душар еткен Зілқарадан жұрттың бәрі де безеді. Ол сүйген жары мен баласына да жат. Поэманың құндылығы да осынау қатал шыншылдығында, опасыздықты әшкерелеп, отаншылдықты дәріптеуінде. Осы тұрғыдан алып қарағанда бұл шығарма Лермонтовтың тау халықтары аңызынан алып жазған, «Қашқын» поэмасымен сарындас, өзектес сезіледі.

Патриоттық сыр-сезімдер мен отаншылдық сарындар

ақынның Испания шындығынан алып жазған «Ремедиос» поэмасында әсіресе күшті. Отызыншы жылдарда Испан халқының фашистерге қарсы азаттық күресі бүкіл совет әдебиетінде кеңінен бейнеленді. Бұл қазақ совет поэзиясында да күдіретті сарын тудырды. Ақындарымыз жалынды жырлар шығарды. Д. Әбілевтің «Ремедиос» поэмасы — сол шығармалардың ең көркем, әсерлілерінің бірі.

Түпгик аспандай кең Атланның
Оқ боран, түтін орап жатыр алды.
Адамзат азаттығын арман еткен
Жалауы жалтылдайды Батырлардың.

Қақпасы қарауытып Мадридтің
Қырайлы шоқысына әр биіктің.
Ғасырдың құсағына құрыш қақтап,
Мезгіл тұр перзентіндей ар-күйіктің.

Поэманың осылай басталуының өзі күшті бір сарын сездіреді. Бұл сезім оқушыны алдамайды. Бұдан әрі ол жауға қарсы құрсаңған Мадридтің сұсты бейнесін, халықты күреске үндеп жар салған Долорес Иббаруридін тұлғасын, «жүрегі адал, жаны адал, бақыт досы, ар досы» Карлостың кейпін өз көзімен көргендей болады. Поэманың негізгі қаһарманы — испан қызы Ремедиос. Фашистер Испанияның астанасына қауіп төндіргенде сүйіскен екі жас — Карлос пен Ремедиос «тағдырын мәңгі қоспаққа талпынған күні» той-думанды тастап, майданға аттанады. Карлос хабар-ошарсыз кетеді де, Ремедиос оққа ұшадy. Ол өліп бара жатқанда да қасиетті астана — Мадрид қаласын естен шығармайды.

Аттан, әке!.. Жорық күн —
Басқалар маған келмесін!
Алқызыл туы полктың
Желбіреп көкке өрлесін!
Геройларға сәлем айт,
Мадридті бермесін! —

деп үзіледі ол. Поэманың патриоттық асқақ идеясы осы Ремедиос образы арқылы мейлінше күшті бейнеленген. Ұлы Отан соғысы жылдарында да ақын бір-ер поэма жазды. Бірақ бұл тұстағы оның поэзиясының дені — лирикалық өлеңдер. Сыршыл ақын лирикалық әсем жырлар тудыруда сол жылдары әсіресе биіктеп өсті.

Ал соғыстан кейінгі кезеңде Д. Әбілев өзінің ең күрделі әрі көркем поэмаларын жазды. Ақынның әсіресе беріле, қайта-қайта оралып жырланғаны — кенді Алтай туралы тақырып. Бұл тақырыпқа ақын ең алдымен «Алтай жүрегі» атты өлеңді романын арнады. Кезінде роман жайында әртарап пікір болды. Қайткенде де ақынның аса жауапты тақырыпқа аса қиын жанрда қалам тартуы — творчестволық зор да батыл қадам еді. Бұл ретте ең ірі жазушыларымыздың бірі, ойлы суреткер Ғ. Мүсіреповтың мынадай пікіріне назар аударма кетудің орайы әбден бар: «Біздің қазақ совет әдебиетінің күні бүгінге дейінгі тарихында өлеңмен жазылған роман деп Сәбит Мұқановтың бір ғана «Сұлушашын» атап келеміз. Өлеңмен жазылған роман, кара сөзбен жазылған поэма сияқты, дүние жүзілік әдебиетте де сирек кездеседі. Өйткені, ол түр жағынан да, мазмұн жағынан да әрі тереңдікті, әрі кендікті талап етеді де, жылдармен есептелетін, күшке тиетін еңбекке жатады. Сондықтан поэзиялық шығарманың мұндай түрі қандай әдебиетте болса да ерекше де елеулі орын алады. Ақын Дихан Әбілев жолдастың «Алтай жүрегі» атты романы осы қатарға қосылады».

Творчестволық зор серпіннен, мол еңбектен туған осындай кең тынысты шығарманың көркемдік келісінде талай-талай кемшілік пен олпы-солпылық та бар еді. Кезінде бұл аталып көрсетілген де болатын. Талғампаз ақын жұртшылық үніне сергектікпен құлақ асты. Ол «Алтай жүрегі» романын «Таудағы ту» деген атпен бастан-аяқ қайта жазып шықты. Оның «Кремльде» деп аталатын үлкен бір бөлімі ақынның 1958 жылы шыққан біртөмдігіне де енген. Бұл роман — кенді Алтай туралы, ондағы адамдар туралы және солардың өмірі мен ісі, өзара достығы туралы шығарма. Талай жылдар бойына көп көңіл бөліп, мол ізденіп жазған бұл романында ақын революцияның дауылды күндерінде шет елдік капиталистер қиратып кеткен кенді Алтайдың қалпына келтіріліп, қатарға қосылғанын баяндайды.

Қиындыққа, жокшылыққа, жаулардың зиянкестік әрекеттеріне қарамастан, зор патриоттық қимыл жасаған орыс, қазақ жұмысшыларының өмірі, олардың өзара татаусыз, қасиетті достығы романда жарқын да кең суреттелген. Шығарманың бүкіл өнбойына оқиға желісіне мол араласып, тегеурінді әрекет жасап жүретін партор

Деев, инженер Горин, жұмысшы әйел Зейнеп, карт шал-тер Тата бейнелері — бұған анық айғақ. Осылардың ішінде Деев әсіресе ерекше көрінеді. Автор оны шебер ұйымдастырушы, іскер де табанды коммунист ретінде бейнелеуді мақсат еткен. Ол негізінен осы нысанасына жеткен де.

«Таудағы ту» романындағы ерекше назар аударарлық бір жәйт — акынның кемелгер көсеміміз Лениннің бейнесін жасауға талаптануы. Автордың басқа бір үлкен акындарға еліктей ұқсап кеткен сәттері ара-кідік сезіліп қалғанымен, шығарманың Ленинге арналған тараулары терең ықласпен оқылады. Ленин ісінің өлмейтін өміршендігін, оның жарқын идеяларының кемімес қуат-күшін акын тебірене толғайды.

Д. Әбілєвтің «Отты толқындар» поэмасы — «Таудағы ту» романының заңды жалғасы іспетті шығарма. Романда бейнеленген Уваров пен Есей «Отты толқындар» поэмасының да тұлғалы кейіпкерлері екенін былай қойғанда, бұл екі шығарманың тақырыбында да, идеялық сарыны мен әлеуметтік тынысында да сабақтастық, ажырамас тұтастық бар.

Поэмала Днепр өзенінде атакты су электр станциясын салған, табиғат стихиясын бағындырған совет адамдарының өмірі мен жасампаздық еңбегі жырланады.

Біздің тамаша дәуіріміз, Маяковскийдің сөзімен айтқанда «Жүрек пен шындық ұласқан», Отан өмірі мен «жүрек өмірі» ажырамастай болып тұтасқан дәуір акындарымыздың алдынан шексіз творчестволық мүмкіндік ашты. Бұл жанрдың дамып, жетілуіне, оның жана қырларының ашылуына да айрықша ықпалын тигізді. Әрине, романға қарағанда поэманың өмір шындығын қамту шеңбері басқа. Бірақ бұған қарап поэма жанрының реалистік сыйпаты аз, кемшін деп тұжырым жасауға еш болмайды. Поэмала сюжет желісінің, характерлер сыйпатының реалистік айқындықпен берілуін қалаған Пушкин мен Белинскийдің талабы зорпелей де ескірген жоқ, қайта біздің уақытымызда бұрынғыдан да терең мән-мағынаға ие болды.

Поэмала лирикалық саз басым болуы мүмкін. Бірақ ол лирикалық өлең емес. Сондай-ақ оңда эпикалық серпін күшті болып та келеді. Бірақ ол роман не повесть емес. Пушкин, Лермонтов, Некрасов, И. Жансүгіров, С. Мұқановтың поэмаларында жоғарыда аталған қасиеттеріне

қоса драмалық тегеурін де күшті сезіледі. Бұл — классика. Ақындарымыздың қай-қайсысы да мұндай үлгіден үйренуге тиіс және үйреніп келеді де. Д. Әбілев те «Отты толқындар» поэмасын осылайша үйренудің, ізденудің арқасында татымды туынды етіп шығарды.

«Отты толқындар» поэмасында тартыс түйіндері шырқау шегіне жеткізіліп берілген деп айту қиын. Бірақ онда эпикалық кендік пен лирикалық саз шеберлікпен қиюласып, астасып берілгені даусыз. Патетикалық лептілік пен нәзік те шыншыл күйлер поэманың бүкіл өнбойына алмасып келіп отырады. Поэмада лирикалық шегіністер мол. Бірақ бұл оқиға өрбүйін бәсеңсітпейді, баяулатпайды. Ақын поэманың бас жағында берілген экспозициядан кейін оқушыны оқиға желісіне бірден араластырады, шығарма кейіпкерлерімен таныстырады. Олар — Есей, Катерина сияқты жас инженерлер, құрылыс бастығы Москвин және басқалар.

Москвин образы ақынның елеулі табысы саналуға тұрарлық. Жасампаз еңбектің қызығына берілген Москвиннің алуан қырлы сипатының бір сыры мынадай:

Бастау үшін жана ырақты жырларды,
Бұрғы ұшымен тындап терен сырларды,
Жер үстіне шығарады Москвин
Жер астына түсіп кеткен жылдарды.

Жақсы айтылған, тапқырлықпен айтылған. Оқушы оның мінез-құлқын, рухани дүниесін де жақсы сезеді, оған іш тартпай қалмайды:

Басқалардан көргін кеп өз жақынын;
Іс бастарда тындағын кеп ақылын;
Қаталдығын қайырымындай сезсең,
Жаның сүйіп, ой-қимылы батылын.

Кең пейілі кейде мүлде тым қатал,
Кейде саған бір-ақ ауыз тіл қатар.
Кейде саған ән салдыртып, сырласып,
Жабырқасаң — жанашырын жұбатар.

Москвиннің Есейге жасаған қамқорлығы мен көмегі, оның өз жүрегімен өзі сырласуы, ішкі тебіреністері поэмада зор көркемдік қуатпен бейнеленген. Есейдің жобасын мақұлдап, Алтайда Ульба су электр станциясын салуға бекініп, бел буатын да — осы Москвин.

Бас инженер Собко мен Катерина образдары да шы-

найы дәрежеде жасалған. Мәселе бұл кейіпкерлердің ұнамды қалыпта алынуында ғана емес. Ақын солардың тұлғаларын толымды, жанды етіп көрсету үшін қажетті көркемдік бояуларды таба алған, олардың психологиялық сыйпатын да терең ашқан.

Поэманың басты кейіпкері — Есей. Оның тағдыры оқушыға ақынның бұрынғы шығармаларынан да таныс. Ал, «Отты толқындар» поэмасында ол үлкен маман; өз ісіне, халық пен Отан мүддесіне қалтқысыз берілген патриот ретінде көрінеді. Есей мен Катяның арасындағы сүйіспеншілік те поэмада әсерлі жырланған.

Есейдің бойында үлкен арман бар. Ол — туған жері Алтайда қуатты электр станциясын салу. Сол арманына Есей жетпей тынбақ емес. Ол болашақ станцияның жобасын, моделін жасайды. Есей мінезінің осы сыйпатын, оның арманшылдығы мен табандылығын ақын көркем де айқын әрі композициялық тұтастықта алып көрсеткен.

Поэмада Есейдің патриоттық ой-сырлары, сүйіспендік сезімдері, туған жерге деген сағынышы ақындық тебіреніспен, әсерлі жырланған. Оның бойында бұдан басқа да абзал қасиеттер мол. Ол:

Өзім үшін деуден аулақ уысын,
Қазақ қана деуден аулақ туысын.
Сызықтармен толтырады інірде
Қызметтен тыс мезгілінің қуысын.

Шығарма Есейдің дос-жарандарымен қоштасып, өзінің арманына, туған жеріне бет алып аттануын суреттеумен аяқталады. Сондықтан да ақын өзінің сүйікті кейіпкеріне, өзіне етене жакын тақырыпқа тағы да оралады деп үміт етуге әбден боларлықтай.

«Отты толқындар» поэмасы көркемдік жағынан мінмүлтіксіз де емес. Ең алдымен онда шығарманың ұзына бойына созылып жатқан өзекті тартыс жоқ. Катерина мен Тимоша, Павло мен Тимоша арасындағы кірбең драмалық өткір түйінге жетіп тарқатылмайды. Сондықтан поэмадағы бұл тартыс желісі табиғи сыйпат таппаған, жасанды сезіледі. Бұл ретте Москва әдебиетшісі Бабовичтің: «Расын айтқанда, Тимошко сәтсіз суреттелген, талантты ақын Дихан Әбілевтің суреткерлік мүмкіндігінен сырт қалған» — деген пікіріне қосылмасқа болмайды.

Сондай-ақ поэманың Павло тәрізді кейіпкерінің образы да толыққанды болып шықпаған. Поэмада оның сыйпаты жоқ, сыйпаттамасы ғана бар.

Бірақ поэманың бағыты, қасиеті мұндай жекелеген кемшіліктерінде емес, оның негізгі идеялық пафосында, әсер етушілік қуатында. Поэма орыс тіліне аударылғаннан кейін де лайықты бағаланды. Әдебиетші Бабович поэманы жоғары бағалай келіп, былай деп көрсетті: «Отты толқындар» поэмасын жазу үстінде акын елеулі, түбегейлі еңбек еткендігін, шығарманың поэтикалық әсерінің күшін, оның творчестволық құралдарының қанаттылығын мойындау керек. Біздің қазақ жолдасымыздың бұл тамаша шығармасы осынау қасиеттерімен жарқырап көрінеді... Жасым келіп, қартайған шақта қазақтың ұлттық поэзиясының мөп-мөлдір қайнарынан сусындағаныма мен шын көңілден қуанамын».

Д. Әбілев поэма жанрында соңғы жылдары әсіресе жемісті еңбек етті. Оның биыл жарық көрген, «Жүрек жырлайды» атты жинағына үш поэма енген. Олар — «Шолпан», «Махаббат тағдыры», «Тасбұлақ» колхозында.

Акын «Шолпан» поэмасында қыршынынан үзілген талантты акын Шолпан Иманбаеваның өмірі мен тағдырын баяндайды. Балғын жас шағында күндік өмірдің азабы мен күйнішін бастан кешіріп, совет өкіметі арқасында азаттық алып, сауатын ашқан, жана дүние орнату жолындағы күреске жалынды жырымен үлес қосқан ақынның талайы мен тағдырын шыншыл жыр тіліне түсіру оңай емес. Д. Әбілев осы қиындықты баурай алған. Ол Шолпанның нәзік те сырлы, бірақ жан қуатына толы бейнесін шынайы дәрежеде жасаған.

Поэманың композициялық құрылысы өзгеше. Дастан науқас меңдеп, өлім алдында жатқан Шолпанның ауыр халін баяндаудан басталады. Ажал сарыны кенет үзіледі. Бұдан әрі Асылдың еске түсірген тебіреністері арқылы Шолпанның білімге талпынған, жыр қызығына берілген шақтары жырланады.

Екінші бөлімде оқудан оралған Шолпанның ауылда жаналық нұрын шашуға жан сала араласқаны, жана дүниенің жаршысы болғаны шынайы көріністер арқылы суреттелген. Акын қызына деген халықтың ыстық ықласын, таза махаббатын автор тебірене жырлаған.

Поэма басталғандағы көрініс екінші бөлімнің соңында тағы да елес береді.

...Өмірге Шолпан келгелі —
Күн көзін алтын перделі
Жиырма екі ғана айналды
Жұмыр жердің шенбері.

Жиырма екіге ғана келген қыршын жас қиылғалы жатыр. Неліктен бұлай? Дастанның үшінші бөлімінде осы сұраққа жауап беріледі. Шолпан сияқты үздік талант иесін жастай құратып, ерте солдырған — күндік өмір, махаббатты малға сатып алып, саудаға түсіретін зорлықшылдар, ескі заман Совет дәуірінде Шолпанның өзі де, жыры да азат болды. Бірақ өгей өмірдің өксігі дұшар қылған дерт оны ажал құшағына берді. Поэма осылай аяқталғанымен, онда өршіл қасиет мол.

Мүмкін емес жыршы жүрек тоқтауы,
Ақын керек! Өлең керек өмірге!

Сондықтан да Шолпан өлмейді. Оның жырлары халқына керек және әрдайым халықтың жүрегінде. Ал Шолпан өмірінің жалғасы оның сол ойлы да өршіл жырларында. «Шолпан» — ақын туралы, жыр туралы дастан. «Тасбұлақ» колхозында» атты драмалық поэмасын ақын алғаш 1957 жылы жазған еді. Кейін қайта оралып өңдегенде автор поэманың өлеңдік қасиетін ширатып, көркемдігін шынықтыра түскен. Поэманың тілі де таза әрі ойнақы. Онда характерлері дараланып жасалған, өзара қарым-қатнастары қызғылықты түрде ашылған бірнеше кейіпкер бар. Сауытбек, Раушан, Бадыр бейнелері атап айтуға да, көңіл аударуға да тұрарлық. Бірақ поэманың оқиға желісінде шұбалаңқылық, жасаңдылық бар. Оның үстіне тартыс түйіні, соның шешілуі де шынайы сыйпат сездірмейді.

Драмалық поэма — қазақ поэзиясы үшін тың жанр. Бұл салада талаптанып жүрген ақындарымыз санаулы. Сондықтан Д. Әбілевтің талаптануын, бұл саладағы ізденістерін тек құптауға керек. Оның үстіне ақындар бұл жанрдың қиындығы мен ерекшеліктерін баурау, Пушкин, Лермонтов жазған драмалық поэмалардың құлашы мен серпініне ұмтылу қажеттігін әрдайым ескеруге тиіс. Д. Әбілевтің соңғы жылдардағы поэмаларының ең таңдаулысы — «Махаббат тағдыры». Көркемдік қасиеті жағынан «Махаббат тағдыры» ақынның бұрынғы поэмаларының барлығынан да жоғары тұр деп үзілді-кесілді айтуға әбден болады.

Қазақ совет поэзиясында Ұлы Отан соғысы тақырыбына арналып жазылған поэма сан жатыпша аз емес. Бірақ сол бір кезеннің қатал да қайсар шындығын, совет адамының батырлық қимылын, әсіресе рухани ерлігін, өршіл тұлғасын шынайы бейнелеген поэмалар саусақпен санарлық қана. Бұл орайда Қ. Аманжоловтың «Абдоласы» мен Ж. Молдағалиевтің «Жыр туралы жыр», Х. Ерғалиевтің «Әке сыры» поэмалары ең алдымен аталады. «Махаббат тағдыры» жайында пікір айтқан кейбір авторлардың поэманы осындай шығармалардың қатарына қосуы әділ де тура.

Белинскийдің айтуынша, шын мәнісіндегі көркем, реалистік поэма «...өмірді оның асқақ мезеттерін де қамтып суреттейді». Жоғарыда аталған поэмалар ұлы сыншының осынау талабына меңзес дәрежеде жазылған. Оларда өмір шындығы, кейіпкерлердің тағдыры мен ой-армандары әрі шыншыл күйінде, әрі зор көркемдік тұрғыға көтеріліп, асқақтата жырланған.

«Махаббат тағдыры» негізінен Ұлы Отан соғысы кезеңінің оқиғаларын қамтиды. Ал оның өзекті тақырыптары — адал, айнымас махаббат пен Отанға деген таза сүйіспеншілік. Бұл — бүкіл әлем әдебиетіне ортақ әрі мәңгілік тақырыптар. Осы тақырыптарды қазақ совет ақыны біздің замандастарымыздың тағдыры арқылы әрі өз дәуіріміздің озық көзқарасы негізінде жырлайды.

«Шолпан» поэмасындағы сияқты «Махаббат тағдырында» да ақын қарама-қарсы бояуларды, қарама-қарсы ситуацияларды шебер қолданған. Поэма шат-шадыман той-думанды суреттеуден басталады. Өмірін қосқан екі жастың қуанышты салтанаты. Қыз әкесі екі жасқа ақ тілегін айтпақ. Сол сәтте Жанна аһ ұрып, талықсып кетеді. Сөйтіп, ақын салған жерден ширыққан драмалық өткір түйінге меңзейді. оқушы назарын еріксіз баурап алады. Шығарма композициясын осылай құру арқылы автор шұбалаңқылыққа бой алдырмай, ойлы ықшамдыққа, тұжырымдылыққа ұмтылған.

Поэмада совет адамының тағдыры Отан тағдырымен ұштастырыла жырланған. Бұл әсіресе Баубек образына жанасты. Жас жазушы Баубек Бұлқышев Ұлы Отан соғысының ай-күндерінде патриоттық публицистикасымен жақсы танылғаны аян. Қасиетті жерімізді, халқымызды жаудан қорғау жолында Баубек қаза тапты. Оның өмірі қандай жырға болса да лайық. Бірақ «Махаббат тағ-

дырындағы» Баубек прототиптің жалаң көшірмесі емес. Ақын өз қиялымен кейіпкерінің образын өсіріп, тұлғаластыра түскен.

Шығармасын жоғарыда айтылғандай өзгеше бастаған ақын Жаннаның өткенді ойлап тебіренуі арқылы лирикалық шегініс жасайды. Дастаннан соғыстың алдындағы бейбіт өмірдің жанға жайлы лебі ескендей болады. Баубектің Жаннаға деген ішкәр сүйіспеншілігі суреттелетін шумақтар да оқушы жүрегін терберлік дәрежеде.

Ақын Баубектің соғыстағы бейнесін, оның патриоттық ой-толғаныстарын, ерлік мінезін әсіресе нанымды әрі көркем түрде жырлаған:

Жигандай әлем қаһарын бойға,
Бұрқайды толқын, тулайды өзен.
Лейтенант Баубек шомады ойға,
Шулайды құстар, шулайды өзен.

Астында айдын, үстінде аспан,
Көпір тұр әсем аркасы биік.
Мұнда да туган жана бір дастан,
Жатқанда жастар табанын құйып

— Бұзындар.— дейді штабтан бұйрық —
Өтердей болса немістер егер.
Бұзамыз қайтіп көзіміз қнып,
Жан едік біздер жасауға шебер!

Жок! Бұзуға бара алмас қолым!
Сақтауым керек көпірді аман.
Кесуім керек дұшпанның жолын.
Достарым, міне осыған панам!

Мұнда Баубектің туған жерге, өмірге деген құштарлығы жақсы жырланған. Баубек поэманың бүкіл өнбойына дерлік көрініп отырады. Оның Жаннаға жолдаған хаттарынан, ішкі тебіреністерінен үлкен жүректі адам екендігі терең сезіледі. Д. Әбілев Баубек образында парасатты, ойлы адамның, отаншыл азаматтың, жарық дүниені, өмірді, елі-жұртын емірене сүйген жалынды ақынның жарқын тұлғасын шынайы күйінде бере алған.

Поэманың екінші кейіпкері — Жанна. Сүйген жігітінің қаза табуы Жаннаны қатты күйзелтеді. Күткен үміті үзілген, арманына жете алмаған Жаннаның жас ғұмыры зая кеткендей. Соғыстың аты — соғыс. Ол құрбандықсыз болмақ емес. Сондықтан да майданға аттанар

алдында Баубек Жаннаға мынадай шын сырын, жар сырын шертеді:

Сүйгенім менің, қимасым менің,
Кім білер, мүмкін, қайтыптан тірі
Жоқ қылар, мүмкін, қорғасын — өлім,
Қалмасын сенде нәсімнің кірі.

Пәк жаныңмен бақыт тап сонда,
Бір ғана келіп бейітіме көрін.
Қатерді айтам, тек қапа болма,
Сау қайтар, сәулем, сүйгенін сенің.

Бұл — өмірді, махаббатты ардақтай білетін, нағыз тура да шыншыл жүректің, үлкен жүректің үні. Өміріне, тағдырына Жаннаның өзі де ойлы, парасатты түрде қарай біледі.

— Жұртым-ау, сырым бір саған аян,
Ішімде оқ бар соғыстан қалған.
Қозы үшін өлер емеспін Баян,
Емеспін Жібек құлайтын жардан.

Бірақ Баубектен кейін тағы да жар сүйе, өмірлік серік табу оңай емес. Жанна өз басынан небір сезім дауылдарын кешіреді. Жаңадан тапқан жарын Баубекті сүйгендей сүйе алармын ба деп те қобалжиды.

Поэма үзіліп қалған тойдың қайта жалғасуын. Жаннанын сүйген жігітіне қол ұсынып, сөніп қалған, жоғалған махаббатын қайта тапқанын баяндаумен аяқталады. Сөйтіп, сөнген үмітті, үзілген арманды, ашы қайғыны баян еткен дастан өмірдің ғажайып қуаты мен нұрлылығын, айнымас та адал махаббаттың ұлылығын ардақтайтын тамаша жырға ұласады. Сондықтан да поэма өмір сүре білуге және оны қастерлеп сүйуге үндейтін өршіл пафосқа, оптимистік рұхқа толы. Мәңгілік тақырыпты, махаббат тақырыбын тың суреткерлік серпінмен толғаған, оны заманымыздың озық ойы тұрғысынан шешкен, зор көркемдік биікке көтере жырлаған ақынның поэзиямызға лайықты үлес болып қосыларлық шығарма тудырғанына сүйсінбеске әлдіміз жоқ.

«Махаббат тағдыры» Д. Әбілевтің ақындық палитрасы жана да жарқын бояуларға қаныққанын көрсетті. Ақынның поэмаларының кейбірінде ұшырасатын көпсөзділік, шұбаланқылық, шындыққа үйлесе бермейтін теңеулер, жасандылық табы «Махаббат тағдырында» жоқ. Таби-

ғат көріністерін суреттегенде, кейіпкерлерінің жан толқындарын, сыр-сезімдерін жырлағанда ақын өзінің шеберлігі шыңдала түскенін, биіктеп өскенін анық аңдатады. Ұрыстың алдында тына қалған төңіректің ақын кейіпкердің сезінуі арқылы берілген сыйпаты мынадай:

- Төңірек тыныш, шықпайды дыбыс,
Тына бір қапты манғы жел де.
Үйрек пе, қаз ба — жараты бір құс
Зарлайды қазын жуынып көлге.

Ал соғыстан кейін қайта жасарып, жаңғырып келе жатқан туған жердің келбетін, тынысын ақын мына бір жолдар арқылы тамаша елестетеді:

Шайқаста қанмен, шуақта термен
Тірілген қайта табиғат өніп.
Қағады құлм тыныштық деммен,
Көзінен күннің жаңа нұр еміп.

«Махаббат тағдырында» ақынның шеберлігі ұшталғанын, оның поэзиясының реалистік қасиеті тереңдей түскенін танытатын мысалды көптеп келтіруге де болар еді. Бірақ мұның қажеттігі бола қоймас деп ойлаймыз. Д. Әбілентің бұл поэмасы жұртшылық назарын мол аударып, алуан түрлі пікір тудырды. Белгілі сыншы М. Қаратаев «Толғантпаған тағдыр» деген мақаласында өзінің поэманы оқығанда толғанбағанын сездіріп, дастан «күткен ойымыздан шықпады» — деп түйді, оны сәтсіз туындыға жорылды. Кейінірек Е. Ысмайылов пен Қ. Бекхожиннің мақалаларында М. Қаратаевтың пікірі ағат деген тұжырым жасалды. Рас, «Толғантпаған тағдырдың» авторы өзінің пікірін тым үзілді-кесілді айтқан. Көрнекті сыншының көрінеу тенденция ұстағаны бұдан байқалмай қалмайды. Оның үстіне М. Қаратаев мақаласының асып айтылған жәйттеріне карамастан, ақынға пайда келтіргені де күмансыз. М. Қаратаев «Махаббат тағдырының» журнал, газет бетінде жарияланған нұсқасына талдау жасаған еді. Ақын поэмасын жеке кітап етіп шығарар алдында сыншының бірталай пікірін ескерген, поэманы өлендік жағынан жетілдіре түскен, әсіресе шығарманың аяқталымын жаңадан қосқан, тың шешім тапқан. Бұл поэманың идеялық тынысын әсіресе кеніте түскен.

«Махаббат тағдырының» кемшілігі жайында сөз болған-

алдында Баубек Жаппал мынадай шығарманы сырын шертеді:

Сүйгенім мені қымасым,
Кім бопар құмал, ақыл,
Жоқ қылар, мүлде,
Қалмасын сені.

Нәзім
Бір

Бұл

сы
шыға,
нін: «Ди,
толқытарлы,
лермен шертілс

Дихан Әбілевтің бүкіл творчестволық жолын терең барламай, жай шолып өткеннің өзінде де бір нәрсені даусыз аңдаймыз. Ол — ақынның ізденгіштігі, өз өнерін жетілдіре, ұштай түсуге ұмтылып отыратындығы. Бұл салада оның тая соққан мезеттері де баршылық. Бірақ тапқаны одан да көп, одан да басым. Д. Әбілевтің әр кезде жазған лирикалық өлеңдері мен поэмаларының тандаулылары ең қатал, ең әділ сынға—уақыт сынына төтеп беріп, жыр құмар жұрттың рухани серігі, сырласы болып келеді. Сондай-ақ, сол өскелең талаппен, уақытпен бірге ақынның өзі де, оның жыр жарағы да өсу үстінде. Ақынның поэзиясы болашақта да уақыт рухына орайлас, меңзес өрістеп өрбитіндігіне біз сенеміз.

МАЗМҰНЫ

Ақын мұрасы	3
Майталман лирик	26
Ерлік пен елдік жаршысы	32
Жемісті жол	51
Жанр табиғаты	72
Қаһарлы күндер тынысы	93
Асқақ дауысты ақын	108
Самал жел	125
Достық дебіз	131
Шығарма және оны өңдеу	147
Іс-әрекет пафосы	168
Абайды қайта-қайта оқығанда	180
Жазушы және герой	197
Еске келілі	255
Жыр алыбы	269
Жылдар-ойлар	284
Махаббат хикаясы	301
Уақыт және поэзия	305

Нұркатов Айкын.
ИДЕЯ ЖӘНЕ ОБРАЗ. Әдеби-сын ма-
қалалар. Алматы, Қазмемкөркемәдеббас, 1962
324 бет.

А. Нуркатов

ИДЕЯ И ОБРАЗ

Сборник литературно-критических
статей

(на казахском языке)

Издание Казгослитиздата — 1962

Редактор А. Лекеров
Художник К. Егизбаев
Худож. редактор Н. Гзев
Техн. редактор П. Вальчук
Корректор Н. Исмаилова

Сдано в набор 24/XI-61 г. Издат. № 391.
Подписано к печати 14/II-62 г. УГ00417
Бумага 84×108¹/₃₂ = 10,125 п. л. — 17,01 усл.
п. л. (Уч.изд. 17,89 л.). Тираж 6350 экз.
Цена 87 коп.

Алма-Ата, типография № 1 Главиздата
Министерства культуры Казахской ССР.
Заказ № 2139.